







H. lit. p. 383-2

<36629936020012

<36629936020012

Bayer. Staatsbibliothek

H. L. P. B. S. B.

(2)

CONSPECTUS  
HISTORIÆ  
UNIVERSITATIS  
VIENNENSIS,

Ex antiquis, veteribùsque Documentis  
erutæ,

*Et*

Ab An. M. CCCC. LXV.

*Usque*

Ad An. M. D. LXV.

Deductæ,

*Seu*

SÆCULUM II.

A P. Sebastiano Mitterdorffer,

à Soc. JEsu, Philosoph. Viennens.


Professore

*Conscriptus & editus,*

An, Incar, Dom, M, DCC, XXIV.

217044200  
ALSO  
CENTRAL  
FISK 1917

ALSO



ALSO

ALSO

ALSO

ALSO

ALSO

ALSO



An. 1465.



**S**ublato è vivis superiore anno Pio II. Pontifici, Successor à Cardinalibus datus est Petrus Barbus, Venetus, qui primò se Formosum dici voluit; sed mutato mox, Cardinalium suafu, animo, Marci, demum Pauli II. Nomen assumpsit. Cujus, ut Spondanus ad annum præsentem habet, sunt inventa Cardinalium ornamenta, & rubri Bireti usus; ut alienatos eorum animos deliniret: Pontificiam quoque auxit magnificentiam, paratâ cum tribus coronis Tiarâ gemmeâ (vulgò Regnum vocant) centum viginti millibus nummum æstimatam.

Interea Viennæ non levis Controversia Universitatem occupabat. Erat jam inde à Rudolpho IV. Collegiatæ ad D. Stephani Ecclesiæ Fundatore statutum, ut Canonorum pars dimidia ex Ducali Artistarum Collegio, habitâ senii ratione, assumeretur. Reductis deinde ad minorem numerum Sacerdotiis, ab Alberto III. ordinatum, ut de octo *Canonicatibus*, & *præbendis*, quoties vacarent, disponi & provideri pro Magistris ex Collegio prælaudato debeat. Cùm itaque anno hoc ex obitu Magistri Nicolai de Puttern vacaret inibi Sacerdotium, illud collatum est Magistro Joanni Grössl de Titmaning AA. Magistro, & Theologiæ Doctore, qui ex numero duodenario Collegialium Artium amplius non fuerat. Gravius tulit Facultas privilegia sua infringi. Res ad Universitatis consilium primùm delata, à quo id datum responsi: ageret Facultas cum Doctore Joanne, ut sponte suâ præsentationi cederet. Verùm ubi ille

A

id

id recusasset, idque unum adpromitteret; daturum se operam apud Pataviensem Episcopum, ut ejus intercessione proximè vacaturus Canonice locus uni ex Artistis in Ducali Collegio conferretur; ad Cæsarem est recursum, misso Neostadium Andrea de Pottenbrun, Artium Magistro, ac Collegiali, cui Canonicatus compete-  
 bat, cum libello supplici, cujus tenor in lib. 3. Act. Facultatis AA. exstat. Perlectis Cæsar literis, auditò-  
 que coràm Facultatis Oratore Andrea, *id demùm*, ver-  
 ba sunt Actorum: *per Reverendissimum in Christo Pa-*  
*trẽ Gurcensem Præsulem, suum Vice - Dominum acce-*  
*ptum est responsi: quòd vellet Collegiales Artistas conservare*  
*cum illo Privilegio Canonice, & solum vellet recipere de Col-*  
*legio juramentum, quòd aliò modò recturi sint supposita sua,*  
*quàm hætenus fecissent. Item quòd sua Majestas considera-*  
*ret Facultatis AA. affectum adversus eum, & secundum hoc*  
*vellet etiam eam gratiosè imposterum conservare. Neque*  
*ulteriùs aliquid à Cæsare est impetratum.*

Alia jam anni initio ad Fridericum, tum Neostadii  
 aulam habentem, instituta est Viennensium legatio,  
 eam ob causam; quòd molitices novæ à nonnullis  
 civium recens tentatæ metum incussissent, ne pauco-  
 rum perfidia bonis quoque exitio esset. Eam in lega-  
 tionem Cives ab Universitate Socios Oratores exorant:  
*Habita igitur in die Scholasticæ, ut laudata Acta recensent,*  
*est Congregatio Universitatis, summo manè post pulsum Pri-*  
*marum ad audiendam petitionem quamdam per Magistrum*  
*Civium nomine totius Civitatis Wiennensis ad D. Rectorem,*  
*& Officiales suos factam: quomodo nempe civitas peteret U-*  
*niversitatem ad mittendum cum spiritualibus, & omnibus*  
*artificibus, & civibus ad impetrandum majorem favorem,*  
*gratiam, & protectionem prædictæ Civitatis, & piorum, à*  
*Domino Imperatore, quòd civitas in magnâ constituta esset*  
*angustiâ. Et conclusum fuit, quòd aliqui essent mittendi.*  
 Ivère igitur Ecclesiastici Ordinis Primates, Universita-  
 tis Deputati, ex Senatu Consul, & delecti primæ digni-  
 tatis viri; Opificum item decuriones, aliique cives  
 non

non pauci; quibus veteres offensas, & novos paucorum motus condonari orantibus, Cæsar per Antistitem Pataviensem respondet: omnium se eis gratiam facere; & si imposterum in officio permanferint, eò erga illos animò futurum, quò paucos ex majoribus suis Austriæ Principibus fuisse crederent.

Non ex integro tamen Fridericus à Viennensibus res suas tutas ratus, maximè Wenceslao quodam cum externi militis cohorte Pottendorffium per eos dies invadente, ac Sigismundo Comite à Pölsing Austriam latrociniis percurrente; æstate igitur jam adultâ Ernestum Saxonem, Pataviensem, & Gurcensem Episcopos, aliòsque ex Consilio suo ad Viennenses legat, iis-que coram, ubi in palatii area omnes Civitatis ordines à jurejurando, quò se Sigismundo Archiduci obstrinxerunt (initis enim pactis Sigismundus suas in Austriam partes Friderico annò Superiori ab obitu Alberti cesserat) liberi pronuntiantur, Friderico Cæsari, & hæredibus perpetuum fidei Sacramentum renovant.

Et si superiore jam An. 1464. ut Schönleben ex quodam MS. recenlet, vitam finièrit egregius vir *Thomas Ebendorffer de Haslbach*, quòd tamen gratam ejus memoriam præclara viri in Universitatem nostram merita postulent, eidem isthlc parentamus. Artium is erat in Archigymnasio nostro, & Theologiæ Professor eximius, zelosus in Bertoldstorff Plebanus, & ad S. Stephanum Canonicus, atque Monialibus ad S. Jacobum à conscientiiis; tertium Universitatis Rector, primarius Legatus Academicus ad Concilium Basileense. Arguit eum Sixtus Senensis prolixitatis: Et Trithemius: *Cum esset, inquit, Ordinarius S. Theologia Lector in Gymnasio Wiennensi, Uno & viginti annis in Isaiam Prophetam legens, ad finem primi Capituli non pervenit.* Quibus verbis, quàm palmarem viro optimè merito injuriam fecerit, satis, superque ejus in Isaiam commentationes loquuntur; quarum si aliquas oculis ipsi perlustrassent, eundem haud dubiè ad caput us-

que sextum decimum Isaiaë scriptionem deduxisse intellexissent. Reliquit præterea non pauca alia monumenta, quorum nonnulla Possevinus recenset. Inter eruditos ejus labores maximè celebrandum *Chronicon Austriae MS.* quod ex Facultatis Philosophicæ Bibliotheca cum Collectore Scriptorum Austriacorum nuper communicatum, publici juris faciendum inaudii. Quantæ vir autoritatis in Concilio Basileensi fuerit, quantæ apud Fridericum Cæsarem, abunde ex iis, quæ parte 1. Hist. Universitatis memorata sunt, elucescit.

## An. 1466.

**P**Aulus Pontifex non eo in Georgium Bohemiæ Regem animo, quo Pius II., eundem anno hoc, die Cœnæ Domini, quodd contra juratam nuper fidem neque Basileensium Decretis acquiesceret, & Hussi dogmata foveret, sacrorum communione exuit, fulmine Apostolico iis, qui ei fidem, & obsequium præstarent, intentato. Affixa est Pontificis sententia in templorum valvis Olomucii, Wratislaviæ, Brunæ, & alibi. Viennæ etiam Crucis commilitum prædicatum, longæque peccatorum veniæ arma in hæreticum, ut literæ Pontificiæ eum vocabant, sumentibus, indultæ. Concivit isthæc denunciatio non paucorum ex Academicis nostris animos, ita Actis Philosophicis referentibus: *Retulit 25. Julii Decanus desiderium quorundam cruce signatorum: quomodd nempe præcedenti die Magister Leonardus de Valle Bergonensi cum pluribus Studentibus, & eorum Capitaneis, volentium ire contra damnatos Bohemos, instantius, & devotius petivissent suffragium in hoc sancto negotio. Qua petitione ipsorum collaudatâ conclusit Facultas, quod in communi 20. fl. Hungaricales deberent eisdem dari.*

Ne antehac Georgius sacris interdiceretur, Fridericus potissimum, quodd ejus amicitia, & subsidio domesticis nuper in turbis uteretur, intercesserat. Cæterum nemo ad bellum Bohemo inferendum magis idoneus Pontifici visus, quàm Mathias Corvinorum è gente



gente Hungariæ Rex. Hunc igitur , re jam antea cum ejus legatis agitatâ , crebris literis admonet : ut qui secundis aliquot præliis Turcarum vires fregisset, hunc quoque in Ecclesiam Dei contumacem sibi debellandum sumeret: neque tam arctum affinitatis (filiam enim Georgii toro junctam habebat) esse vinculum, quod ab hoc tam sancto negotio eum absterreat. Ad-didit & Fridericus Mathiæ animos, ac spem subsidia-rii militis.

Hos sub annos in Archigymnasio nostro virtutibus æquè, ac literis excoluntur magna aliquando utraque in Republ. nomina. Petrus scilicet de Puseil primus deinde Neostadiensis Ecclesiæ, in Cathedralem à Friderico anno 1470. erectæ Episcopus. Georgius de Alten-öting suo tempore Antistes Lavantinus. Christophorus Schachner honesto apud Riedenses Bavarix locò natus, annò 1490. ut Hundius habet, Pataviensis electus Præsul. Wigileus Fröschl ex Nobili Bojorum familia, qui annò 1500. ab obitu Schachneri viduas Pataviæ infulas scientiâ, & virtute meruit. Achatius Sebriacher, subinde Tergestinis clarus infulis. Illustrissimi item Principes Georgius, & Sigismundus de Anhalt Comites de Ascania : quorum prior Illustrissimus Princeps in Universitate nostra anno 1471. Procuratoris munere ex natione Saxonica functus est.

## An. 1467.

**J**Am Inferior Austria à civilibus, externisque quie-ta erat turbis, cum Viennenses desiderium sui Prin-cipis, ab eo etiamnum tempore, quo à suis Viennæ obsidione cinctus tenebatur, alibi aulam habentis, ampliùs haud ferebant : Decreti igitur Legati, qui ad Cæsarem profecti orarent, ut qui Viennenses nuper in gratiam clementer recepisset, aulam quoque Viennam revocaret. Plurimum ad id momenti allaturum, cum non dubitarent Viennenses, si Universitas Oratores adjungeret : *Hinc propositum fuit, ajunt acta, in vi-*

*gilia Ascensionis Domini per D. Doctorem Magistrum Martinum Guldein, & alium Consulem, scilicet Honorium, D. Rectori, & suis Officialibus, ac aliis Doctoribus, & Magistris in Stuba Collegii Ducalis, quod Communitas, & Cives Wiennenses sequenti die, scilicet in festo Ascensionis, intenderent legationem solemnem, videlicet circa quinquaginta viros mittere ad Dominum Imperatorem, tunc existentem in Thermis, seu Baaden, ad intendendum; ut sua Imperialis Majestas se in praesentiarum constitueret in solita Residentia Principum Austriae, scilicet in Vienna. Optabant igitur nomine Vice-Magistri Civium persuadentes, ut etiam Universitas aliquos de suis mitteret ad illud idem impetrandum. Quocirca quatuor Facultates concluderunt: ut huic desiderio ad praesens annuendum esset: Et quidem imprimis ipse Rector Universitatis, & ex qualibet Facultate Magistri, nempe de Facultate Theologiae, Decanus M. Paulus de Mellico: Canon. Eccl. S. Stephani; & Thomas de Wulderstorff Vice Cancellarius Studii Vienn. & Canonicus S. Stephani: De Facultate Juris, Magister Alexius, Officialis Curiae Patavien-sis; & D. Ordinarius Magister Wolfgangus de Herzogburga: De Facultate Medicinae, Decanus, Magister Michael Schneck: De Facultate A.A. Decanus, & Magister Leonardus de Perching, mitterentur. Et per pluralitatem conclusum fuit, quod expensae recipiantur de arca Universitatis.*

Omissam tamen oportuit legationem, intellecto Caesaris itinere, quo ad indicta Lincium comitia properabat, ut Superiorem Austriam, etiamnum Procerum dissensionibus aestuantem, componeret. Quod cum pervenisset Caesar, conventu dilato, Ernestum Saxonem suum ex sorore Nepotem cum 400. equis Styram mittit, ei que ex suis Procerum quosdam adjungit, praecipue Georgium Volckendorffium, ab ejus Oppidi civibus fidei Sacramentum exacturos: Qui dum civium animos procurant; adest Georgius de Stain cum non contemnendis Bohemorum copiis, & expugnato Steyrdorffio in arcem cum 200. militibus intro-missus, multa in oppidanos perfidiae convicia effundit.

dit. Volckendorffius arduam defensionem prospiciens (nam cum milite suo, & fidissimis civibus in Parochiali templo sese communiêrat) interpositis honestis conditionibus Oppido cum suis excedit.

Inter hæc Imperii Principes Norimbergam conveniant ; eò Fridericus, quòd ob domesticos motus Lincii retineretur, Pataviensem Episcopum cum potestate miserat : à Pontifice aderat Laurentius Roborella Præsul Ferrariensis. Hic luculenta oratione Principes hortatus: uti pro suo officio, ac fide imminentes à Turcis, & hæreticis calamitates profligare adnitantur. Paratos se ad id responderunt Ordines ; ageret imprimis Pontifex, ut pace inter Christianos confirmatâ, suæ ditionis limites cum armis exire liceat. Legatus in id operam suam pollicitus, soluto conventu in Austriam contendens tumultuantibus Puechhaimio, Stainio, ac aliis ad se vocatis concordiam, & pacem cum Friderico suadet, obsequi nolentibus sacrorum usu interdicat.

Sacris hisce Nuntii Apostolici minis arma Cæsar junxerat. Renuntiatum enim copiarum suarum Ducem Udalricum Gravenekerum in tumultuantes ire jubet. Profectus ille cum exercitu, Styram aliquot dierum obsidione capit ; in inferiorem inde Austriam appulsus, Ibscum, vulgò Ipsum, aliâque oppida ab Austriæ Proceribus Bohemo adhærentibus inessâ, expugnat, frustra in subsidium Victorino, Georgii Podiebradii filio, advolante.

Hujus in bellicæ expeditionis sumptus Viennensi urbi exactio indicta ; quâ ut & Universitatem cives Viennenses involverent, eam variarum conspirationum ream ad Cæsarem detulêre. Consensu igitur Cæsaris à civibus imperatum : *Ut quivis ex Universitate de qualibet carrata musti Wiennam introducendi unum fl. solveret.* Lædi privilegia sua ad eò impunè Universitas indolens, communi consilio Legatos ad Gravenekerum adornat : Legatione functi, *ex ejusdem Gravenekeri responso, actorum verba recito, retulerant : quomodò quæ-*

*dam gravis depositio, & infamatio contra Clerum, & per consequens contra Universitatem facta fuerit per Magistrum Civium, & omnes Cives, pro tunc impetrantes consensum Domini Imperatoris ad hoc, ut Clerus similiter hujusmodi Steüram solveret. Famabatur etiam, quod laboraverint circa Imperialem Majestatem ad hoc, ut scriberet idem Domino Apostolico, impetrando rescriptum ad hoc, ut authenticè relatum Steüram Clero generaliter imponere posset. Quibus perceptis suarum Universitas partium esse duxit, non modò de objectis sese purgare criminibus, sed immunitatem veterem conservare; quod & missis ad Imperatorem Oratoribus prosperè effectum.*

Interea sub Septembris initium, prima scilicet illius mensis die, Neostadii obiit Eleonora Friderici Cæsaris Augusta Conjux, Eduardi Regis Portugalliæ filia, quinque prolium fœcunda Mater; Christophori nempe, Maximiliani, Helenæ, Cunegundis, & Joannis; è quibus tamen solum Maximilianus, & Cunegundis adultiorem ætatem attigère; ille Romanorum deinde Cæsar; hæc Alberto IV. Bavarix Duci desponsata.

Eodem hoc anno supremum clausit diem Gregorius Scheichl de Linz A.A. Magister, & Theologiæ Baccalaureus; cui vel inde memoriam debemus: quod manu suâ sanè pro illo sæculo eleganti plurimorum Academiæ nostræ Doctorum scripta vindicârit ab interitu, quorum non pauca extant in Bibliotheca Academica: his ipse addidit partum suum, sermones scilicet 10. in Pater noster, 15. de symbolo Apostolorum, 11. in Salutationem Angelicam, religiosus Commentator.

**An. 1468.**

**D**Um Mathias Hungariæ Rex adulto jam vere exercitum per Austriam in proscriptum Bohemiæ Regem movet, ac deditâ ultrò Brunâ, Spillbergam arcem obsidione cingit; Cæsar Fridericus sub initium Novembris res jam satis in Austria quietas, & Mathiæ fæde-

fæderi fidendum, ratus, suscepto in Italiam itinere pri-  
die Natalis Domini Nostri Romam venit; ubi eâ nocte,  
sacris Pontifice operante, Evangelium *de Edicto Cæsaris*  
*Augusti*, decantâsse fertur Sigismundi Imperatoris ex-  
emplô. Sedecim dies illic cômmodatus, domum re-  
diit. Itineris hujus causam votum esse dicebatur, quô-  
fese obstrinxerat, quando unâ cum Coniuge, & Archi-  
Duce Maximiliano Viennensi castro ante sexennium  
inclusus tenebatur. Erant, qui cum Pontifice de Bohe-  
miæ, Hungariæque Regno; nonnulli qui de expedi-  
tione in Turcam actum fuisse meminere.

## An. 1469.

**J**Acta quidem sunt An. 1461. Universitatis Fribur-  
gensis Brisgoæ initia ab Alberto VI. Austriæ Archi-  
Duce; anno tamen isto, quo literatorum Coloniae, &  
statuta ex Archigymnasio nostro Friburgum deducta,  
eidem suprema manus addita videtur. *Initiô siquidem*  
*anmi præsentis* (verba actorum sunt) *Viennam venit Ma-*  
*gister Conradus de Schorndorff Orator, instructus literis Cre-*  
*dentialibus ex parte Illustrum Principum, & Dominorum,*  
*Ducis Sigismundi Austria, & Caroli Marchionis in Baaden,*  
*nec non circumspectorum virorum, & Consulum oppidi Fri-*  
*burgensis in Brisgau, porrigendis Universitati nostræ; simulq;*  
*petiturus prænominatorum nomine copias Privilegiorum,*  
*Statutorum, & Ordinationum, tam Collegii, quàm Bursa-*  
*rum, & contuberniorum pauperum; Unum item Doctorem*  
*in Theologia; unum in Jure Canonico; item duos AA. Ma-*  
*gistros, in Theoria qualificados; adjiciens, quòd præfati Prin-*  
*cipes velent omnino suam Universitatem Friburgensem in-*  
*star Nostræ instaurare, eamq; filiam Nostræ subicere, spon-*  
*derentq; Doctoribus, ac Magistris certissima stipendia. Fuit-*  
*que utrumque tandem post multas prius Facultatum delibe-*  
*rationes Oratori adpromissum.*

Sub hæc accelerârunt iter Cæsaris, Româ reducis,  
novi in Styria motus, quorum Authores Joannes Stu-  
benbergius, Andreas Baumkircherus, & Joannes Pes-

nitzerus, ob non soluta stipendia : Cæsar in Provinciam redux suos eorum conatibus obviam misit ; obsessis illorum arcibus , levibûsque præliis fractis ; donec reliquorum Styriæ Procerum interventu res compositæ. Pacatâ Styriâ pridie Non. Decembris Imperator Fridericus Viennam eodem die , quo septem ante annos solutâ obsidione exierat , ingressus , insolitâ cum lætitiâ non Civium modò, sed & Universitatis ingenti plausu est exceptus.

Interea Mathias , demum Spillbergâ captâ , à Religionis Catholicæ Ordinibus Rex Bohemiæ salutatur ; à Silesitis advocatus , primùm Bratislaviam , dein totam Regionem in fidem recipit ; ac captum Victorinum Bohemiæ Regis filium secum in Hungariam abducit , Budæ per integrum biennium in libera custodia retentum.

## An. 1470.

**M**ors Georgii Bohemorum Regis , quam 22. Martij anno hoc , ut habet Roo contra Spondanum , obiit ; novos in Bohemia tumultus , & pro corona æmulos dedit. Ægrius enim ferebat Cæsar , se inconsulto, Mathiam Regios Bohemiæ titulos usurpâsse, ejûsque autoritate , dum Romæ abesset , excitatas in Styria seditiones , seditionûmque authores foveri. Ad Casimirum itaque Poloniæ Regem Fridericus legat Raphaëlem Lescininum Equitem Polonum in aula sua diu versatum , qui Cæsaris nomine Uladislauum Casimiri filium natu majorem ad Bohemiæ Coronam evocaret. Casimirus hoc nuntio exhilaratus , suos Viennam Legatos mittit , istoque certis conditionibus fædere , Fridericus per Legatos suos , Oratorésque Polonos indictis Cuthnæ comitiis , Bohemorum animos , voluntatésque ad Uladislauum inclinat.

Dum hæc circa Bohemiam : Fridericus de procurandis Cælitum honoribus Leopoldo IV. Austriæ Marchioni sollicitus , Oratores Romam destinat , acturos cum

cum Pontifice Paulo II. ut Austriæ quondam Principi & sanctitate vitæ, & miraculis identidem glorioso Divorum demum honores decernerentur. Cæptum jam est sacrum istud negotium A. 1357. juxta Spondanum, vel ex Bzovij Calculo An. 1358. per Austriæ Duces: sed ob belli injurias, rerumque vicissitudines jam amplius sæculo intermissum, hoc demum anno studiofius resumptum. Addidère literas suas Romam utraque ex Repub. Austriæ Proceres, & Cænobiorum Præfides: expetitæ quoque ab Universitate nostra per Reverendissimum Pataviensem literæ, quibus pondus piis votis apud Sedem Pontificiam adderetur. Nec deerat illa partibus suis, jam antehac in procurando Marchioni suo Cælitum cultu perquam studiosa; sequentis itaque tenoris epistola ad Pontificem exarata:

**Sanctissimo in Christo Patri, & Domino Paulo, Sacrosanctæ Romanæ, & Universalis Ecclesiæ summo Pontifici, Domino nostro gratiosissimo, devoti Oratores, Rector & Universitas studii Wiennensis.**

**Beatissime Pater, Domine Clementissime, obedientiam devotissimam ad pedum oscula beatorum.**

**Q**uemadmodum ad sanctitatem Vestram non nulli Prælati, aliiq; Domini in Ducatu Austriæ commorantes, communis vulgi, ut accepimus, rumore, ac famâ de vitæ sanctitate Divæ memoriæ Leopoldi, dicti pro tempore Marchionis, multiplicibus miraculis resurgentis, moti, pro ejusdem canonizatione preces porrexerunt; & Sanctitas Vestra rem ipsam quibusdam Venerabilibus Patribus examinandam cõmisit; cujus quidem commissionis executio clariùs in processu desuper habito habetur: itaque nos solius Dei gloriam, Universalis Ecclesiæ decus, & singularem sanctitatis Vestræ honorem, ac salutem inclyti Ducatûs Austriæ, Diocesis sanctæ Ecclesiæ Pataviensis, purè ex intimis  
piscen

*visceribus desiderantes, fiducialiter audemus provolutis genibus, totis sanctitati Vestrae votis humillimè supplicare, quatenus hujusmodi Canonizationem de Vestrae solita benignitatis clementia, misericorditer ad finem perduceret optatum, ac devotæ petitioni nostræ aures paternæ pietatis salubriter inclinare dignetur: quam & Altissimus Sanctitati Vestrae divinitus inspiret, conservans Eandem Regimini Ecclesiæ suæ sanctæ feliciter, & longevè. Datum Viennæ 23. die Mensis Martij, Anno Dñi 1470.*

Quantum hæc cum Universitatis, tum Austriæ Procerum, ipsius præprimis Cæsaris Comendatitiæ apud Pontificem valuerint, inde in promptu est, quod demum annò 1485. ut dicetur, Divus Marchio inter cælitales sit relatus.

Sub hæc indixerat Patavij Synodum pro tuenda, conservandâque Cleri disciplina Udalricus Patavienſis Antistes, Dominicâ tertiâ post Pascha cogendam. Ad quam ut Universitas nonnullos mitteret Doctores, per Officialem suum, Magistrum Alexium Tumer desiderabat: *Habitâ igitur 26. Aprilis, feriâ 2dâ in crastino Annuntiationis, Congregatione deliberatum est, an sint aliqui mittendi, & cujus expensis? Facta deliberatione delecti sunt ad Synodum Magister Paulus de Mellico, & Joannes Harrer, ea tamen conditione, ut expensæ non ab Universitate penderentur.*

Recusâsse Rectoris munus, ad quod in mutatione autumnali electus erat, Pancratium Creüzer de Traismauer Medicinæ Doctorem, acta Artist. edocent. Rogatus, ne electioni intercederet, ut candida, & aperta illa erant tempora, die altero causas, ob quas Rectoratum à se deprecabatur, istas submisit: *imò quod non esset sufficiens regere tantam communitatem propter suam inexperientiam. 2dò quod esset Lector in Facultate Medicinæ stipendiatus Principis, cui lecturæ ipsum integram impendere operam oporteret, ac exinde utili, & sufficienti diligentia non posset Rectoratui prodesse. 3tid quod ipse in Uxorē duxisset corruptam, ob quod bigamus Clericorum iudex esse*



*esse prohiberetur, habereturque inhabilis Reſtoratui Univerſitatis. His auditis allegatis, Acta continuant, placuit communiter omnium Facultatum Doct̃oribus, quod Magiſter Pancratiuſ, eò quod nollet Doct̃orum ſuaſionibus acquieſcere, non eſſet per Univerſitatem declarandus habilis, aut inhabilis; ſed potius à Reſtoratu abſolvendus, & per Procuratores aliuſ eligendus. Sicque electuſ eſt Nicolauſ Ratiſbona A.A. & Medicina Profeſſor.*

## An. 1471.

**U**Bi ſeptimo Kalendas Junias in Bohemiæ Regem Uladilauſ proclamatuſ erat; graviter ſuccenſuit Friderico Cæſari Pontifex, Eidem Bohemorum à Mathia defectionem exprobrans, miſſo etiam ad comitia Ratiſbonenſia, quæ ad ſtabiliendam Germaniæ pacem erant indiſta, Legato. Verùm Imperij Ordineſ Cæſariſ judicium ſecuti Uladiſlai electionem confirmant. Inter hæc Mathia repulſa irritatuſ atroci bello Moraviam, & vicinoſ Bohemiæ limiteſ vexabat, Uladiſlao cum 7. equitum, & 2. peditum millibuſ in Bohemiam ingreſſo, ac Regiſ initiato titulis. Quod minùſ in præſentia plura à Mathia attentarentur, id cauſæ fuit; quod eum inteſtini ab Archiepiſcopo Strigonienſi, Quinque-Eccleſienſi Antiftite, aliſque Regni Proceribuſ motuſ concitati in Hungariam revocarent.

Et timeri potuiſſet fulmen in Fridericum æquè, ac Uladiſlaum à Pontifice Paulo II., niſi iſ anni hujus menſe Auguſto, apoplexiâ tactuſ, mortem obiſſet; cujuſ loco vacanteſ conſcendit Romanam Sedem Franciſcuſ Ruvereuſ Cardinaliſ, Ordiniſ antehac Minoritarum Miniſter Generaliſ, aſſumpto Sixti IV. Nomine. Dedit iſ proximis ab electione diebuſ non modò ad Imperatoreſ, ſed & Univerſitateſ noſtram literaſ, quibuſ electionem ſuam ſignificat, admodum ab Univerſitate efflagitans, operâ conferret, ut Imperator pacatiſ Chriſtianorum rebuſ bellum contra Turcaſ ſuſciperet. *Leſta ſediſ Apoſtolica literâ coram congregata*  
in

*in die BB. MM. Crispini , & Crispiniani Universitate , verba actorum reddo , in praesentia literarum Nuntii , grates summae actae sunt SS. Domino , promissaeque orationes , missarum Sacrificia , ac alia pietatis opera , quod & Altissimus Eundem Sanctissimum Dominum in Vicarium suum assumpsisset ; datique sunt Nuntio 4. fl. hungaricales. Hunc in finem habita est etiam Statio Universitatis in vigilia Simonis , & Juda Apostolorum in Ecclesia B. Virginis ad Predicadores ; fuit etiam praesens Dominus Leo Spauer Brixinensis cum aliis : fuit etiam Nuntius Apostolicus : item & francollatio fuit non modica , licet plura supposita absuissent , & pauca obtulissent.*

Cæterum ferax erat domesticarum litium annus praesens. Obtinuerat jam sub id temporis usus , & consuetudo adeo antiqua , ut Acta ajunt , quod ejus Ortus non esset in hominum memoria ; quod videlicet Facultatum Decani instituantur , & confirmentur per praesentationem libri Statutorum , Sigilli , ladula , & aliorum , quae more solito per , & apud Facultatis Decanos debent conservari. Huic cum contravenisset Magister Augustinus de Elbing Decretorum Doctor , Rectoratu Universitatis defunctus , latâ proscriptionis Sententiâ in obstituros , praedicta Decanatûs insignia secum pertinaciter retinebat. Inversas adeo temerè Universitatis consuetudines novus Juridicæ Facultatis Decanus , Dominus Kilianus Decretorum Doctor , unâ cum inclyta Facultate Juris ægrè ferens , causam ad Universitatis consilium defert , convocatis in id quoque cæteris tribus Facultatibus ; quibus post causæ discussionem visum , Facultatem Juris in sui manutenendam juris consuetudinarii possessione quod ad suorum Officialium electionem , institutionem , & confirmationem. Et licet Magister Augustinus , contra latam in se sententiam apud novum Dominum Rectorem Nicolaum de Ratibona verbotenus interposuisset appellationem , hâc tamen per datos à Facultatibus Deputatos examinatâ , Universitas pro Facultatis Juris consuetudinaria possessione iteratò sententiam dixit.

Vix

Vix illud terminatum erat diffidium, aliud Universitati intercessit cum Magnifico, ut Acta loquuntur, Domino Alberto Marchione Brandenburgensi, Viennæ locum Principis tenente : hic ab Universitate dimitti poterat homicidam in Universitatis carcere detentum : erat isthic Baccalaureus Facultatis Artium, qui, nescio, quibus ex causis, unâ cum socio in rixas delapsus ejusdem secum Codriæ incolam occiderat : fugâ unus elapsus, alter in carceres civitatis primûm, deinde quodd Universitatis è jure foret, ad ejusdem custodiam abductus est ad pleniorē usque facti discussionem. Verûm consilio Universitatis visum, *humiliter Domino Alberto respondendum, quodd Universitas à Casarea Majestate haberet jus in sibi subjeptos.* Impetravit igitur Albertus ab Imperatore literas, quibus prædictum sibi extradi homicidam mandabatur. Traditus est ab Universitate, sed eâ clausulâ : *quodd ipsa dictum homicidam hac vice seriosis Casaræ Majestatis mandatis coacta absolvat à carcere.*

Utraque præterea electio Rectoris suas anno hoc habebat discordias : Ubi enim in festo Tiburcii & Valeriani Martyrum novus eligendus erat Rector, Procurator nationis ultimæ, seu Saxonicæ, (erat is Magister Augustinus de Elbing) se se stiterat cæteros inter Procuratores loco primo : reclamatum ab iis, quorum intererat ; tum quodd nationi Saxonicæ locus is minimè competeret, cûm quodd laudatus Augustinus habilis non eisset Procuratoris Officio, ut qui ob sua in Rectoratûs munere delicta dignitate omni esset exclusus. *Clamabat ad hæc, verba Actorum sunt, Doctor Augustinus : mentitum est ;* movit ad indignationem omnes hæc insolentia ; coactûsque Magister Augustinus non solum veniam petere, sed & officio se se abdicare. In Procuratorem suffectus, Magnificus, & Generosus Princeps Dominus *Georgius Anhalt de Ascania*, cui reverentiæ causâ, quodd Princeps esset, tres primæ Nationes motu proprio, ut inter Procuratores primo sederet loco,

loco, consenserunt; facta tamen protestatione: quod hoc non debeat pro futuro in sequelam, seu consuetudinem trahi.

Semestri altero, ipso die Divi Colomanni, in Rectorem unanimi voto designatus erat Magister Paulus de Mellico ex Facultate Theologica, qui nec electioni, aderat, nec intimatae consensit: conclusum ergo per Facultates, *electum adhuc semel legaliter requirendum, ut electioni de se factae consentiret, id si recuset, pœnam solveret præscriptam, ac ad novam deinceps procederetur electionem.* Precibus Deputatorum motus tandem Magister Paulus consenserat, præfuitq; quartò Universitatis Rector.

Eodem anno hoc instauratam scribit Ederus Archigymnasii Bibliothecam, ad quam Sacerdos quidam, Magister Jacobus de Yban, Tyrnaviensis, 100. fl. hungaricales contulit. Mortem hujus Acta Artist. referunt ad annum 1479. ajuntque: *Fuisse virum plenum dierum, & bona sanctitate, ut qui ipse ad perfectionem structurae librariae manu sua lapides portasset, ac eandem cemento clausserit, & dealbaverit.*

## An. 1472.

**U**T sancità inter Christianos Principes pace conjunctis viribus in Turcam arma sumerentur, agebat Pontificis nomine Neostadii apud Cæsarem Franciscus Piccolomineus Cardinalis, magnum Archigymnasii nostri, cujus membrum erat, nomen. Idem imperatum à Pontifice Marco Bando Cardinali, ut apud Poloniæ Regem tractaret: jamque pax quædam Fridericum inter & Mathiam convenerat, si tam facile isthic cum Casimiro Poloniæ Rege pacisci voluisset. Vix enim aliquot mensium inducias ab se impetrari passus, ob conditiones parùm optatas, non opus esse ea sibi pace, Mathias respondit; venturum se brevi, & Calvo reliquos crines se evulsurum.

Hæc dum pacis fœdera Legati procurant; Universitas in sacratoris Curæ partem vocatur. Fecerat nuper

per anno 1468. Paulus II. Friderico id postulanti, facultatem, Viennæ, in Metropoli Austriæ, Episcopatus erigendi; cujus rei famâ ad Pataviensem Antistitem, sub cujus Viennensis Ecclesia juribus hætenus fuerat, perlatâ, omnem movit lapidem, ne suæ cum præjudicio Diocœsis Vienna Insulis ornaretur. Quam in rem & Universitatis patrocínio utendum ratus, ad eandem dedit epistolam, cujus sequentem Acta Artist. faciunt mentionem: *Accepit Universitas à Reverendissimo in Christo Patre, Domino Udalrico Episcopo Pataviensi literam per Magistrum Alexium Turner, ejusdem Viennæ Officialem: lectâ coram congregata Universitate literâ, prædictus Dominus Officialis proposuit, petendo nomine Episcopi sui: quòd Universitas dignaretur adjungere certas Personas nomine Universitatis Ambassiatus præfati Reverendissimi Episcopi, iturus ad Cesaream Majestatem ad Novam Civitatem, volentibus proponere Domino Imperatori certos articulos, & rationes, ne Cesarea Majestas specialem Episcopatum erigeret in Vienna, dividendum ab Episcopatu Pataviensi. Postulatis hisce maturè discussis, in eam ab Universitatis Consilio itum sententiam: quòd nulli essent adjungendi nomine Universitatis; tum quòd non sciret Universitas articulos; tum quòd nihil agendum esset, quòd alii non possent facere; tum ne Universitas notetur apud Dominum Imperatorem, quæ stipendia haberet ab eo; tum etiam, quòd dictus Episcopus haberet plures viros in Universitate sub sua jurisdictione, ut Plebanos; hinc illos posset mittere suo nomine.*

Intercessit rursus electioni suæ in Universitatis Rectorem anno hoc egregius AA. & Decretorum Doctor Jacobus Hausman; causamque reddidit: imò quòd esset infirmus pluries: add quòd esset Vicarius Præpositurae S. Stephani, & haberet Consistoria in hebdomada, quæ se ab Universitatis Consilio impedirent, possetque ab hoc ad alterum fieri appellatio. siò quòd cum Vicarius sit, haberet vigilare in Choro. Et quamvis primùm rationes adeo ponderosæ non viderentur, quæ eum ab officio absolverent;

rent; importuniùs tamen causam urgenti demum Universitas consentit.

## An. 1473. usque ad 1477.

**A**Nnis hisce utcumque pacatæ res Austriæ fluxêre; Friderico Cæsare exteris negotiis, bellisque detento; quæ fusiùs Roo, aliique Austriæ Scriptores recensent. Ictâ autem an. 1475. post Novesianam cladem pace cum Carolo Burgundiæ Duce (cujus alias inter conditiones hanc fuisse ferè omnes affirmant: Mariam, quam Carolus filiam habebat unicam, Maximiliano Friderici filio desponsatam, Provinciis Hæreditariis, si nullâ prole masculâ aucta foret, successuram) Fridericus per Bavariam, ubi nuptiis, quibus Georgio Ludovici divitis Bavarix Ducis filio Hedwigis Calimiri Poloni filia elocabatur, interfuisset, sub finem anni 1475. in Austriam cum Maximiliano profectus est: ut Acta Facultatis Theologicæ ad prædictum annum his verbis docent: *adâ Decembris congregata fuit Facultas ad eligendum aliquos, qui per Arengas, juxta morem, Sacram Majestatem Imperialem, & Juvenem Principalem ejus cum reverentia susciperent; & electi fuerunt Venerabiles Magister Joannes Harrer pro Imperiali Celsitudine; & Magister Nicolaus de Greußenach pro Juvene Principe Maximiliano &c.*

Priusquam Cæsar Viennam attingeret, abrogatus est vinearum decimas per studiosos Universitatis conscribendi mos. *Invaluerat siquidem pestilentissima illa consuetudo, ut quidam, Decimatores dicti, qui jus decimarum persolutum, & insolutum conscripsêre, per cuneos, & turmas validissimis clamoribus Civitatem intrarent, atque exirent, & suis insolentiis tum suburbanos, tum urbanos, omnes denique molestarent, & qui repugnarent, ut, prob dolor! nuper visum est, lethalibus vulneribus afficerent. In quibus turbis sæpe primò innocentes, demum nocentissimi evaserunt; neque in Bursas noctu revertentes, sed ludis, & commensationibus indulgebant.* Tantis igitur malis, ut

Uni-

Universitas succurreret, habita deliberatione eam legem tulit; ne ullus Scholarium, aut Baccalaureorum operam daret scriptioni decimarum, sub pœna retardationis à gradibus: pœterea ut Conventores Bursarum suis suppositis id inhiherent, quique monitis non obsequerentur, Bursarum contubernio essent exclusi.

Quæ domi adeo literis & morum disciplinâ florebat, exteris Oraculum veluti quoddam tum etiamnum habebatur Universitas, ad quam Communitates, privatique perplexis in conscientiæ casibus recurrerent. Asservatur sanè in Actis Theologicis epistola bene longa ad Illustrem, Nobilémque Dominum Nicolaum de Liechtenstein de Murau, decisoria quæstionum, quas super possessione Castri Tierenstain ad Facultatem Theologicam submiserat. Alia item in Actis Philosophicis à Magistratu Norimbergensi data, quæ ex Universitate disquirat: *An Judæis venientibus ad judicium cum debitorum literis, nihil usura expressè continentibus, contra Christianos, debeant pronuntiare pro Judæis contra Christianos?* Responsio desuper fundatissima, pluresque per articulos discussa à Deputatis Facultatis Theologicæ confecta est, quæ documenta inter Bibliothecæ Philosophicæ conservatur.

Quodd iteratò utraque in mutatione anni 1474. Rectoris Officium, ad id electi, (erant ii Magister Michaël Lochmayr de Haydegg Decretorum Licentiatus, & Magister Martinus Heintzl de Meminga Theologiæ Professor) recusassent, ne res mali exempli foret, ab Universitate statutum: uterque præscriptam solveret pecuniariam multam, aut Rectoris munus susciperent; quorum posterius longam post causæ disceptationem illi prælegere: Ordinatam tamen, ut qui deinceps Academiæ onera subire nollent, ipso facto essent eliminati, atque ad suæ Facultatis officia, emolumentaque inhabiles.

An. 1477.

**C**um Viennæ, Universitatis quoque res anno præ-  
senti, bellorum injuriâ, fuere oppidò perturbatæ;  
adventasse siquidem anno hoc Uladislaum Viennam,  
atque ei à Friderico Cæsare jus Regni Bohemiæ, coro-  
namque esse collatam, Acta Theologica apertè memi-  
nerunt: *Dominicâ Cantate*, inquiunt, *quæ est quarta post*  
*Pascha*, congregata fuit *Facultas super eligendo Magistro*,  
*qui Regem Bohemiæ coronandum cum Arengâ* ( sermo-  
nem ea vox veteribus significabat ) *susciperet*; & erat  
*electus tunc Decanus, Nicolaus de Creützenach*, qui paucis se  
*absolvit ad beneplacitum Domini Imperatoris circa introi-*  
*tum Regis extra portam Civitatis Viennensis*. Cui, ut Ede-  
rus habet, quamvis ab anno aberret, Rex Viennam in-  
gressus ornatè, & benignè respondit: hoc sibi studium  
longe esse gratissimum.

Regii hi in Uladislaum collati à Friderico honores  
novas flammâs subdiderunt prono per sese in bella Ma-  
thiæ Regis animo. Collecto igitur exercitu rapidi tor-  
rentis instar Austriam inundat, loca passim obvia sub-  
jugat, iis, quæ munimentis fidebant, omni vi circum-  
fessis. Has inter & Vienna ipsa ( quam Bonfinius *pul-*  
*cherrimas inter Barbarorum Urbes*, cui scilicet Italo omne  
extra Italiam barbarum, appellat ) 27. hebdomadis ob-  
sidionem invicta sustinuit; cùm tandem 21. Decem-  
bris pax Fridericum inter, & Mathiam est restituta.

Quæ omnia belli hujus tempore gesta, cùm & in  
non communem Universitatis commendationem, &  
ad statuendam certissimam temporis rationem deser-  
viant, miræque rerum varietate sint referta, audire  
juverit ex Actis Philosophicis fusiori calamo per Exi-  
mium virum, Magistrum Joannem Goldperger de  
Wiennâ, ejusdem anni semestri altero Decanum Ar-  
tium, conscripta:

\* Anno præsentis, videlicet 1477. Cum Fridericus  
III. Romanorum Imperator, ac Austriæ Dux &c.

Bladts.



Bladislauum primogenitum Calimiri Regis Poloniæ, de Regno Bohemiæ, ac Ducatibus, & Dominis ad id spectantibus in urbe Viennensi infeudasset, Mathias Rex Hungariæ ad idem Regnum jus habere prætendens, illius infeudationis occasione Cæsari bellum indixit, ac collectis copiis, ut ajunt, circiter XX milia magnâ vi mense Julio in Austriam intulit, ac oppidum, quod Haimburgum vocant, quâ fines Hungariæ spectat ad solis ortum, admotis scalis & machinis muro, primum cominus oppugnare cæpit, unâque ignes tectis iniicit, domos succendit. At Haimburgenses, esto incauti, nec quidam tale metuentes, aggressi, viriliter resistunt, adeo, ut totam ferè diem prælium faxis, ac telis utrinque conteratur. Nam Hungari, nisi victores abire; at illi nequaquam victi superare, contendebant. Sole verò in occasum vergente, ut hostis se nihil proficere, & multa suorum funera è fossis efferri videt, revocato exercitu oppidum relinquit; & ea nocte propè Castrametans occisos sepeliri jubet, & vulneratos Posonium mitti, ut curentur. Deinde juxta oppidum Prug in ripa fluvii Leûta exercitum sistit. Postera die Haimburgenses secretò Viennam Legatos mittunt suppetias orantes: alioquin similem irruptionem hostium sustinere non possent. Viennenses anxii, & sibi prospicere, & vicinis auxilia ferre, durum putant. Nam paulò antehac Cæsar, paucis militibus ad tuendam Viennam relictis, in Crembs abierat: tamen Consilii decretò noctu per Danubium pedites nonnullos cum bellicis machinis, & aliis, quibus opus erat, suppetias mittunt, quas Haimburgenses summâ cum lætitiâ recipunt; quibus freti durante bello sæpe in Hungariam excursiones facientes spolia etiam opima retulerunt. At Rex factò fœdere cum Givibus in Prug, exercitum omnem movit contra arcem Trautmanstorff, quæ ob penuriam com meatûs, & eorum, quæ Castrî munitiones requirunt, mox in deditionem venit. Relictis igitur ibidem nonnullis

militibus, qui Castrum Regiæ ditioni tenerent, rur-  
 sum exercitus omnis juxta Haimburg, Castrum Domi-  
 ni Comitis de Schaumburg, tentoria figere jubetur. In-  
 terea Rex mittit Legatos ad villas, oppida, & arces  
 undique circa Viennam sitas, deditionem, ac jusju-  
 randum Regi Hungariæ præstandum postulantes; qui  
 nisi faciant, igne, & fero Regem omnia vastaturum  
 minantur. Multa fortassis in illis oppida restitissent,  
 si à quoquam homine præsidium venturum speras-  
 sent: quod cum non viderent, insuper & hostis ipse  
 die, noctûque partibus eorum insultaret, penè omnia  
 circum Viennam oppida colla subdiderunt. Ita qui-  
 dem urbe Wiennensi nedum exercitu campestri, sed  
 & oppidis, & villis, & arcibus munitis, vallatâ nus-  
 quam liber patuit egressus. Nam in Orientem, & pe-  
 nè ad ipsas civitatis portas Eberstorff Castrum ingens  
 erat, & ibidem hostium manus insidias tendens. Ad  
 Meridiem multorum millium exercitus curribus fal-  
 catis munitus. Juxta montem Wiennensem ad flu-  
 vium Inzespach Castrametabatur. Ad Occidentem  
 versùs arces, & oppida munita in manibus hostium  
 posita libertatem egrediendi, aut commeatum addu-  
 cendi, prohibebant. Unica in Septentrionem patuit  
 via, scilicet Danubius; ipse adhuc subservire poterat,  
 sed breve hoc nostrum fuit solatium. Nam Rex misso  
 quodam Bohemo ex Ducibus suis, cui nomen Selene,  
 homine ad negotia belli tractanda ingeniosissimo, ea die  
 20. Augusti, dum sol in occasum tenderet, Neuburgum  
 versùs agmen suum ducit; & in aurora sequenti insul-  
 tum faciens, inferiorem Civitatem vi mox expugnat;  
 & antequam meridies transiret, Civitas superior mu-  
 rō, & fossâ munita, sive perfidiâ, sive timore hostili  
 correpta, victam sese hosti subjugavit. Nunc tan-  
 dem potissima salus Wiennensibus, subtraditione Da-  
 nubij, fuit adempta: sed adhuc Mediamnis juxta  
 Viennam, quem vulgò Werdeam appellant (*Me-  
 diamnis locus ille Insula erat, quam diversa Danubi-  
 bra-*

*brachia efficiunt , hodiéque Leopoldinam vocant ) & pons , qui Danubium transmittit , propè Wiennam in manibus nostris erat : qui ne præsidio nobis esset ; instructâ classe armatâ in Neuburgo Claustrali die 27. Augusti , ut sol oriebatur , Rex ordinatas turmas per montem Wiennensem procedere instituit , ac juxta Wiennam in oppido Mezlisdorff sistit ; ubi positis bombardis saxa , & globos ferreos passim per Wiennensium suburbia spargebat : Cùmque hujuscemodi belli præludia fierent , & populus serè omnis parum , aut nihil suspicans dolos Neuburgæ fabricatos illac concurreret , subito naves armatæ ex Neüburgo descendentes in ripa , Werdeæ dictâ , in Tôblpach subducuntur ; emmissoque exercitu agmen totum usque ad pontem Danubij incedit. Nescio hîc , utrum fatum incussem , an potius nostræ Urbis Rectores , & tanquam ignavos , & rerum bellicarum prorsus expertes arguam ? qui cùm certò didicissent , & sæpe admoniti , hostem hoc pacto Mediamnem capturum , neque pontem diruerunt , qui hosti venturo præsidio non esset ; neque vallum , olim ad recipienda telonia ad pontem extructum , munierunt : quin imò vix tantùm temporis illis concessum est , ut vallum illud vetus , & contra vim hostium penitus ineptum igni succenderent. Tunc etiam ad brachium Danubij , quod penè muros Civitatis alluit , in ripa , quæ Werdeam respicit è conspectu Civitatis , domos passim extructas perdidit : nostri enim timentes , ne si domus illæ superessent , hosti tuta latibula forent , quibus defensi etiam Castra sua contra Civitatis prospectum tendere possent , unâ & illas subito igne vastârunt. Hostis ergo tanquam prælium commissurus , aliquamdiu moratus , tandem cùm homines nostros inter mænia , & fossas se continere , nec quemquam in se irruere vidisset , Molendinum non longè à ponte extructum capit , ac circùm castra ponit : mox securus solam urbis deditionem expectans. Ita quidem à quibusdam consultoribus , qui à Cæsare ad Re-*

gem defecerant, perſuafus, modò victum, & Com-  
 meatum Wiennenfibus ſubtrahat. Neque illius rei  
 fama tam ficti, quàm veri nuncia aberat: nam die ſe-  
 quenti in Caſtris Regiis in omnium ore erat: rem nu-  
 mō denenariō vendi, quæ pridie unicō reperiri poterat.  
 Verum tamen non proſus illa à veritate aberat: Cūm,  
 ut Civitas ſubitō ex omni parte vallata erat, ſtatim  
 piſtorum officinæ claudebantur, non habentes, quod  
 pinſerent. Nam etſi frumentum bona parte copioſum  
 adeſſet; at Molendina non erant: itaque vulgus,  
 quod panes ſingulos ſingulis diebus emere conſveve-  
 rat, haud modica fame torquebatur: adeo, ut multi  
 per triduum nec morſum panis guſtarent; donec inge-  
 nio humano ſuapte naturā in neceſſitatibus promptio-  
 ri, plus quàm centum piſtrinæ, & molendinæ fabri-  
 carentur; ubi plebs diu, noctūque laborans farinam  
 exprimebat. Tunc noſtræ urbis Rectores bellum tan-  
 dem altiùs animo volventes, cæperunt munire vias  
 inter ſepes ſuburbiorum, ſinè intermiſſione cuſtodias  
 diligentes adhibere; adeo, ut quiſque oppidanorum  
 alta nocte, & die ad cuſtodienda ſuburbia conſigna-  
 retur, foſſas profundare, valla reſarcire, quemque,  
 ut in opere publico ferveat, exhortari, quantum fru-  
 menti quiſque haberet, paſſim per ſingulas domos in-  
 quirendum Cives mittere. Tunc etiam ſingula per  
 Wiennam Monasteria, omneſque, quos aut privile-  
 gium, aut jus cōmune à tributis ſolvendis tutabatur,  
 ad ferenda auxilia invitabantur. Etiam Gymnaſium  
 noſtrum literarium pro mittendis quibuſdam, qui foſ-  
 ſas, & ſepes munire adjuvarent, ſolicitabatur; ubi uſq;  
 hodie ſepes, & foſſas extructas ad ripam Wiennæ fluvii  
 Stubarum portam reſpicientem, ubi idem fluvius Da-  
 nubio miſcetur, operā ſcholarum reſtauratas cernere  
 licet. Cūmque obſidio iſta in tempus proferri videre-  
 tur, multiſque alimentum exiguum eſſet, paulatim  
 & ſcholares, & mechanicæ artes, operarii, & reliquī  
 in noſtra urbe peregrini, catervatim non ſine periculo  
 gravi noctu per media hoſtium Caſtra exeuntes, alibi  
 ſibi

fibi prospiciebant. Multi etiam ex illis in manus hostium incidentes captivi ad dandas pecunias cruciabantur. Omnis quoque totius Wiennæ campanarum pulsus vetitus erat, quo nec hostes ad certos diei, aut noctis pulsus in castris suis interfligna sibi constituerent, quo etiam nostri ad unius Campanæ signum, tanquam nuntium certissimum, mox ad arma, & mœnia tutanda ruerent. Addidit insuper hostis viribus fraudem, ut quos impetu submittere non posset, saltem dolo victos caperet. Novit quidem vulgi inclinationem ancipitem, & ad auræ cujusvis impulsu præcipitem, quo permotus plebi, quæ exercitum adhuc non viderat, in eo curruum & Castrorum apparatu, ut fieri solet (nam exercitus totus sub monte Wiennensi latitabat) aperta Castrorum inspectione timorem injicere studebat. Est autem juxta Wiennam in via, quæ ad Neiburgum Claustrale ducit, campus quingentorum passuum stratus, planè ad prospectum undique patens: illac exercitus unus traducitur ex monte Wiennensi, ut contra Civitatis prospectum tentoria erigat, interpositis curribus (ut fieri solet) qui omnes rubrò tecti erant, quo magis militibus nostris stuporem inducerent. Ea quidem res oculis nostris objecta, ingentem subito extructam fuisse Civitatem, argumentum erat; at quo cujusquam animum (ut hostis commentatus erat) conturbasset, audivi neminem. Alia denique usus est fraude, quo magis timor, aut dissensio in Civitate oriretur; ut cujusque conditionis, & sexûs homines ad nos submitterentur, passim Regem exitium extremum minari, omnia vastare, Tempora diruere, & à fundo omnia vertere, prædicarent, nisi in tempore nos dedamus. Quidam quoque ex Ducibus regiis, & his, qui ad eum defecerunt, Magistratui, Mercatoribus, & plebi literis suis persuadere nitebantur, ut electis quibusdam, qui Regem in Castris adirent, & de pace, ac concordia agerent, se in ea re fidissimos fore adjutores, ne tam insignis Civitas to-

to terrarum orbe celebrata, Principis sui negligentia periret : nam Regem in Castris esse potentissimum , ac jure jurando statuisse , nisi Urbe capta, hinc non discedere : cæterum Principem Civitatis abiisse ; per paucos reliquisse Rectores utiles , tum nullum à quovis præsidium venturum ; indies magis sese exedere : convenire ergo , & quidem absque alicujus fidei violatione, ut priusquam Regem in rabiem vertant, sibi, Civitati , bonis , liberis , ac uxoribus suis prospiciant. At Magistratus , & tota urbs cantus illos Callidè sapiens , haud eis aures præbuit ; neque literis , & suasionibus suis quidquam respondit ; sed , prout fortissimos viros decet, adhuc extrema omnia passuros, quàm se hosti victos dedere , statuerunt. Siquidem si hic locus esset , & mihi quoque vena ad scribendum pinguior , non sinerem , quin summis laudibus hanc clarissimam Wiennam extollerem, quæ etsi antehac celebris sit hac tempestate tamen nobilissimam sese reddidit , & Principibus Austriæ ( nisi prorsus delirare velint ) charissimam. Sola namque hæc urbs Ducum Austriæ hæreditatem , ne inter alienas raperetur , conservavit. Reliqua enim omnia , & castella , & Urbes , quæ adhuc in manibus Regiis non erant , solius Wiennæ fortunam spectabant ; ad illius auspicia & sua regi vela cogitantes. Quid dicam incredibilem Civium patientiam , summam paupertatem , ut qui paulò antefere usque ad medullam emanſi erant ? quid commeatum , qui penè deficiebat ? quid noctes insomnes , quibus ad tutanda suburbia invigilabant ? quid juvenum catervam , quæ crebrò usque in Mediamnem hostem perſequebatur ? quid de Gymnasii nostri Regentibus , qui ne unum quidem actum scholasticum omiserunt ? quid Religioſorum , Sacerdotum , & Matronarum devotas ad Deum preces , processiones per templa continuatas , ac totius populi summam concordiam , & Ducibus suis , quidquid in hostes fieri imperarent , obsequentiſſimi ? & quod omnium majus est , ex nullâ mun-

mundi plagâ ventura auxilia ? sed posthabitis suis omnibus, ut fidissima Ducum Austriæ camera, quod suo Principi fidem inviolatam servaret, usque ad necem decertare voluptatis loco habuit. Nempe sæpe visum est, ut populus Campanæ signo ad arma concitatus, apud Duces suos importunè instaret; modò, ut in Mediamnem emitterentur (illic enim Rex ipse castrametabatur) sese experiri vim hostium, velle; illic vel omnes mori, vel lætam absque dubio referre victoriam. At Duces eventus belli magis, quàm vulgus, sapientes, nunquam precibus populi assenserunt; quo etiam sæpe improperiis, & contumeliis affecti sunt, tanquam pusillanimes, aut qui Principi suo haud satls fidi essent. Sed redeamus unde digressi sumus. Rex tandem, ut vidit se neque viribus, neque fraude animos Civium infringere posse, quin imò indies gravioribus damnis se affici; neque tamen audere virtuti suæ, ut cominùs pugnando non ipsa urbis mœnia, sed neque sepes, & suburbia nostra aggrederetur; decrevit relinquere Civitatem, & alia, que minori egerent virtute, oppugnare oppida, nihilominùs posito vallo juxta pontem Danubii firmissimo, & circum relictis militibus in Castellis, & villis, qui ne commeatus adveherentur, vigiles intenderent; sperans hoc pacto, inediâ Civitatem sese confecturam. Transmisso itaque exercitu Neüburgum Forense, oppidum fossâ, & muro inter Civitates Austriæ, quæ trans Danubium situantur, munitissimum impetit; quod, & paucis diebus exactis, nec non & Tulnam, potestati suæ subegit: hic infausus vicinæ Civitatis eventus, haud parvo Wiennensium animos timore perculit, cum hoc præsertim Neüburgum Forense oppidum insigne captum esset, verendum esse, nè tota Austria cladem patiatur. Rex hâc victoriâ amplius ingrassatus, mox exercitum contra Krembs, & Stain movit: sed is à quartâ Octobris illic usque in 22. Decembris, & machinis, & bombardis, & omni genere belli laborans,

mu-

muros, & turrez diruendo, etiam Civitatem Krems meatu subterraneo ingredi sperans, ad hoc efficiendum multa rusticorum millia ad fodiendum compellens, prorsus omnem operam frustra exegit: Nam urbes illæ Wiennensium exemplō animatæ, quæque adversa fortiter sustinentes haudquaquam vinci potuerunt. Interea dum hæc fierent, quamvis res belli Regis nutu gradi viderentur, tamen nihilominus Rex Caduceatores suos ad Cæsarem mittit, in quos omnes suam transfert auctoritatem; ut quidquid firmarent, tanquam à se gestum, ratum teneretur. Illi ergo legationem obeuntes apud Cæsarem, tandem certa pacis fœdera pacti sunt, utrimque inviolabiliter observanda; confectisque literis, & munimentis utrimque, per totam Austriam 21. Decembris pax clamatur, exercitusque omnis campestris sublatus in Moraviam, & terras suas transfertur. Castella verò, & Civitates, quæ Regi coactæ sunt profiteri, tandem rursus Cæsari reddi debuerunt; cùm Inscriptio pro centum millibus florenorum Regi sub certa conditione præstandis tradita fuerit. Nam ita quidem per Caduceatores Regis, & Cæsarem, dum pax conficeretur, pactum erat. Ille est eventus belli, quod hac tempestate miseram Austriam contrivit; adeo, ut ne ulla quidem memoria extet, quæ antehac unquam hanc Austriam tam gravi clade fuisse oppressam testetur. Deus Omnipotens concedere dignetur, ut saltem modò post mille labores, & inexhausta belli pericula fessos quiescere sinat. \*

Hæc Joannes Goldperger Scriptor Actorum Synchronus. Fabellis igitur accensendum potius existimo illum vulgi rumorem, quo, nescio cujus fide, Matthiam Regem Obsidionis tempore Viennam exploraturum ignoto vultu ingressum, atque in Caupona, abinde ad 3. Corvos dicta, hospitasse; proditumq; haud obscuris signis, Rotæ currulis, quam ante se gyabat, beneficio per Urbis portas elapsum ferunt. Cujus certè melioris notæ Scriptor meminit nemo; nec, si quid  
veri



veri subesset, qui minimos rerum gestarum apices recenset, prælaudatus Goldpinger prætermisisset.

Cæterum tam licentiosæ ab Hungaro in Austriam irruptionis causa, neglectique à Friderico subsidii non postrema fuit, seu quòd, ut nonnulli cum Bonfinio prodidère, Viennensium Fridericus nuper in se Viennæ obsidendo perfidiam ulcisci eo pacto vellet; seu quòd Maximiliani filii spem, ac fortunas minimè negligendas ratus, perficiendum ejus cum Mariâ Burgundicâ matrimonium domesticæ saluti præhabuerit; quod & prospero planè eventu est consequitus; cæso enim anno hoc nonis Januarii à fœderatis Helvetis, ac Lotharingiæ Duce Renato ad Nancæum Carolo Burgundiæ Duce, relicta tot ditionum hæres unica Maria, frustra armato Gallo eam pro filio suo procante, Maximiliano nuptiali fœdere 13. Kal. Septembris Gandavi jungitur, eo apparatu, quem rerum, sponsæq; conditio exigebat: quo ex connubio Domui Austriacæ Burgundia cum septemdecim Belgii Provinciis accrevit.

Anno hoc eodem, ut Jacobus Middendorpius suis in Academiæ libris habet, Tubingensis Academia ab Illustrissimo Wirtembergæ, Mompelgardicæque Comite, Domino Eberhardo Barbato, hortatu Illustrissimæ Matris Mechtildis, & Patruï Ulrici auxilio, auctoritate Sixti Pont. & Friderici Cæsaris, incæpta, atque fundata est. Primum Universitatis illius Rectorem, ac Cancellarium præfuisse Joannem Nauclerum idem Middendorpius refert.

Vivere hoc anno quoque desiit, Hundio teste, Bernardus de Kraiburg, quem Ederi Catalogus præposterè de *Rayburga* compellat, Nobili apud Carinthos familiâ natus, in Universitate Viennensi Canonum Doctor creatus; Salisburgenses inde inter Canonicos translatus, & literis, & virtute Chiemseenses Insulas commeruit.

**An.**

## An. 1479.

**U**T anno Superiori Chiemseensi, ita præsentī orbatā est Universitas Pataviensi Episcopo, quondam alumno suo; Reverendissimo scilicet Domino Udalrico NUSDORFFER; fuerat is FRIDERICI Imperatoris simul Cancellarius, Academiæ nostræ, in qua literis, & literarum honoribus est excultus, commodis, & ornamento nunquam non studiosus. Quem non longo post intervallo infectus est Reverendus ac Excellens vir Paulus de Mellico, Theologiæ Doctor, & Professor in hac Universitate, ut eum Schönleben compellat, Fundatissimus, ad S. Stephanum Canonicus, ac quater Archigymnasii Rector, relictis dilucidis super Ecclesiasticum Commentariis etiam post mortem clarus.

## An. 1480.

**P**ACE Universitas cum Austriā fruebatur non diu, Mathia Hungarorum Rege armis Turcicis implicito: cū renovatum est in Austria hoc anno bellum eā, quam nonnulli allegant, causā; quod pactam in nupero fædere pecuniam FRIDERICUS, nondum exsolvisset. Quare in Styriā Mathias Mariæburgum obsidet, à Cæsareis tamen mox libertati assertum. Petovium inde, & Rakerspurgum capit; sed quod eo tempore Turcæ Transylvaniam pervastarent, Mathias cum Cæsare inducias paciscitur, quas eò promptior iniit FRIDERICUS; quod miles Germanus submittendus esset filio MAXIMILIANO bellis Gallicis, & factionibus Belgicis occupato.

Dum induciæ, procurante Prospero Asculano Pontificis Legato, sanciantur; graves subortæ sunt de Pataviensi Episcopatu factiones; quibus componendis Universitas arbitra expetita est. Ab obitu enim Udalrici Patavienſium Canonicorum suffragia in partes scissa erant, quod FRIDERICUS Imperator pro familiari suo Georgio Häslero Ecclesiæ Romanæ Presbytero Cardinali; Georgius verò Bojorum Dux pro Doctore quodam

dam legum , Friderico Mauerkirchero Bavaro Aulæ suæ Cancellario intercederent ; Populus , Senatúsque Pataviensis à Friderici Imperatoris partibus stabat , potiori , ut Hundius memorat , Canonicorum numero Bojarii Ducis factioni favente. Quare cùm Georgius Cardinalis Wiennæ tunc adesset , *convocatis pridie Kal. Julii*, ut Acta nostra docent, *Rectore, ac Senioribus omnium Facultatum* , jura sua super nominatâ Ecclesiâ proponebat , legique eis coram curavit plures literas Sedis Apostolicæ. Similiter autem , & Oratores per Capitulum electi Domini Friderici Mauerkircheri ab Universitate audiri volebant : auditis utriusque partis juribus , omnibus quatuor Facultatibus visum : *Ne se quovis modo Universitas in hoc negotio intromitteret. Responsumque partibus : Universitatem nullo modo de juribus eorum velle disceptare, nec definire.*

Fuit Reverendissimus hic Georgius Häslerus bonis artibus in Universitate nostra excultus , ac Romæ rude donatus. Inde digressus Friderico Cæsari eruditionis præstantiâ variis in muniis, legationibúsq; adeo se probaverat, ut eidem demum anno 1477. à Sixto Pontifice Cardinalatús honorem impetrârit. Præfuit Pataviensi Ecclesiæ ad annum usque 1482. quo negotiorum causâ Wiennam à Cæsare vocatus , cùm Danubium lintre transmitteret , naufragio periit 14. Septembris. Cadaver nona post die undis supernatans propè Wiennam inventum , ibidem in Ecclesia B. Virginis *de Ripa* , quæ nunc *ad Scalas* dicitur , honorificè est tumulatum.

Dum lis ea de Pataviensibus Infulis fervebat ; Ecclesia Viennensis ad D. Stephani , quæ ab anno 1360. Collegiata fuit , anno hoc autoritate Apostolicâ Cathedralis , obtentis jam antehac erectionis à Paulo II. 1468. aliis item à Sixto IV. anno 1475. literis , est publicata ; atque non Vienna minùs , quàm Universitas à jurisdictione sacra Pataviensis Ecclesiæ exempta. Juxta hac super re audire Acta Facultatis Artist. *In vigilia* , ajunt , *S. Mathæi coram congregata Universitate expo-*

*exposuerunt Oratores Casarea Majestatis, quodd Dominus Imperator omnino vellet, ut in futurum tota Universitas, & singula ejus supposita, pro Ordinario suo recognoscerent praeferendum Ecclesiae Viennensi, qua Dominicâ præcedente cum magna solemnitate pro Cathedrali erat promulgata juxta tenorem Bullarum Apostolicarum. Erat tunc sollemnis processio; cui & Universitas interfuit ad desiderium Casarea Majestatis eo modo, quo interest processioni in die Corporis Christi. Proposuerunt item præfati Oratores, & volebant nomine Domini Imperatoris, quatenus Universitas demandaret his, qui in causis quibusdam patrocinati sunt in Consistorio Patavienfi, ut in futurum ab hujusmodi desisterent in Vienna; coram tamen Officiali Ecclesiae Viennensis id facere possent, & in ejus Consistorio. Hac posteaquam sunt proposita, Rector ad quorundam consilium statim respondebat: quodd Universitas velit, sicut debet, obtemperare desiderio Casarea Majestatis.*

Primus itaque omnium anno hoc à Friderico Cæsare urbi Viennensi, atque Ecclesiae Antistes datus est Leo de Spauer, dignus eo honoris gradu, tum ob generis in Tyroli splendorem, tum ob insignia virtutum, ac Doctrinae decora; qui sub ea tempora Curionis non procul Vienna munere fungebatur. Certè eum sub hocce annos Viennâ haud procul commoratum, vel inde patet; quodd ad annum 1470. institutis post electionem Sixti sollemniis interfuisse ab Actis nostris memoretur.

Eodem hoc anno nominatum à Friderico Cæsare primum Cathedralis Capituli Præpositum, Thomam de Cilia, in Constantinienfi Ecclesia eadem dignitate fulgentem, tum Actorum Facultatis Philosophicæ liber, cum vetustæ Canonicae Viennensis tabulae edocent. Et quoniam hæc non parùm ad Historiæ nostræ Conspectum faciunt, libuit communicatum mecum à Reverendissimo & Magnifico ad D. Stephani Canonico utriusq; inaugurationis documentum isthæc recitare.

*Anno*

*Anno Domini millesimo, quadringentesimo, octogesimo, decima septima die Sept. quæ erat Dominica sexta decima post Pentecosten, & celebris etiam S. Lamperto Martyri, & Episcopo Traiect: coram Reverendissimo in Christo Patre, & D. Alexandro Forlivienſi Episcopo, & Sedis Apostolicæ cum potestate Legati de latere Legato; coram & alio Legato, qui gratiâ Salzburgensis Ecclesiæ missus fuerat, celebrata est publicatio Erektionis Ecclesiæ Collegiatæ nostræ Wiennensis in Cathedralẽm hoc ordine: Alexander Legatus, ubi indutus est, cum 16. Diaconibus, & toto Clero, & populo, se posuit super sellam ante altare summum, alium Legatum secum assumens ad latus non indutum vestibus sacris; postquam per Notarios, in præsentia Consiliariorum Serenissimi Domini Imperatoris Friderici III. requisitus est ad publicandum Apostolicas Bullas: eis acceptis reverenter, per suum Scribam eas clarè, & publicè legi fecit ad laudem Dei, & honorem Imperatoris. Dein requisitus iterum ad instantiam Notariorum pro D. Thoma de Cilia, ut eum Præpositum dictæ Ecclesiæ declaret nominatum, & admissum; quod & factum est. Dein surgens Legatus processionem per Ecclesiam, & urbis bonam partem celebravit, sequentibus Episcopo Strigoniensi, tunc Administratore hujus Ecclesiæ, & Legato Apostolico alio, & Baronum, & Procerum nobili Catervâ. Universitas quoque à latere processionis Ecclesiasticæ in Scholaribus, Baccalaureis, Magistris, atque Doctoribus ornatissimè incessit. Et ei processionis mandato Principis omnes Religiosorum ordines devotissimè interfuerunt. Et ubi reditus ad Ecclesiam factus est, jussu ambas Bullas, quæ ex utraque parte per Notarios publicè portabantur, ad valvas portæ Aquilonaris sub turri nova affigi: deinde ad altare summum Missam de Spiritu S. Solemnissimè decantavit.*

**An. 1481.**

**U**T erecto ab se An. 1468. quemadmodum ex Bulla Pauli II. docet Papebrochius, militari D. Georgii Ordini Cæsar Viennæ de domo prospiceret; Uni-

C

versi-

verſitati dat in mandatis, quatenus, verba Actorum re-  
 ferro, illa ad hoc conaretur apud Abbatem S. Crucis Ordinis  
 S. Bernardi, ut nullum præſtet impedimentum ſua Caſarea  
 Majeſtati, quantum ad Domum, & Capellam S. Nicolai  
 Vienna in Singerſtraß ſituatas, quo minus ſua Majeſtas  
 eandem domum tanquam ſibi debitam, & jure cedentem  
 occaſſione negligentia Cõmendatorum ejusdem, quietè acci-  
 pere poſſet, atque cum ea conſtituere, quomodo vellet. Fecit  
 Universitas per deputatos, Reſtorem nempe, Decanos, & Pro-  
 curatores ſatis officio ſuo; conſecutâque eſt Imperatoria Celſi-  
 tudo præſatam domum. Quam Imperator tradidit, neſcio  
 qua conditione, Nobili, atque quàm præſtantiffimo Domino  
 Joanni Sübenhierter, Ordinis Militaris S. Georgii Magi-  
 ſtro; accepitque idem D. Sübenhierter poſſeſſionem ejus-  
 dem in præſentia prædicti Abbatis, & plurimorum nobi-  
 lium Virorum.

Cauſa porro inſtituendi laudatum ordinem Fride-  
 rico fuit, quòd Turcæ per illos annos non ſemel hære-  
 ditarias Provincias, Styriam, Carnioliam, Carinthiam-  
 que repentinis incurſionibus pervãſtaſſent; quibus re-  
 primendis Ordine illo nihil opportuniùs viſum. In  
 Sedem Generalis Magiſtri Milleſtadium Carinthiæ an-  
 no prædicto 1468. attribuit; Religioſis D. Benediſti,  
 quorum illud erat cænobium, per alia ejusdem fami-  
 liæ domicila diſperſis. Nec Milleſtadienſi tantùm Do-  
 mino potiebatur Equeſtris hic ordo; ſed & ſplendidis  
 Carinthiæ caſtris Sterenbergâ, & Londſcronâ: in Au-  
 ſtria item, ſi fides Lazio, Trautmanſtorffio, Scharffe-  
 neckio, Petronello, aliſque alibi fundis. Equitum  
 ac Sacerdotum ordinem ipſum conſtantium Inſigne  
 fuerat Crux Rubea, quam quovis Sabbatho, & feſtis  
 Deiparæ diebus ſupra veſtem albam geſtabant. Pri-  
 mus Generalis Equitum Magiſter, ut author vitæ D.  
 Domitiani habet, fuit Joannes Sübenhierter, quem,  
 ſucceſſorẽſque Principis titulo Cæſar honeſtavit. Intẽ-  
 puit tamen brevi, nec multum extra ſæculum excur-  
 ſit iſthoc inſtitutum; nam ordine illo vel inter bella  
 extin-

extincto, vel infectis Lutheri dogmate Provinciis, illo quoque evanescente, ejusdem bona, & reditus ab Austriæ Archi - Ducibus in alios translati sunt. Plura de Ordine illo benevolus Lector in Actis Sanctorum Papebrochii, & in Germania Austriaca reperiet.

Anno hoc eodem juxta Ederi Catalogum, aut si fides major Middendorpio, An. insequenti Moguntina Literarum Academia à Dietrico Isenburgio, ejusdem Archi - Præsule, est erecta. Anno subinde 1501. statutum, ait, ab Universitate illa: ne quis ad Scholasticos honores admittatur, qui de Conceptione Beatissimæ Virginis juxta Basileenlis Concilii sanctionem non sentiret.

### An. 1482. usque ad 1485.

**E**T Austriæ, & Universitatis res triennio isto sanè fuère afflictæ; cùm non tam bello, quàm belli metu, grassante lue pestifera, atque consecutâ rerum omnium difficultate Academiæ alumni aut morte absumerentur, aut alio dilapsi essent, quòd literis parum comodè vacarent; recrudescente enim rursus Mathiam inter, & Fridericum bello, hyeme exeunte An. 1482. validus exercitus Austriæ infunditur; ac primùm rursus Haimburgum obsessum; quod multis suorum perditis Mathias tandem expugnat. Interea Imperator contermina præsidario milite obfirmat oppida; Leüthapontem præcipuè, & Korneoburgum, quæ duo veluti Viennæ brachia habebantur. Mathias ne tempus tereret, Leüthapontem præteriens, vicinis Viennæ Regionibus militem, stragem, & terrorem infert. Et tentasset Viennam, ni sæviens jam hyems Hungarica in hyberna copias revocasset.

Vix Ver anni 1483. rediêrat, exercitum in Austriam reducit, jubetque Stephanum Hazy Leüthapontem infesta aggredi obsidione; quam demum post quatuor ferme mensium incredibilem obessorum virtutem armata manu cæpit. Primo furore non mediocriter in oppidanos sævitum: Cæsareus miles in arcem

confugerat, quam post toleratam mensis unius obsidionem tradere, inedia magis, quam armis, coactus est. Toto itaque ferè anno obsidio Leüthapontis Pannonicas laceffivit vires.

Belli hujus seriem, miserámq; Viennensium conditionem Annales Theologici his verbis annotârunt: *Superiori anno, nempe 1482. oppido Haimburgo per Regem Hungaria tota astate obseffo, & circa festum Michaëlis obtento (nam famis necessitas illos ad deditionem urgebat) statim postbac milites erga Viennenses adornat, & montana circumquaq; occupat; ad S. Vitum etiã opprimit: nam Castellanus se continere diffidebat; hoc fortissimè munit fossis. Orientem ergo versùs nos regno suo, & munitionibus Rex Mathias premebat: nam Civitatem quoque Baaden in deditionem accepit, quã erga Meridiem nos impediēbat. Ad Occidentem, & trans sylvam habuit S. Vitum, & Civitatem S. Hypolitum; cujus aggerem altiore muris extulerunt, ubi totius exercitus sui Princeps Thobias de Zernahora Moravius residebat. Habuit Rex eam Civitatem per deditionem, & impignorationem ex Capitulo Pasaviensi, quod Cardinali, & Imperatori erat contrarium, & Electo adharebat. Habuit ex eadem causa, & Mauttern ad Danubium sitam urbem veterem: ex qua munitione facta censu aureus Danubio imponitur; & hominibus descensus recluditur acerrimè. Ex parte verd Aquilonari, unde Wiennensibus frumentum adducitur, habuit per deditionem Civitatem Enzestorff, fortalitium in Stockerau, atque apud Neoburgum Tritici, sive Forensè, in Tuttendorff fortalitium. His ex locis conatur Rex Wiennensibus famem inferre (nam sitim vix poterit) verùm ejus conatus non penitus frustratur: nam panis, qui olim tribus venibat numis Wiennensibus, nunc viginti vix emebatur; deinde etiã libra carnis plus quàm quadraginta numis mercabatur; vitulina, & agnelina incomparabilis, de quo mirari non sufficio. Multus populus in diem vivens obiit. In Moraviam, Bavariam, & aliorum vinea, quod mirum dictu! per Huldam ducuntur, & præstatione florenorum aliquorum de aliquot vineis per Huldam, hoc est*  
*scedu-*



*scedulam quamdam cum caractere signatam, utitur; qui caracterem hunc non habuit, captus abducitur, se defendens occiditur: mulieres, & virgines spoliantur in vineis; vinea verò inculta manebant in anno præfato, in quo copia vini fuisset uberrima, ac super quàm necessaria; Scholares verò, & discipulos superioris anni pestis fugârat: Mansisset & ex eis nullus, nisi de proximo gradum sperarent. Accessit ex novellis nemo, sicq; desolata in suppositis elanguit Universitas, in Doctõribus tamen, & Magistris satîs copiosa.*

Vienna undique ita hoste circumfessa, exhausto quo ærario laborabat; quod ut ad solvenda stipendia augeter, ab Universitate etiam, non jure, sed pietatis titulo subsidium exorat: nec de fuere Facultates, quamvis & illis hoc tempore parum esset prospectum: contribuit siquidem Facultas Theologica 15. Juridica 6. Medica 7. Facultas Artium 50. fl. Hungaricales, hoc tamen pacto: ut impensæ hæ Facultatibus à Consilio Universitatis suo tempore ex pœnis Suppositorum redderentur.

Interea nec deerant Superioris Austriæ Proceres, atque nonnullæ ad Danubium sitæ urbes, qui instructis navibus, & per medios hostes Urbi fame laboranti, omnique commeatu interclusæ succurrerent. Nam cum vicinæ civitates, Actorum verba reddo, egestatem, pressuramque Vienna undique hoste circumcincta non ignorarent, maximè Stain, & Khrembs, Baronésque supra Onasum, nostræ inedia succurrere volentes, mirum in modum (quod usque ad nostra tempora invisum est) naves ad bellum plurimum aptas disposuerant, onustas bladis, farinâ, segimine, pernîs, aliisque plurimis ad vitæ sustentationem necessariis, numero sedecim. Inimici verò id ipsum sentientes, totis se viribus opposuere, quò naves prædictæ ad nos haud quaquam pervenirent. Habebant namque fortalitium in Danubio penes Stockerau. Fuerant & tunc Bombardæ parvæ, mediocres, item maxima in variis locis, ubi nobis amplius nocere poterant, prope aquam posita; & maximè prope Neoburgum Forensè, ubi tunc exercitus hostium positus

*fuerat cum variis machinamentis. Neoburgum quoque Claustrale tunc item nobis infestum erat. Verum ingenium contra ingenium in hostilibus rebus agitur indies; qua de re tres ex illis, quas commemoravi, naves in magna quinta Feria sese paraverunt itineri, rei exitum fortunæ committentes; quæ dum prope usque Neoburgum Forense salva pervenissent; una ex illis, major inter cæteras, passa est jacituram non mediocrem; ordinavit namq. hostium dolositas suas machinas in modum crucis contra nostros; ita ut sine læsione transire liceret minimè. At ubi nostri eum locum pertransire vellent, illi sua jacula in eos cruciatim, & item transversaliter trajicientes, peremerunt quatuordecim personas, miserabiliter eas lædentes; ita ut in frustra eas bombardarum jaculis comminuerint, in morem avicularum hinc inde volitantia in aëre, sparso in remis sanguine, ut cernere horrendum esset. Reliqui tamen Wiennense littus attingere ferè propè horam septimam magnæ Sextæ Feriæ in manè, in quarum occursum in Mediannem se receperunt Wiennenses non mediocriter armati.*

Non defuere Facultates, Artium potissimum, quin, futuram rerum egestatem prospicientes, sibi, suisque alumnis providerent: Ex advecta igitur navibus farina tres, quatuorve modios Facultas Artium emere parabat: at à Magistratu Civium prohibita; cum metretis, nedum modiis comparandam diceret farinam, ne egenis ea quoque deficeret.

Erat interea etiamnum in fide Cæsaris Korneoburgum; quod ubi Hazijs obsidione urgere pergit, Cæsar periclitanti collectas ex Noricis, Vindelicisque copias submittit: at non tam justo certamine, quàm velitatione congressis, germani non parva sui strage repulsi, in vicina Oppida sese recepere: Hazijs dum assultum adornat, glande ab obsessis emissâ, interiit. Cum demum fame adacti deditiorem fecere Korneoburgenses.

Tametsi jam anno 1480. Thomas de Cilia Præpositus ad D. Stephani Cathedralē Ecclesiam nominatus esset, Cancellarii tamen munus ab anno 1477. ad annum

annum usque 1482. à Reverendissimo Joanne Strigoniensi Archi-Episcopo, ac deinde, ut dicetur, ad Salisburgenses Infulas translato, administratum esse, Acta Philosophica meminerunt: Dum per laudatos annos ejusdem Archi-Episcopi autoritate cancellos promovendis ad supremos literarum honores fuisse apertos affirmant: id quod deinde anni 1483. initio, die scilicet 2da Januarii, Licentiâ Bernardi de Rohr Viennensis Episcopatus Administratoris præstitum insinuant. Cùm itaque anno 1484. 2da Januarii Candidati pro Magisterio Artium præsentandi forent; duo sese Vice-Cancellarii obtrusere, Andreas de Pottenbrun, se ad id à Thoma de Cilia denominatum, & Joannes Kaltenmarcker id muneris sibi delegatum à Reverendissimo Bernardo contendens. Re ad aures Cæsaris delatâ, congregatæ in Vigilia Epiphaniæ Universitatis Superintendens Ægidius Schattauer literas Cæsareæ Majestatis adfert, *in quibus cavebatur: quod Universitas D. Præpositum, Magistrum Thomam de Cilia pro Cancellario, & sequentes Præpositos Ecclesiæ Cathedralis Wiennensis, & nulum alium deberet recognoscere.*

Sub hæc vix quadriennali felix connubio, an. 1482. Maria Burgunda, Maximiliani, ea tempestate bello Gallico, pacandisque Belgis distenti, Conjux lectissima, vitâ excessit: cùm in venatione equo lapsa, fracto fæmore, omnem tractationem partis affectæ per verecundiam refugeret; Provinciarum hæredibus Philippo, & Margaretha relictis.

Eandem binos post annos, nempe 1484. insecutus est Sixtus IV. Summus Pontifex Idibus, Spondani ex calculo, Augusti: cui 4to Kalendas Septembris à Cardinalibus sublectus Joannes Baptista Cibo, sub Innocentii VIII. nomine. Quo is in Archigymnasium nostrum animo, quantæ hoc ei existimationi, ex iis, quæ ad annum 1490. dicentur, palàm erit.

Fundatam circiter annum 1484, Ederus meminit, *Bursam Pauli*, sic dictam à Fundatore suo Magistro Pau-

Paulo wan de Kennrat, Theologiæ Doctore, Ecclesiæ Cathedralis S. Stephani Canonico, ac Verbi Dei Encomiasie disertio: scripsit quoque non pauca, quæ in unum collecta codicem, in Bibliotheca Academica aservari dicuntur: Vendita, certis de causis, sub annum 1518. hæc Bursa, aliâque coëmpta domus, quæ abinde *Bursa Gentium*, seu *Haidenheimb* appellari cæpit.

## An. 1485.

**A**D ultima demum fata res Wiennensium, urbisq; status recidit: nam sub novi Anni initia urbem Mathias arctius circumcingi, omnesque submittendæ annonæ, com meatûsque vias intercludi jubet. Tenuit hæc circumvallatio ad Aprilem; cùm admoto urbi validiori exercitu acrius obsidionem urgere, atque expugnandæ Viennæ ipse præsens adesse, institit. Et res Wiennensium accisæ tantùm jam erant sub medium Majum, ut capto suburbio Stubensi, extrema, Viennensibus fame propè pereuntibus, hostis minaretur: in macellis siquidem equinam carnem venum propositam multi scribunt; nec à muribus, & fellibus Cives abstinuisse. Destituti itaque omni Spe, ac subsidio cives deditionem dum meditantur, ad Universitatem præprimis recurrendum rati, ex cujus consiliis rebus suis prospicerent.

*Decimâ tertiâ Maji, inquiunt Acta Artistica, fuit congregata Universitas ad lamentabile desiderium Dominorum Civium Wiennensium; cùm namque Dominus Rex Hungariæ Mathias Stormali vi partem suburbii Stubensis obtinisset, videlicet Monasterium S. Nicolai, & suburbium usque ad lapideum pontem; ibidem Domini Cives timore perterriti, Universitatem, & simul Prælatos Wiennenses orant humiliter, quatenus pro bono, & conservatione universalis Reipublicæ civitatis apud se in Domo Consilii convenirent. Exaudita ipsorum petitione, comparuerunt apud eosdem utriusque partis viri amplissimi; D. Rector pro tempore Leonardus Fruman, A.A. Magister, & Theologiæ Licentiatus,*

*cum*

cum aliquot Decanis, & Doctoribus; & simul Dominus Officialis; atque Domini Prælati Scotorum, S. Dorotheæ, & reliqui; in quorum conspectu Dominus Magister civium protunc, Stephanus Oenn, Dominorum civium proposuit desiderium lamentabili voce, innumerisque suspiriis: Præstantissimi, inquit, viri, Domine Rector, Domini Prælati, & reliqui Domini, & Patres nostri colendissimi: vident, & intelligunt vestræ Præstantiæ, in quod hodie vos, & nos conjuncti simus periculum corporis, & rerum, & maximè nos Laici, qui omni humano destituti sumus præsidio, & auxilio, præter ipsum, quod apud vestras Præstantias nobis est repositum. Considerantibus itaque, quod noster inimicus gravissimus, Dominus Rex, non tantum Vobis adversetur, quantum Nobis; cum Vestræ Præstantiæ in hac parte litis neutrales constitui debeant; quare ad vos tanquam ad nostrum singulare, & ultimum refugium confugimus, oramusque, ut vestræ Præstantiæ Vobis, & Nobis consulant, quibus ab hoc maximo nostro periculo animi quiescamus. Petimus denique, ut vestræ Præstantiæ apud Regiam Majestatem, tanquam eidem grata, laborent: ut saltem pro quibusdam, ad tractandum cum sua Majestate pro mitigatione iræ ejusdem, atque ad inquirendum, quid pro tali, quâ hactenus in nos usus est, ferietate prætendat, salvus haberi possit Regius conductus.

His, & aliis auditis: Dominus Rector receptis secum nonnullis Doctoribus, cum Domino Officiali Wiennensi, Domino Leopoldo Pranz, adiit Dominum Fiscalem, Magistrum Joannem Keller, pro tunc Cæsareæ Majestatis Præsidentem in Vienna; eique civium mentem exponunt; suam simul Præstantiam consulunt super ea. Respondit Dominus Fiscalis: Non possum amputare civium desiderium; neque jubeo, quid faciatis, neque prohibeo. Nam ego ipse apud eos expecto periculum in caput meum; si assentieritis eorum desiderio, non erit peccatum.

Itaque 14tâ Maji manè horâ sextâ Rector Universitatis Consilium convocat; Facultatum item Primores, ac rursus mentem civium in tres divisam partes

proponit : Imò an audienda esset petitio Civium , quâ peterent , ut Universitas cum Prælatiſ literas ad Regem daret impetrandi ſoloi conductûs causâ ? Circa quam partem viſum eſt omnibus , ut fieret. 2dò an aliqui de Universitate ſint mittendi ad placandum Regem , & qui ? ac concluſum , quod ſic ; & ex pluralitate ſuffragiorum deputati ſunt, Magiſter Leopoldus Pranz officialis , Doctör Canonum inſignis ; & Magiſter Wolffgangus Stadler itidem Canonum Doctör. 3tò an ſicut conceperant Domini Cives , illi Deputati , poſt placatum Regem , deberent , ac poſſent in reliquis tractandis nomine Universitatis collaterales fieri Dominis Civibus ? & ruruſus in affirmativam conſeſſum.

Hâc Universitatis ſententiâ ad Magiſtratum Civium delatâ ; quemadmodum laudati annales proſequuntur , extemplo ejuſdem deputati cum Præpoſito S. Dorotheæ & Carmelitarum Priore , eodem die Regem adiêre ; referunt reduces , ſe non ſinè gratia ſuſceptos ; redeuntque altera die multâ Regis benevolentiâ , & Universitati , & urbi , ad promiſſâ. Interea ubi articuli dedendæ urbis conſeſſi ſunt : præſeſti illi quoque Academico in Conſilio , qui conſervandam libertatem , conſuetudines & privilegia Civium , Prælatorum , Universitatis attinebant. Propoſuit ſimul Rector in deliberationem ; an deberent Civibus præſtari perſonales aſſiſtentia per Universitatis membra ? dum hac à Facultatibus deliberantur , veniunt duo ex Civibus , N. Hornperger , & N. Leübenpök , petentes accelerationem ; promittitur ipſa ; mittuntur ex conſilio Rectoris Decani Theologiæ , & Artium , qui & articulos ſibi placere , & fieri aſſiſtentiam Civibus referrent. Verùm ubi ad conſilium civium venêre , eorum nomine deputatis noſtris , ait Dominus Perman : non indigemus nunc aliquibus ex vobis ; quia Maieſtas dicit , quodd velit tractare nobiſcum , quia non ſciat diſputare cum doctis , quia non didicerit. Irrisam ſe quidem dolens Universitas ; gaviſa tamen plurimùm , quodd Dei nutu periculofis his tractatibus fuerit liberata. Excluſâ ſic Universitate , urbem egreſſi Senatores , Hornperger , & Leübenpök , ac nonnulli cives quatuor in curribus ad tractandum

*dum cum Regia Majestate; remanente in civitate Magistro Civium, Taschler, Perman, Zeller, & Casparo Schneider. Stabilitis ita dedendæ urbis conditionibus, sese, ac urbem Mathia Regi submisere. Rex ovans prima Junij Viennam ingressus, die Dominica insequenti Beatrix Regina singulari pompâ urbem est inuenta.*

*Ingredi itaque devictam ab se Viennam Ovantis in morem cum Mathias, & voluntate sua, & Civium hortatu constituit; nec ea in rerum vicissitudine Universitas suis deesse partibus voluit, quibus Regis, quem dura temporis necessitas Dominum dedisset, animum benevolentiamque mereretur; sic enim Annales iteratò recitant. In die Junij introivit Regia Majestas cum magno & Regio apparatu, præmissis ad octo millibus potissimum equitibus, aptatis ad bellum: manifest eo die foris Domina Regina, die Dominica insequenti, nempe quinta Junij, ingreditur ipsa magnâ cum Solenitate. Intranctibus ipsis, scilicet Rege, & Regina, sequitur Universitas in notabilioribus suppositis. Sollicitat spectabilis Doctor Magister Martinus, Plebanus Ecclesiæ B. Virginis Buda, impetratque Universitati audientiam apud Regiam Majestatem pro susceptione ejusdem: itaque per Organum famosissimi viri Doctoris Canonum, & Sacrarum Literarum, Magistri Nicolai de Creutzenach suscipiuntur uno labore ambo: finitâ Arengâ, & commendatione Universitatis ultimò adjectâ, ore proprio fatur Regia Majestas dicendo: conabimur utique omni labore, quod Vestra Universitas conservetur, in suis privilegiis, & libertatibus; & quod ipsa non minuantur, sed augeantur, & quod redigatur in pristinum statum, & floreat, quemadmodum temporibus retroactis. Hac, & similia dicebat sua Majestas Regia latino egregio. Acta sunt hæc in choro Ecclesiæ S. Stephani, stantibus ipsis pariter usque in finem; arrexit diligentissimas aures Domina Regina; sæpe, cum placita audieret, subridendo. In introitu Regiæ Majestatis processiones Universitatis, & reliquorum statuebantur in Ponte Lapideo ante portam Stubarum: erat tunc validus ventus, & sparsa copioso pulvere multis oculi sunt laesi;*

*lassi ; cùm autem Domina Regina ingrederetur , fuit quasi similis ventus ; sed processiones sistebant intra portam Stubarum per totum vicum.*

Captâ Viennâ Rex victoriam prosecutus , Inferiori Austriâ ferè omni potitur ; tandem & Neostadio post septem mensium obsidionem fame ad deditionem compulso. Fridericus , qui laboranti Austriæ parum succurrerat, quod pluris sibi bella filii Maximiliani cum Belgis , Gallisque duceret , interim cum octingentis equitibus Austriâ excefferat , Germaniæ Principum auxilia operiens , & animo fortunam suam non nimis iniquo ferens : unde cùm illa verba : *summa felicitas est , rerum irrecuperabilium oblivio* , passim usurpâisset , symboli locum obtinuere.

Aderat interea festa D. Joannis Baptistæ dies , quæ Ordinibus, Civibusque fidelitatis juramento præstando constituta à Rege fuerat. Quo nomine cùm & Universitas à Civium Magistratu Regis jussu conveniretur ; res & indigna , & cum Academiæ legibus pugnare visa ; conclusumque , ut Rex edoceretur : præter Universitatis , quæ ex Clero maximam partem constaret , id morem esse ; neque unquam ad ejusmodi eam juramentum adauctam : quod si proposito tamen Rex dimoveri nequitiam posset , postulandas potiùs salvi conductus literas , quibus , jusjurandum abnuentibus liber è civitate discessus concederetur. Eam in rem deputati Dominus Rector Leonardus Fruman , Decanus Theologiæ Nicolaus de Creützenach ; Magister Georgius Schöbl locò Decani Medicorum ; & Decanus Facultatis Artium M. Thomas Wiener ex Neuburga Forensi , cum duobus Procuratoribus ; 23tiâ Junij Reverendissimum Dominum Episcopum Jaurinensem , Regis Thesaurarium , adeunt , acurbationem Universitatis , quæ in magnum ejus ruinam cederet , ob oculos ponunt. Suscepit is benignè Universitatis causam , ac onus amovendi periculum.

Tristitia adeo Austriæ fata lætior præcesserat Nuntius



cius Româ , qui Divum Leopoldum Austriæ Marchionem ex Babenbergica familia ejus nominis IV. Sanctos inter , solemni ritu , ab Innocentio VIII. anno hoc die Epiphaniæ promotum esse retulit.

Conjicit Episcoporum Viennensium Catalogus ad annum hunc primi Viennensium Antistitis Leonis de Spauer Obitum ; atque eidem ad infulas suffectum Bernardum de Rhor , Archimyslam antehac Salisburgensem , quo post gesta cum Friderico Cæsare bella eidem conciliatus , seu quietis amore , seu , ut rapinas & odia Mathiæ Regis effugeret , se anno 1482. abdicaverat , ac Friderici in gratiam Joanni Archi-Episcopo Strigoniensi , ut Hundius ait , ex Bratislavia oriundo ( quem malè nonnulli Bernardi fratrem literis prodiderunt ) cesserat. Ad hunc igitur annum 1485. si referenda est Bernardi ad Viennensem Episcopatum à Friderico Cæsare denominatio ; eundem , adhuc vivo Leone , jam ab anno resignationis suæ , Administratorem Episcopatus Viennensis fuisse constitutum , est necesse. Apertè enim Acta Philosophica ad annos 1483. & 1484. eundem Bernardum de Rhor Administratorem Episcopatus Viennensis nominant , cujus auctoritate , ut superiùs meminimus , Cancelli sint promovendis ad litterarios honores aperti. Cæterum Bernardus eodem hoc anno Episcopatu Viennensi rursus excidit. Captâ enim Viennâ ab Rege adversario Urbem , Insulasque deseruit : quibus Urbanus Agriensis Antistes , Mathiæ Regis Ecclesiastes , & Quæstor admotus est.

### An. 1486. usque ad 1490.

**P**ost amissam Viennam nonnulla lux serenior Austriæ affulsit ; dum anno 1486. Maximilianus concordibus ordinum votis , Romanorum Rex decimo sexto Februarij Francofordiæ est proclamatus , ac nonâ Aprilis Aquisgrani inauguratus. Non licuit Universitatilætitia significationem palam contestari , alieni sub domi-

dominatu Principis: verum hanc ipsam serenitatem mox turbo factionum involuit, Maximiliano Brugis anno 1488. insolentissimo ausu à seditiosis Civibus in custodiam conjecto; cujus rei nuncio Fridericus in Belgium adproperat cum exercitu, atque Maximiliano libertatem, Brugenlibus perfidiæ metum, demum pacem adfert.

Sub annum 1486. negotii quidpiam Facultati Theologicæ faceffivit Medicinæ Doctor, Magister Georgius de Cilia, qui ordinem S. Pauli primi Eremitæ ingressus, haud obscurè de erroneis dogmatibus erat suspectus: quod Acta ejusdem Facultatis ita recensent: *Die S. Georgii coram Facultate Theologica exposuit quidam Venerabilis Pater Ordinis S. Pauli primi Eremitæ; quomodo ante dictus Dominus Doctor declinasset ad quodam Eremitorium S. Pauli prope Budam, ibique staret in anno probationis, vocareturque Leontius; & nunc citò expiraret probatio ejus. Hic cum inter fratres ejusdem loci distribuisset quosdam tractatulos, venisse, ajebat, rumorem ad præfatum Eremitorium, de quibusdam articulis hic Vienna in Theologica Facultate reprobatis: & occasione eorum se per Seniores suos esse missum, ut illos petat à Facultate, ut Ordini caveatur à scandalo. De iisdem itaque informatus, cum literis credentialibus ad superiorem suum est remissus. At is brevi rediit, ac à Facultate petiit nomine ejusdem Georgii, ut quamvis Scandalosa quædam scripsisset, calumniâque cuidam Theologiæ Doctori intulisset, sine impedimento Facultatis, & potius ejus favore recipi possit ad Professionem nominati Ordinis. Cui responsum: quod Facultas Theologica non velit nominatum Doctorem impedire in profectu salutis, sed potius ad hoc promovere; ea tamen conditione; quod præfatus Medicinæ Doctor satis faceret Facultati Theologicæ per deprecationem saltem litterariam, quæ sit munita signeto superioris Monasterii, in quo profiteri intendit.*

Anno 1487. confectum rursus memorant Acta Artistica, Rotulum Doctorum, Magistrorum, Baccalauræo.

reorum , ac Scholarium Universitatis, ad Urbem transmittendum : de quorum Rotulorum ratione , formâque ad annum 1390. dictum est.

Eodem anno 1487. eadem Acta , è D. Augustini Eremitarum familia Professum nonneminem , eumq; primum, Magisterii in artibus gradum petiisse, docent. Reluctata est diu multumq; Facultas , nec in rem adeo novam , & ad hæc usque tempora unquam usitatam facile consentire placuit: dein tandem præsentatâ superioris sui Facultate , & plurium , eorumque gravium virorum commendatione exhibitâ , ad petitum in artibus honorem admissus fuit.

Sub hæc edè connisus Innocentius Pontifex, ut Imperatorem inter , & Hungariæ Regem pax componeretur ; misso , ut Acta Theologica habent , anno 1488. Sedis Apostolicæ Legato cum potestate à latere , Angelo Ortono Episcopo ; quem , ut eadem Acta innuunt , Universitas cum Arenga suscepit. Verùm primis Oratorum congressibus id negotii minimè confici poterat; Mathiâ septingenta aureum numum millia postulante , Imperatore verò Austriam sibi absque ulla sumptuum restitutione reddi volente ; quod aliunde Austriam à Mathiæ obitu , quem & valetudo fracta , frequensque sub ea tempora morbus non diu abesse persuaserat , ad se redituram speraret. Confecta nihilominus pax est anno 1489. Budæ , ac ipso Corporis Christi festo publicata : dies quoque dictus , quo Imperator , & Rex colloquerentur , & quæ sancita , rata forent. Verùm id colloquium intermissum oportuit ob ingravescentem in dies Mathiæ valetudinem , & secuturam anno altero mortem.

Dum hæc Principes inter aguntur ; Universitati non parum , nec semel de obtinendis Magistrorum stipendiis cum Rege luctandum fuit ; quorum defectu , & alias se adituros minabantur scholæ ; nec Universitatem subsistere posse videbant. Soluta sunt nonnulla anno 1488. ut Acta Theologica meminere , assignatione Budensi ex ærario facta.

Nec

Nec deerant , qui sub hæc Hungarici dominatûs tempora bonis artibus Viennæ excolerentur : hos inter fuisse, Ederus meminit, Sigismundum ab Holeneck Decretorum in Universitate nostra Doctorem , deinde, ut Hundius habet , 1494. Archi-Episcopum Salisburgensem. Thomam de Erket Strigonienfibus postea Infulis , ac Purpurâ Cardinalitiâ insignem. Balthasarem Baronem de Stubenberg Juris utriusque Doctorem , Salisburgi Canonicum. Georgium de Neüdegg Episcopum subinde Tridentinum , & Austriæ Cancellarium. Nicolaum Comitem de S. Georgio & Pössing. Mathæum Lang à Wellenburg pervetustâ Patritiorum Augustæ familiâ natum , qui Gurcenses primùm Infulas , Salisburgenses Archi-Episcopales, ac demum Cardinalatûs Purpuram Maximiliani Cæsaris non tam favore , quàm propriis virtutum , & eruditionis meritis est consequutus.

### An. 1490.

**E**X morte Mathiæ , quam anno hoc obiit , Vienna cum Inferiori Austria ad Maximilianum rediit , cui vivo adhuc Patre hæreditariæ Provinciæ cessione Juris , cum Hungariæ regno ex pacti debito obvenêre. Expiravit autem , ut Acta nostra annotarunt , Mathias sub noctem quartæ Aprilis, quæ dies Martis erat, Viennensi in arce apoplexiâ tactus , horrendos , ut plerique referunt, inter ejulatus ; relicto filio unico Joanne, sed illegitimo toro nato. Prænunciatam fuisse mortem Bonfinius scribit, leonibus eo, quo periit, die Budæ extinctis, & nullis tum Corvis ibidem visis, Albæ autem ingenti numero. Princeps dum viveret , omnibus sanè animi , & fortunæ dotibus ornatus ; id præcipuè à nobis ei laudis dandum : quod arma inter non minùs literas , ac literatos semper coluerit ; extructâ in arce Budensi Bibliothecâ, utriusque linguæ fœcunditate, numerô , cultâque librorum refertissimâ.

Vix Mathias diem supremum clausit ; Universitas liber-

libertatem, veterésque Austriæ Principes respicere cæpit: malueréque non pauci Dòctorum æquè, ac Studio-  
forum, Viennâ excedere, quàm Juramento à Step-  
hano Scepusiensi Comite postulatò sese obstringere, quòd  
*nempe nec directè, nec indirectè verbò, vel factò agere contra  
coronam Hungariæ, nec quemquam Hungaris faventem la-  
dere vellent*: adeo ut in Bursis, ac Codriis, in quibus an-  
tea septuaginta, & amplius, jam vix decem, duode-  
címve alumni censerentur.

Verùm non diu hoc in Viennenses, Universitatém-  
que fuit Stephani Hungarorum Præfecti imperium,  
administrâ maximè Universitate: nam inclinatis jam  
Austriacorum in Maximilianum animis, ac pro coro-  
nâ Hungariæ pluribus procantibus, quam in partem  
Vienna secederet, dum hæret dubia, ad Universitatem  
rursus confugit, ejus consiliis obsequi certa: *Die enim  
septima Augusti D. Affra sacro cives delegati, verba acto-  
rum sunt: Universitati congregatæ proponunt: se in magna  
positos perplexitate, super eo, quòd non plenè, certèque infor-  
mati essent, quem in eorum Dominum verum recognoscere  
deberent, ed, quòd ipsi juramento se obstrinxissent Regi Hun-  
gariæ Mathiæ, successoribusque suis: modò autem, quis ve-  
rus esset successor, cum ipsi juris inscii essent, minimè disc-  
tere ipsis possibile fore, dicebant. Adjiciebant quoque, quòd  
Rex Bohemiæ jam per nonnullos regnicolas pro Rege electo ha-  
beretur: Etiam, quòd quidam filius Regis Poloniæ, Albertus  
nomine, se jus ad idem regnum Hungariæ habere contendat.  
His accederet filius Mathiæ, Joannes Corvinus Spurius, qui  
& coronam, & Thesaurum regni habet. Denique Maxi-  
milianus Invictissimus Romanorum Rex, Friderici Impera-  
toris filius, resignatione jurium Paternorum sese indubita-  
tum Regem Hungariæ speraret: ed, quòd in quibusdam com-  
pactatis, & inscriptionibus inter Divum Fridericum Roma-  
norum Imperatorem, subsque legitimos successores ex una  
parte, & Mathiam Regem Hungariæ, caterósque regnicolas  
altera ex parte cautum fuerit: in quantum, si præfatus Ma-  
thias Rex sine legitimis hæredibus decederet, quòd tunc sine*

difficultate prædictum Fridericum Imperatorem, aut ejus legitimum heredem potenti manu Hungari in Regem sibi constituerent, constitutumque recognoscerent. Talia quoque, compactata Sedes Apostolica de certâ scientiâ approbavit, ratificavit, contravenientibus etiam maledictionem horrendam adjiciens. His itaque, similibusque terroribus perculsi cives, ad Universitatem confugere, petentes sibi eandem fore pro præsidio, ac sano consilio, tanquam ad eam, sub cujus arcanis cordibus scientia sit discernendi, quod cuique jus suum competat.

Auditâ eâ Legatorum oratione, more veteri à Facultatibus deliguntur, qui causam Civium disquirant, suamque ad Rectoris Consilium sententiam referant: Quâ perceptâ, decimâ Augusti Universitatis nomine eum in modum civibus est satisfactum: Quid relatorum, & inscriptionum veritate subsistente, confirmatione Apostolicâ, & inquisitione secutâ, consulat Universitas Studii Wiennensis; Inviçtissimo Principi, Domino Maximiliano Romanorum Regi, Austria, Carinthia, Styria &c. Duci, competere jus ad Regnum Hungaria ex cessione Serenissimi Principis Domini Friderici Romanorum Imperatoris Genitoris sui, Domini nostri gratiosissimi factâ; & illi tanquam vero, legitimo, certo, & indubitato Hungaria Regi ab omnibus incolis esse obediendum. Ea tamen cum protestatione Universitatis tanquam Clerica: se tali consilio non teneri, si quoquo modo ultio sanguinis, aut quavis alia vindicta inde sequeretur.

Opportuno recreati consilio Cives, extemplo artibus Maximiliani sese addixere, vitam, ac sanguinem pro eo daturi, missis, qui Principem venerarentur, Viennamque invitarent, Legatis. Erat tum Maximilianus Lincii, non mediocriter pronis adeo Viennensium in se studiis exhilaratus. Equestri igitur stipatus manipulo in Austriam descendit, rectâ Viennam petiturus: vigesimâ Augusti civitatem ingressus, Urbe obviam profusâ, magnos inter lætitiæ plausus excipitur: die altera ad D. Stephani sermone disertio per Nicolaum

laum de Creüzenach Theologiæ Doctorem reditus ejus Viennam felix, longumque imperium est acclamatum; non sine multa Regis in Universitatem commendatione. Cæterum tenebatur etiamnum ab Hungaris Arx Viennensis, quam postridie sui in urbem ingressus oppugnari cœptam, haud multo post deditione accepit. Inde non prosperis minus armis Neostadium, Leuthapontem, Claustro-Neoburgum, & reliqua præsidio Hungarico munita oppida vindicavit.

Quin eodem adhuc anno victore exercitu in Hungariam ducto, Sopronium, Sabariam, ac demum ad 14tum Kalendas Octobres Albam Regalem deditione capit. Belli hujus Hungarici causa Uladislaus Bohemiæ Rex, qui Hungariæ Regnum usurpare cæperat, à nonnullis partium suarum studiosis in Regem proclamatus. Adjecisset Maximilianus post captam Albam victoriis suis Budam, ni debita militi stipendia, sed dilata, seditionem in exercitu excivissent, & rei bene gerendæ, & victorias proferendi occasionem ademissent. Maximilianus ergo in Austriam regressus, seditionis authores suspendi, partim Viennam adductos gladio percuti jussit: in reditu Haimburgensem Arcem expugnat, omnemque Inferiorem Austriam Hungarico evacuat milite.

Vivebat adhuc Mathias, cum è vivis abiit Urbanus Antistes Vien. Eidem à Rege Hungaro in Successorem datus Joannes, Vesprimiensi jam Insula clarus, Vir ingenti zelo præditus. Præfuit Administrator, quo Acta nostra eum nomine compellant, annos ferè novem, donec anno salutis 1499. fatis concessit.

Ad annum hunc initia Academiæ Basileensis Ederus cum nonnullis refert: Verùm fundatam illam fuisse jam anno 1459. demonstrat ex diplomate Pii II. Pontificis Middendorpius, atque: eadem illi à Pontifice privilegia, quæ Bononiensi, Viennensi, cæterisque per Germaniam Academiis, indulta: ut proinde anno præsentē nonnisi quædam ejusdem restauratio facta fuerit.

An. 1491.

**D**um Maximilianus auxilia continuando in Hungaria bello circumspicit quidem, sed parum impetrat, Germaniæ Principibus concordiam potius cum Christiano, & affine Rege suadentibus, pacem cum Uladislao sancit has in leges: Uladislau Rex belli Hungarici expensas Maximiliano restitueret; titulus Regis Hungariæ Austriæ Archiducibus maneret; si Regem Hungariæ sinè Mascula prole decedere contingerit, Austriæ Princeps hæres, successorq; esset. Cujus compositionis formulam diffusè recitat Joannes Sambucus Tyrnavienſis, Universitatis nostræ, & membrum, & Scriptor apud Bonfinium haud ignobilis.

Interea, quòd eâ tempestate nulla, aut perparcè solverentur stipendia, industria, fervorque Magistrorum non parum elanguit; unde ad Fridericum, tum Lincii aulam habentem, Oratores stipendia rogaturi adornantur: redivère illi paucis post diebus, & præter largam spem retulère nihil; animo Friderici in Universitatem offenso, quòd ampliùs, quàm par erat, Mathiæ Regi eam favisse crederet. Lætius tamen anno inſequenti accepit nuncium, miſſo ad Universitatem Superintendente Bernardo Perger, qui feriâ 2dâ antè Purificationem B. Virginis Mariæ præter complura alia retulit: *Perſolvenda certò circa feſta Pentecoſtes ex telenio loſenſi ſtipendia; & ſe exaſperatum nonnihil in Academicos Caſaris animum leniſſe, omnémque ſiniſtram de Univerſitate opinionem eidem exemiſſe: eâ tamen adjectâ conditione: ne in futurum Univerſitas ulli alteri Principi, quàm Auſtriaciſ adhæreret.* Nonnulla denique Imperatorio juſſu in ſtudiorum ordine, rationéque, quæ reſtauratione opus habere videbantur, ordinari meliùs, & reformari poſtulavit.

Translatum anno hoc ad Conſtantienſes Infulas à Vienneniſi Præpoſitura, Univerſitatiſque Cancellis Reverendiſſimum Thomam de Cilia, eiſque eo in munere ſuffe-



suffectum Dominum Virgilium Cantzler, fragmentum quoddam Tabularii Canonorum D. Stephani memorat sequentibus verbis : *Anno Dñi M CCCC XCI. vacante iterum Præpositurâ per electionem, & consecrationem Domini Thomæ de Cilia in Episcopum Constantiensem, præsentatus fuit per Serenissimum Ducem Fridericum Rom. Imper. semper Aug. Dñus Virgilius Cantzler ex Salisburga, qui investitus, & installatus exstitit per Doctorem Hieronymum Hollnbruner, tunc Vice-Decanum, & Officialatus Commissarium, presentibus Consultis ejusdem Imperialis Majestatis, per baculum pastorem, annulum aureum, & biretum rubeum, die Dominica post Elisabeth.*

Sub hæc vitam posuit vir Consultissimus, Magister Nicolaus de Creußenach, Artium, Decretorum, & Theologiæ Doctor, tertium Universitatis Rector. Natione fuit Germanus ex Comitatu Sponheimensi, popularis Trithemii, à quo id laudis defunctus meruit : *Vir in Divinis Scripturis eruditissimus, & secularis Philosophiæ non ignarus, ingenio subtilis, vitâ præclarus, disputator acutus, & declamator sermonum egregius : qui in Archi-Gymnasio Wiennensi multis annis Theologiam publicè docuit, & tam apud Scholasticos ibidem, quàm Fridericum IV. magnam eruditionis suæ laudem, & mercedem obtinuit. Scripsit quadam præclara opuscula, quibus posteris nomen suum notificavit. Moritur Viennæ in Austria sub Friderico Imper. IV. & Innocentio VIII. anno Domini 1491. relicto Bibliotheca sua hærede Facultate Theologica.*

Nec longè ab hoc vitam quoque clausit vir in paucis eximius, ac Reverendus, Dominus Michaël Lochmayer de Haidegg Theologiæ, & Canonum Doctor, Passaviensis, & Viennensis Ecclesiæ Canonicus, bis Rector Academicus, relictis nonnullis voluminibus, quæ Possevinus recenset. Denique anno hoc fundatam à Magistro Oswaldo de Weikerstorff *Bursam Pruck* Catalogus Ederi docet.

**E**Rroneas suas, & scandalosas, hæresimque sapientes, quas jam ab anno 1483. in Schola Juridica docuerat, positiones retractare coactus est Mag. Joannes Kaltenmarckter Theologiæ, & Juris Pontificii Doctor Ordinarius, atque Officialis Pataviensis; Vir cæterum à multa scientia, & Rectoratu Archi-Gymnasii sæpius gesto insignis, multarum tamen turbarum non semel author, & Cervicis, ut Acta loquuntur, duræ. Delatus is erat jam anno 1490. à Venerabili Magistro, Fratre Udalrico Zehentner Ordinis Prædicatorum Facultatis Theologiæ Decano, suspectæ doctrinæ; sed cum isthuc commodum ageret Reverendissimus Dominus Angelus Ortonus Sedis Apostolicæ Legatus, apud eundem sese expurgarat: Quibus tamen minùs cæteris satisfactum. Romam igitur Magister Udalricus à Facultate Theologica ire jussus, coràm Kaltenmarckteri fidem, & doctrinam accusat; tantùmque effecit, ut Romam reus evocaretur. Nec abnuvit ille, sed causam acturus comparuit; minùs tamen, ac Viennæ, feliciter. Errorum enim convictus, doctrinæ retractionem spondit. Quæ omnia, quia plurimùm tum ad causæ notitiam, cum ad Facultatis Theologiæ sub id temporis commendationem, autoritatémq; faciunt, ex literis Apostolicis discere juverit, quarum sequens est tenor:

**Innocentius Papa VIII. dilectis filiis  
Decano, & Magistris Facultatis Theologiæ  
Universitatis Viennensis.**

**Dilecti filii, salutem & Apostolicam  
Benedictionem !**

**E**X his, quæ per Vos in confutatione, & reprobatione nonnullarum propositionum, & conclusionum, partim hæresim sapientium, partim erronearum, & scandalosarum, per dilectum filium Kaltenmarckter in ipsa Universitate vestra

*stra publicè legentem propositarum, laudabiliter egistis, pro defensione fidei Catholicae, & confutatione damnatarum opinionum viriliter Vos decertasse cognovimus, ut veros Theologos decet; in quo Vos plurimum in Dño commendamus, ac per Vos in hujusmodi damnatione facta approbamus, exhortantes; ut si qui talia semina haresum, aut speciem haresis sapientia pullulare cognoveritis, ad ea exstirpanda, & penitus eradicanda debitam diligentiam adhibere curetis. Cum autem dictus Joannes ad Curiam Romanam, ut vocatus fuerat, accesserit, seque coram Venerabilibus Fratribus nostris, Oliverio S. Sabine Neapolitano, & Georgio Uluxbones, Cardinalibus iudicibus Commissariis per nos deputatis præsenterit, erroresque suos humiliter confessus, veniam meruerit, injunctâ etiam pœnâ salutarî, prout ex forma sententiæ per præfatum Georgium Uluxbones Cardinalem (Dño Cardinali Neapolitano tum legitimè impedito) latæ plenariè cognoscere poteritis; volumus itaque, ac vobis mandamus, quatenus dictum Joannem Authoritate Apostolica requiratis, ut conclusiones prædictas, reprobatas, juxta continentiam sententiæ contra eum latæ, in publico revocet, & alia omnia sibi injuncta adimpleat, ita, & taliter, quod imprudentibus ipsis revocatio hujusmodi omnibus innotescere valeat. Quid si forsân dictus Joannes, per vos juridicè requisitus, facere recusaverit, quod tamen non credimus, nobis significare curabitis, quatenus eundem pœnis debitis punire valeamus; in contrarium non obstantibus quibuscunque. Datum Roma apud S. Petrum sub Annulo Piscatoris die ultima Junii anno M. CCCC. XCII. Pontificatus nostri annô VIII.*

Jeremias Baldanus.

Lecto igitur Brevi Apostolico Facultas Theologica à Joanne Kaltenmarckter, ut errores suos juxta tenorem literæ Apostolicæ revocaret, postulat; cui pœnitens obsecutus, confecto desuper à Facultate Theologica revocationis instrumento.

Haud multum post datas has ad Universitatem literas, octavo nempe Calendas Augusti extinctus est Innocentius VIII. Pontifex. Quem in Sede Pontificia

Electorum Cardinalium suffragio insecutus est 3. Idus Aug. Joannes Borgia, qui se Alexandrum VI. dici voluit.

Meminerunt etiam Acta anno hoc primum haberi captum à Facultate Theologica sermonem ad Clerum, & Universitatem in festo S. Leopoldi Austriæ Patroni: quem sub id temporis Panegyri Venerabilis Magister, Frater Joannes Forter Ord. Carmelitarum celebravit.

## An. 1493.

**P**Ace fruebatur demum Austria, & Germania serè tota; cùm Fridericus Imperator Lincij, ut Acta nostra notant, feriâ 2dâ post festum Assumptionis Virg. Mariæ (cujus semper vixit studiossimus, pervigilium festi illius cibi, potúsque abstinentiâ jam à pluribus annis colens) supremum obiit diem. Vixit universim An. 77. menses 11. cum natus esset An. 1415. mense Septembri, ex Ernesto Ferreo Austriæ Archiduce, & Gimburga Massoviæ Ducis filia: Princeps sapientiâ, gravitate, morúmque integritate præstantissimus, atque pacis egregius cultor, quâ tamen, præter ultimum vitæ annum, rarò fruebatur; unde Paulus Amalteus Artium in Universitate nostra Magister, ac Poëta in Eundem ita lufit:

Astra pius Cæsar pacato ascendit ab Orbe,  
Talis Vita fuit, qualis & interitus.

*Item:*

Augusto propior Fridericus Tertius, orbem  
Quinquaginta annis rexerat, atque tribus:  
Sed tribus hic vitæ Augustum superaverat ævo,  
Longior hic, ille est ditior Imperiô.

Erexit is An. 1461. in Carniola Episcopatum Labaconsensem Oberburgensis Benedictinorum Cœnobii redditibus fundatum. Neostadiensem An. 1470. Constitutis jam antehac in Capella Aulica, 1444. Præposito, Decano, & undecim Canonicis. Viennensem in Austria

ftria An. 1480. ut plura minorum gentium Cœnobia , Ordinémque Equitum S. Georgii alibi infinuatum præteream , Universitatis Fautor perpetuus. Appolitus est , non , ut habet Roo , Neapoli Austriæ , sed Viennæ in æde S. Stephani ; ita expresse præter Guspinianum , aliósque , Actis nostris fidem facientibus. *Invictissimus Dnus noster Imperator Fridericus IV. feriâ 2dâ post Assumptionem MARIÆ debitum natura in Linz persolvit , & in Profesto S. Augustini ejus Corpus de Linz nâpigio in Viennam honorificè ductum est , atque in Ecclesia S. Stephani in sepulchro Principum sepultus est.* Quo loco reconditus quievit ad Annum usque 1513. dum inchoato à se annis ante viginti monumento magnifico , & à Maximiliano filio tandem absoluto , illatus est.

Parentavit meritissimo Principi Universitas habito funebri sermone in Ecclesia Fratrum Prædicatorum : solutis funebribus accinxit se excipiendo proximè Viennam ingressuro Maximiliano Romanorum Regi , à quo & confirmationem Privilegiorum , & solutionem stipendiorum exorare constituit ; quod utrumque præstitum , sic referentibus Actis. *Feriâ quartâ ante Colomani Serenissimus Romanorum Rex, Dnus Maximilianus , Dnus noster nâpigio Viennam venit , qui & honorificè pro sua Regia Magnificentia in Ecclesia S. Stephani cum Arenaga , ut moris est Reges suscipere , susceptus est : atque Orator noster Dnus Doct̃or Briccius Regiam Majestatem exoratum habuit , quatenus sua sacra Mejestas privilegia Prædecessorum Principum Austria confirmaret , stipendia denique Dnis Lectoribus , sinè quibus Universitas subsistere non posset , daret.* Dnus Rex noster Serenissimus utrumque per suum Cancellarium ibidem promisit.

Cætera inter , quæ à Bernardo Perger Universitatis Superintendente pro emolumento , profectúque in Artium Liberalium studiis proposita fuère , visum quoque , futurum perquam salubre , si à Magistris Artium Plateales haberentur Congregationes : assensit Facultas , primâque haberi cæpit feriâ 2dâ post Octavam

Corporis Christi : sed quia haud quidquam fructus inde relatum , exercitatio isthæc abinde intermissa. Quid porro publicis hisce conventibus rerum actum sit , ex Actibus Artisticis discere juvet : *Convocati sunt inquit , à Decano Artium ex omnibus Bursis , & Codriis studiosi horâ Imâ ad statutum ante fores Collegii Ducalis circa partem Fratrum Predicatorum locum ; & venerunt in satis copiosa multitudine rerum novarum cupidi ; venit Superintendens , omnes Facultatum Doctores multi Laici : & habebatur conversatio publicè , suppositis invicem de assignata materia disputantibus , & doctrinam suam conferentibus. Continuata illa fuit usque ad Calendas Septembris ; verum cum pauci jam comparerent Facultatum Magistri , & Doctores , Civibus etiam conquerentibus de discursu studentium in Civitate adhuc circa horam 7mam ; ad Calendas Septembris Conversationi plateali finis datus est : neque imposterum habendus censebatur.*

### An. 1494.

**M**Emerunt Acta nostra ad annum hunc , primum , fundatis à Maximiliano Romanorum Rege stipendiis , constitutum egressæ Grammaticam juventuti Humanitatis Magistrum. • Fuerat is Conradus Celtes , jam antehac à Friderico IV. Laureâ Apollineâ redimitus : cui à Facultate legendi hora assignata est 1ma ad 2dam Author verò Virgilius.

Eodem Anno hoc in Juristarum Scholis circa Festum D. Joannis Baptistæ Jus profiteri cæpit Excellens Juris Doctor Hieronymus Balbus Paduâ Viennam excitus ( Facultati Juridicæ An. 1498. adscriptus ) invisio antehac , ut Acta ajunt , ad novi Magistri Doctrinam concursu.

### An. 1495.

**U**Bi Maximilianus post junctam sibi Oeniponti secundis thalamis Blancam Mariam Galeaci Mediolanensem Ducis Filiam in Brabantiam discessisset ;

Vien-

Viennæ ad augenda literarum Studia , ut anno superiori Schola Poëtica, ita anno hoc Oratoria est instituta. Commissa profitendæ Eloquentiæ provincia Hieronymo Balbo Juris simul, ut antea meminimus, doctissimo, numeratis in stipendium ex Principis ærario florensis Centum. Minor tamen ea literarii utriusque laboris remuneratio, quàm quæ vitæ ornatiùs agendæ sufficeret, cùm Balbo videretur, Minerval certum & à discipulis extorsit: Id cùm Facultatis Artisticæ præter consensum, fieret, exactio illa Balbo interdicta. Recurrit is ad Austriæ Regentes, porrecto sequentis formæ libello: *Hieronymus Balbus supplico Magnificentissimis vestris; nam Lector Artis Oratoriæ constitutus, petii à Facultate Artistarum, ut lectio Oratoria inter ordinarias computaretur, & Scholastici, qui volunt graduari, ad eam audiendam compellerentur. Item; ut Scholastici Lectori stipendium contribuerent, sicut in aliis Lectionibus. Ad quæ mihi responsum est: cùm hæc lectura per Magnificentias vestras sit constituta, Dominos Artistas velle hoc negotium arbitrio Magnificentiarum vestrarum disponi. Supplico itaque, ut Magnificentia vestra hoc negotium dignentur examinare, & efficere, quod juris est. Supplicationi huic Regentes ita subscripsere: quòd non arceantur Scholares ad ei solvendum pastum, quòd aliunde habeant stipendium pingue à Principe; Cetera autem fiant.*

His Disciplinarum augmentis accessit etiam sub anni finem impetrata per missos superiori anno Romam Oratores facultas, seu, ut Acta ajunt, *Signatura Apostolica*, quâ legendi, audiendique Jus Civile quibuscunque alumni, etiam Clericis, studii Wiennensis indultum est. Benevolentiam hanc Sedis Apostolicæ animatam quoque Universitatem ad postulandam à Pontifice Privilegiorum suorum confirmationem, eadem Acta testantur. Dum interea majori anni parte con-

suc-

suatarum lectionum Cursum pestifera Wiennæ grassans lues inhibuit.

## An. 1496.

**A**ttulit hic annus Maximiliano cum Tyroli totam exteriorem Austriam ; Philippo verò ejusdem Filio jus vastissimi Hispaniarum Regni ; ad Illum siquidem Provinciæ illæ rediêrunt ex morte Sigismundi Austriæ Archiducis ; anno hoc eodem pridie Nonas Martii Oeniponti, nullo relicto hærede, defuncti : ad hunc verò Monarchia Hispana ex conjugio, quod itidem anno hoc initum cum Joanna Ferdinandi, & Isabellæ Hispaniarum Regum Infante, devoluenda : ut posteaquâ ex nuptiis Maximilianum inter, & Mariam Burgundam Belgica omnis, ita ex Spôsali Philippi fœdere tota Hispania Domui Austriacæ accreverit. Tantis accessionibus beatus, subinde per annos complures secuturos Maximilianus Cæsar cum exercitu in Italiam profectus, bello implicatur Neapolitano, & Florentino ; inde rediens lentis armis Helvetos, Gallósque exagitat.

## An. 1497. usque ad 1500.

**D**um illa extra Austriam à Maximiliano ; nostræ res utcunque pacatæ ; nec multâ memoriâ dignæ. Id speciale annus isthic habuit ; quòd ubi Regentes Austriæ Lectionem Decretorum in Legum conversam vellent ; operâ generosi D. Doctoris Fuchsmagen, Regiminis Consiliarii, à Maximiliano impetratum fuerit novum stipendium, quo conservatâ Decretorum lectione Leges novo adjuncto Præceptore traderentur. Non annuit modò justis postulatis amantissimus literarum Princeps ; verùm etiam ut neglectum nonnihil Juris studium in Archigymnasio restitueret, illi promovendo, dilucidandóque celeberrimos

Juris-



Juris Consultos ex Italia; Joannem nimirum Sylvium, & Aurelium Siculum submissos, præfecit.

Anno 1498. ad Insulam Viennensem nominatus est Reverendissimus Bernardus Baro à Polheim, insignis Universitatis nostræ decus; in qua & bonis Artibus, & Jure excultus, in Artium Magistrum est inauguratus, ac Matriculæ Facultatis Juridicæ anno 1471. inscriptus. Refert tamen Catalogus Viennensium Episcoporum, Virum & virtute, & literis insignem, nunquam se Episcopum, sed Administratorem duntaxat Viennensis Tiaræ dici voluisse.

Illustrem Universitatem nostram ad finem sæculi reddidit Illustrissimus Scholarum alumnus, Sigismundus L.B. ab Herberstein in Neüberg, & Guettenhag &c. Hic ubi primam in Artibus lauream est consecutus; subinde pace, ac bello amplissimas consecutus est dignitates: totam penè Europam summorum Imperatorum Maximiliani, Caroli V. & Ferdinandi I. ad maximos Reges, & Principes Legatus, & Orator peragravit; Moscoviæ historiam, quam Legatus adibat, singulari dexteritate complexus; Cæsareæ subinde Majestatis Consiliarius, & Præfectus Cameræ Austriacæ constitutus. Clausit hoc sæculum tanta rerum omnium abundantia, ut mensura vini uno nummo venderetur.

## An. 1500.

**C**Um novo ineuntis sæculi anno novus Austriæ oritur Princeps, Carolus nempe V. hoc nomine futurus Imperator; D. Apostolo Mathiæ die Sacra, ex Philippo Maximiliani Filio, & Joanna Hispaniarum Infante, Gandavi in Flandria natus: Orbem aliquando, & pietatis, & belli facinoribus illustraturus.

Ut florentibus cæteris Studiorum disciplinis neglectus tot sæculis Romanæ linguæ nitor, puritasque in Archi - Gymnasio civitate donaretur, concepti quidam jam superioribus annis restaurandæ latinitatis articuli, anno hoc sunt publicati, ac in usum deduc-

deducti. Quos integros in Actis Artift. ad hunc annum conſcriptos, tametſi plurimum tum ad Studio- rum, cum Univerſitatis noſtræ commendationem fa- ciant, quia prolixiores, hic adducere prohibemur. Et debet ſanè non Univerſitas modò noſtra, ſed Germa- nia omnis id beneficii Maximiliano I. quòd ejus curâ liberales Artes non excoli tantum, ſed ferrea illa po- litiorum literarum, Romanæque linguæ ætas in au- ream iterum commigrare cæperit. Omnium enim ferè è Sententiâ, ignoratio latinæ ſacundiæ imanis, Ma- ximiliani uſque tempora, ac ferè ad annum 1500. te- nuit; cum demum ejus Principis authoritate, & uti- liſſimis Eraſmi Roterodami, Petrarchæ, aliorumque laboribus, velut è ruderibus protracta Romana lingua coli denuo cæpit, ac reſſeſcere,

Cæterum vixit etiamnum hac tempeſtate vete- ris illa Statuti obſervantia, quâ præter Superintenden- tem Principis, alius quoq; qui Univerſitatis dicebatur, in annos ſingulos nominaretur. Et quidem ad annum 1417. uſque unus duntaxat ex Facultatibus per ordi- nem delectus Superintendens rebus proſpiciebat; ab eo autem año bini annis ſingulis Superintendenti Prin- cipis adjuncti eo ordine, ut anno uno Theologus eſſet cum Medico; altero Jurifta cum Philoſopho. Unde & anno præſente à Facultate Artiſtica Univerſitatis Su- perintendens nominatus eſt, Magiſter Georgius Pat- terſtorffer de Waſſerburg; à Principe autem, qui res ſuas in Concilio Univerſitatis curaret, Joannes Cuſpi- nianus Artium, & Medicinæ Doctör, ac Poëta lau- reatus, Rectoratus Officiò anno hoc eodem functus: qui Univerſitati Superintendens, præſuit ad annum uſque 1529.

Juverit in gratiam benevolis Lectoris hic inferere juramenti formulam inter manuſcriptas Statutorum tabulas repertam, qua Superintendentes Univerſitatis, dum munus adibant, ſeſe obſtrinxere. *Primò, ut offi- cium Superintendentis fideliter exequi velit; ſcilicet ut ſi quem*

quem defectum apud aliquam Facultatem Universitatis nostrae senserit, illi sine mora pro sua possibilitate obviet, & occurrat: imò exigente necessitate de Consilio Universitatis ad Principem denunciaret. Secundò, ut stipendium Universitatis, cum præsentatum fuerit, Priorem Collegii Ducalis sine dilatione distribui faciat illis, qui tale meruerunt, secundum notitiam ipsi per singularum Facultatum Decanos mediata, & per Priorem Collegii immediata factum. Tertio, ut nulli prohibeat stipendium dandum, neque impediatur ob quamcunque causam, nisi talis fuerit in literis foundationis expressa. Quarto, ut fideliter impendat remanentias ad illas necessitates, ad quas in literis foundationis sunt ordinatae. Quintò, ut procuret diligenter tempore debito ratiocinium sumere à Priore, & Prioribus de remanentiis receptis, & expositis, notatis consuetè notandis. Ultimo, ut neque aliis, neque ipsi jubeatur dari stipendium, quibus secundum foundationis literas exhiberi minimè debent.

Illud mirari satis nequeo, quo errore lapsus Calendarii Academici author Bonnanus ea in Proëmio ad Superintendentum Catalogum verba inferere ausus fuerit: Ubi præliminaliter sciendum, quòd Universitas à prima fundatione nullum Superintendentem, sed tantum certos Episcopos, & Abbates pro Conservatoribus habuerit usque ad An. 1500. Primus itaque Superintendens fuit Joannes Cuspinianus Medicinæ Doctör, & Poëta laureatus. Hæc Bonnanus. Nam tametsi Universitas suos habuerit Conservatores à sese requisitos, cujusmodi Episcopum Frisingensem fuisse, Mareschallum item inferioris Austriae, ac alios in Actis lego; suum tamen Universitati, præter illos, quos Universitas ex Facultatibus in annos singulos deligebat, constantem fuisse Principis Superintendentem, vel exinde satis constat: tum quòd ex *Albertino Statuto* semper unus ex iis duobus, quos quisvis Archidux Consilio civico præfecerit, privilegiorum, & libertatum executor, ac conservator ab Universitate eligi debebat; deinde quòd ante Cuspinianum *Ægidius Schattauer*, *Bernardus Perger* Artium Magister,

ster, Jurisque Doctor, ac Austriæ Cancellarius, pluresque alii Superintendentes Principis in Actis nominentur: denique, quod in Decreto Ferdinandi I. ad An. 1529. emanato, cujus exemplum in pervetusto Universitatis Tabularij Manuscripto à me lectum extat, expressè memoretur: *Semper Duces Austria apud Universitatem suos habuisse Superintendentes.*

Hallucinatur quoque graviter idem Bonnanus in prælaudato Catalogo, quem à Cuspiniano auspicatum prosecutus est: dum & complures transmittit, cum & inverso ordine non paucos adfert. Quemadmodum ex variis MS. Universitatis colligere est. Ex quibus, quantum licuit, sequentem Superintendentum Principis ab anno 1500. ad 1565. Ordinem confectum adjicere visum:

Joannes Cuspinianus ad An. usque 1529.

Joannes Pillhamer circiter ad An. usque 1539.

Stephanus Schwarz Juris utriusque Doctor, Consiliarius deinde Regiminis ad An. usque 1544.

Joannes Ludovicus Brassicanus Juris utriusque Doctor, Consiliarius deinde Regiminis ad An. usque 1546.

Bernardus Walter circiter usque ad An. 1557.

Joannes Gößl ex Münzidl Juris utriusque Doctor, ejusdem Ordinarius Professor.

Wolfgangus Lazijs, Phil. & Medicinæ Doctor, ejusdemque Primarius Professor ad An. usque 1564.

### An. 1501.

**R**Eformata superiori anno nonnihil studiorum ratione, ne ullum deesset consequendarum literarum institutum, anno hoc perpetuò fundatæ, ac stabilitæ sunt disciplinæ duæ, Mathematica nimirum, & Oratoria cum Poësi; non parum ad hoc operam conferente Joanne Cuspiniano Universitatis Superintendente. Collata quoque à Maximiliano Romanorum Rege Archigymnasio potestas creandi Poëtas laureatos, cujus indulti formam ex originali fideliter descriptam hic recitare visum:

Maxi-

**M**aximilianus Divinâ favente Clementiâ Romano-  
rum Rex semper Augustus, ac Hungariæ, Dal-  
matiae, Croatiae Rex, Archidux Austriae &c. &c. *Ad per-  
petuam rei memoriam notum facimus tenore praesentium  
universis: cum post susceptum Divino auspicio Caesarea Ma-  
jestatis titulum, officii nostri imprimis esse duxerimus ad ea  
singula animum intendere; quae & Reipublica nostra decori  
& ornamento perpetuo esse arbitramur: & nationem nostram  
Germanicam, ac domum Austriae, ex qua orti sumus, quan-  
tis possemus honoribus apud omnes gentes, & posteritatem  
notas faceremus: id potissimum occurrit pro aternitate lit-  
terarum necessarium in humanis rebus fore; ut populus, &  
Urbibus nostris, Romanarum literarum Gymnasia, lauda-  
to ordine, & Romano more statueremus; unde publicarum  
rerum Moderatores, ac Rectores ut plurimum excellentes  
prodiere, qui veterum rerum gestarum lectione facti pruden-  
tiores, bene, & beatè vivendi rationes multâ experientiâ  
scripsere: Directis itaque à Nobis in nostro Wiennensi Gym-  
nasio civilis juris lectionibus, cum in Poëtica, & Oratoriâ  
arte nihil hactenus ibi instituerimus; decrevimus pro ipsius  
Universitatis nostrae augmento, Collegium Poëtarum ibidem,  
priscorum Imperatorum nostrorum more, erigere, abolitam-  
que prisci saeculi eloquentiam restituere. Itaque pro hac pro-  
vehendâ, & initiandâ duos in Poëticâ, & Oratoriâ; duos ve-  
rò in Mathematicis disciplinis eruditos ad ipsum Collegium  
deputamus: Inter quos eum, quem pro tempore Lectorem  
ordinarium in Poëtica constituemus, volumus eidem Collegio  
praesse: Quem etiam praesentibus nostrâ ipsius Collegii, &  
Lectionum Superintendentem facimus & creamus. Quo  
autem praesatum Collegium uberiori à nobis gratia & privi-  
legio decoretur, resque ipsa felici gradu debitum sumat in-  
crementum pro honore Nostro, & dignitate augenda Univer-  
sitätis Wiennensis, Caesarea Nostra auctoritate, ac motu pro-  
prio praesatum Collegium hoc praesenti privilegio, ac prae-rogati-  
vâ decoramus: ut quicumque in praesata Universitate no-  
stra Wiennensi in Oratoria, & Poëtica studuerit, laureamque  
concupiverit; is in praenominato Poëtarum Collegio diligen-  
ter*

ter examinatus, si idoneus ad id munus suscipiendum habitus, & inventus fuerit, per Honorabilem, Fidelem, nobis dilectum Conradum Celtem, per Genitorem Nostrum Fridericum Tertium diva memoria, primum inter Germanos Laureatum Poëtam, & modò in Universitate Nostra Wiennensi Poëtices, ac Oratoria Lectorem ordinarium; ac dein per Successores ejus, qui pro tempore Collegio præfuerint, Laureâ coronari possit: Sicque per eum, & Successores ejus Laureatus pro Poëta ab omnibus habeatur, & celebretur; omnibusque privilegiis, & insignibus, quibus ceteri Poëta Laureati fruantur qualibet consuetudine, vel de jure, uti, & gaudere possit, ac si manibus Nostris eâ dignitate fuisset insignitus. Cujus rei tenore præsentium damus, concedimus, & imperitumur Nostro Cæsareo jure eidem Legenti Poëta ordinario, ut prædictum est, omnimodam auctoritatem; non obstantibus quibuscumque Legibus, statutis, consuetudinibus, ordinationibus, aut aliis quibuscumque in contrarium facientibus. Reservato tamen Nobis nihilominus jure Poëtas coronandi, quos idoneos duxerimus; potestati etenim nostræ per hoc privilegium nequaquam derogamus. Nulli ergo omnino hominum liceat hanc nostræ concessionis, & ordinationis paginam infringere, aut ei ausu temerario contraire: si quis verò id attentare præsumpserit, pœnam indignationis nostræ gravissimæ, ac quinquaginta Marcarum auri puri irremissibiliter se noverit incursum: Quam medietatem imperiâli Fisco nostro, ac reliquam partem præfato Collegio decernimus applicandam, harum testimonio litterarum Sigilli nostri consueti appensione munitarum. Datum in Oppido nostro Bolzano pridie Kalendas Novembris: Anno Domini Millesimo, Quingentesimo primo: Regnorum nostrorum Romani sextodecimo: Hungariæ vero duodecimo.

Præter id privilegium, optimi Principis auctoritate confecta coronæ in modum Laureolæ, quâ post datam egregiam artis Poëticæ speciem Candidati ornarentur. Obtigit subinde per annos illos is honos Joanni Stabico Maximiliani Historico, ac Authori Rhythmo.

morum de Martyrio S. Colomanni. Thomæ Resch de Krembs, Joanni Panetiano Bohemo, aliisque.

Solemnnitas S. Joannis Evangelistæ ad Prædicatores ab Ecclesia-S. Nicolai anno hoc à Facultate Theologica translata est : causa mutationis erat, quòd Præfatus dictæ Ecclesiæ non semel exposulasset incommoda in faciendis expensis. In has porro cum Prædicatoribus conventum conditiones : *Ut Facultas de Rosolio, & vino benedicendo provideat : sed Fratres Prædicatores ipsi de Cleinodiis convenientibus prospiciant.*

Illud denique memorandum : An. isto 1501. primum in Actis Artificis legi, Rectorem Universitatis, consueto abinde honoris titulo, *Magnificum*, fuisse compellatum ; id, an antehac usitatum, quæve id ratione factum, haud insinuant.

## An. 1502.

**W**ittebergensis in Saxonia anno hoc à Friderico I. Saxonix Duce erecta est Academia ex Lipsiensi, & Tubingensi, ut Middendorpius cum aliis refert ; hanc Joannes Fridericus ita exornavit, ut ex frigida, teste Erasmo, celebris evaderet. Cæterum inscriptio supra Principum Electorum Saxonix imagines in Monasterio ad Portam Eliftrinam de hac sic habet : *Academiam Wittebergensem Joannes Fridericus Dei benignitate Dux Saxonix &c. fundavit, Fridericus inchoavit, Joannes conservavit, Mauritius bello dissipatam instauravit : Augustus exornavit, amplificavit, & confirmavit.* Floruerunt hic Heningus, Schurffius, Wessenbecius, Jurisconsulti scriptis celebres, & præ aliis Martinus, ille Lutherus, ac Philippus quoque Melancthon ; quinti ille Evangelii, novæque sectæ author : hic Prophetæ sui Lutheri dexter oculus.

Obiit anno hoc, Edero teste ( nec quidquam enim sedulo acta omnia pervolventi occurrerat ) Secundus ab erecta in Cathedrali D. Stephani Ecclesia Præpositus, idemque Universitatis Cancellarius, Virgilius

Cantzler; cui in munere præclarè gesto successor datus, Justus Kasman ad D. Stephani Canonicus.

## An. 1503.

**P**OSTEAQUAM diem supremum obiit Alexander VI. 15to Kalendas Septembris ex poculo venenato: ingenti sanè Universitatis nostræ gaudio ejus in locum à Cardinalibus electus Franciscus Piccolomineus, Senensis Italus, dictus Tedescus, Academiæ Viennensis splendidum membrum: dicique voluit Pius III; sed brevissima fuit Pontificis vita; nam vigesima sexta post die, non mediocri Archigymnasii nostri, bonorùmque omnium dolore rursus est sublatus. Huic ex electione successit Julianus Ruvereus, sub nomine Julii II.

Perpetuo quoque ornamento nacta est Universitas anno hoc supremum Archigymnasii Rectorem Magnificum, *Illustrissimum nempe Principem, & Dominum, Dominum Fridericum Dei gratiâ Teschinentsem, & majoris Glogoviae in Silesia Ducem, Artium Liberalium antehac Magistrum.*

Id etiam in partem gloriæ sub annos hos Academiæ nostræ obtigit, quòd literarum studia undiq; florent, summa esset Præceptorum industria, omnium Alumnorum cultus singularis. Nusquam Magistri, ut inquit Ederus, sine palliis, & habitu solemni comparebant: in victoriæ signum tres linguæ ex panno pallis affixæ præferebantur, quarum una postea Ingolstadiensi Academiæ ex nostra filiae honoris gratiâ est collata. Tyrones singularum Facultatum cingula, provectorésque cappas gestabant, quibus ab indoctæ plebis turbâ & agnosci, & honorari possent. Is porro erat sub tempora illa studiosorum Viennam literarum ergò accursus, ut, si prælaudato Edero fides, nonnunquam supra 7000. eodem tempore disciplinarum alumnos Universitas Viennensis numeraret.

Id demum Cumulo felicitatis Archigymnasii accessisse videri potest; quod anno hoc 10. Martii Compluti in

Hispa-



Hispaniis natus sit Ferdinandus Austriæ Archidux, & Hispaniarum Infans, Caroli V. Frater, futurum olim non Religionis modò in Austria, sed & Universitatis ruentis fulcrum.

Quamvis Catalogus Episcoporum Viennensium nuper editus gestam Insulam Reverendissimi Bernardi à Pollheim ad annum usque 1513. differat: rectiùs tamen cum nonnullis arbitror, eundem suprema fata anno hoc 1503. obiisse, atque ab obitu per 10. omnino annos Ecclesiam Viennemensem Antistite vacasse. Ejus rei fidem Annales Philosophici æquè, ac Theologici apertam faciunt, dum per annos istos identidem meminere: *Sedem Episcopalem vacasse; vacante Sede plures cum Officiali ad S. Stephanum Universitati fuisse controversas.* Sæpiùs etiam nonnullas lites decisas, ea tamen adjunctâ clausulâ: *Citra tamen præjudicium futuri Ordinarii, atque Ecclesiæ Cathedralis S. Stephani Episcopi.*

## An. 1504.

**P**Arabat Augustæ Vindelicorum Maximilianus bellum in Palatinos; cum ad eum Universitatis nomine Magnus sub id temporis Rector Christophorus Kulber ex Graz, Theologiæ Doctor, confirmationem Privilegiorum, atque Statutorum conservationem oraturus, in quibus haud modicè tum à civium Magistratu, tum Episcopo per annos præterlapsos impetebatur, legatione fungitur; auditus erat clementer; nec minùs ex voto omnia, quæ veteris juris Archi-Gymnasii erant, impetrat: confirmatorias nempe privilegiorum, Statutorum, ac consuetudinum Universitatis novâ Regiâ autoritate munitas: Immunitatem item ab oneribus personalibus Civitatis, adjuncto mandato; ne Academiæ membra bonorum immobilium, aut fructuum ex illis perceptorum causâ suis destituantur privilegiis, sed scholastica fruantur libertate. Addidit his mandata, quibus Universitati alumnorum disciplinam, & quietem publicam commendat.

Literis his, reduce Rectore, in Consilio perlectis, ut voluntati Principis mos gereretur, dati à Facultatibus Deputati, qui articulos certos, ad disciplinam scholasticam facturos, conficerent: functi illi egregiè officio suo, non paucas Universitati obtulère leges, quas post-hac literarum alumni observarent. Extant illæ etiamnum cum literis Regiis in Actis Philosophicis, quas adferre brevitatis studiò superfedemus.

### An. 1505.

**C**ontroversia iteratò non levis Universitatem inter, ac Officalem, Capitulumque S. Stephani, ut Acta ajunt, Vice-Cancellariatùs causâ exorta est; quam ob rationem solemnita Universitatis ad D. Stephani aliàs fieri solita, ad Ecclesiam Fratrum Carmelitarum transferenda visum. Verùm pravi sanè exempli, multæq; offensionis materiam, dissidium illud peperit; Cum enim quidam, verba Actorum sunt, egregius sacre Theologiae Licentiatus in Vigilia Pentecostes sermonem faciendum suscepisset, eundem in Ecclesia Carmelitarum habere recusavit. Id agrè Rector Universitatis, qui tum erat Magister Wolfgangus Mosnauer, ferens, eundem ad Consistorium suum citavit, decretusque est ei in pændam carcer Universitatis. Non comparuit citatus, sed ad curiam Romanam appellavit. Qua tamen appellatione non obstante Rector obstinatum ubiq; inquire jussit; eum demum comparentem in processione Corporis Christi, Dominus Rector cum nonnullis studiosis, è processione violenter abripit circa domum arcalem in Wollzeil, & ad carceres deduxerunt. Ne tamen tumultus fieret, & processio interturbaretur, uti Capitulum volebat, per Seniores Civium effectum est. Licentiatus per dies octo in carcere detentus, tandem emissus est, totâque controversia benignè inter Universitatem, & Capitulum composita.

### An. 1506. usque ad 1508.

**B**ellum anno hoc Hungaricum meditabatur Maximilianus; defensurus sua in Regnum jura, quæ  
Stepha-

Stephanus Transylvaniæ Princeps, *Vaivodam* Indigetes appellant, ereptum ibat, Joanni filio Annam Uladislai Regis Hungariæ hæredem, adhuc infantem, despondere postulans, non invito, ut nunciabatur, Uladislao Parente. Jam exercitus in Hungariam ductus erat, & castra ad Posonium posita: At Reginâ uterum ferente, armis aliquamdiu abstinere visum; cùm nunciatum, Reginam masculum enixam esse, cui Ludovici inditum nomen. Pax ergo à Maximiliano sancita, eâ iterum lege: ad Austriacos Regnum Hungariæ pertineret, si Uladislaus, Ludovicusque sine masculo hærede decederent.

Maximiliano interim ad bellum Venetum properante, tristis Viennam consternavit nuncius: Philippum jam à Ferdinando socero Hispaniarum Regem renuntiatum in ætatis flore, Patrem tamen ex Joanna Conjuge Caroli, & Ferdinandi Romanorum postea Cæsarum, Eleonoræ item, Catharinæ, Isabellæ, ac Mariæ, Regiis subinde nuptiis felicius, supremum obiisse diem. Cor Austriaci Principis Bruxellis conditum hoc Epitaphio:

Urbes, & populos, diversâque Regna tenebam:  
 Spes dabat Imperium, spes dabat orbis opes.  
 Si spes in quemquam fuerat mihi gloria prima,  
 Heu! heu quanta fuit spes mea! tanta jacet.

Nil Academiæ nostræ antiquiùs, quàm Principi Austriaco parentare: at quia sermo de defuncti laudibus die mox altero à perlato nuncio, 5. nempe Novemb. habendus indicebatur, eum propè omnes recusabant. Offendit ea res non parum redituum Regionum Præfectum, atque adeò comminatus erat: se, nisi laudes demortuo haberentur, ea de re cum Maximiliano Rege expostulaturum. Ne res igitur in Universitatis dedecus cederet, sermonem funebrem vesperi illo sacræ Theologiæ Professor Magister Joannes de Werd, de Conventu Fratrum Prædicatorum, suscep-

rat; ac altera die non modica cum Archi. Gymnasii commendatione peroravit.

Cæterum grassante potissima Annorum 1506. & 1507. peste epidemice per Austriam lue, Academia non modico suorum numero diminuta fuit, alumnis aut pestis terrore dilapsis, aut morte absumptis: quâ afflatus etiam cùm occubuisset Rector Magnificus, Joannes Wiflinger Artium, & Medicinæ Doctor, à congregata Universitate per Procuratores Nationum ei suffectus est Michaël Sartoris de Premarthon, Artium Magister, & Collegii Ducalis Prior.

### An. 1508. usque ad 1510.

**R**ectorem Magnificum 4. Februarij secundùm Ederi Catalogum Actis nostris id confirmantibus (quamvis Königius sua in Bibliotheca mortem illius jam ad an. 1505. referat) insecutus est Conradus Celtes Franco Sweinfordiensis, primus in Germania Poëta Laureatus; quem honorem è manibus Divi Friderici Cæsaris promeruit; artem subinde eandem annis compluribus in Universitate nostra egregiè professus: à morte suppellectilis librariæ, ac manuscriptorum suorum hæredem Facultatem Artificam scripserat: Eorum Catalogum Königius, Vossius, Lambecius, aliique recensent. Editus in lucem à morte ejus quidam Odarum liber; qui cùm haud satls castigatus Facultati Theologicæ visus esset, vocati ad examen M. Thomas Resch Artistarum Decanus, Bibliopolæ, & ultimæ Conradi voluntatis executores; res eò decisa, ut quantum fieri possit, sine authoris infamia versus haud satls tuti lituris emendarentur.

At meditaturn diu in venetos bellum, priusquam Maximilianus auspicaretur, arduum Romam iter, ut Cæsaream à Pontifice acciperet coronam, futurum prospiciens, Tridenti per Matthæum Langium Gurgensem tum Antistitem, ac suum Epistolarum Magistrum è suggestu se non jam Romanorum Regem, ut hæte-

hactenus , sed Imperatorem deinceps appellandum , promulgari jubet : cuius Imperatorii tituli confirmatorias literas mox , dum Bolsani esset , per Legatum à Pontifice accepit. Vario subinde eventu bellum in Italia à Maximiliano , Venetis , Gallo , & Pontifice gestum.

Interea domi haud suæ Archigymnasio lites , & minora deerant bella , quæ ei cum Cancellario Universitatis , ac Superintendente Joanne Cuspiniano ob promovendi ad literarios honores jura , intercesserant. Majoris aliquid negotii , Facultati potissimum Theologicæ , ad quam causas morum , & Religionis cognoscere tum pertinebat , nonnulli periculosarum doctrinarum nomine suspecti , faceffivêre. Delati siquidem erant ad Facultatem , primum *Magister Wolffgangus Sack* , ad S. Michaëlis Viennæ Plebanus , quòd scomata non pauca in quatuor Mendicantium Ordines , Dominicanos scilicet , Augustinianos Eremitas , Minores Conventuales , atque Carmelitas , quibus quatuor Religiosis Familiis aditus ad Universitatem , literariosque honores jam ferè ab origine Academiæ patebat , è publico suggestu sparsisset : Dominus dein *Philippus Turrianus* Domûs S. Spiritûs Viennæ extra Stubarum portam sitæ Commendator , qui diversas contra indulgentias , cum populi offendiculo , propositiones palàm effutivisse ferebatur : Duo demum Fratres , ut Acta ajunt , ex ordine *S. Bernardini* ; quorum unus , Jacobus nomine , ad S. Petrum Prædicator hæc verba ad concionem proferebat : *Quòd Sacerdotes in Ecclesia non ostendant veras reliquias , sed reliquiarum locò imponant ossa equorum , & sic decipiant homines.* Alter verò , cui Theobaldi nomen , ad D. Laurentium itidem ad concionem dixisse accusabatur : *quòd quilibet Sacerdos Viennæ habeat unum equum , in quo equitat ad inferum.*

Primus eorum Innocentiam suam comprobavit , præstito in hæc verba juramento : *Ego Wolffgangus Sack A.A. & Theologia Doctor juro ad S. Dei Evangelia , quòd ali-*

*quid horum , de quibus contra me fama , & suspicio est , non feci , nec mandavi , nec consilium , aut favorem , seu auctoritatem dedi , nec unquam ratum habui ; quod forsitan meo nomine in hac causa inter Fratres Ordinum Mendicantium , & meos Cooperatores quondam apud S. Michaëlem hic Vienna , contra pia Patrum decreta , facturum se asseruerunt : sic me Deus adjuvet , & omnes Sancti ejus .*

Difficilior expeditu posteriorum trium causa fuit , quod & Religiosi essent , & exemptos ab ordinaria jurisdictione se dicerent ; cum demum , ne Facultas odio potius , quam justitiæ studio , agere videretur , posteriorum duorum causa prætermissa est , eo tamen pacto , ut Fratres humiliter Facultatem convenirent , ac spem futuræ facerent emendationis . Turriani negotium adhuc diutiùs tenuit , quod sese interposuisset Scotorum Abbas , Ordinis S. Spiritûs ea tempestate Conservator . Verùm cum Facultas conservatoris officium prædicti Abbatis se solùm extendere ad jura bonorum temporalium , non item ad jurisdictionem in moribus , & rebus fidei , responderet ; Abbas mitiora amplexus , à Facultate certos obtinet deputatos , quibuscum causa Turriani agitata eo rei exitu ; ut præter multam , quam persolveret , vitam posthac , & mores sese emendaturum sponderet .

## An. 1510.

**A**lterum ingenti sanè splendore , hoc anno Serenissimum Rectorem Magnificum Universitas nacta est , *Franciscum* scilicet *Sfortiam* , *Dei gratiâ Mediolani Ducem* ( Fratrem Maximiliani Sfortiæ , Gallis Mediolanum usurpantibus Ducatu suo quoq; extorris ) in festo S. Colomanni electum , Artium antehac Magistrum , & Juris in Universitate nostra Studiosum , qui præsens ipse Concilium Universitatis moderari Rectoratûs sui tempore non aspernabatur : à Fratris obitu subsidio Caroli V. An. 1521. Ducatûs Mediolanensis possessionem quidem adibat , quo tamen ob bella , invasionesque Galli-

Gallicas minimè fruebatur. Serenissimo hoc sub Duce militabant literaria stipendia Universitate in nostra, & nobilitate, & eruditione alumni insignes; Illustrissimus scilicèt Princeps Dominus Ludovicus Bavarix Dux; Christophorus, & Udalricus L. B. ab Eytzing, Cæsari subinde à consiliis, Sigismundus de Puechaim, Gvolhardus de Stein, aliique complures.

Nec prætermitti hìc debet, qui diem anno hoc supremum clausit, ut Catalogus Ederi docet, Reverendissimus Dominus Justus Kasman, Præpositus Ecclesix D. Stephani Cathedralis Tertius, & Universitatis Cancellarius, Sororius, ut Acta Artist. ajunt, Joannis Cospiniani, Universitati multis diffidiis obnoxius. Successit ei in munere Joannes Buschius.

## An. 1511.

**A** Fædere Ludovicum inter Gallix Regem, & Maximilianum sancito, uterque acriùs, ille in Pontificem, hic in Venetos bellum instauravêre. Et Gallus quidem, cùm bellicosum, & rebus suis in Italia minùs studiosum Pontificem longo odio averfaretur, operam dedit, ut *Conseiliabulum Pisanum* cogeretur; haud invito Cæsare, qui alieniore tum quidem à Julio Papa animo erat. Calendis igitur Septembris à *Segregibus Cardinalibus* Conventus Pisas indicitur; cujus Convocatorix tum Cardinalium, tum utriusque Principis literæ apud *Odoardum Reinaldum* ad An. præsentem extant. Alias quoque Cardinales illi ad Universitatem nostram dedêre, quarum sequens est tenor:

**Reverendis, & Egregiis Patribus, Rectori, Cancellario, Deputatis, & Consiliariis, Magistris, & Doctoribus Almæ Universitatis  
Studii Generalis Viennensis.**

**M**iseratione Divina Episcopi, Presbyteri, Diaconi S. R. E. Cardinales in Lombardia pro bono Ecclesix

convenientes , Reverendis , & Egregiis Patribus , Reſtori , Cancellario , Deputatis , Conſiliariis , Magiſtris , & Docto-ribus Almæ Uniuerſitatis Studii Generalis Viennensis , ſalu-tem cum intelligentia , prosperitate , & directione Eccleſia Sanctæ Dei. Cum frequentes Generalium Conciliorum ce-lebrationes tanquam flumina Paradisi ſemper Eccleſiam Dei perrigaverint , rerigaverint , & ſacundaverint ; illo-rumque intermiſſiones tribulos , & ſpinas variarum diſſen-ſionum , errorum , & bellorum ſapius induxerint : quales hodie graviffimas ( Deo permittente ) patimur ; effectum in-de eſt , ut Divinâ illâ Conſtantiensi ſynodo ſancitum ſit , ut decimo quoque anno Uniuerſale Concilium congregaretur : quod itaque animo revolventes S. D. Noſter ſuæ creationis tempore , & Cardinales in conclavi exiſtentes , nobiſcum ju-rejurando , & ſolemni voto poſt biennium ab eo die Conci-lium convocare ſtatuerunt : ad quod exequendum etſi San-ctitatem ſuam aliquando ſupplices hortati ſumus , nihil ta-men hætenus perfecimus cum ſua Sanctitate , & nonnullis aliis Reverendiſſimis Dominis Cardinalibus id negligentibus , & nonnullis forſan ad id non liberis. Reputamus itaque ju-omne , omnemque poteſtatem Concilii congregandi ad nos eſſe devolutam ; ut voto noſtro jurato ſatisfaceremus , Eccleſiaq; collabenti ſuccurreretur , Concilium ipſum faciendum cura-re decrevimus : quod cum in ditione Eccleſiæ , ubi liberum nobis , ac tutum id agere non fuerat , libertate noſtri ſacri ordinis plurimum oppreſſâ , procurare non audemas ; in Lom-bardiam ſeceſſimus ; ubi poſt longum , maturumque noſtrum tractatum , plurimorumque Divini , & humani juris do-ctiſſimorum Conſilio , voluntate , & aſſenſu Sereniſſimi , & Sanctiſſimi Domini Maximiliani Romanorum Imperatoris ſemper Auguſti , & Chriſtianiſſimi Domini Ludovici Fran-corum Regis Sereniſſimi , die Veneris , decimâ ſextâ præſen-tis menſis Maji , auxilio Dei Omnipotentis , & ſpe bonæ ad-herentiæ aliorum Principum , & fidelium , Generale Conci-lium Uniuerſitatis Eccleſia indiximus , & convocavimus , Kalendis Septembris proximè futuri in civitate Piſarum inchoandum , continuandumque uſque ad definitionem bonæ ,

& con-



*& constantis pacis inter Christianos Principes, belli sufficientis contra infideles, reformationis Ecclesiæ in capite, & in membris, extirpationis hæresum, Schismatum, & errorum in Christiana repub. vigentium, ac aliorum, quæ in Schedulis Congregationis continentur, quas Paternitatibus Vestris transmittimus in locis publicis, & consuetis affigendas, & à Vobis bene pensitandas, ut eligere ex probatissimis, Doctissimisque viris Universitatis Vestræ valeatis, qui ad tantam rem, & plures causas fidei in aliis Conciliis nondum conclusas, suis consiliis juvandas, mittendi sint, nobiscum de omnibus in commune consulturi. Ad quod, etsi nullo admonente, sponte properare debeat, & teneamini; hortamur nihilominus plurimum in Domino Paternitates Vestras, quod tam Sancto, & necessario operi deesse nolitis, & ad constitutam diem nobiscum adesse consiliis, & rationibus plenissime instructi, Christianæ Reipub. & Sanctæ Ecclesiæ causas curaturi. Et sic valete, ac nos in orationibus juvate. Mediolani XXIII. Maji MDXI.*

Vestri Fratres Episcopi, Presbyteri,  
Diaconi, S. R. E. Cardinales pro bono Ecclesiæ in Lombardia convenientes, ut supra, pro se, & adherentibus sibi cum mandato.

Nomina porro Cardinalium, à quibus tum convocatio Concilii facta, cum literæ ad Universitatem nostram missæ sunt, fuerunt, ut subscriptio convocationis habet, Bernardinus Episcopus Sabinensis Cardinalis S. Crucis. Guilielmus Episcopus Prenestinus Cardinalis Narbonensis. Philippus Episcopus Tusculanus Cardinalis Cenomanensis. Franciscus tituli SS. Nerei, & Achilei Cusendinus. Hadrianus tituli S. Chrysogoni de Carneto. Renatus tituli S. Sabinæ Bacocensis. Karolus tituli S. Viti in Macello de Fimario, Presbyteri Cardinales. Nec non Dominus Federicus S. Angeli de S. Severino, ac Dominus Hypolitus S. Luciae in Silice Eftenfis S. R. E. Diaconi Cardinales.

Ha-

Harum tenorem cū congregata 25. Julij Universitas legisset, unanimi suffragio decretum, ne præfatæ literæ publicè affigerentur. Et è re sua fore Facultatibus visum est, si nulla ratione Pisani conciliabuli partibus Universitas adhæreret: præcipuè, cū inaudiisset à Julio Pontifice in annum sequentem apud Basilicam Lateranensem Concilium Universale esse indictum; Maximilianum quoque Cæsarem jam sensim à Conciliabulo abhorrere: nempe qui, ne ullus ex Germania Episcopus, Legatusve Pisas mitteretur, statuisset. Inchoatum tamen est Conventiculum Pisanum Nonis Novembris; habitis ibi sessionibus duabus, deinde Mediolanum Segreges Patres confugere: ubi, ut Spondanus habet, Bernhardinus Cardinalis S. Crucis *Antipapa* sub Martini nomine renunciatus. Sed anno demum insequenti seipso dissolutum evanuit.

## ·An. 1512.

**S**olemnis sub hæc tempora Viennensibus ritus ille fuerat, quo singulis hebdomadis die Jovis Sacrosanctum Christi Corpus in supplicatione deducerent; majori autem, & accursu, & solemnitate die Jovis illo, qui proximus Novilunio fluxerat. Videbatur hic non paucis cultus gentilitatem, superstitionemque spirare: re igitur, nescio qua ex occasione, ad Cæsarem Maximilianum delatâ, ad Rectorem, & Facultatem Theologicam has Norimbergâ dedit literas:

**Maximilian von Gottes Gnaden erwählter Römischer Kayser, &c.**

Den ersamen, gelehrten, geistlichen, unsern lieben, andächtigen, N. dem Rector, Collegiaten, und gemeiner Facultet der Theologi unser Universitet zu Wien.

**A**ls in unser Statt Wien alle Wochen ein Procession mit unsers Herrns Fronleichnamb auff alle Pfin-

Pfingsttag beschicht, werden Würbericht, wie etlich daselbst zue Wien dieselbe wochentliche Procession mit mehrern Wesen, und Triumphiren, auf den Pfingsttag, den der erste Monatschein bescheinet, begehen; der Meinung, als ob es bey demselben Monatschein besser, dann auff andere Pfingsttag seyn solt; dieweil uns nun solch ein Aberglaub, daraus ein Kezerey erwachsen mecht, gedunckt, empfehlen Wür euch mit Ernst, und wollen, daß ihr euch solcher obberührter Process halben, wie auch, durch wem, und auff was Grund, und Ursach die geschicht, und fürgenommen werde, eigentlich erkunt, und uns solches wider bericht, und euren Rathschlag under euren Insigni verschlossen anzeigt, damit wür Gott zu ehren, und unsern H. Glauben zur Nothurfft ferner darein wissen zu handeln. Daran thuet ihr unser ernstliche Meinung. Geben in unser, und des Reichs-Statt Nürnberg in X. Tag Febr. anno 1512. unsers Reichs in XXVI. Jahrs.

Qua super causa cum pluribus deliberatum esset, Rector, Theologi, & Collegiati conceptis hunc in modum verbis Imperatori respondere:

**Domino Maximiliano invictissimo, ac Serenissimo Romanorum Imperatori, & Principi, & Domino nostro Gratiosissimo.**

**D**evotissimas, ac indefessas erga Deum preces: accepimus jam pridem Caesar invictissime, Vestra Imperatoria Celsitudinis literas summa, quam debuit, & reverentia, & devotione, quibus vestra Caesarea Majeestas serio postulat, quantum diligenti rerum indagine scrutemur, quo auctore, aut quibus de causis in Urbe Viennensi Dominici corporis festinatio splendidiori cultu, pompaque ad quintas potissimum Novae Lunationis Feras peragatur, cum idipsum vel gentilitatis, vel etiam Judaica superstitionis impietatem (unde plerumque haereticorum fomenta prorumpunt) pretendere videatur. Nos igitur, Caesar clementissime, tanquam salu-

berrimis iussibus obsequiosissimi rem ipsam Vestris jucundissimam auribus hac succincta narratione detegimus. Quippe quoniam memorata celebritatis Patroni, sive Præpositi, cum suæ solemnizationis primordia inchoarent, festiviori quidem triumpho proximam post Novilunium quintam feriam concelebravere, sed à prudentibus, & eruditioribus super hujuscemodi lunationis observantia redarguti, jam dudum captum deseruere propositum, multò quidem ante quam Vestra ad nos perlata sunt literæ. Novimus præterea eos ipsos magis animi simplicitate, quàm hæreticâ pertinaciâ sua festâ ad lunarium dierum numerum aliquamdiu, insolitos licet, exercuisse; Neque idcirco hæreseos perfidiam (cùm pertinaces non fuerint) incurrisse; ipsa namque obstinata pertinacitas iuxta doctrinam Catholicam potissimum hæreticos efficit; at illi mox pia eruditione instructi, atque admoniti, quàm libentissimè cesserunt: ne tamen hac ipsa superstitiosa lunarium dierum observatio Viennensi populo aliquam impiam Judaismi, vel gentilitatis opinionem vulgò ingereret, continuò memoratæ Fraternitatis Patronos enixe, atque ex debito hortati sumus, quatenus nec lunationem ullam, nec quidquam præter orthodoxæ fidei solitum cultum inter suas solemnisationes observent. Denique juxta vestra Imperialis Celsitudinis desiderium super lunaribus superstitionibus hanc Catholicam afferimus sententiam, dicimus, & formamus: hanc dierum lunarium observationem ex Hebræorum umbratis, & emortuis cæremoniis, atque etiam ex profanis gentium superstitionibus initia traxisse; sic usquemodò turba Judaica suas Neomenias, hoc est, mensium initia festivissimè colit; quod & Psalmorum liber manifestissimè docet: Buccinate, inquit, in Neomenia tubâ, in insigni die solemnitatis vestræ, quia præceptum in Israël est. Hunc quoque Egyptii, Græci, Veteresque Romani, & lune festa, ejusque superstitiones millenarias tanquam idololatra, observavere: Quorum nunc ritus tanquam impios, atque nefandos sacrosancta Christiana Religionis fides, atque Majestas explodit, abjicit, atque contemnit; Hieremin sic vaticinante: Juxta vias Gentium nolite discere,

scere,

scere, & à signis cœli nolite metuere, quæ timent gentes &c. *Plurima sunt hujusmodi scripturarum testimonia, quæ strictim epistolaris non capit angustia; ne tamen, Cæsar invictissime, vestram Majestatem Imperatoriam, grandia, & splendidissima Christiana Reipubl. negotia cogitantem, longis teneamus ambagibus, receptui canimus: nos ipsos, omnemque operam nostram studiosissimam vestræ Imperatoriae Celsitudini semper obnoxiam, semperque devotissimam, quàm humillimè commendantes. Datum Vienna ex Collegio Gymnasii.*

Thomas Velocianus Austriacus Rector,  
Theologiæ Professores, Magistri Collegiales Studii Viennensis, Vestræ Imperatoriae Celsitudinis Oratores seduli.

Cæterum, cùm etiamnum, ut Acta nostra notârunt, Viennensis Ecclesia Antistite esset orbata, controversia rursus Officalem inter, & Universitatem de jurisdictione in homines sacros Universitati subjectos, rebûsque eorundem testamentariis recrudit. Tuebatur se Universitas datis sibi tum ab Austriæ Principibus, ac à Pontificibus, cùm à Concilio Basileensi juribus: Lis hæc indecisa in annos complures, est protracta.

Romæ interea 5to nonas Maji inchoatum est magnâ pompâ Generale Concilium Lateranense Quintum, præsidente ipso Julio Pontifice; cui Cardinales 15., Patriarchæ Alexandrinus, & Antiochenus, Archiepiscopi, & Episcopi 77. Multi Abbates, & Principum Legati interfuere. Ac primò quidem Concilium Pisanum irritum declaratum est; habitis deinde anno hoc Sessionibus duabus, cæteræ annis sequentibus sub Julii successore, Leone X. coactæ; dum annò 1517. sunt terminatæ.

### An. 1513.

**A**Ltùm etiamnum in Italia ardentibus belli Gallici, & Veneti flammis, ipso ferè Concilii Lateranensis principio, 9no Kalendas Martii Julius H. Pontifex  
F  
obiit:

obiit: ei successor Cardinalium Conspiratione, ut vocant, 5to Idus Martii Joannes Mediceus, qui Leo X. nominari voluit, datus est. Cui plurimum sanè debet Universitas nostra, in quam primo mox electionis suæ anno mirè erat beneficius; non modò enim missis eum in finem ab Universitate Nunciis, Statuta ejusdem confirmavit, sed & Privilegium à Concilio Basileensi antehac Archi-Gymnasio nostro concessum, quo ad res Academicorum testamentarias, júsque absolvendi eos, qui in excommunicationem Canonis, *si quis suadente*, inciderint, iteratò indulgit: prout fusiùs videre est in confecta desuper Bulla, quam ex Universitatis tabulario exscriptam quidem, pagellis tamen hisce, quia longior, inferere supersedemus.

Priusquam confirmatio hæc Privilegiorum Romæ obtineretur, hospitalariæ domui, quæ à Facultate Artistica proximè ad Stubarum portam, grassante sæpiùs epidemica lue, ingenti Academiæ alumnorum bono ab Anno 1494. extructa, S. Sebastiani Sacellum adjectum est. Primus 5to die Aprilis lapis per Reverendum in Christo Patrem, ut Acta loquuntur, Præpositum ad S. Stephanum, studiique Viennensis Cancellarium jactus est, tametsi controversia adhuc superiori anno recitata, Universitatem inter, & Officiale Viennensem vigeret: interdictò quidem Facultatem Artium involverat Officialis Viennensis Georgius Angrer, si structuræ Sacelli prosequendæ insisteret: quia id tamen consensu Capituli ad D. Stephanum cæptum, novæque Officialis eam in rem requisiti autoritas accesserat, ædificium est continuatum eâ adjectâ conditione; *ne id in præjuvium futuri Ordinarii cederet.*

Haud diu post, posteaquam decem ferè annos Diecæsis Viennensis vacasset Antistite, datus est eidem Episcopus *Georgius à Scavonia* Carniolanus Labacensis, Administrator antehac Petinensis, Cæsari Maximiliano à Consiliis, & Sacris Concionibus, à quo, non obstante Bulla Pontificia paulò ante memorata, *circa ju-*  
*rudi-*

*risdictionem, & res testamentarias in Clerum Universitatis, controversia est resumpta. Cæterum præfuit Ecclesiæ Viennensi magna cum laude annis novem, ut ad annum 1522, dicetur.*

Interea, ut Ederus cum Actis Artificis ad annum hunc annotant, 20. Maii, ipso nempe festo Corporis Christi die in Suburbiis Academicos inter, & vinicolas (*Ligonistas* vocitant) rixæ enatæ sunt, eâ causâ, quod à duobus scholarum alumni acerba, & contumeliosa in id genus *Ligonistas* conjecta sint. Ortæ inde altercationes, & clamores primùm, concursus deinde, ut fieri solet, partium; demùm velitatio inter utrosque. Cessere primi studiosi, & in domum se recepere, è qua contra rusticorum turbam tribus fere horis strenuè se defenderunt. Advolat interea Civitatis Judex cum Academiæ Legatis seditionem compositurus: sed incassum. Magister enim Quirinus Teininger à lictore vinò æstuante cum bipenni confossus esset, civis item alter trucidaretur; Joannes denique Ecker Artium Pedellus multis vulneribus læderetur, scholares in rabiem acti rursus in rusticos impetum faciunt; dum eos denique in turpem fugam compulserent. Quæ clades cum in urbe innotuisset, studiosi undique confluere, insurgere in Magistros suos, scholarum portas perfringere, ac in ipsum Ducale Collegium irruere, daturi stragem, nisi Magnifici Domini Rectoris singulari prudentia fuissent mitigati.

Anno tandem isto, ipso Pervigilio Commemorationis Fidelium defunctorum, teste Cuspiniano, & Actis nostris, cineres Divi Friderici IV. monumento, à Maximiliano I. Cæsare, filio piissimo, tandem absoluto magnificentissimè sunt illati, Antistite Viennensi Georgio à Slavonia, universo Clero, & Austriæ Proceribus funebrem pompam honorantibus. Sermone de laudibus Friderici dixit Joannes Cuspinianus Universitatis Superintendens. Moles hæc cum & pretii summi (nam erogatas Cuspinianus ait in eam plus

quàm

quàm quadraginta numerorum aureorum millia) & artificii singularis à nullis non prædicetur, juverit descriptionem illius ex Authore Memorab. de templo, ac Turri ad S. Stephanum, Universitatis nostræ historiæ inferere:

\* Augustum hoc monumentum, quod longitudine sua 5. faciliè ulnas, latitudine verò  $2\frac{1}{2}$  complectitur, ex albo, purpureique coloris marmore exurgit: undique artificio incredibili efformatis ferarum, bestiarumque formis instructum, pluribusque, quàm centenis imaginibus ad Majestatem summam exornatum, quarum quælibet unum, & medium pedem altitudine sua æquat. Superiùs imminent triginta Provinciarum hæreditariarum insignia, atque in quatuor sepulchri angulis Electorum Principum pari è lapide eleganter elaboratæ effigies, inter quas media Friderici ipsius imago Imperatoriis vestibus, coronæque ad omnem venerationem elaborata conspicitur: Ex ore illius quinque hæ vocales: A. E. I. O. U. quibus, dum viveret, sæpiùs usus fuisse, dicitur, prodeunt. His alii Cæsarem significare voluisse contendunt: *Aquila, Electa, Justa, Omnia, Vincet.* Alii interpretantur in hunc sensum: *Austria Est Imperare Orbi Universo.* Alii: *Austria Erit In Orbe Ultima.* Alii deniq; Oedipi alias symboli illius divinant significationes; ut quadraginta ejus nonnulli recenseant. Imaginem Friderici circumdant scuta Gentilitia Domûs Habsburgicæ: Ad verticem verò effigies S. Christophori puerum Jesum humeris gestantis erigitur; appensæ denique à Maximiliano binæ æreæ tabulæ aurò obductæ, in quibus vita, diésque obitûs descriptus est. \*

**An. 1514.**

**C**omposito superiori anno Studiosorum tumultu, novus, isque major, qui vulgò *Bellum Latinum* nominabatur, anno hoc exortus est. Ubi enim occasione dictæ rixæ ab Austriæ Regentibus singulorum locò



locò jus deportandi arma Studiosi extorsissent, crebriores cum opifium turbâ factiones sunt concitatæ: quæ res Facultatem Artium, sub cujus potestate in Bursis plerique vivebant, movit; ut per Magistrum Vincentium Rogkner Cæsari à secretis ageret de abrogando privilegio. Novum igitur in Alumnos Academiæ decretum promulgatur, quo arma deportare prohiberentur. Obsequuntur Scholastici; verùm cùm hi cingulis rursus inducti ludibrio, & joco essent indotæ multitudini, armorum usum violentiùs rursus extorquere connituntur. Rejecti omnes, & postulata denegata: ad hæc factionis authores, multis etiam minis territi primùm, tum ex urbe abesse iussi. Quibus moti, commune Alumni fædus ineunt, Præfectos, Capitaneosque sibi ex Bursis, Codriisque designant, & turmis suis præficiunt. Erecto demum ipso pervigilio D. Laurentii vexillo Viennam 800. numero egressi rectâ Maximilianum Cæsarem, erat is tum Welsæ superioris Austriæ oppido, petunt. Quò cum attigissent: Cæsari *Melchioris Seütter* latini exercitûs Oratoris operâ itineris causam exponunt. Optimus Cæsar seu Juventutis simplicitate, seu literarum amore permotus, milites Scholasticos honestò donatos viaticò cum clementiæ significatione redire jubet, atque causam omnem Illustrissimo Principi Domino Ernesto Marchioni Badensi, vices Cæsaris in Austria gerenti, commisit. Repetunt illi Viennam in vigilia Nativitatis Mariæ: atque non cingulorum ponendorum modò impetrant facultatem, sed & armorum usum; atque sic Latinum Bellum est confectum.

Sub finem jam erat annus. cùm Rector Magnificus ex commissione Cæsaris literas accipit, quibus mandatum; ut Facultas Theologica, & Matheseos Magistri, quosdam designent, qui conficerent, ut Acta loquuntur, *rectificationem Calendarii super festo P. schatis*. Nominavit Facultas Theologica duos egregiè scientiæ peritos, suos item Facultas Artium Mathematicæ Magistros;

fros ; qui brevi interpolito temporis spatio modum , rationemque Calendarii , celebrandi Paschatis causâ , confecere , documento desuper confecto ad Cæsarem transmissio.

## An. 1515.

**S**ub anni initium Syndicus Ingolstadiensis Academiæ , Udalricus Wolff, quod minùs benevolas ab Universitatis nostræ Consilio antehac nactus sit aures, libellum supplicem Austriæ Regentibus porrexerat, quo Gymnasii sui, ac Baviaræ Ducis nomine orabat; darent Regentes in mandatis Rectori Magnifico, ac Universitati nostræ, ut ab eadem sibi privilegia, statuta, consuetudines, libertatésque tum à Pontifice, cum Austriæ Ducibus Archi-Gymnasio indultas extraderentur, quas ritè descriptas & autoritate Notarii signatas cum Ingolstadiensi communicarent. Miserant desuper Regentes decretum ad Universitatem; verùm omnibus Facultatibus visum: *Originales literas ob multa pericula non esse extradenda: deinde quod privilegia ab Austriæ Ducibus concessa non se extendant ad Baviaræ jura: effectumque, ut nullo legationis fructu Syndicus Ingolstadtium rediret.*

Sub medium deinde Julium spectavit Vienna conventum, suâque intra mœnia conclusit eos Reges, ac Principes, quos una in civitate collectos nec ulla antea ætas vidit, nec Majestate pari locus ullus superavit. Aderant siquidem ex condicito Viennensi in urbe Maximilianus Cæsar, quod Welsâ descenderat; aderat Uladislaus Hungariæ, & Bohemiæ; Sigismundus Poloniæ, Reges fratres; aderant Ludovicus, & Anna Regiæ proles Uladislai: aderat Maria Castellæ Infans Maximiliani ex Philippo, & Joanna Neptis; aderant Cardinales duo, Mathæus Gurcensis Antistes, & Thomas Strigonienfis Archi-Episcopus: Nuntius item Apostolicus Leonis X. Episcopus Feltrensis: aderant Wilhelmus Baviaræ Dux; Joannes ex iisdem Baviaræ Duci-

Ducibus Ratisbonensis Præsul ; Casimirus Brandeburgensis Marchio ; Albertus Dux Mechleburgicus ; Udalricus Würtenbergæ Princeps , cum Hispaniæ , & Angliæ oratoribus : aderant denique Colocenſis , & Bremenſis Archi - Episcopi ; Georgius Quinque Eccleſienſis ; Mathias Uratiſlaviensis ; Stanislaus Olomucenſis ; Ladislaus Vacienſis , Wigileus Paſſaviensis ; Chriſtophorus Labacenſis ; Petrus Primiſlaviensis ; Joannes Poſnaniensis ; Berthöldus Chiemſeenſis , Episcopi , pluresque alii utraque ex Republica Proceres. Actum hoc in congressu præcipue de pace has inter coronas mutuo conjugiô firmandas ; unde peractis celeberrimo ingressu in templo Divi Stephani officiis Divinis , quæ Viennensis Antistes Georgius à Slavonia tanta in summorum capitum corona peregerat , ibidem per Reverendissimum Cardinalem Strigonienſem Anna Uladislai filia Ferdinando Cæsaris Nepoti tum absenti ; deinde Maria Cæsaris Neptis , Caroli , Ferdinandique Soror , Ludovico Uladislai Filio , sunt desponsatæ : successio item in Regna Hungariæ , & Bohemiæ , si mascula proles Uladislai deficeret , Domui Austriacæ confirmata ; pluræque alia Regnorum negotia confecta sunt. Totius hujus conventûs seriem , festivitatisque rerum singulis diebus gestarum *Diario* complexus est Joannes Cuspinianus. Tribus item libris , quos *Hodæporicon* vocat , eundem descripsit Perusinus Cardinali Gurcensi à Sacellis.

Nec minor Universitati nostræ ab hoc conventu splendor , & existimatio ; nam præterquam quod ingressuri Viennam Cæsar , ac Reges extra urbis portas à Rectore Magnifico , quatuor Facultatum Doctoribus , ac Academiæ alumnis omnibus pulchro ordine comitantibus excepti ; Cæsar etiam , Reges , Regina , Duces , Cardinales , & Episcopi ferè singuli à singulis Universitatis Magistris apto eam in rem sermone sunt salutati : qui subinde in unum collecti typis vulgabantur :

elegantes sanè , & pro eo tempore tersi : quorum Exemplum inter libros Facultatis Artisticæ asservatur.

An. 1516.

**D**Um à morte , quam anno hoc obiit , Ferdinandi Catholici Hispaniarum Regis Carolus Regnum Hispaniarum obtinet ; sub mensem Majum ab Austriæ Regentibus , adnitente potissimum Cardinali Mathæo Episcopo Gurcensi , rursus Decretum impetratur ; ut Scholarum alumni abjectis armis consueti habitu , certique coloris uterentur.

Refert quoque Ederi Catalogus ad annum præsentem , obitum Reverendissimi Præpositi ad D. Stephanum , Universitatique ; à Cancellis , Joannis Buschii , Theologiæ Doctoris ; nominato ejus in locum Paulo de Oberstein.

Adivit anno hoc , & famâ excitus , & eruditionis periclitandæ causâ Universitatem nostram Spectatus in paucis sub ea tempora Vir , *Joannes Eckius* Artium , & Theologiæ Ingolstadii Doctor , ibidem Pro - Cancellarius , & Canonicus Aichstadiensis , futurus postea Religionis Catholicæ invictissimus adversus Martinum Lutherum Propugnator. Dederat hoc de suo itinere , rebûsque à se Viennæ gestis , ac visis epistolam benè longam ad Reverendissimum Episcopum Aichstadiensem , quæ quoniam permulta , quæ ad Academiæ nostræ sub id temporis notitiam , commendationemque faciunt , complectitur , haud abs re me facturum duxi , si , quæ ad historiam nostram attinent , in gratiam benevoli Lectoris adduxero , sic itaque in laudata epistola scribit :

*Causam autem primariam itineris mei , vel me tacente , non obscure novit Paternitas tua Reverendissima , compertum jam pridem habens , quid sit in votis Eckio , quamque ardentè disputatorium obeat munus , ac scholasticam argumentandi pugnam exerceat. Et cum aliàs Agrippinam viderim , Heidelbergam , Friburgum , Moguntiacum , Tubingam ,*

gam, Basileam, ac anno superiori magnis impendiis Bononiam; Vienna tantopere celebrata videnda supererat, &c. Vigesima octava Julii Viennam applicuimus; capi mox ego altero die cum bonis viris, Domino Joanne Cuspiniano praesertim, de habenda per me disputatione verba facere: & vigesima nona Julii Almae Facultatis Theologicae Decanum adii pro Patribus quam primum convocandis: qui difficilem se exhibuit; quod Patres gravissimi non facile, aut fortuito, sed statis observationibus convenirent. Tandem prima Augusti Theologis convocatis proposui vota mea, perbrevis captata benevolentia supplex rogans: ut me ad disputandum via regia admittere dignarentur; optione eis data materia eligenda cujuscunque, principaliter à Theologis in Sententiarum Commentariis tacta.

Differebatur viri eruditissimi desiderium: nam paratos se ad disputandum quidem Theologi obtulere, ea tamen lege, ut tantisper Eckius Viennae moraretur, dum finitis studiorum feriis rursus ad scholas reverterentur; quod si tamdiu expectare ei non esset integrum, facultatem ei fecerunt, ut, cum Theologi sub Priore Collegii Ducalis singulis feriis sextis disputationem haberent, Respondentem ad defendendum susciperet. At cum ardentius publicum ineundi disputandi exercitium à Theologis nostris Eckius oraret, hoc demum à Reverendo Martino Hupero ex Ordine Prædicatorum Theologiae Decano tulit responsum: Domine Doctor, finale habuistis responsum, & singulariter hoc tempore, videlicet disputationum aularium, non est locus, nec opportunitas, alterius disputationis Theologicae; rogo itaque, ne molestetis Facultatem, aut me.

At omnia susque deque faciens forti animo, pergit Eckius, perdurabam, cumque Reverendissimum Episcopum Viennensem Georgium mira integritatis, ac rarae probitatis virum adiissem, quasi ejus favore Viennam rursus abiturus, etque, me desideriiis meis in Facultate Theologica disputandi frustratum, essem conquestus; operam ejusdem Reverendissimi, ac Laurentii Saurer, avarii Austriaci Praefecti, vulgò Vice-

*Dominum appellant, & Philippi Altinger Juris utriusque Doctoris, Austriaeque Quaestoris id effectum est, ut re ad Regimen Caesareum delatâ, decreverint, ut postero die manè Respondentem Dominum Augustinum Morium, Canonicum Regularem Ulmensem tuerer in materia confessionis, ac ipse 18. Augusti absque respondente viâ regiâ disputarem in majori Aula Universitatis, &c. itaque eo die obtuli eis materias tres, unam de Divinarum Personarum productionibus; alteram de Substantiis separatis Angelicis: tertiam de Castro- rum impignorationibus, fructibus in sortem non computa- tis, de redditibus perpetuis, ac pecuniariis, de vitaliciis, de pacto retrovertendi, &c.*

*Itaque sequenti die, uti decretum erat, Augustini, pro virili meâ, strenuum egi propugnatorem; quatuor tamen duntaxat erant argumentantes; in causa fuit, quod Respon- dens diutius pro more Facultatis in probandis positionibus versaretur, & quod Dominus Joannes Heckman Ostro- Francus sacrae Theologiae Licentiatus, ac Canonicus Viennen- sis, apud suos ut Chrysippo acutior in Logicis nodis habitus, prolixius: respectus à rebus absolutis separari, ac majorem esse, quàm denarium predicamentorum numerum, conten- deret: diu quoque in illa luctabatur consequentia, quam probandam susceperat: Adam est confessus in paradyso, ergo Adam est Adam, &c. Tanta porro erat auscultan- tium multitudo in loco minùs capaci, & arcto, tantâque pressura, ut Juvenis pressus viribus destitutus, syncopi de- ciderit, &c.*

*Adveniente deinde 18va die Augusti, ordinaverat Casa- reum Regimen tanquam disputationis Superintendentem egregium, ac præcellentem Virum Georgium Besserer, utri- usque Juris Doctorem Suevum, quo omnia modestè, gravi- ter, & sine turba fierent. Itaque breviuscula Oratione præ- habita, disceptatio ipsa agi capta est in frequentissimo ac ma- ximo Doctorum, adde etiam Laicorum, confesso; quorum cum ego objecta diluerem, ipsi rursus repugnabant: Atque ita summa cum maturitate, doctrina non vulgari, discepta- tio antemeridianis, & pomeridianis scholis, tota est habita.*

**Post**

Post hæc recenset multo elogio præcipuos ejus temporis Theologiæ Doctores, ita inquires: *At forte dignissime Antistes scire percipis, qui rem strenuè gesserint, & graviter in palæstra literaria versati sint? hos noverit Reverendissima Paternitas tua fuisse præcipuos: argumentatus est Doctor Martinus Huper Facultatis Theologiæ Decanus ex sacro Prædicatorum Ordine, Vir admodum acutus, & hujus scholastici exercitii gnarus: Doctor Joannes Trapp, maturæ eruditionis, ac Doctrinæ Vir, Leucotecie Parrhisorum alumnus: Doctor Joannes Camers Italus Divi Francisci Sacerdos variâ Doctrinâ præditus, Musarum Antistes, & historiae diligens scrutator, qui ex Studio Paduano (ubi cum magna laude Philosophiam est professus) ad Viennam concessit, & primus Doctoris subtilis Joannis Duns Scoti dogmata subtilissima plenis velis Viennensi Gymnasio invehit: Doctor quoque Joannes Lentich Wissenburgicus, industrius Neotericorum sectæ adsertor: Doctor Christophorus Külber ingenio, ut mihi videbatur acuto, accurate, & in forma, ut ajunt, rationes suas validas ad amussim fringebat. Post sacra Theologiæ Doctores locus datus est Facultatis Artium Decano, ac Domino Joanni Heckman sacrae Sophiæ Licentiato, in quo solo desiderâsem majorem modestiam: nam is omnia clamoribus opplebat, ac scholasticis sua volebat propenere argumenta. Thomas item Resch cognomento Velocianus, amenissimi ingenii Vir, in sacra Theologia, & humanioribus literis laureâ insignitus, afferebat pleraque remotiora ex Divi Augustini, & Platonis, de Angelicis Spiritibus, sententiâ, &c. Sicque Actus disputatorius Rectore Magnifico Victore Gamp, Doctore Georgio Besserer, ac Facultatis Decano sic volentibus, supra vota etiam celebriter finitus est.*

Enarratâ hunc in modum disputatione suâ, paucis interjectis aliis, celebrare pergit à se Viennæ conspecta, tum Archigymnasii, tum aliorum clarissimorum virorum literaria monumenta, ita scribens: *sed junabis forsân dignissime Præsul & alia à me illic visa commemorare? Primò omnium nobilem illic vidi supelectilem librorum*

*nondum in lucem editorum : inprimis clarissimorum Doctorem, Henrici de Langenstein Halliæ in Librum Genesios ; & Henrici de Oyta Frisii in Theologicas sententias Commentarios carnosissimos. Hi enim duo ab Illustrissimo Austria Duce Rudolpho ad novellam Gymnastii plantationem à Parrhisiorum Leucotecia vocati fuerunt : ceptum est autem Viennense Gymnasium præfato Duce Rudolpho Fundatore, XXVI. Annos nato, Anno à Natali Christiano, M. CCC. LXVI. in Divi Georgii Martyris festo : Sepultura eorum Doctorum in ade Divi Stephani visitur. Multa quoque illic præclara extant in Mathematicis opera, ac instrumenta à Mathematicorum Principibus Georgio Peüerbachio, Joanne de Montereio, ac aliis elaborata ; Nam Mathematica Studiosos semper habuit hæc Universitas. Vidimus etiam Georgium Trapezontium Peripatheticum, ac singularis eruditionis virum in eleganti opere, quod pro Aristotelis defensione contra Platonem, & Academiam scripsit, ex Bibliotheca Mathiæ Regis Hungari victoriosissimi allato, contra quem ob id Bessario apologiam Platonis edidit. Doctoris quoque Joannis Camers Cordigeri, cujus meminimus, nonnulla Francisci Mayronis in sententiis scripta subtilissima, nondum à calcographis excusa. Et alia id generis non parum multa.*

*Sed id memoratu dignissimum, quod Vienna apud Augustinianos ( quos nunc de Larga Manica vocant, quorumque monasterium ab Ottone Austriæ Duce circa annum 1338. vitâ functo extructum, sub id tempus eo ipso in loco steterat, ubi nunc Cœnobium à Patribus Augustinianis Eremitis Discalceatis inhabitatum, conspicitur) sepulti sunt summi Theologiæ Proceres Georgius de Arimino, acumine ingenii super veri fidem excelso, & Thomas Argentoratensis, facili, ac resolutus Doctor ( quorum uterque Prior Generalis Ordinis, ille Parisiensis Academiæ præclarum lumen, iste in pluribus per Italiam Gymnastiis clarus ; uterque Viennæ, ille quidem, ut Possevinus habet, anno 1358. iste verò 1357. mortuus ) quorum tamen epitaphia erant incondita, bar-*  
*bara,*



*bara, & numeris inconcinnis duriuscula. Rogavi amicum nostrum Joachimum Vadianum Helvetium, absolutissimum Musarum Antistitem, qui id favente propitiâ Minervâ præstare posset, ut elegantius, ac tersius tantis viris excuderet elogium; qui etiam se hoc facturum non gravatim promisit, & protinus exaravit: quod quia politum est, & elegans, placuit hîc inserere.*

## Viennæ ad sepulchrum Gregorii de Arimino, Joachimi Vadiani ex persona Gregorii Epitaphium.

**D**ulce solum patriæ tribuit mihi Ariminum ingens  
Adriaci socias; qua Padus intrat aquas.  
Me Juvenem Aufoniæ cæperunt mænia Romæ,  
Donaruntque bonis artibus ingenium.  
Mox ubi succrevit studiis vehementior ætas,  
Atque animo cæpit candidiore frui;  
Divinas arteis, & mystica sacra professus.  
Parrhisii, Gallus qua colit arva, soli:  
Interpres Divum, naturæ hominûmque serebar,  
Et primus tanta mi fuit urbe locus.  
Inde ubi tot nunc os tempus declive labores  
Fregit, & è Senio mens mihi fessa fuit.  
Ipsa Vienna locum nostræ dedit apta quieti,  
Qua celer amplificis infremat Hister aquis.  
Pulchra Vienna viris, & terræ munere dives,  
Austriadæ sobolis, Pannoniæque caput.  
Hæc, ubi deserto migravit corpore vita,  
Oclusit dulci membra caduca sinu.  
Mente fruor Divûm aspectu, & cælestibus oris,  
Quodque animus petiit muneris, illud habet.  
Si quæ meum nomen terris modò fama sequetur,  
Ingenii nobis hanc monumenta ferent.

Hucusque, & plura alia memoratu digna Eckius  
in laudata Epistola: quem vigesimâ subinde Augusti in  
Bavariam redeuntem Rector magnificus, Decanus  
Theo-

Theologiæ , & Superintendens Joannes Cuspinianus publicis rei ab eo præclarè gestæ commendatitiis ad Serenissimum Bavarix Ducem , alióque sunt profecuti.

## An. 1517.

**L**ibuit fusiori calamo Eckii laudes de Universitate nostra in medium adducere ; ut uno veluti obtutu inspiciatur , quis tunc adhuc vigor , quis ejus status : abinde enim turbata novis Lutheri dogmatibus non Germania modò , sed cum Austriacis Provinciis , atque Viennâ , sensim Universitas non parum emarcuit : datum enim Anno hoc initium sectæ , si superis placet , Evangelicæ à Martino Luthero , Augustiniano Monacho : Nam cùm , ùt ait Spondanus , is jam multo tempore pietatem fastidiret , atque etiam palàm traducere Doctores Theologiæ Scholasticæ primùm , ùt rudes , & incultos ; deinde ùt Evangelii per Sophisticam Philosophiam corruptores , cœpisset : año superiori 1416. contra illos de libero arbitrio , meritis bonorum operum , & traditionibus orsus est ; ubi demum ex occasione promulgationis indulgentiarum , quas ituris adversùs Turcam , qui orbi Christiano formidandus imminebat , certámve collaturis in id bellum pensionem Leo Pontifex indulserat , anno hoc adversùs peccatorum venias è Cathedra insaniit , positionésque edidit , in quibus Doctrinam jam antehac adversùs hæresarchas condemnatam , palàm asseribat. Atque his ex scintillis mox eruperunt futura perversæ doctrinæ incendia , quæ aquæ guttula , ùt ajebat *Sadoletus* , prudenti , & forti manu adhibita extingui potuissent. Id tamen velut in proloquio ad hæc tempora Universitati dandum commendationis ; quòd tamen non pauci subinde ejusdem alumni ad nova defecerint dogmata , Saniori tamen , & meliori sui ex parte semper avitæ Religionis propugnatrix , & Catholica fuerit.

Hæc dum toris fervent ; non deerant domi nostræ , quæ curarentur. Præterquam enim , quod non acquie-

acquiesceret Bullæ Pontificiæ ad añum 1513. recitatæ, Reverendissimus Viennæ Antistes : alia multa in præjudicium Universitatis , à Civibus incommoda facessuntur : ne ergo detrimentum jura Universitatis acciperent , Rector Magnificus , ex Consilio Quatuor Facultatum , gravamina in unum redacta conscribi jubet ad Cæsarem transmittenda. Jámque ipse Rector viæ se accinxerat mense Septembri , cùm nuncio perfertur , Cæsarem Viennam iter instituisse. Igitur Magister *Joannes Abbauser* ad Maximilianum missus, id responsi ad Universitatem reportavit : Cæsarem Litis compositionem commisisse Consiliariis suis procurandam. Verùm ubi ea re sibi parum prospectum Universitas adverteret, ad Cæsarem iterum delegat Magistrum *Sebastianum Wunderl* Licentiatum in Theologia , qui , dum viveret Maximilianus causam Universitatis quidem egit , etsi ad optatum exitum, & finem non perduxerat.

### An. 1518.

**C**onvocavit Maximilianus Cæsar Imperii ordines Augustam Vindelicorum ; quorum in comitiis tametsi plurimùm de bello Turcico , deque Carolo Nepote in Cæsarem creando , actum sit ; non minùs tamen deliberatum ; qua ratione nova doctrina supprimeretur , Aderat Comitiis Lutherus , qui versipelllem induens revocationem dogmatum suorum adpromittebat ; sed mox , ubi Comitiis excessit , depositâ larvâ veterem vultum referebat. Certè recitat Bredenbachius , *supra Lutheri cucullum illu in comitiis sedentem Dæmonem à Maximiliano Cæsare conspectum*. Redux ergo Lutherus , cùm suos divulgare errores pergeret , jámque Academicos Wittenbergenses , aliósq; quàm plures lue sua infecisset ; eosdem non pauci Theologi , quos inter præcipuè laudatus paulò ante Joannes Eckius , impugnandos , exagitandósq; suscepêre. Sed potentiori remedio ( ùt ipsemet Maximilianus Pontifici

fici significârat, operam suam deferens ) opus fuisset; nisi mitioribus primùm & Pontifici, & aliis pestiferum malum curandum esset visum. Lutherus igitur Romam evocatur; ne tamen iret, per Fridericum Saxonem effectum.

Inter has & Regnorum, & Ecclesiæ turbas, Maximilianus Cæsar investigandæ Domûs Habsburgicæ origini, cæptum multos jam ante annos Studium, in quod plurimum ingenia sollicitaverat, prosequi constituit; Cæteras inter opiniones cùm Joannes Stabius, in eam propenderet: Domum Habsburgicam à Noë, & Cham ejus filio non interrupta serie propagatam: tamen si ea sententia, ut Lequileus de rebus Austriacis refert, plurimum Maximiliano displiceret, dedit tamen ad Universitatem literas, ut certos de Facultate Theologica deligeret, qui Genealogiam à Noë inchoatam ad Sicambrum usque, si fors quidpiam sententiæ Joannis Stabii, aliorumque ejusdem mentis, subesset veritatis, contexerent: cujus imperio obsequuta Facultas, per designatos eum in laborem Doctores, Joannem Trapp, & Joannem Camertem, desideratam complexa est Genealogiam, Cæsarique transmissit.

## An. 1519.

**I**Pso fere hoc in ornandæ Domus suæ, qua ortus est, conatu, anni scilicet hujus initio vitam mortalem posuit Augustissimus Cæsar Maximilianus. Dum enim superiori anno, ut Roo recitat, solutis Augustæ comitiis Oenipontum profectus, variis Legationibus operam daret, Nepotisque Caroli in Imperio successionem identidem urgeret, lenta febris corripitur. Welsam oppidum mutandi soli causâ cùm venisset, morbusque intenderetur, ibidem substitit; Georgio quodam Carthusiano, qui olim ei à confessionibus, Friburgo acciri jussu; multa cùm eo de salute animæ, rebusque Divinis commentatus. Viennâ præter Domesticos, Guilielmus Polymius, & Georgius Collimitius Academici Medi-

Medici sunt accersiti; interdiu Oratores, noctu, quòd infomniis ageretur, Joannem Stabium res Austriacorum legentem audiebat. Ultimis demum sacris ritè perceptis animam Deo 12ma Januarii reddidit, ut Acta Universitatis tradunt, tertiam inter, quintamq; horam matutinam, cum vixisset annos prope sexaginta; & triginta duos imperâset. Cadaver, ut jusserat, in tumbam, quam teste Guspignano, quinque & ampliùs annis arcæ instar, cæteris rei ignaris, circumferebat, impositum; Viennam primùm, deinde Neapolim Austriæ deportatum: ubi sub Divi Georgii Ara etiamnum conditum, anastasin præstolatur, Comitabantur Funus Welsâ Viennam usque, iisdem Actis testantibus, Cardinalis sancti Sixti, & Ernestus è Bavariæ Ducibus Pataviensis Ecclesiæ Administrator. Universitas Imperatori Optimo, cui non conservata modò, sed aucta etiam jura sua, studiorumque incrementa perpetuò debet, Viennæ primùm ad D. Stéphani parentavit; funebrem inde pompam Neostadium attris induta deduxit, Philippo Gundelio Humanitatis Magistro de laudibus Literati, & literatorum meritissimi Principis perorante.

Quiescentibus licèt Neostadii in Austria Maximiliani cineribus, Oeniponti tamen in Tyroli Franciscanorum in templo monumentum eisdem tam materiæ pretio, quàm operis elegantia eximium subinde à Ferdinando I. jam Cæsare erectum est. Ex nobili marmore tota constat moles; uti & viginti quatuor scuta circa inferiorem ejus ambitum disposita, quibus eleganter incisa tanti Imperatoris gesta. Mirum his decus addunt per intercolumnia distributæ viginti octo æneæ statuæ humanâ staturâ majores, habitumque, & armaturam juxta cujusvis morem raro artificio representantes, quorum syllabus, nominâque ex Lambecio *Germaniæ Austriacæ* est insertus. Appensum monumento sequens legere est Epitaphium:

IMPERATORI CÆSARI MAXIMILIANO PIO, FELICI, AUGUSTO PRINCIPI, TUM PACIS, TUM BELLII ARTIBUS, OMNIUM SUÆ ÆTATIS REGUM LONGE CLARISSIMO: SUB CUJUS FELICI IMPERIO INCLYTA GERMANIA DULCISSIMA ILLIUS PATRIA TAM ARMIS, QUAM LITTERARUM STUDIIS, PLUSQUAM ANTEHAC FLORERE, CAPUTQUE SUPER ALIAS NATIONES EXTOLLERE COEPIT: CUJUS INSIGNIA FACTA TABELLIS INFERIORIBUS, QUAMVIS SUB COMPENDIO, EXPRESSA CONSPICIUNTUR. IMPERATOR CÆSAR FERDINANDUS, PIUS, FELIX, AUGUSTUS AVO SUO PATERNO PERQUAM COLENDO AC BENE MERITO, PIETATIS, ATQUE GRATITUDINIS ERGO POSUIT. NATUS EST XXII. MARTII, ANNO DOMINI MCCCCLIX. OBIT ANNO DOMINI MDXIX. XII. MENSIS JANUARIi.

Vix Neostadii Maximilianus sepulturæ mandatur, jam Vienna intestinis tumultibus æstuari cœpit. Austriæ enim Ordines coacto Provinciali Conventu, veteres exosi Regentes, officio, ac gesto munere privant, novosque sine Archiducum Fratrum absentium consensu, contra etiam ultimam Maximiliani voluntatem substituunt. Illi odium Provincialium, ac furorem insanientis vulgi metuentes Neostadium abiierunt, Gubernio Austriæ in duas scisso partes. Duravit ea Viennensium dissensio, ac interregnum in annum usque Vigesium secundum, dum adventu in Austriam Ferdinandi Hispaniarum Infantis, ac Austriæ Archiducis res fuere pacatæ.

Ne tamen Regium Consilium Neapolim Austriæ profugum Viennæ gubernacula deseruisse videretur: ad Universitatem dedere literas, quibus, postulabant: *Ut Universitas, si quos Cives à via justitiæ, & veritatis, quantum ad hoc negotium de Reſtoribus Provinciarum, aberrare cognoscerent, tanquam prudentiores eosdem ab errore revocarent.* Visum est, perlectis literis, Facultatibus  
lingu-

singulis, nihil omnino dandum responsi; ne Universitas adhærendo uni, vel alteri parti notam aliquam, & offensam incurreret. Verùm mox secundæ ab iisdem sunt redditæ: quod ubi Provincialibus innotuisset, ablegant Sub-Marschallum, & Joannem Frimer, multis adhortantes: ne sese ulli parti admisceat Universitas, sed uti promissit, neutras sequeretur partes.

Interea Francofordiæ ab Imperii Electoribus in Romanorum Imperatorem Carolus Archidux Austriæ, & amplissimorum Hispaniæ Regnorum Rex (rejectione Francisco Galliarum Rege, potentissimo æmulo, ac recusante, ut Spondanus ex Erasmo docet, supremam Imperii dignitatem Friderico Saxone) renuntiatus est: cujus inaugurationis Acta Theologica sic meminere: *Vigesimâ octavâ Junii, quæ est dies Leonis Papæ, serenissimæ Hispaniarum, & utriusque Sicilia, ac Hierusalem &c. Rex potentissimus, Carolus, Archidux Austriæ, Francofordiæ unanimi Electorum consensu illius diei horâ nonâ Romanorum Rex proclamatur, propter cujus festivam electionem splendida festivitas Viennæ 6. Julii agitur in bombardis explosis, institutis processionibus gaudiosis, & quod notatu dignum extitit, in apice turris S. Stephani ignis vivacissimus incensus visus est, & bombardarum sonitus auditus, ac omnibus quasi perpetuus apparuit.*

Redditæ sunt inter hæc Universitati faventes sanè Romæ literæ, è quibus spes affulgebat desideratæ cum Viennensi Episcopo in causa testamentaria Clericorum concordie: verùm is Pontificiâ Bullâ intellectâ non modò Privilegiis Archigymnasii oblectatur, sed 24ta Julii affixâ publicis in valvis S. Stephani, & Collegii Ducalis appellatione, Universitatem ad Urbem provocavit. Quò cum Procuratorem misisset Episcopus, coacta est Universitas collatis per Facultates expensis, & suos illac submittere.

Maximiliani obitu factus insolentior Lutherus, liberius in Sacerdotes invehebatur. Tractavit tamen anno hoc cum Carolo Militio, Nobili Germano, ac Pontifi-

Pontifici à Cubiculis, qui sub id tempus Rosam auream Friderico Saxoni à Pontifice honoris causâ submissam attulerat : ita ut Lutherus fateretur, sopiri Religionis negotia potuisse, si ea dexteritate secum Cajetanus egisset. Dedit quoque literas ad Pontificem humiles, & modestas, quibus se, causamque suam totam ei subjecit. Quominus tamen, ut convenerat, Confluentiam cum Miltitio accederet, controversias ibidem coram Archiepiscopo Trevirensi composituri, instantem Lipsiæ Congressum, ad quem condixerat cum Eckio, uti superius insinuavimus, prætexebat. Habita itaque ea est 27ma Junii coram Georgio Saxoniae Duce, Friderici Electoris Patruale, Catholicæ fidei studiosissimo; Judicibus congressus delectis Theologis Parisiensibus, & Erfordiensibus; continuata sunt religionis illa certamina ad 14. Julii, Eckio palmam referente. Post quod colloquium scripta quædam Lutheri Universitas Colonienfis, & Lovaniensis igni comburi jussit; Parisiensis verò quatuor & centum propositiones ejusdem publico scripto condemnavit.

Eodem hoc anno, ut Acta Universitatis habent, \* 30ma Martii Consilium Universitatis accessit R. P. Theobaldus Ordinis Minorum de observantia, petendo ab eodem, ut literas conficeret, quibus sanctissimo Domino, & Sedi Apostolicæ commendaretur plurimum Canonizatio Joannis Capistrani, quondam Viennæ, & per Austriam, Hungariamque, Germaniam, & Bohemiam indefessi animarum zelotis, ac in Belgradensi obsidione anno 1456. strenui precibus suis ad Deum defensoris, multisq; miraculis clari. \* De quo Kranzius illud reliquit : *Joannes in Germaniam descendit predicans magno zelo verbum Dei, in Austria, Bavaria, Suevia, Thuringa, & Saxonia, mortuus est Villaci in Carinthia oppido.* Annuit libenter justo desiderio Consilium, & optimam formam promotionales, ut loquuntur Acta, literæ ad summum Pontificem in dicta Canonizationis causa exaratæ sunt.



An. 1520.

**M**emorant Acta Universitatis ad annum hunc, mense Junio Claustro - Neoburgum advenisse Principum Caroli, ac Ferdinandi Fratrum, Austriæ Archiducum Legatos, quos inter Casimirus Brandenburgensis Marchio, & Carolus Princeps ab Oetting, eorundem nomine ab Austriæ Ordinibus, Viennensique Senatu fidei juramentum excepturos. Eandem, ut jurarent, Facultas quoque Juridica, ac Medica vocatæ sunt. At sententiâ in Universitatis Consilio postulatâ, conclusum; solus ut Rector Magnus Claustro-Neoburgum ascenderet Legatos Archiducum Universitatis nomine salutaturus.

Insignito subinde Aquisgrani 9no Calendas Novembris Imperii Coronâ Carolo, suam contestata est lætitiâ Vienna editis per Urbem non vulgaris gaudii signis; à quibus gliscente adhuc inter Episcopum, & Universitatem lite non semel memoratâ, cum Academici excluderentur: Universitatis ex Consilio in valvis Collegii Ducalis mandatum est affixum; vi cujus Academici omnes in proximam diem Dominicam convocabantur: ducta est, ut Acta ajunt, solemnis supplicatio Universitatis ad Scotorum Ecclesiam, ubi inter Missarum solemnias gratiæ Deo Actæ pro collata Romani Imperii Corona Austriaci sanguinis Principi.

Interea terminato Lipsiæ congressu, quod Lutherus insolesceret indies, Eckius Romam profectus est, exhibuitque coram Pontifici, quæ Germaniæ, ni Lutheri dogmatibus seridè occurratur, imminerent discrimina. Itaque Leo X. re diu, multùmque diliberatâ, Cardinalibus in Consilium adhibitis, doctrinam ejusdem quadraginta, & uno capitibus comprehensam, literis publicis, quæ incipiunt: *Exsurge Domine, & judica Causam tuam*, Calendis Julii ita condemnavit, ut libros quidem chartasque aboleri jussuisset, Authorem tamen, & Sectatores ad resipiscentiam invitaret, dato

ad errorum abjurationem publicè faciendam 60. dierum spatio. Redux cum Bulla Pontificis in Germaniam Eckius, ejusdem exemplum tum ad alias Germaniæ, cum ad nostram quoque transmissit Universitatem, suis etiam adjectis literis sequentis tenoris.

**Magnifico Domino Rectori, & aliis clarissimis viris Studium Laudatissimum Vienne Regentibus, Dominis suis colendissimis.**

**Salutem cum paratis obsequiis.**

**P**ost diligentem dogmatis Lutherani discussionem, Rector Magnifice, & Doctissimi Viri, Sanctissimus Dominus Bullam contra certos errores edidit; & mihi, licet invito, publicandam in certis partibus injunxit: quod ego strenuè feci nulla veritus pericula, in Ecclesia Misnienfi, Merseburgensi, & Brandenburgensi; aliis Episcopis, Principibus, & Studiis Generalibus partim coram, partim per literas insinuavi. Functurus ergo officio meo, Vestris Paternitatibus copiam Bullæ in Urbe impressam, Sigillo Prælati, & subscriptione Notarii munitam, transmittito; quantum ex me est orans, & obsecrans, ac Summi Pontificis nomine requirens, & præcipiens; ut quatenus fieri poterit, omnes Vestra jurisdictioni subiectos sub debito Obedientiæ convocetis, ac eis convocatis Bullam publicetis; mandando eisdem juxta continentiam Bullæ, ne quisquam articulos condemnatos, vel legendo, vel disputando, aut scribendo, defendat, laudet, doceat, aut affirmet; sub penis in Bulla contentis, & exclusionis ab Universitate: Libros quoque Lutheri, & adherentium, sub eisdem penis, mandetis per eos Rectori Universitatis præsentari, qui omnes, & singulos comburi publicè faciat: & de his, ubi opus fuerit, fideliter testimonium perhibere poteritis: nisi essent aliqui Doctores Theologi, aut Juris Canonici, qui Zelo veritatis, ac ad excutiendos errores, non ad invertendam veritatem, hujusmodi libros de Licentia Rectoris, & totius Consilij, in quo conscientiam Vestram oneramus, apud se retinerent. In hoc facietis iustum

*sum Sedis Apostolica, rem Deo gratam, Ecclesie utilem,  
& fidelibus salutarem. Datum Ingolstadij 14. Octobris  
Anno Domini Millesimo Quingentesimo Vicesimo.*

Vestrae Magnificentiae & Dominationibus  
Obsequiosus

Joannes Eckius Protonotarius, &  
Nuntius Apostolicus.

Et eguisset sanè jam tum Vienna præsentì reme-  
dio; nam præterquam, quòd passim Viennensium in  
manibus propudiosi dogmatis chartæ volitarent, no-  
væque doctrina cum à Poëtis, tum liberioris vitæ ho-  
minibus celebraretur: erant jam non pauci ex Nobili-  
tate æquè, ac vulgo, quibus illa & arridebat, & altiùs  
inhæsit. Lentiori tamen pede primùm in causa Lu-  
theri ab Universitate est processum; perlectis enim Ec-  
kij, Pontificisque literis, ea ferè Facultatum omnium  
fuit Sententia: *quòd cum tempora, verba Actorum sunt,  
sint periculossima, & suspicionis plena, & nusquam tuta  
fides, ad præsens Bullæ Apostolicæ ad mandata Eckiana non  
fiat executio, cum ea tamen protestatione; quòd Facultates  
ab Ecclesia & Maximi Pontificis mandato nequaquam de-  
flectere velint, prout nec debent eidem refragari; dummodò  
sufficienter, & legitimè, & cum eâ, qua decet, lega-  
litate Eckius de Mandato, & Autoritate Apostolica Uni-  
versitatem informaverit; accesserit insuper mandatum Ma-  
jestatis Cæsareæ, ad quam Universitas hoc super negotio li-  
teras censebat expediendâs.*

Maturiori interea rem consilio Facultas Theologi-  
ca perpendens, Feriâ 2dâ post S. Martini festum in eam  
demum ivit sententiam: *quòd omnino per omnia, & sin-  
gula Bullæ Apostolicæ, vel ejus transcripto sit obediendum:  
& quòd Magnificus Dominus Rector juxta scripta Doctoris  
Eckij, & modum in Bulla Apostolica expressum seriòse, &  
quantocyus procedat, prædictæque Bulla Reverendissimo  
Episcopo Viennensi communicetur. Mox insuper de me-  
diis dandi executioni mandata Pontificis prospectum;*

scilicet : ut D. Doctor Trapp unà cum Facultatis Decano adiret Episcopum, & sequentes proponeret articulos.

*Primò ; quod incipiendo bujushmodi negotium Inquisitionis Reverendissimus Episcopus Viennensis cum Facultate Theologica in finem continuare, nec tepidè, quæ optimo inchoata sunt principio, omittere velit. Secundò ; quod uniformis instructio detur omnibus Prædicatoribus Viennensibus, & quod omnes citentur ad Curiam Episcopalem ad audiendum transcriptum Apostolicum. Tertio : quod fiat publicè in valvis Ecclesiarum mandati affixio. Quarto ; quod Bibliopola, & ceteri venditores bujushmodi libellorum seriòsius inhibeantur, & mercatores, qui tales libellos huc adduxerint, arestantur, nec permittantur dispendere ad alia loca. Quintò : quod transcriptum afferatur ad imprimendum, ita quod ad minùs cuilibet Prædicanti ad manus offeri possit, & quod fiat summarium extractum in lingua Alemanica ex Bulla, sic quod nullus valeat se excusare. Sextò : quod Domini Doctores interea deliberent pro refutatione errorum potissimum in Bulla Apostolica signatorum.*

Tam Studiosam obsequendi Bullæ Pontificæ voluntatem Facultatis Theologicæ, minùs, quàm par erat, æquo animo tulit cum Consilio suo Rector, qui tunc Universitati præerat, Magnus, Joannes Wenzlhauser, Artium, & Medicinæ Doctor, eâ de causâ, quod Inquisitio à Facultate Theologica tam propere suscepta in contemptum Rectoris cedat; expectandumque sit præcisum à Cæsare mandatum. Decimâ ergo Decembris conceptam protestationem à Notario Universitatis subscriptam, per Clarissimum Artium, & Juris Doctorem Andream Harrer publicavit, ac subinde Augusto Carolo V. Wormatiam transmisit; quæ sic habet:

*Nos Joannes Wenzlhauser, Artium, & Saluberrimæ Medicinæ Doctor, ac Alma Universitatis Studii Viennensis Rector, nos denique Procuratores, Consiliarii,*  
*& Af-*

& Assessores dictam Universitatem representantes, nomine,  
 vice, ac de commissione totius Universitatis, & singularum  
 personarum, & membrorum ejusdem, coram vobis Nota-  
 rio publico, & testibus presentibus infra notata deducimus,  
 & protestamur; Quoniam nuper per quendam Joannem Ec-  
 kium Theologum, ut videbatur, certa litera ad nos & Uni-  
 versitatem predictam, negotium Doctoris Martini Lutheri  
 tangentes, missa fuissent. Nos Rector ante nominatus, ut  
 debebamus, literas prænominatas ad quatuor Facultates  
 transmisimus; qua omnes, & singula negotium maturè,  
 & digestè deliberantes, singula vota sua juxta Universitatis  
 consuetudinem attulerunt; Nos itaque Rector præfatus visis  
 Facultatum votis, apertè invenimus tres Facultates concor-  
 di voto, rem tam arduam causis moventibus suspendendam  
 fore; considerat namque Universitas esse in Germania Reve-  
 rendissimum Dominum Archiepiscopum Moguntinensis Ec-  
 clesie, qui & Primas Germanie existit, & Cardinalis est  
 à Latere Pontificis Romani: Similiter Reverendissimum Pa-  
 trem, & Dominum Archiepiscopum Salisburgensem, pari-  
 ter à Latere Pontificis summi existentem; tacemus nunc  
 de reliquis Archiepiscopis, Episcopis, Prælatiis, Principi-  
 bus, Universitatibus, Comitatibus ubilibet per Germaniam  
 constitutis, ad quos omnes procul dubio hujusmodi trans-  
 sumpta Bullæ Apostolica pervenerunt, qui hucusque non  
 publicarunt, nec opuscula Lutheri igni tradiderunt; præ-  
 terea Universitas famosissima Studij Parisiensis, qua nostra  
 mater est, ad cujus instar nostram Universitatem fundatam  
 esse, literæ foundationis apertè docent; quæ denique Parisien-  
 sis Universitas per Martinum Lutherum, & Joannem Ec-  
 kium in disputatione Lipsiensi suarum dissensionum judex  
 electa, usque in præsens Lutherum non damnavit. Et su-  
 per hæc omnia in præfata Bulla omnes receptatores, detento-  
 res, fautores &c. Lutheri quasi damnati videntur; Sicut  
 autem veridica relatione ad nos deductum est, quod idem  
 Lutherus in Curia Inviçtissimi, & Sacratissimi Domini,  
 Domini Caroli, Caesaris potentissimi, Domini & Fundato-  
 ris nostri Clementissimi his diebus fuerit, vel adhuc degit;

de cujus Inviſſimi Principis conſilio ſunt quamplures Archiepiſcopi , Epifcopi , Prælati , Doctores , & omniſariam experti , ibique nihil dignum morte , aut infamiâ eidem Luthero actum eſſe : Ne in prædicti Domini , & Principis noſtri jacturam agere videamur , Nobis nequaquam licere præcipitanter , ejuſdem Principis noſtri mente non habitâ , procedere. Et quod idem Joannes Eckius Nuncium ſe aſſerit Apoſtolicum , de cujus , de Notarii quoque , & Prælati , qui Tranſſumptum tranſmiſſum ad nos , ut aſſerit , muniêrint , legationibus nihil conſtat. Quoniam itaque Nos Rector præfatus in Conſiſtorio noſtro pro pluralitate votorum concluſimus , ob reverentiâ Illuſtriſſimi , ac Inviſſimi Principis , & Domini Noſtri Domini Caroli Romanorum Imperatoris , & Domini Ferdinandi Archiducis Austria , Fundatorum , & Dominorum Noſtrorum Clementiſſimorum , ac omnium Cardinalium , Archiepiſcoporum , Epifcoporum , Prælatorum , ac temporalium Principum totius Germaniæ , ne & ipſi macularentur eadẽ Bullâ , ut aſſerit , aut fulmen ſentiant ; ac ob alias cauſas , & ad evitandos tumultus , clamores , & populi ſeditiones , quæ per publicationem , executionem noſtram , ut timendum eſt , contra Clerum inſurgere poſſent , negotium ad tempus fore diſtinnendum ; ſperantes , ſi Sedes Apoſtolica de hiis noſtris motivis rationabilibus plenius fuerit informata , nullam indignationem ſua Sanctitatis Nos contracturos. Decanus verd , & Magiſtri Theologiæ , poſtpoſita ordinatione , ſtatutis , privilegiis , & conſuetudinibus Univerſitatis , ſe & ſuam Facultatem à Nobis , & Univerſitate prædicta diviſerunt , & declinaverunt , prout in alio proceſſu contra eoſdem Theologos forſan emanando plenius continebitur. Ne itaque jam dicti Theologi , vel quicumque alteri , nunc , aut in futurum Nobis , & Univerſitati præſata publicè , vel occultè impingere poſſint , Nos , & Univerſitatem fuiſſe , eſſe , aut fore hæreſum , errorum , aut perversorum dogmatum receptores , deſenſores , vel promotores ; Noſtris , & totius Univerſitatis noſtræ , ac omnium , & ſingularum perſonarum nobis , & prædictæ Univerſitati ſubditarum , & obedientium , nominibus melioribus , viâ , jure , & formâ , qui-

quibus possumus, aut debemus, protestamur: nunquam fuisse, & esse, vel fore de mente, & intentione nostra, vel alicujus nostri; velle consentire, defendere, recipere, aut promovere quoscunque errores, hæreses, aut perversa dogmata, quæ contra fidem Catholicam, sanctam Matrem Ecclesiam, vel ejusdem fidei articulos, aut Evangelium militarent; sed semper contra hæreticos, perversos Doctores, & errantes summis viribus laborare, fidem Christianam defendere, usque ad sanguinis, si oportuerit, effusionem. Rogamus itaque Nos Rector, Decani, Procuratores, Consiliarii, & Assessores antedicti, & nominibus, quibus supra, per Vos Notarium Publicum super hac nostra protestatione confici in signum vera, & integra fidei nostra, unum vel plura, quotquot fuerint necessaria, instrumenta publica.

Quibus nomen suum subscripsit Joannes Favorenus, aliàs Gunsthoffer, Clericus Pataviensis Diocesis sacra Imperiali Autoritate Notarius. Acta sunt anno à Nativitate Domini MDXX. Indictione octava, die verò Lunæ, quæ erat 10. Mensis Decembris.

Adductæ Rectoris Magnifici protestationi Congregata in aula Episcopali Facultas Theologica coram Notario appellationem opposuit: lectum item Nicolai V. datum eidem Facultati inquirendi in Hæreticos Privilegium; denique executio Bullæ Pontificiæ demandata. Verùm quodd rursus tum Universitatis Consilium, cùm, ut Acta ajunt, Regentum Capitaneus (qui cum non paucis jam Lutherum sequebatur) Comes Leonardus de Zeg sese interponerent; Facultas Theologica piis conatibus suis destitit; coram Notario tamen, & testibus protestata: *Quodd si ipsa ad aliquid adstringeretur per Dominos Regentes, nunc protestaretur, si metu pœnarum, & propter scandalum pusillorum, condescendere cogatur.*

An.

## AN. 1521.

**Q**uarto Januarii initium Wormationensibus Comitibus, quæ & Belli Turcici, & extirpandæ grassantis undique Lutheri doctrinæ causâ Carolus Cæsar superiori anno indixerat, datum est. Aderant iisdem seu officiorum apud Augustum, seu negotiorum Universitatis nomine, Viri ex Academia nostra clarissimi, Doctor Gabriel Vogt, Doctor Wolfgangus Prandtner, Doctor Maximilianus Transylvanus, Doctor Maximilianus de Bergiis, Doctor Martinus Sibenburger, Doctor Gregorius Gerber, aliique non pauci; à quibus cum Cæsar de lite in *re testamentaria* cum Viennensi Episcopo edoctus esset, indignius ferebat, se Universitatis Principe, ac Protectore præterito, causæ discussionem Romanam ad Curiam esse devolutam: ut ergo ad suum tribunal causa rediret, & ad Universitatem, & Episcopum revocatorias dedit; quas legere est integras in Actis Artist. Acquieverat quidem Imperio Cæsaris Universitas, Controversia tamen non nisi anno 1537. sæpius interea Romanum æquæ, ac Ferdinandi Archiducis ad tribunal revocata, composita est.

Vocatus ad ea quoque Comitibus Lutherus fuit datâ publicâ securitatis fide: cui, cum dogmata perversa, librique, in quibus eadem continebantur, objicerent, & num ea, ceu sua, agnosceret? interrogaretur; sua esse, nec revocare quidquam eorum se velle, dixit; nisi ex testimoniis Scripturarum fuisset convictus: quæ cum obstinatè assereret, plurâque turbulenta pararet; Cæsar, ut fide data sese liberaret, Lutherum reduci passus, monitum tamen: à turbis, & concionibus ut abstineret; quæ cum ille arroganter sperneret, imò indies protectione Friderici Saxons nixus insolesceret; sub mensem Majum edicto Cæsar Lutherum apertè proscripsit, ac authoritate Cæsarea, consensuque Ordinum, Decretum condemnatorium, à Leone Pontifice in eum Nonis Januariis hoc eodem anno editum,

con-



confirmat, atque elapso salvi conductus termino eundem capi, & in custodia detineri concedit; jubetque scripta ejus comburi; legi denique, teneri, ac imprimi gravissimarum poenarum interminatione interdicat. Publicum jam antea die 19. Aprilis Carolus Documentum ad praesentes Imperii Ordines exaratum promulgavit, in quo se & à progenitoribus Romano-Catholicae fidei ortum, eandem quoque se vitam, & sanguine propugnaturum, nec quieturum se antea, quam pernicioſa Lutheri dogmata abolerentur, profitetur.

Aderat quoque huic Imperij Conventui Ferdinandus, cui Cæſar Frater Regnorum, & Imperij amplitudinis causâ ſuas in Imperio vices, & ex ultima Maximiliani Avi voluntate Austriam cum hæreditariis Provinciis ceſſerat. Qui relictâ Wormatiâ non exiguo stipatus comitatu, anno jam in Autumnum vergente Austriam primum (cujus pars inferior cum Viennâ Provincialium motibus turbata fuerat) petiit: inde Gracium Styrorum abiit: ita enim Chronicon Universitatis ad diem septimam Septembris anni hujus meminit: *Gracium Styrorum ad Ferdinandum Archiducem Austria, qui nuper eo advenerat, missus est Clarissimus Vir Magister Martinus Edlinger, qui cum Domino Joanne Salio Medicina Doctore, ac Principis Archiatro causam inter Episcopum Viennensem, & Academiam eidem commendaret.*

Interea dum Wormatiæ Religionis causa agitur, redditæ sunt Cæſari literæ Regentum Austriae, & Universitatis, quibus mens ejusdem circa Eckij Epistolam, & Bullam Pontificiam pertentabatur: acerbiori animo tulit Religionis a vitæ Studiosissimus Cæſar, easdem non quantocyus executioni datas; quare sequentes ad Academiam Viennensem expedit:

Caro-

tarii Universitatis comportarentur ; traditæ quoque tabulæ Cæsareæ cum Pontificiis latino æquè , ac Alemánico idiomate typis evulgandæ.

Inclinante jam anno , 4tâ nempe Nonas Decembris , Leo Pontifex lento veneno extinctus est. Cui sub principium anni ineuntis suffectus est in supremum Antistitem Adrianus , natione Batavus , vir insigni , & doctrinâ , & morum integritate : Præceptor quondam Caroli Cæsaris. Electus est mense Januario Romæ à Cardinalibus in Hispaniis absens , retento Adriani Sexti nomine.

## An. 1522.

**N**OVUM Sidus An. hoc non Austriæ modò , sed & Universitati exortum est ; dum scilicet Ferdinandum Archiducem Austria Inferior primùm & conspexit , & suis in terris recepit. Ex Imperio siquidem , quò superiori anno ex Styria rediverat , in superiorem Austriam reversus , Lincij magno Procerum plausu , ac bonorum omnium lætitiâ est salutatus. Præstolata ibidem Ferdinandum Sponsum Anna Hungariæ , Bohemiæque Regis Uladislai Filia , cum qua Regio apparatu nuptiarum solemnia sunt peracta , In inferiorem deinde descendit Austriam multo quorundam Provincialium , Viennensiumque Civium metu , ob factionum conscientiam ; quos & paulò post pœna est consecuta : juverit rem totam ex Actis Theologicis referre :

*In Æstate Dominus Princeps noster Ferdinandus venit altera vice in Austriam celebratis Lincii nuptiis , & ad Novam Civitatem , Viennam pratercessus , divertit ; ad quam Civitatem Novam vocavit , & citavit per Edictum publicum valvè Ecclesia S. Stephani die 1a Junii anni presentis , 1522. affixum per Joannem Sieß ; quatenus Provinciales omnes Austria , ac Antiqui Regentes Casaris Maximiliani die 8va Julii coram D. Principe in Nova Civitate ad præstandam audientiam ambabus partibus , videlicet Antiquis Regentibus ,*

& co-

eorum adhaerentibus ex una ; & Provincialibus Austria infra Onasum ex parte altera , adessent. Ubi vocati sunt etiam Doctores Legum tum ex nostra , tum etiam aliis Universitatibus. Itaque partibus his auditis , ea sententia pro Dominis Antiquis Regentibus contra Dominos Provinciales lata est : quod Provinciales malè egissent ; reservaret tamen Princeps sibi panam contra eos , qui hujus negotii inceptores fuerunt principales. Et ita die 13tiâ Julii lectâ sententiâ publicè , Princeps misit capere Dominum Joannem de Puechaim , & Michaëlem de Eyzing , Barones Austriae , qui demum vigiliâ Laurentii publicè decollati sunt. Ac deinde capere misit Cives Viennenses impertinentiores ; videlicet Doctorem Juris Martinum Sübenburger Judicem civium , Joannem Ründ , Joannem Schwarz Monetarium , Stephanum Stachindweit , Fridericum Inersch , Martinum Schlosdiner , Sigefridum Steiner , Wolfgangum Schmidinger , Casparum Reitter , & Michaëlem Lungl. Ex his Civibus Viennensibus Crastino S. Laurentii sex primi sunt decollati publicè in Nova Civitate ; ultimi verò quatuor Cives ex his sunt reservati in captivitate longius.

Ab his justitiæ exercitiis tametsi Ferdinandus imperium in Austria inchoaret ; feliciora tamen Universitas sibi promittebat : nec spe falsa est : huic enim uni Principi debet , ea tempestate se conservatâ. Erat enim , ut Acta Theologica meminere , calamitosa jam Academiae conditio ; cum sæviante epidemica lue , pestilentior longè Lutheri doctrina alumnos à scholis adeundis arceret : sua namque è Pathmo ( sic latibulum illud suum *Alstadtium Saxonum* vocitabat ) redux Lutherus , alias inter execrandas chartas libellum in lucem protulit , quo Germanicam Nobilitatem adhortatus est : *Philosophiam , ac Theologiam Scholasticam , ceu animæ mortem ; Aristotelis Physica , Metaphysica , Ethica prorsus aboleri debere , declamabat.* Quem imitati præclari Discipuli Carolstadius , & Melanchton adolescentibus persuadere adnituntur : *Non esse operam literis dandam , Platonem , Aristotelem , Ciceronem , & id genus alios non nisi*

*mera scripsisse commenta , & imposturas , libròsque eorum Vulcano consecrandos ; uni Sacrorum Bibliorum lectioni vacandum ; neque fas esse homini Christiano literis deditam agere vitam ; faciendum omnibus , quòd in Genesi dictum : In sudore vultus tui vesceris pane tuo. Quibus commoti plerique adolescentum combustis Artium Liberalium libris , mechanicis officiis sese addixerunt.*

Et applicuisset profectò religiosissimus Princeps illicet manum extirpandis non Viennæ tantùm , sed per omnes suas Provincias Lutheri dogmatis , ni altiores jam egissent radices , nisique Norimbergam ad Comitiam evocatus esset. Facultati ergo Theologicæ præpripmis dat in mandatis , ne malum serperet , sedulò adcuraret. Nec illa muneri suo deerat ; ea enim tempestate ad illam *Doctor Paulus Speratus* , nuper Viennam aliunde adventans , quòd in Cathedrali Ecclesia D. Stephani è Lutheri doctrinâ prædicasset , delatus erat ; recoram testibus , & Notario examinatâ , negotiòq ; cum Officiali Viennensi communicato , sub proscriptionis pœna ad sese purgandum citatus est , seriòque interdictum , ne ullo in loco ad concionem diceret ; injunctum denique , à Religiosis æquè , ac cæteris Sacerdotibus Sperati doctrinâ è Cathedris refelleretur. At cum ad ternam reus citationem non compareret , Viennâ occultè dilapsus , in eum excommunicationis lata est sententia publicis in valvis affixa. Submiserat subinde exul Speratus Universitati propugnatricem suorum dogmatum epistolam ; quæ jussu Facultatis Theologicæ , confecto desuper commentariolo per egregium Virum Joannem Camertem Theologiæ Doctorem Ordinis Minorum S. Francisci strenuè est refutata.

Finem vitæ anno hoc sexto Calendas Maii Reverendissimus Viennæ Episcopus , Georgius à Sclavonia imposuit : ut proinde rursus minùs rectè annum sequentem obitùs ejusdem statuisse nonnulli videantur ; cum jam anni insequentis septimâ Februarii in literis à Ferdinando I. datis Petrus Bononius Viennensis Episcopa-

scopatûs Administrator nominetur, idque satis aperte confirmet Epitaphium, quod etiamnum in æde D. Stephani penes altare Divi Briicii extat, ut sequitur:

**GEORGIUS A SLATKONIA NATIONE CARNIOLUS LABAGENSIS CIVITATIS, HUIUS TEMPLI PONTIFEX, ET PETINENSIS ADMINISTRATOR. DIVI MAXIMILIANI CÆSARIS AUGUSTISSIMI A CONSILIO, ARCHIMUSICUSQUE. VIR PIENTISSIMUS, MODESTISSIMUS INTEGERRIMUS, QUI IN ORNANDO EPISCOPATU VIENNENSI OMNES ANTECESSORES SUOS FACILE SUPERAVIT. VIVUS SIBI HOC MONUMENTUM FIERI CURAVIT, ANNO SALUTIS MDXXII. SEXIO CALENDAS MAIL. VIXIT ANNIS LXVI. MENSE UNO, DIEBUS QUINQUE.**

Accersitus est Georgii in locum ad Viennenses Infulas Reverendissimus Dominus Petrus Bononius, Tergestinus Antistes, & Supremus aulæ Ferdinandi Cancellarius: qui easdem, quemadmodum ex Actis Universitatis colligere est, præcisè Administratoris nomine ad anni usque sequentis Mensem circiter Augustum summa cum laude gestavit; ut in Actis laudatis lego: *Cum Universitatis nomine anno 1523. decima Julii plura de controversia Universitatis apud Reverendissimum Petrum Bononium tractarentur, is respondit, se jam non posse cum Universitate contendere, cum esset tantum Administrator, nec haberet confirmationem à Sede Apostolica, sed ageret Administratorem Principis.*

Semestri anni hujus altero in Rectorem Magnificum Joannes Salius ex Styria, Medicinæ Doctor, electus est; sed is, quod tanquam Archiater Serenissimam Ferdinandi Conjugem sequi cogeretur, electioni suæ intercessit, aut sibi alium absentiae suæ tempore substitui postulavit: data ei ab Universitatis Consilio facultas: ut Vice-Rectorem denominaret; nominavit is primùm Joannem Heim Medicinæ Doctorem; at ille certis de causis munus recusavit; Joannem deinde

Pilhamer , quem Consilium Academicum respuit : tandem Magister Martinus Edlinger Artium Magister , & Sacrae Theologiae Licentiatus substitutus est.

### An. 1523.

**I**N Comitibus Norimbergensibus , quibus Caroli Cæsaris per Imperium Locumtenens intererat Ferdinandus , de bello rursus adversus Turcam ( à quo non pauca Germaniæ , captâ Superiori anno Rhodo , ac anno prius uno Belgrado , timenda erant ) suscipiendo , deque componendo Religionis dissidio , tractabatur ; sed exiguo utramque in partem fructu. Edoctus ibidem Austriæ Archidux Universitatis Protector , à Rectore Magnifico Joanne Salio prolabentis Academiae ; Regnorum inter , Ecclesiæque curas quantocyus ejus conservationi , incrementoque procurando mentem adjecit ; datis ad designatos ab se Commissarios literis ; quibus perspicerent , mandat , quæ ad ejus facerent emolumentum , quæve in parte eam censerent restaurandam. Alias item ad Austriæ Regentes eadem in causâ addidit. Utriusque tabulae Actis Philosophicis insertæ exstant ; nominatque iis in literis sunt Commissarii : Præpositus Claustro-Neoburgensis, Dominus Leonardus ab Harrach, Dominus Sigismundus ab Herberstein , Dominus Felicianus à Bertschach , Dominus Wilhelmus à Zelting , & Doctor Udalricus Crabath.

Hæc commissio , ubi Concilio Universitatis exhibitæ , cumque Facultatibus communicatæ ; ferè omnibus visum , ei obtemperandum ; difficiliorem tamen sese Universitas exhibuit in contribuendis pecuniariis oneribus ad bellum Turcicum , quæ Ferdinandus etiam ab Ecclesiasticis exigenda impetraverat ; multa hac in re cum delegatis pecuniæ Collectoribus , Præposito Claustro-Neoburgensi , & Scotorum Abbate pertractata : cum demum anno insequenti Universitatis nomine Norimbergam ad Episcopum Tridentinum , cui supremum sacrae collectionis munus per Germaniam im-

posi-

positum, Magister Martinus Edlinger profectus est, qui inde rediens, id unum se à Principe, plurimum operæ ad hoc Clarissimo, ac Reverendo viro Joanne Faber Universitatis Viennensis Doctore conferente, impetrâsse retulit : *Quod Clerus Steſuram, scilicet tertiam partem fructuum, non ad semel exsolvere teneatur, sed anno hoc unam; secundo alteram; tertio tertiam partem, cum relaxatione quoque summa, quam in arbitrio suorum Consiliariorum, & Episcopi Tridentini Princeps reliquisset.*

Priusquam illa de exactionibus tractantur, mense Mayo Universitas de exhibendis Statutis suis, Privilegiis, & Consuetudinibus, ipsis in originalibus tabulis; Facultates verò, sua ut singulæ conciperent gravamina, jussu Principis admonentur; & curarent unâ, ut authographæ Foundationis literæ ad Austriæ Regentes Neostadium perferrentur: Qua de re non levis Universitatis membra disceptatio tenuit, originarias Foundationis, Privilegiorumque tabulas, aliorum concedere oculis, manibusque, an expediret? Deportatæ tamen à Magnifico Dño Vice-Rectore sunt; cum antea, quo numero, quove de argumento missæ essent, abjurato Universitatis Notario in scripta referretur.

Discussis multa consideratione, & tabulis, & Facultatum gravaminibus, id tandem à Regentibus pronunciatum: collapsam in multis Universitatem, & pluribus medicinâ, & reformatione indigam videri; ageret igitur redux Vice-Rector; ut novæ institutionis forma, & articuli, unanimi Consilio ab Universitate, conderentur, conditique ad Regentes rursùm mitterentur. Fecit ille, ut imperatum, conscriptosque reformationis articulos cum singulis communicavit Facultatibus, demerent, adderentve, quæ illis videbuntur. Acerbiori hæc à Facultatibus animo accepta, ac ferè à singulis responsum: tunc optimè reformatum iri Universitatem, si vetera Statuta, Privilegia, & Consuetudines confirmarentur; si adstricti fuerint singuli ad accuratam eorundem observantiam,

& stipendia Lectoribus augerentur. Hæc ubi ad Regentes perlata sunt, additumq; esset: quòd si demum reformandam censerent Academiam, liceret ut minimum Facultatibus singulis, qui sua è re forent, articulos concipere. Ad quod impetratum id est responsi: duros Regentes operam, ut Serenissimum Principem ad postulatorum ratihabitionem inclinarent.

Hæc inter domestica negotia, anno hoc Eximius, ac Clarissimus vir Joannes Faber, Artium, & Theologiæ Doctor, egregium, ac fundatum, ut ait Cochläus, in lucem dedit opusculum, in quo adversus Lutherum auctoritatem Pontificis, Sacramenta novæ legis, Clericorum cælibatum, ac Ecclesiæ Cærimonias ex Scriptura, & utriusque Ecclesiæ Patribus solidissimè propugnat: recussum est mox Lipsiæ, ac Coloniae; ubi eadem titulus præfixus; *Malew in Haresim Lutheranam*; cui Lutherus præter scomata ferè reposuit nihil.

Cœpta etiam anno hoc primùm in Academia Viennensi lectio Grammaticæ Græcæ, ac constitutum: neminem ad Baccalaureatûs in artibus gradum promovendum, nisi Studio Græco quoque operam navâisset.

Non diu ab obitu Petri Bononij vacavit Ecclesia Viennensis; nam paucos post menses eidem præfectus Joannes à Revellis, Canonici ad S. Stephanum, ac Ferdinando Archiduci ab eleemosynis, & Confessionibus. Eodem enim anno hoc, ac in mense non nisi uno, alterove à morte Bononij Episcopum Viennensem Joannem esse denominatum, vel inde constat, quòd mense Julio anni hujus Petrum Bononium adhuc vixisse Acta Universitatis testentur; Joannem autem à Revellis jam mense Novemb. anni itidem præsentis fuisse Antistitem, datæ ejusdem ad Universitatem literæ satis declarant. Præfuit annis ferè 8. nimirum usque ad annum 1531. quo ad mercedem in cœlum est evocatus.

Vix annuo Ecclesiæ regimine vitam clausit, ut Spondanus docet, 18. Calend. Oct. Adrianus Pontifex, dum sanctissimis conservandæ in Germania Religionis



gionis Catholicæ, dissolutosque Cleri, ac Curia Romanæ mores, in quos virus omne evomebant Lutheri Seditatores, reformandi cogitationibus æstualet. Successit in Petri Cathedram post nonnullum Cardinalium dissidium 13. Calend. Decemb. Julius Medicus, Clemens VII. dictus.

## An. 1524.

**Q**uæ hætenus religiosa adhuc sub veste spargebat dogmata, eadem anno demum isto, indies in pejora ruens, abjecto palam cucullo propugnare cœpit Lutherus. Nec quidquam aliud in Comitibus Norimbergenfibus pro Religione confectum, quàm agendum: ut Pontifex in Germania liberum, & generale Concilium indiceret, cujus autoritate Religionis controversiæ definirentur; interea novum Spiræ Conventum ad Festum S. Martini habendum, in quo maturè discuteretur, qua ratione quivis interim se haberet, dum res per Concilium deciderentur; à viris doctis Lutheri, aliorumque Novatorum libri examinarentur &c. Ita soluto Norimbergenfi Conventu studiosi Luthero Ordines Spiram; Ferdinandus Archidux cum Legato Apostolico, Archiepiscopo Salisburgensi, Ducibus Bavariæ Wilhelmo, & Ludovico, nec non aliquot Episcoporum Oratoribus Ratisbonam discessere: habito hic particulari colloquio initum fœdus, quo Lutheranis conjunctim obviarent; multa quoque, eaque saluberrima pro avitâ tuendâ Religione decreta, ac quæ in futuris Comitibus Spirenfibus pro re Catholica facerent, discussa.

Interea Ferdinandus Archidux Viennam cum mandatis, & literis ad Universitatem Virum Reverendum ac Præstantem Doctorem Joannem Faber præmiserat: quam mox ubi attigit, 29. Julij Rectorem Magnificum, ac nonnullos Deputatos in domum Kirchhofferianam in foro Graben sitam, advocat, ac mandato Principis exponit: quanto is dolore afficeretur,

quodd Viennæ, suisque in Provinciis Religio, morésque aviti emorerentur; adhortari se itaque Universitatem: nonnullos deligerent Doctores, qui errores Lutheri ex latinis, & vulgaribus chartis exscriberent, Principi ituro ad Conventum Spirensen transmittendos; commendatam item sibi Universitas fidem Catholicam haberet, neque à vestigiis antiquorum Patrum deflecteret; tum demum Archiducis Epistolam sequentis formæ extradidit.

**Ferdinandus Dei gratiâ Princeps, & Infans Hispaniarum, Archidux Austriæ, Dux Burgundiæ, & Imperialis Locumtenens Generalis.**

**H**onorabiles, Docti, Devoti, sincerè nobis dilecti. Quoniam pro reparanda hujus nostræ Nationis tranquillitate, & animorum salute, quæ malorum audaciâ indies crescente magis, atque magis turbatur, impediturque, universi Ordines Sacri Imperij in proxima Dieta ad diem D. Martini indictâ Spira, opportuna media tentabunt, sicut ex incluso articulorum in vernaculo conscripto latius cognoveritis; nobis autem incumbat, ut vos, sic admonente articuli articulo, enixè requiramus, ut nova quæque dogmata, in dubium, & disputationem revocata in libris recèns editis per aliquot nostros imprimis Theologicarum rerum eximie peritos in compendium trabantur: itaque cum nos pro ea pietate, quam DEO, & suæ Fidei sanctæ debemus, non solum Dominia nostra pro virili in ea, quam à Patribus accepimus, Sanctissima Religione servare, sed etiam contra ipsos nova molientes tam Apostolica, quam Imperialia decreta exequi demandaverimus: ne in hac parte, quod cõmuni statuum suffragio impositum est, officio nostro deesse videamur: idcirco vos & plurimum hortamur, & studiosius requirimus, ut pro tam necessaria causa, Deo Omnipotenti gratissima futura, ad præfatum Conventum, singula, quæ ad rem faciunt, secundum præscriptum in articulo modum dige-

*digesta , & in literas relata , ad nos mitti curetis ; daturi indubiè operam , ut quàm maximè luceat vestra quoque Pietas in Religionem , cui favere , stuaerèque debet omnis lingua , industria , ingenium , atque labor , quem omnium bonorum Retributor DEUS , immortalis præmio dignabitur ; Nos vèrò sua laude primùm , tum grata vicissitudine , dum occasio quoque dabitur , prosequemur , & compensabimus . Datum Ratisbonæ die IV. Mensis Julij Anno Domini M. D. XXIV.*

**Ferdinandus**

Hæ & pietate & Religione avita plenissimæ Principis Optimi & Catholicissimi literæ ubi Rectori Magnifico unà cum vernaculis articulis , qui in libro Actuum Facultatis Artificiæ ex integro descripti habentur , quòsque brevitatis causâ præterire cogimur , consignatæ fuerunt , eas mox ad singulas transmisit Facultates , earundem desuper consilia , & sententias postulando ; quasnam illæ tulerint , ex Actis Universitatis operæ pretium fuerit intelligere.

Facultas itaque Artium sequenti forma conclusit : *Quoniam peritissimorum Theologorum res agitur , ut ipsa Serenissimi , & Clementissimi Principis nostri Commissio aperte commonstrat , ipsam nihil posse concludere ; quoniam ante triennium publico Theologorum edicto Magistri de Facultate Artium prohibiti fuère , ne scripta Lutherana legerent , intermissa sunt , neque lecta . Sed si Clarissimi Dnis Theologia Doctõribus aliqui Magistri de Facultate Artium idonei viderentur , eos nominare , & vocare possunt , qui nomine Facultatis laborem subire volunt , & debent.*

Facultas Medica : *Super Commissione Serenissimi Principis , & Dni Dni nostri Clementissimi deliberavimus : cum nemo debeat mittere falcem in messem alienam , inhaerendam esse Commissioni ejusdem Sacratissimi Principis ; cum qua se in hoc negotio Facultas remittit ad Theologos istarum rerum eximie peritos , atque Pontificia auctoritate Here-*

*seos Inquisitores , quibus tam ex officio , quàm professione incumbit , hoc tractare ; Medici sua habent , quæ tractent.*

*Facultas Juridica : In causa Lutheri libellorum examinandorum , consuluit Facultas Juridica , quod de qualibet Facultate tres viri idonei eligantur , puta de Facultate Theologica tres Presbyteri , similiter de Facultate Artium tres Presbyteri , de Facultate verò Juridica tres Laici ; similiter de Facultate Medica tres Laici ; deinde quod sic Deputati possint ad mandatum Serenissimi Principis ad se accersere quoscunque alios viros doctos , cum eisdem consulendo , atque dictam causam tractando.*

*Facultas Theologica : Imprimis Facultas Theologica omni , qua decet reverentia , literas , & commissionem Principis Serenissimi acceptat ; congratulatur item plurimum suæ Serenitati , eò , quod vigore Catholici Principis pro exterminio Lutheranorum errorum , quibus vita , & mores hominum infecti sunt , factò , & opere declarare conatur. Secundò. Afferit Facultas , se jam dudum aliquid remedii , ne hujusmodi morbus excrevisset , in medium attulisse , si non fuisset affecta extrinsecus impedimentis ; ad desiderium tamen Principis pro laude DEI , & Christi fidelium unione , quantum ei possibile fuerit , contra errores aliquid concipere , in meditumque deducere conabitur. Tertiò. Expectat Facultas , piæque affectione hortatur alias tres Facultates , ut per easdem , sicut ab eisdem fidei , morum , ac bene vivendi bonestas exigit , in laudem DEI , ac Gymnasii nostri augmentum , juxta desiderium Principis , aliquid congeratur. Quarto. Placet Facultati , ut personæ ab omnibus Facultatibus deputentur , quæ singulis Facultatibus modum scribendi assignent pro requisitis exemplaribus. Quintò. Ut congesta per Facultatum deputatos Rectori Magnifico , in presentia quatuor Decanorum , & duorum Seniorum cujusque Facultatis ad redigendum illa in debitum ordinem presententur , antequam Principi transmittantur : & quod Facultas una in ejusmodi annotationibus faciendis alteram famâ , seu alia sinistra machinatione non mordeat , seu laceßat ; sed quod*  
*omnia*

*omnia fiant animo sincero, & pace communi, tum Universitatis, tum fidelium Christi.*

Et sanè nulli pepercit operæ Facultas Theologica in perquirendis, discutiendisque Lutheri dogmatibus, quæ tenenda, quæve reprobanda : quò minùs tamen congesti per eam articuli ad Archiducem transmittentur, id causæ intercessit, quòd indicta Spiræ Comitia fuerint omiſſa ; nam, ut Surius habet, ubi de Actis Norimbergensibus Pontifex esset edoctus, Carolum Cæsarem in Hispaniis tum absentem monuit ; ne majori cum periculo Spirenses Conventum celebrari admittat, Religionisque definitionem Sedi Apostolicæ reservaret. Præstitit id Cæsar 15tâ Julij Burgis in Castella datis literis, quibus & Gomitia Spirensia inhiibuit, & Norimbergense Decretum penitus rescidit : seriò mandans : ne quid sine Sedis Apostolicæ auctoritate, suoque consensu de rebus ad Fidem pertinentibus statueretur, sed omnino Leonis Decretum, suumque Edictum Wormatiense executioni darent.

Quoniam itaque dissolvebatur Spirensis Conventus, Archidux Legato Sedis Apostolicæ, ac Episcopo Viennensi Joanne de Revellis comitatus Ratisbonæ in Austriam ( de quibus omni solennitate excipiendis Universitas præmonita fuit ) contendit. Nil antiquius mente gerens, quàm quæ pro re Catholica facerent. Viennam igitur ubi appulerat, ut Acta Theologica loquuntur ; *Cum videret pessimam sectam, Lutheranam nempe hæresim, nedum pullulare, sed de die in diem magis, ac magis in omnibus locis Archiducatus Austriae succrescere, seriòse commisit Doctoribus Facultatis Theologicae, tanquam hæreticae pravitate Inquisitoribus, quatenus Reverendissimo Præsuli Viennensi Joanni de Revellis assisterent, atque negotium inquisitionis contra certas personas per suam Majestatem carceribus mancipatas peragerent ; quare infra nominati Doctores nedum vigore privilegiorum Facultatis, sed &*

*ex Commissione Principis laboriosè, & magnâ cum diligentia singulis actibus à principio usque in finem interfuere, atque debitum officii, ac commissionis persequerunt.*

Eorum autem, in quos inquisitio haberetur, præcipuus erat *Casparus Tauber Civis Viennensis*, qui in eo potissimum delirabat, primò ( ut acta Inquisitionum Episcopatus Viennensis habent ) quòd crederet, ac teneret, post consecrationem factam non esse in altari, verum corpus, & sanguinem Christi in Eucharistia; cum Christus à Patre exiverit tanquam spiritus; quare etiam corporaliter hic non adsit. 2dò, benedictiones in Ecclesia usitatas, & luminum accensionem damnavit. 3tò, purgatorium negavit. 4tò, dixit, se non minus esse Sacerdotem, quàm eos, qui ab Episcopo consecrati sunt. 5tò, Confessionem aliam peccatorum non esse necessariam, quàm quâ frater in fratrem se peccasse fatetur. 6tò, negavit intercessionem Mariæ, & Sanctorum. 7mò, credidit, claves Ecclesiæ communes esse omnibus, tam viris, quàm feminis. Adactus quidem erat per Inquisitionem, ut revocationem errorum suorum faceret, præstito juramento, & dato syngrapho, ac imprecatione pœnarum hæreticis debitarum, si ad veterem doctrinam rediret, spargerétve in vulgus, aut divenderet libellos hæresi Lutherana infectos. At rediit mox Sus ad volutabrum, non modò veteres tenens errores, sed libros hæreticos & retinuit, & in alios dispersit; hinc pœnâ juris, nempe igne, mense Septembris absumptus est.

. Alii duo, in quos cum Taubero facta Inquisitio, fuere *Jacobus Peregrinus Pataviensis Diœcesis in Hospitali Cooperator*, & *Joannes Voysler Oâternarius*; qui, tametsi Lutheranam hæresim confessi, ac convicti, quòd tamen & revocarent errores, & emendationem jurarent, salubri injuncta pœnitentia dimissi sunt. Superfuisse & quartus *Joannes Ekenberger*, Prædicans Dominorum de Regimine in Castro Principis; verùm, ut Acta Theologica ajunt, *ruffus ille, & infidelis, jam ante adventum Principis Serenissimi Vienna se subduxerat.*

Ade-

Aderat inquisitioni huic præsens ipse Reverendissimus Dominus Vienenſis Epiſcopus ; Officium verò judicis ejus locò explevit Dominus Ulricus Kauffman, Doctòr Juris , & Canonicus Viennenſis. Conſedère imprimis ſolertiſſimus Dominus Theologiæ Doctòr Joannes Faber Conſiliarius Principis : Dominus Doctòr Michaël Ceremoniaris Reverendiſſimi Domini Cardinalis Laurentij de Campegio Legati Apoſtolici de Latere : Decanus Facultatis Theologiæ Magiſter Wolfgangus Kraveker ; Prior Fratrum Carmelitarum Doctòr Theologiæ : Joannes Camers Ord: Minorum : Dominus Valentinus Kräler Theologiæ Doctòr : Dominus Chriſtophorus Külber Theologiæ Doctòr : Dominus Joannes Klein Theologiæ Doctòr Ord: Fratrum Auguſtinenſium Eremitarum : Dominus Decanus Eccleſiæ D. Stephani , & Doctòr Petrus Cancellarius Epiſcopi Viennenſis.

Dum hæc pro extirpandis erroribus præclare aguntur , penè jam emortuam litem Anno iterum iſto reſuſcitavit Univerſitatis Cancellarius Paulus de Oberſtein : qua ſibi vel præ Rectore Magnifico locum deberi contendebat. Hæc ille cauſâ , eſſi jam An. 1519. Facultatum omnium judicio cecidiſſet , novâ tamen rerum occaſione , quòd nempe Nuncio Apoſtolico Cardinali Campegio familiariter uteretur , & in vota ſua proniorem non neſcieret , nihil omittendum ſibi ratus , veterem crambem , & cauſam recoxit , citato ad Nuncium Rectore Magnifico.

Res Facultatibus indigna omnibus viſa , atque ad Auſtriæ Regentes ut recurreretur , concluſum ; auditis igitur , verba Actorum Facult. Artiſt. ſunt , ultimâ Octob: partibus , ſententia à vice gerente Domino Generoſo de Dietrichſtein præſentibus Commiſſarijs à Sereniſſimo Principe ex Auſtriæ Regimine ad hoc deputatis , lata eſt in hanc formam : *Domine Præpoſite ; Illuſtriſſimus Princeps noſter Ferdinandus &c. imprimis magnam diſplicentiam habuit in hoc , quòd Univerſitatem ſuam*

*suam à suis Antecessoribus Austria Ducibus fundatam fecit citare ad Cardinalem, contemptâ jurisdictione suâ. Deinde ex Commissione Serenissimi Principis Dominationi Vestre demandando, ac inhibeo, ut Universitatem in suis Privilegijs, Consuetudinibus, ac Ordinationibus permittat, non molestat, neque Rectori Universitatis prælocari in publicis Stationibus præsumat in perpetuum. Quid si contrarium feceritis, Principis indignationem incurretis.*

Verùm non acquievit decisione huic Cancellarius, alia à Ferdinando obtenta Commissione, ac denuo Rector Magnifico præeminentiae ergo in jus vocato; cùm demum, uti docebimus, pro præeminentia Rectoris An. 1529. est decisum.

Cœptum eodem hoc Anno immutari locationis in Philosophicis gradibus ordinem hætenus usitatum, tum Acta Artistica, tum Universitatis notant sequentibus verbis. *Ultimâ Febr. in Ecclesia Divi Stephani coram Sepulchro Imp. Friderici, Rector Magnus cum Consilio suo convenerat, ubi propositum; quatenus Facultas Artium locationem in conferendis gradibus hætenus juxta merita observatam, certis ex causis immutatam velit, ac sententiam suam ab Universitate roborari, ac validari: Assensit major Consilij pars. Præbuit hæc novitas non parum tumultus, contranite Universitatis Cancellario præmemorato Domino Paulo de Oberstein, ut ad An. 1526. dicemus.*

## An. 1525.

**D**Um Germania ferè tota Rusticorum bello à Sectarijs adversus Episcopos, & Clerum primò, deinde contra sæculares Principes, Magistratus, ac Nobilitatem concitato conflamat; bello item Italico Franciscus Galliarum Rex à Cæsarianis ad Ticinum capitur, Vienna magnam partem Vulcano perijt: de quo si Acta Philosophica referunt: *XVIII. Julij Vienna noctu incendium est subortum: quàm grande, ac horridum fuerit, monumenta, tum adium privatarum,*



*tum sacrarum posteritati indicabunt: ingenuè fateri possumus, quartam Urbis partem igne conflagrâsse; insuper de Universitate ferè actum fuisset, nisi optimorum hominum labore, aula Universitatis circum circa flammis obruta, extincta fuisset.*

Præsenti quoque Anno in Actis statutum reperio, ut Disputatio, *Quodlibeticam* vocabant, quotannis antiquitùs haberi solita, deinceps ob studentium paucitatem, temporùmque vicissitudines, adusque Universitatis reformationem aut prætermitteretur certè, aut non nisi triennio quovis, si opportunitas se obtulisset, haberetur. Hujus olim in Universitate nostra tam dilaudatæ Disputationis Quodlibeticæ dum meminì, facere non possum, quin ex antiquis Academiæ Statutis, pluribus memorem, quibus legibus, & ratione eadem haberetur. Solemnis hic actus erat circa Festum D. Catharinæ quotannis celebrandus, in quo selectæ è septem Liberalium Artium materijs quæstiones disputationi proponerentur. Baccalaureorum erat, affirmativam, aut negativam, ut visum, sustinere partem. Ex Artium Doctoribus, qui senissimus audiret, primus erat, qui disputationem designaret, & respondentibus præsideret, quem alij, atque alij, prout cujusque senij ordo ferebat, eadem in acta excipiebant annis singulis. Qui secùs fecerat, actumq; non justissima ex causa neglexerat, ei 8. fl. gravis satis eo tempore multa pendenda fuit.

**An. 1526.**

**N**on parum terroris attulit clades à Solimano Turcarum Imperatore ad Mohazium Hungarico exercitui illata, quâ Rex ipse Ludovicus periit: Pacem siquidem Solimanus Ludovico obtulerat, ut paratior esset ad resistendum Christianis, quos contra se maritimo bello depugnatueros, erepta nuper Rhodò, metuebat. At pacem, nequidquam dissuadente Sigismundo Poloniæ Rege, ac Patruo, respuit, Italorum maxi-

maximè Regulorum precibus permotus. Collecto igitur 300000. exercitu Hungariam Solimanus invadit, ac direptis obvijs, patulisque locis, Salankamenna, & Petrowaradino, capto insuper superioribus annis, ut diximus, Belgrado, in viscera Hungariæ irrupit. Ludovicus collectis, quas poterat pro temporis angustia, viginti aliquot millium copijs, obviam profectus, die ipso decollationis D. Joannis Bapt. in Mohazinis campis ab hoste aggressus, exercitu cæso, & fugato, Rex ipse in fuga interiit. De quo ita acta Artistica :

*Per hoc tempus Caesar Turcarum innumerabili multitudine militum Regnum Hungariæ minaciter invasit, multa oppida, villas, Castella, depopulatus est, plurima incendio delevit; deinde 29. Augult. hoc est, in die Decollationis S. Joannis Bapt. congressi sunt exercitus Serenissimi Domini Ludovici Hungariæ, & Bohemiæ Regis, ac Turcarum; ubi aliquamdiu pugnatum est; Rege suo cum exercitu miserrè succumbente, crudelis Caesar victor evasit: multis Hungaris in fugam versis, plurimis occisis: & quod maximè omnium dolendum, Rex ipse, & quicunque præcipui Hungariæ Episcopi, gladio ceciderunt, & usque in hanc diem corpus Regium (inventum tamen postea est, & jussu Reginæ in Alba-Regali sepultum) non est inventum. Amplitudinem spoliis, bombardarum, equorum, curruum, auri, atque argenti, quis æstimare queat? taceo de strenuis militibus, optimis Nobilibus, quorum multa millia occisa sunt. Verum hoc etiam justo Dei judicio propter peccata nostra factum creditur, ac nisi resipiscamus, majorem Dei iram sentiemus. Turca non contentus hac victoriâ, & fortunam sibi favere præsentiens ultro progressus, Budam Metropolim Hungariæ cum arce Regia 9. Septemb. cepit, inæstimabilem rerum, & divitiarum copiam invenit, majori populi civitatis multitudine partim captâ, partim gladio casâ. Qui quidem Turca, spoliata, & exusta civitate, & maximè pulcherrimâ Corvini Mathiæ Regis Bibliothecâ direptâ, fabricato per Danubium ponte versus Transylvaniam exercitum duxit,*

*duxit, qui quid cogitet, facile concipi potest: nempe dormientibus, & ridentibus Christianis, Christianum extinguere nomen. Fertur, plus quam 8000. hominum secum abduxisse, & adeo Budam spoliâsse, ut nec unus quidem clavus ferreus illic sit repertus.*

His sub Hungariæ cladibus domesticum Universitatis dissidium est terminatum; ubi enim prælaudatus Paulus de Oberstein Universitatis Cancellarius mutationi illi, qua promovendi in Artibus juxta Nobilitatis conditionem ex Universitatis Statuto locari cæperant, intercessisset; res ad Regentes Austriæ devoluta est, ad quos posteaquàm Facultatis rationes sunt delatæ; scilicet ea de causa immutatum juxta merita promovendi Ordinem: imò, quodd paucissimi sub id tempus reperirentur Scholares; ac ex iis non nisi pauperiores, qui cùm promotionis taxam solvere vix possent, Nobiliores autem postpositionis timore Gradus negligerent, non exiguum esset periculum, ne Facultas ullum Gradum facere posset. 2dò quodd servato meritorum in Studiis ordine dignitati Nobilium Adolescentum fieri non posset satîs, cùm ex his plerumque juvenes, ex pauperibus autem adultiores Studiis vacarent. His à Regentibus Austriæ perceptis, immutatio locandi juxta dignitatis conditionem est confirmata, donec in restauratione studii Viennensis aliud statueretur.

Inquisitum iterum à Theologica Facultate in eos; qui suspecti in Religione deferebantur; eorum unus certæ Religionis alumnus, *Frater Adamus Sporer*; alter Artium Magister Joannes Rosinus Encomiastes, & Sacerdos; absolutus iste, quodd se de propositionibus suis, quas in æde D. Stephani è Cathedra sparâsse ferebatur, purgâisset; factus subinde apud Ferdinandum Regem Rectorum liberorum Præceptor, ac Præpositus ad D. Stephanum. Quid circa Joannem Sporer decretum, Acta non insinuant. Et quoniam media quævis excindendæ Lutheraræ Sectæ Viennensi in Urbe adhibenda Ferdinandus statuisset, ad Senatum Civicum Anno hoc literas dedit, quibus ei imperatum; suam quoque

I

con-

conferret operam , ne Concionatores contra Constitutiones Christianas veteres prædicarent : transmisit eas literas Civitatis Consilium Universitati , petiitque , sibi fieri assistentiam ; Universitas rem totam Facultati Theologicæ commisit.

Spiræ coacta rursus Religionis, bellique Comitibus ; sed iterum neutra ex parte ullo effectu ; imò Religionis in dissidio illud decretum : interim , dum Concilium celebraretur, ita cuilibet agendum in ditione sua, ut DEO simul & Cæsari justam aliquando posset reddere facti sui rationem. Quo aditus factus est ad libertatis , quam vocabant conscientiae concessionem. Hæc dum Spiræ : Badenis quoque Helvetiorum cum Sacramentariis disceptatio est habita ; præcipuos Religionis Catholicæ inter Propugnatores advocatus erat Joannes Faber Academiæ nostræ Doctor , cum Joanne Eckio, & Thoma Murnero : eo eventu, ut, teste Surio, folis Tigurinis demptis , Helvetiorum Pagi omnes publico promulgarint edicto , in antiqua Catholica Religione standum esse. Publicavit insuper Joannes Faber contra Zwinglium scripto ingentem illius Antilogiarum numerum ; recensuit item supra 140. mendacia ex Oecolampadii documentis.

## An. 1527.

**S**ECUNDUM obitum Ludovici Hungariæ Regis , cum absque hærede discessisset, superiori anno Joannes Zapolia Transylvaniæ Princeps , Scepusiensis Comes , Regnum Hungariæ invasit ; eo jure , quod esset nobilitate generis Regi conjunctissimus , atque idem Regnum ab se & strenuè , & frequenter defensum : quorum Acta Theologica ita meminere : *In Festo Divi Martini Confessoris An. 1526. in Alba Regali Panoniæ electus , atque coronatus est in Regem Hungariæ Joannes dictus Weivoda ; qui Regno Hungariæ , licet sapius per Ferdinandum Principem Austriæ monitus , cedere noluit ; verum id ipsum varijs machinationibus & insidijs asserere prætendit , & conatus est.*

Ve.

Verùm cùm & vetera toties repetita pacta , Jús-  
que uxorium Annæ pro Ferdinando starent ; nec Bo-  
hemi modò , sed ex Hungaris quique præcipui cum  
Stephano Batorio Regni Palatino , ac Regina Maria Vi-  
dua Ferdinandi partes sequerentur ; is Bohemiæ , Hun-  
gariæque Regem se promulgavit , atque in Bohemiam  
profectus Pragæ 24tâ Februarij anno hoc Bohemiæ ;  
ac subinde Jaurino , Comaromio , Budâ , Strigonio  
Alba Regali , aliisque locis in Ferdinandi potestatem  
reductis 3tiâ Novembris in Regem Hungariæ , die al-  
tera Serenissima Conjux in Reginam , sunt inuncti :  
sic Actis Artificis referentibus : *Tertia Novembris Se-  
renissimus Rex Bohemia Ferdinandus Archi-Dux Au-  
stria , &c. in Regem Hungaria in Alba Regali maxima  
cum solennitate coronatur , cui coronationi tanta hominum  
interfuit multitudo , quanta hominum memoria non vidit  
in alterius Regis coronatione. Die verd sequenti Anna Bo-  
hemia Regina , Austria Archi-Ducissa &c. Serenissimi Fer-  
dinandi Conjux Reginarum Coronâ coronatur.*

Priusquam Ferdinandus ex Bohemia redux in Hun-  
gariam descenderet , omni memoria dignum mense  
Junio veteris Austriacæ pietatis spectaculum Viennæ  
die Corporis Christi dedit ; subinde festivitates ob na-  
tum Cæsari Carolo Filium Philippum , ac brevi post  
tempore Ferdinando itidem Maximilianum , conse-  
cutæ sunt : Quæ omnia verbis Actorum recitare ju-  
vet : *Serenissimus , ajunt , Hungaria , atque Bohemia  
Rex , Ferdinandus die Corporis Christi , dum processio agere-  
tur , eandem suâ præsentia illustrare dignatus est ; siquidem  
civibus , ut moris est , ordinatis , permultis suis Magnatibus  
Sacramentum Venerabile , quod ab Episcopo Viennensi sub  
cælo portabatur , deducantibus eum à dextris Generoso Do-  
mino Georgio à Puechaim Austria Mareschallo , à sinistris  
Magnifico Domino Wolffgango de Rogendorff , sua Majestas  
sola aureâ veste amicta , ense cincta , Cariophilorum ferto ca-  
put coronata , orationale dextra manu gerens subsequitur ,  
oculis huc illucque discurrentibus , ut animadverteret , qui-*

*nam, & quo pacto circumstantes sacro Eucharistiae Sacramento debitam deferant reverentiam. Mirum est plebi visum, nec mediocre ad excutiendam vitiorum, & grassantis jam haereseos in Sacramentum Eucharistiae socordiam exemplum.*

*Pridie autem, seu in vigilia hujus solemnitatis Corporis Christi, quae fuit decima nona Junii hac in Urbe Viennensi in Templo D. Stephani Officium Missae, cui nihil ceremoniarum defuit de Spiritu Sancto celebratum fuit, cui ultra hoc, quod utriusque sexus populus devotè astitit, serenissimus Hungariae, & Bohemiae Rex, Princeps noster Illustrissimus Ferdinandus etiam suam praesentiam non deesse dignatus est. Quoniam Germani ejus, Inviçissimi Romanorum Imperatoris Caroli, Primogeniti Filii Philippi nuper procreati intimatio omnibus solatio fuit, eidemque congratulabantur. Vespere verò multa fiebant in tota Urbe ob procreatum letitiae indicia, ac panes, & vinum distribuebant.*

*Eodem hoc anno deinde die quinta Augusti conveniunt nobiscum Primores cum suis Gweris, ac aliis Nobilibus; Rector quoque Universitatis cum suis subjectis in Arce Viennensi cum baptizatur Illustrissimus Princeps Maximilianus supradicti Regis Ferdinandi Primogenitus nūdio quarto praecedente nocte in lucem editus, per Reverendissimum in Christo Patrem Dominum Christophorum Episcopum Labacensem. Tandem totus dies omni exultatione praeditus: In crepusculo fiunt ignes in insignioribus Urbis locis, & in turri S. Stephani faces ardentes extenduntur; non cessat bombardarum frequens sonus, & aliorum id genus instrumentorum: fit quoque in populum panis, & vini elargitio; in quibus nimirum Rex Ferdinandus (qui septimā ante die, quae erat penultima Julii splendido, ac benè ornato exercitu, ac satelitiq; Hungarorum sibi inobedientium domandorum gratiā in Hungariam descendit) si adfuisset (adfuit quidem soror ejus Maria, cujus absque dubio magnus tristitia propter occisum maritum Ludovicum Regem fomes conceptus adhuc in praecordiis latuit) spectaculum vidisset non ingratum.*

Addunt denique Acta nostra ad annum hunc, mortem Casimiri Brandeburgensis, Exercitus Regij in Hungaria Præfecti, ac grassantem non in Hungaria modo; sed Viennæ etiam dissenterix luem his verbis: *Vigesimâ quartâ Octobris Illustrissimus Princeps Casimirus Marchio Brandenburgensis à Buda in curru mortuus Viennam est adductus, ac in Templo D. Stephani cum Vigilijs, Missis, cæterisque Ceremonijs ex more Christiano peractis, deinde tertio die currui impositus à suis ad suos est adductus. Obijt verò Buda in dissenteria, sicuti eodem morbo multi, præcipuè ex militibus advenis, è viventium numero discesserunt. Multi insuper aliograviori morbo, puta ex febris sinacha, mortui sunt, qui cum aërem mutare cupientes Viennam profecti, ibidem moriuntur, aliòsque infecerunt.*

Hæc in Austria, vicinæque Hungaria evenêre: Tristiora multò ex Italia nunciabantur: illud Universitatem omnino perterrefecit: direptam nempè Romam, Pontificémque Clementem, in Castello S. Angeli obseffum: Ubi enim in libertatem superiori anno Francisco Galliarum Rege restituto novumque bellum adversùs Carolum Cæsarem in Italia moliente, Clemens Pontifex ob ademptum sibi Rhegium Lepidi Cæsari offensus ad partes fædusque Francisci accessit; eam ob causam à Columnenlibus oppugnabatur: quos ut Ecclesiæ hostes proscriptos, opibusque nudatos, cum adjuvandos sibi sumeret Ludovicus Borbonius Dux à Gallo nuper ad Cæsarem transiens, jamque exercitum, cui præficièbatur, Romam adduceret, Pontifex pacem cum Cæsare jciendam censuit eâ conditione, ut Lanotus Neapolis Prorex Borbonium cum exercitu ab Urbe averteret. At ille contempto Proregis interdicto sub Maji initia anno hoc Romam advolat; et non maxima contentione Urbem capit, diripitque; nec ad Ecclesias confugientibus paritum, cruenta undique, & promiscua Romanorum cædes; Hispanis ipsis, magis quam Germanis, tametsi eorum magna pars Lutheri è secta forent, teste ipso Sponda-

no, sævientibus: Bibliotheca Vaticana incomparabili codicum Thesauro instructa magnam partem depopulata. Dux Borbonius inter primum certamen glande trajectus cecidit; ne, qui obsidionis erat author, captæ Urbis gaudio frueretur. Arx deinde, quam Castellum S. Angeli appellant, & quo se Pontifex receperat, acriter obseffa; nec nisi post septimestrem Custodiam, Lauteracij Gallorum Belliducis adventu, Pontifex in tutiora est dilapsus.

Inscio, invitóque, hæc Carolo Cæsare gesta Scriptores propè omnes annotârunt. Certè Carolus humanissimis Pontificis litteris flexus, jam ante, misso eum in finem Lanojo, novum cum eodem fædus inje-rat, Borboniæque ad Urbem iter indixerat. Atque cùm Romanam cladem absens tum in Hispanijs intellexisset, summum suum, quem exinde conceperat, dolorem, pluribus contestatus est. Nec modò enim illa, quæ miles à Pontifice & Cardinalibus vi, ac metu extorsit, rata habere noluit, sed ludos quoque ac spectacula festiva, quæ tum ob natum recens Philip-pum Filium Madriti edebantur, inhibuit; nihilque ei antiquiùs, quàm ut quantocyus in pristinam restitueret libertatem summum Ecclesiæ Antistitem. Quæ res majori tamen lætitiâ à Sectarijs per Germaniam accepta est, chartis propudiosis historiam miro odio in Ecclesiam Romanam celebrantibus, ac è cathedris in clerum, clerique exterminium debacchantibus. Et sanè animadversum, quod vel ab inde majora indies Sectæ sumerent incrementa, ubi authoritatem Pontificiam passim adeo cernebant prostitutam.

Id ne in Austria, Austriacisque provincijs suis liceret, iretúrque obviam serpenti perversorum dogmatum veneno, studiosè adcurabat Ferdinandus. Eum in finem rursus Joannem Faber sibi jam tum à sacratoribus Consilijs, facultatem Theologicam adire jubet, Regiòque nomine postulare: *Ut omnes articulos hæresim sapientes, qui facultati, ejusque Doctõribus*

pro



*pro tunc constarent, in unum registrum rescriberent, & Regiæ Majestati præsentarentur. Verùm coactâ in Vigilia S. Jacobi Congregatione, Facultas coram delegato Joanne Fabro brevitatem temporis excusavit, & multorum articulorum se habere ignorantiam, quod complures libelli in diversis locis divenditi, ac hæreticas continentes doctrinas ad manus non haberet. Interea ergo dum articuli conscriberentur, Doctores Theologi convocati sunt ad domum Huebarum, & ibi oretenus singula sunt expedita.*

Nihil abinde prætermisit Theologorum Senatus, quæ suarum partium erant: sæpius iterum occupata in indagandis, examinandisque dubiæ Religionis hominibus. Eorum unus erat Magister Georgius Oëder Sacerdos, & Prædicans in Perchtolstorff, qui ubi nonnullos errores confessus esset, alios negasset, de ejus pœna, reductioneque ad frugem cum Præposito Vienneusi actum esse Acta memorant. Nec domi modò in expurgandis Lutheri erroribus Theologorum desudavit solers industria; ad externos quoque adhibita: datas enim à Reverendissimo Principe, Pataviensi Administratore Ernesto ex Baviaræ Ducibus ad Facultatem Theologicam literas Mense Julio reperio, quibus Doctorem Theologum submitti postulat, interfuturum, ut literæ sonabant, judicio contra quendam hæreticum de secta Lutherana habendo. Proficisci Pataviam jussus Doctor Albinus Graßinger, Lector Theologiæ ordinarius: Quod iter tamen, ut Acta ajunt, propter longitudinem viæ, & brevitatem temporis non arripuit.

**An. 1528.**

**I**terum anno hoc Joannes Faber Facultatem Theologicam conciverat, à qua peritissimos quosque Theologos deligi postulavit, Commissariis Regiis, nempe Christophoro Labacensi Episcopo, Christophoro de Zinzendorff, & Wolffgango Matseber, ituris per Austriacas Provincias, Austriam, Styriam, Carinthiam, &

Carnioliam, adjungendos : ut dum illi homagium, subsidiûmque ad bellum Turcicum reciperent, isti Religionis rebus irent prospectum. Addidit Regiâ quoque voluntate Faber alios duos articulos : *Congereret nempe Facultas Theologica auctoritates, & loca sacrarum litterarum adversus Lutheranam factionem. Deinde Provinciam assumeret, certosque deligeret, qui Testamentum Novum, quod nuper à Luthero in Theutonicum translatum est, quòdque variis scateret erroribus, juxta exemplaria vera, & antiquiora castigarent; quam tamen castigationem sua sub directione perficerent.* Respondit Facultas sese in omnibus ad desiderium Regiæ Majestatis fore promptissimam.

Nondum Mensis Aprilis, quò hæc agebantur, effluxerat, cùm ab eadem Facultate nova Inquisitio habita est in Artium Magistrum Leopoldum Bernhardt, Bursæ Rosæ Provisorum, qui 40. Articulorum, quos fidei Catholicæ contrarios temerè asseruerat, reus actus erat, quæ tamen in eum lata sententia, Acta haud meminerunt. Mense autem Martio *Balthasar Huebmer Pacimontanus*, seu ex Fridperg, pessimus Anabaptistarum Antesignanus Viennæ rogo est concremat. Scripserat superioribus annis adversus impios ejusdem errores sæpe laudatus Joannes Faber Apologiam sanè fundatam sub nomine : *Orthodoxa Fidei Catholicæ Defensio*, ac veritatis vi perversum hominem ita convicerat, ut palinodiam in non paucis caneret; sed quia in pluribus pertinax hæserat, & Austriam Moraviæ vicinam Anabaptisticis erroribus pergeret inficere, captus ac igni adjudicatus est. Uxor ejus triduo post in præterfluentem submersa; ac paucis post diebus duo affecclæ eâdem pœnâ sunt condemnati. Rem, prout gesta est, ejusdem anni Facultatis Artium Decanus Magister Stephanus Sprugl sequentibus enarrat :

*Decimo die Martii Sacrarum Litterarum Professor, nomine Balthasar Huebmer ex Fridperg Viennæ ad ignem judicatur. Fuit is olim Lector ordinarius Ingolstadii in Theologia,*

logia, ac Ratisbonæ inter Concionatores præcipuus: ejus namque persuasione impii Judæi, qui annis multis, & satîs potenter urbem incoluerunt, sunt expulsi. Idem Doctor Balthasar inter reliquas hæreses, quas seminavit tum in concionibus suis, tum etiam libellis à se editis, Imò docuit palàm, sub specie panis in Sacramento altaris non esse verum Christi Corpus, nec sub speciebus vini verum Christi sanguinem. 2dò Anabaptistarum primus Author fuit; nempe utriusque sexûs multos rebaptizavit. Has Hæreses cum aliis multis (nam omnes enumerare nimis foret prolixum: ideo has silentio transeo) postquam in Helvætia ac Suevia, aliisque locis Superioris Germaniæ in corda multorum implantasset: tandem in Moraviam venit ad Oppidum Niclospurge (quod hoc tempore Schismaticorum, ac omnium hæreticorum asyllum erat) ac ibidem suâ pestiferâ doctrinâ totam fere Moraviam, ac magnam Austriæ partem infecit: Ad eum nempe velut ad Apollinis Oraculum undique concursus fiebat. Reliquit multos discipulos impios sacrilegòsque: qui omnem moventes lapidem, quo veram Religionem, Divinûq; cultum ex hominum pectoribus radicitus evellerent, ac còmunem Christi Fidelium concordiam, pacem, & amicitiam pedibus, manibusque perturbare student. Postremò prædictus Doctor Serenissimi ac Christianissimi Regis Ferdinandi jussu, vinctus unâ cum uxore (uxorem enim duxerat) Viennam ducitur, mittiturque in carcerem. Deinde post aliquot septimanas ex Regio edicto ducitur in arcem, cui nomen est Greiffenstein, ac ibidem diu in carcere detentus, ad quem sæpius sunt missi viri doctissimi, integerrimique, qui sincero animo, & compatiendi eundem piè, amicè, ac fraternè admonuerunt, adhortatique sunt, ut ab incepto proposito desisteret, ac errores suos revocaret. Sed quid multùm? Verba (ut Comicus ait) mortuo fiunt: flecti namque à sententia nullis verbis potuit. Demum resipiscere cùm nollet, reducitur Viennam, ac in domo malefactorum (quam lingua patriæ vocant: in dem Schergenhaus) per torturam examinatur: ac secundum ejus confessa, ut hæresiarcha ad ignem judicatur, comburitûrque. Ad supplicium dum ducitur, se

ipsum verbis hinc inde ex sacris literis sumptis consolatur, & constantissime (imò rectius dixerim pertinacissime) tanquam saxum immobile in sua bæresi ad mortem usque permansit. Ad rogam dum venit flexis genibus super truncum ibidem vultu in calum erecto vernaculâ linguâ, & ea voce, quæ est Helvætiis peculiaris, Deum Optimum Maximum, his aliisque consimilibus invocat verbis: O min gnädiger Gott, verleihe mir Gedult in miner großen Marter, O min Vatter, ich sag dir Danck, daß du mich hütt wilt nemmen auß disen Jammerthall, mit Freuden begehre ich zu sterben, und zu dir kummen, ô Lamp, ô Lamp, das do hinnimbt di Sünd der Welt. O min Gott! in dine Händ befile ich minen Geist. *Convertens se ad populum ait*: O libe Brueder, ob ich etwo oinen beleidiget hett mit Worten oder Wercken, er wolle mir durch minen barmherzigen Gott verziehen; ich verzi-ge auch allen den, di ye wider mich haben gethan. *Vestimentis cum exueretur, dixit*: Dir min Herr, sin deine Kleider auch abgezogen worden. Ich will gern dargeben mine Kleider, und min Libe, auch alles, ællin behütt min Geist, und mine Sel, di befilch ich dir. *Latine deinde dixit*: ô Domine, in manus tuas commendo spiritum meum! *latine nihil aliud locutus*: sed tantum linguâ vernaculâ. Demum pedibus, manibusque ligatis rogo superponitur. Cumque Carnifex barbæ (nam barbam satiss proximam nutritiv) salnitrum, ac pulverem imponeret, ad eundem hac dixit verba: O salz mich wohl, ô salz mich nur wohl: Caputque erigens orabat circumstantes dicens: O libe Brueder, bittet Gott minen gnedigen Vatter, daß er mir Gedult verleihe in min Liden, ich will sterben in einen Christlichen Glouben. *Ac rogo incenso ignem vident exclamavit alta voce*: O min himmlischer Vatter, ô min gnediger Gott! *Postremo barbâ, ac pilis incensis clamavit*: ô JESUS! JESUS! & ita per fumum suffocatus, tandem expiravit. *Hæc omnia dum fierent, vidi, & audi-vi*: nam à rogo haud longè aberam, singula etiam ejus verba audiui. *Visus etiam est inter orandum ridenti magis si-milis,*

*milis, quàm dolenti. Verbis denique sat̃s compositis, ac barbâ suâ Philosophicâ lachrymas excussit multis.*

Uxor præfati Doctoris triduo post, hoc est 13tiâ die ejusdem mensis submergitur : fuit enim ( ut laudatus Sprugelius prosequitur ) cum marito ejusdem farinae, hoc est in eadem hæresi indurata. Sæpe namque ac crebro pie sincerèque admonita, ut ab exercenda hæresi desisteret, ac se Christi fidelibus conformaret, tamen omnia surda aure præterijt. Marito etiam constantior, aut ( rectius ut loquar, pertinacior ) hunc etenim, cum in ultimum vale eidem diceret, orabat, obsecrabátque, quatenus ad mortem usque in proposito suo viriliter, constantèrque perseveraret : quod & ille intrepidè uxori promisit. Quare ipsa uti membrum putridum à reliquo corpore rescatur. Nam lapide ad colum suspensò, de majori ponte Danubij in aquam dejicitur. Deus Optimus Maximus his, ac omnibus miseris nobis peccatoribus secundum magnam, & inexhaustam misericordiam suam misereatur. 24ta Martij duo comburuntur ( fuerant enim eadem hæresi, quâ Doctor Balthasar infecti ) quorum alter fuit Sator, alter verò rusticus, qui rogo superpositi inceperunt canere : Kum Heiliger Geist, &c.

Sub his eadem acta : Anno præsentis creverunt vina acerbissima, & immatura. Nam per dies octo aut decem continuos cecidit pruina, quæ uvas adhuc penitus immaturas ita adussit, quasi ad ignem fuissent desicata. Vina tamen illa acerba in sat̃s magno fuerunt precio : nam octo aut decem numis octava vendebatur. Vini autem veteris octava, quæ æstatûs tempore quatuor aut sex numis vendebatur, postea in autumnò & hyeme dabatur quatuordecim, aut sexdecim, imò etiam viginti ; tam subitò vini pretium fuit auctum. Crediderim ego vina anni præsentis fuisse similia vinis anni 1450. Nam anno prædicto, ( ut habent annales ) vina tam acerba, adeoque immatura creverunt, ut plerique in plateas publicas profunderent, eò, quod nemo posset illa bibere præ acerbitate nimia, vulgò & patria lingua dicta Ruiff-Peisser, quasi dicas à pruina, antequam maturescerent, adusta : ignari igitur quasi circu-

*los vasorum adurerent, aut potius corroderent, consumerentque, Râff-Peiffer dictitabant: sicuti vulgus plerâque perperam nominat; sicuti finis terra, Zu dem finsternen Stern. Et Carbunculum, morbum ac vitium commune vocat lingua vernaculâ das Mildt daw, cum dicendum sit Wildt daw, quasi ros agrestis, &c.*

## An. 1529.

**A**Nnus hic non Universitati modò nostræ, sed Viennæ, ac universæ Germaniæ erat calamitosus. Sæviebat enim lues, quam Sudorem Anglicum dixerent: Austria incendijs, & rapinis vastata: Vienna artissimâ obsidione à Solimano tentata; Spiræ in Comitij subsidia ad bellum Turcicum ab hæterodoxis ordinibus denegata, nisi Religionis libertatem impetrarent; cujus quoque occasione *Protestantium nomen* primò natum: Inferior Germania effuso Oceano prope obruta; tanta insuper annonæ difficultas, quantam nemo tum mortalium meminisset.

Causa cruenti aded belli, Joannes Transylvaniæ Wainoda, seu Regulus; Qui Hungariâ, cujus possessione exciderat, ut potiretur, per Legatum Hieronymum Laschum Siradiensem in Sarmatia Palatinum, Solimano se tributarium submiserat. Lætus belli semine Turca; 200000. vel ex Cadani, & Isthvanffij calculo, 400000. exercitum Hungariæ primùm iufudit, Budâmque præsidio ferè destitutam primo adventu arcem longiori obsidione pressam, demum deditione, invito licet Arcis præfecto Nadaftio, capit, Germano milite contra pactam fidem, ubi arce egressus esset, interneccione deleta. Rectâ inde in Austriam cum copijs profectus, 21mâ Septembris, ut Acta Artistica notant, ipso die Divi Mathæi Viennam obsidione cinxit. Insperato, properoque hostis numerosissimi adventu Viennenses consternati licet, quod & milite, & comæatu eis parùm esset provisum, Urbis tamen defensionem omni contentione apparare. Commodum Philip-

Philippus Rheni Palatinus cum cohortibus nonnullis adventum hostis prævenerat: muniendæ igitur Urbi, progugnandæque extemplo manus admotæ. Suburbia incinerata, Arx montis Cæcij, Archiducale Palatium, ne munimento hosti, nostrisque impedimento sint, ejus jussu diruta. Pons, majori Danubij brachio impositus, octo centurijs commeatui advehendo communitus; Porta, hodie Nova dicta, aggeribus, & cespite obstructa; Sacerdotes, Monachi, Senes, Pueri, Fæminæ, omnisque armis ineptum vulgus Urbe exclusi; quorum pars major in manus hostium delapsi vel cæsi, vel in servitutem abducti. Miles præsidarius quatuordecim millium expertæ militiæ, quibus si Equestres Copias, Incolæque armis tractandis habiles, accenseas, viginti faciliè millium Urbem propugnabat. Supremo Urbis, præsidiariorumque Polymarcho Ferdinandi voluntate laudato antea Philippo Rheni Palatino Comite designato. Ordinem, datamque provinciam defendendæ Urbis Author Synchronus in *Germania Austriaca* sequentem refert: Ad Carinthiæ Portæ muros, ubi majus imminebat periculum, excubabat Hispanus miles; inde ad Stubensem, & aliam à Rubra Turri cognominatam versùs, Ernestus à Brandenstein cum auxiliaribus Imperij cohortibus, & duobus Bohemorum millibus, quibus Ductores aderant Wilhelmus à Wartenberg, & Joannes Comes ab Hardeck: ad Judæorum Turrim, eo tempore dictam in Elend, prope Novam Portam stabat Reiprechtus ab Eberstorff: inde ad Scottensem, & Aulicam cum suis, manipulis Maximilianus Leisser, Joannes à Greiffenneck, & Joannes Hauser cum civibus. Aulam ipsam tuebatur Leonardus à Vels; ab ea ad Augustinianum usque cœnobium mænia propugnabat Abellus ab Holleneck cum Styris; inde rursus ad Carinthiacam Portam Urbi, ac hosti invigilabant Eckius à Reisach cum tribus peditum millibus, & Joannes Kazianer cum Carinthis. Ferdinandus ipse Spirensi ex Conven-

tu,

tu, ubi Viennæ ei obsidio nunciata, in Bohemiam profectus, ut laboranti auxilia properaret. Tenuit obsidio ad 16tam Octobris ingenti hostium conatu, majori obfessorum virtute. Dum demum tertiâ, & quartadecimâ die Octobris decretorios post assultus, etiam murus ad Stubarum Portam viginti pedibus collapsus hiaret, nunciato Ferdinandi Regis, ac Friderici Palatini Rheni Comitis adventu cum numerofo auxiliari exercitu, die post alterâ obsidionem solvit, atque incensis castris, captivis, quos secum habebat, cæsis, Hungariam primùm, atque inde Budæ Constituto Joanne Transylvano Hungariæ beneficiario Rege, Solimanus Constantinopolim redijt. Sunt qui obsidionis tempore, ad 60000. cecidisse; abducta verò ex Austriacis terris in servitutem facilè itidem 60000. scribant. Obsessi cognitâ hostium fugâ, instructis Urbem ordinibus egressi solidum diem in armis stetere. Atque ita Vienna totius Germaniæ propugnaculum secundùm Deum, Ferdinandi studio, virtute præsidiariorum, ac præprimis Palatinorum Comitum servatum: et tamen Urbis, ac suburbiorum facie, ut Viennensis ipsi Viennam vix nôssent.

Hæc Urbis Viennensis ante fata, duos suorum Universitas funera extulit; Unum mense Aprili, Junio alterum, utriusque de se haud parum meriti. Primus eorum Vir ex æquo doctus ac præstans Joannes Cuspinianus, natione Franco Schweinfordiensis, Viennæ Artium Magister, & Medicinæ Doctor creatus, quam & subinde professus est: Apollineâ item laureâ à Maximiliano Cæsare redimitus. Præfuit An. 1500. Rector Magnificus, ex quo à Maximiliano Cæsare (cui æquè ac Friderico percharus, nec semel legationibus honestatus) Universitati Superintendens datus, Civitatis etiam Viennensis Præfecti, quem *Ambaldum* vocant, ac Consiliarij Regii munus sustinuit. Notatur à Spondano infectus Lutheri dogmatibus; quo authore, nescio, id certè neque ex Actis nostris com-

pro-



probare licuit. Scriptor ab historijs suis percelebris, sed acer, & in multis dubius. Visitur etiamnum sepulchrum ejus in æde D. Stephani in sacello Crucifixi Salvatoris, cum sequenti Epitaphio.

Joannes Cuspinianus Doctor quodam, Civitatis Viennensis Præfectus. Anna Maria octo liberorum Mater; Agnes altera Conjux.

Excolui primum Musas, & Apollinis artes,  
Nempe fui Medicus, tuncque Pœta simul.  
Postea me rebus natum majoribus, auxit  
Cæsar, & ornavit præsidis officio.

Illa igitur nostro sint verba inscripta sepulchro:  
Vitam vixi olim, Cuspinianus eram.

Historiæ immensæ monumenta æterna reliqui,  
Vivus in his semper Cuspinianus erit.

Vixit annis LVI. Anno M. D. XXIX. Mense Aprilis  
die 19. obiit.

Alter erat Magnus, ac Reverendus Christophorus Külber Græcio Styrorum oriundus, Theologiæ Lector Stipendiatus, ad Divi Stephani Canonicus, & Custos: Archigymnasii Septies Rector, Religionis avitæ acerrimus propugnator. Obiit diem in profesto Sanctorum Martyrum Gervasij, & Prothasij, nempe decimâ nonâ Junij, cujus funus die altero, ut Acta habent, in eadem Ecclesia in choro versûs Aquilonem sepulchro mandatum est.

A morte Cuspiniani isto adhuc anno superintendens, qui Principis nomine Universitati præesset, ex voluntate Ferdinandi Austriæ Archiducis, nominatus est Vir eximius, Doctor Joannes Pilhamer; ut testamentum eunt literæ à Ferdinando Ratisbonâ anno hoc 1529. die 30. Junij datæ, cujusq; exemplum in perveusto Decretorum Universitatis MS. libro asservatur.

An.

An. 1530.

**U**bi superiori anno Carolus Cæsar Italiam, Gal-  
liamque pacaturus Barcinone primùm cum Pon-  
tifice, deinde Cameraci cum Galliarum Rege pacem  
fanxisset, in Italiam mari appulsus, Bononiæ anno  
hoc Mense Februario festo iterum D. Mathiæ luce, qua  
natus erat, Romanorum Imperator à Clemente VII.  
inauguratur. Inde multa cum Pontifice de bello Tur-  
cio, Religionisque per Germaniam dissidio collocutus,  
ad indicta abs se Augustæ Vindelicorum Comitia pro-  
fectus est. Ipso profecto Corporis Christi, die scilicet  
15tâ Junii consultò Augustæ aderat, cùm die altera ex-  
cussio Protestantibus rubore supplicationem Eucharisti-  
cam manu facem gestans, nudato, ardente licèt sole,  
capite deduxit. Stipabant latus Ferdinandus Frater  
Hungariæ Bohemiæque Rex; inde Brandenburgus Ele-  
ctor, secuti magno numero Catholici Principes. Cæp-  
tis Comitijs, de bello Turcico, quod Austriæ im-  
minere rursus timebatur, de Religione, de eligendo  
in Romanum Regem Ferdinando actum. Adpromis-  
sa ab Imperij Ordinibus ad bellum subsidia; Regis de-  
signatio in annum alterum dilata. Religionis in ne-  
gotio concinnata per Philippum Melanctonem Lutheri  
doctrina, in qua aliis articulis fidem suam declarat,  
alijs abusus ab ipso mutatos indicat, Cæsari oblata;  
Quæ dogmatum Confarcinatio abinde *Confessio Augu-  
stana* appellata, illudque Evangelium est, ad quod  
Confessionistæ jurant. Quamquam Confessionis Au-  
gustanæ forma, quæ sequenti, mox anno edita, & ad  
quam hodie plerique Lutheranorum se profitentur, alia  
longè ab illa in multis variata, quæ Augustissimo Cæ-  
sari est præsentata. Eam ut Cæsar accepit, discuti-  
dam Doctoribus orthodoxis Eckio, Cochlæo, Joanni  
Fabro Universitatis nostræ Theologo unâ; alterâ ex  
parte peritissimis in re Lutherana comisit. Multis ul-  
tro citroque habitis Colloquijs, pro religionis concor-  
dia

dia parum confectum, diffidijs ferè ad generale Concilium, quod tum quidem Protestantes ipsi petebant, dilatis. Illud interea à Cæsare, Ordinibûsque statutum: sola ut Catholica auita Religio ab omnibus manuteneatur. Abinde sædus, quod Pium vocabant, à Cæsare cum Orthodoxis initum; item Comitia alia Coloniae ad principium futuri anni indicta pacis sacrae, ac eligendi Ferdinandi in Romanorum Regem causâ. Fœderi illi, Comitîisque Protestantes suum Smalchaldicum jam superiori anno cæptum opposuere.

Dum hæc extra Austriam: in eas ab obsidione Turcica jam ante ob Religionis disturbia propè dissipata, Universitas calamitates dilapsa est, ut parum abesset, quin corrueret. Moverat misera illa Academiae conditio, ad quem per superintendentem Joannem Pilchamer perscripta fuit, addito à Rectore libello supplici, Ferdinandum, cui conservatione, incrementoque Academiae tam bene hactenus de provincijs Austriacis meritæ nil magis erat in votis: igitur Spirâ nonâ Februarij ad Rectorem, Superintendentem, nominatosque Commissarios literas expedit, mandatque; ut quàm diligentissimè dispicerent, qua potissimum re Universitas restauranda videretur. Nec deerant illi partibus suis, sed scrutati omnia, eas demum collabentis Archigymnasij causas Archi. Duci significandas invenere: imò: quod magna esset Lectorum, Professorumque eruditorum penuria, qui justî stipendij defectu Viennensem Academiam refugerent. 2dò: quod dissipata in Collegijs, & Bursis ob Religionis disturbia esset disciplina: 3tò: quod Foundationum negligetur cura; denique non levibus identidem cum Episcopo, Civibus, Cancellario adversus statuta, ac privilegia sua involveretur controversijs. Quibus aliisque ejusmodi perceptis articulis alteras Mense Decembri ad Locumtenentem, & Austriæ Regentes Ferdinandus dedit, ut, quæ pro commodo, restorationeque Universitatis judicarent, sedulò & ipsi disquirerent, ac ad

sese referrent. Quominus tamen aliquid effectui daretur, novus belli Turcici metus inhibuit.

## An. 1531.

**I**Nterea Electores Coloniam profecti, nequidquam reclamante Joanne Saxoniae Electore, aliisque nonnullis Protestantium, Nonis Januarij Ferdinandum Archi-Ducem Austriae, Hungariae, Bohemiaeque Regem, etiam in Romanorum designant, qui tertio subinde Idus ejusdem mensis Aquisgrani Rex est inauguratus. At rumore de repetenda in Austriam Turcarum expeditione Caesar perculsus, Ratisbonam ad annum 1532. conventum Imperii Ordinibus alium edicit: detrectarunt obsequia Protestantes Schweinfurti primum, tum Norimbergae congregati, palam professi: nec Regem Ferdinandum se agnituros, nec in bellum Turcicum quidquam collaturos, ni Religionis libertas indulgeretur. Cessit Caesar sane Catholicus temporum injuriâ Protestantium votis, atque in id conventum: ut communis, & publica pax constitueretur, nec cuiquam Religionis causâ molestia crearetur, usque ad Concilii generalis Conventum, quem intra sextum mensem à Pontifice indici curaturus esset Imperator; aut si hoc impetrari non posset, tum in Comitibus de summa rei tractaretur.

Viennae sub hac sublato è vivis Joanni de Revellis in Episcopatu successit Joannes Faber natione Suevus Leukirchenensis, non Universitatis modò nostrae, sed & Ecclesiae totius magnum lumen, & ornamentum. Vir enim erat scientiae omnigenae, doctrinae magnae, & Virtutis. Artium per annos complures Magister, deinde Theologiae Doctor, ac in utroque Jure excultus. Archigymnasii, ex quo eruditionem suam hauserat, nunquam non memor; cui conservandae in avita Religione optimè semper consulebat, fundatisque perpetuis redditibus, quibus in Bursa Pruck quinque Adolescentes alerentur, prospexit. Transcripsit quoque

que jam Episcopus optimorum librorum supellectilem studiosorum pauperum ad Divum Nicolaum Collegio: donationem suam hisce verbis exprimens: *Donamus Collegio nostro apud S. Nicolaum, ordinamusque, ut in perpetuum studentibus usui sit, juxta statuta, & præscripta nostra. Actum Viennæ 1mâ Septembris anno 1540.* Quo is conservandæ, tuendæque per Germaniam avitæ Religionis zelo, ac studio flagraverit, abundè testatum eunt complures cum sectariis publici congressus, tótque pro re Catholica data in lucem volumina, non sine encomiis à Possævino recensita. Tantus igitur cùm esset Joannes, à Ferdinando accersitus, primùm conscientiæ suæ arbiter, & ab intimis consiliis esse jubetur; tum ad vacuum, ut meminimus, Pastore Vienneensem Ecclesiam admotus, eidem zelo, pietate, Doctrinâ decem ferè annis præfuit, Administrator simul Episcopatus Neostadiensis, in id præ reliquis intentus: ne Viennam sectariorum venenum amplius corripere, correptique avitæ Religionis restituerentur. Obiit Anno 1541.

### An. 1532.

**C**ertis jam nunciis de novo Turcarum bello significatum erat: ejus avertendi gratiâ missi Constantinopolim, quemadmodum Acta Universitatis annotant, Oeniponto, ubi tum Ferdinandus erat, mense Februario Oratores D. Josephus de Lambach, & Comes de Nagroll, pacem ab Orientis Imperatore sollicitaturi. Verùm is, seu ulturus cladem ad Viennam tribus abhinc annis acceptam; seu dissidio Imperii Principum Religionis in causa fretus; seu tuendi Joannem suum in Hungaria Stipendiarium studiò, spretâ pace collectum 500000. Suriò teste, exercitum, superatis Dravi, & Savi amnibus, in Austriam intulit; Regionem omnem, quæ Danubium inter, & Alpes interjacet, Styriam nempe, Carinthiam, Carnioliam, & Austriam ad Onasum usque igne, ferro, rapinis depopulatus; Chri-

stianorum, quorum jugulo parcitum, multis millibus in servitutem præmissis. His tamen in rapinis, & coactis ad deditioem, quod repetitis vicibus aggressus est, Gynsio, tota stetit Barbarorum expeditio. Ubi enim certus in castris hostium increbuit rumor de proximo Cæsarei exercitus, quem Jovius ex Imperii, Hispanorum, Italicorum, ac Austriacarum Provinciarum milite ducentorum sexaginta millium comparatum scribit, itinere; non jam prælium hostis, sed fugam meditari, quam mox turpissimam mense Septembri iniit, posteaquam haud procul Vienna insignem à Philippo Palatino, qui primis copiis præiverat, 15000. cladem, non tentato totius exercitus conflictu, accepisset. At nec quidquam quoque ulterius in correptum panico terrore Barbarum tam numerofo Christianorum exercitu, ad quem Pontifex ingentem auri vim præter concessas à Clero exactiones, militemque contulit, effectum: Carolo Cæsare, incassum deprecante Fratre Ferdinando, partem maximam copiarum in Italiam, in qua novum bellum Franciscus Galliarum Rex Anglo foederatus interea orsus est, rapiente: relictis ad invadendam Hungariam Ferdinando nonnullis Italicis copiis, quæ tamen orta seditione elatis vexillis patriam quoque suam repetière.

### An. 1533.

**P**ulso Turcarum exercitu, ut nonnulla Austriæ pax rediit, cætera inter Regnorum, Religionisque negotia ad restituendum demum pristinum Universitatis nitorem Ferdinandus Rex animum adjecit: longâ igitur industriâ, & plurium annorum spatio discussis iis, quæ ad Academiæ incrementum facerent, anno hoc reformationis formula est concepta, quâ non tantum priorum Principum Statuta, ac Privilegia confirmata, sed & nova quædam addita. Professoribus ex celeberrimis Gymnasiis evocatis aucta stipendia, & ut laudatissimum hoc optimi Principis propositum suo potire-

tiretur effectu, omnibus studiorum causâ Viennam accedentibus, publicatis per omnes Provincias literis, clementiam, variâsque pollicetur immunitates. Exstat Decretum istud invitatorium *Codici Austriaco* insertum. Congregata itaque 7. Augusti Universitate, à Domino Superintendente Joanne Pilhamer reformationis forma, in qua plurima de augmento ærarii Universitatis; de stipendiorum, & Bursarum administratione; de numero, & ordine Lectorum; de Lectionum sedulitate, ac visitationibus constituuntur, omnibus est perfecta. Non paucos tamen restaurationis articulos variis ex causis subinde expungi, aut mutari oportuit. Et quoniam id præprimis necessarium videbatur, ut viam, rationesque opportunas exhiberent, quibus stipendia Professoribus augerentur, cum in finem laudatus Superintendens plurimum cum Cardinale Tridentino egit: suâ apud Regem Ferdinandum auctoritate efficeret, ut Prælati cœnobarum stabilia bona per Austriæ Provincias habentium certam pecuniæ summam ad Universitatis ærarium in singulos annos contribuendi onus imponeret. Qua in re quid effectum, suo loco referemus.

Alterum haud paulò post ad Universitatem ab eodem Ferdinando Rege Decretum emanavit, cui idem Joannes Pilhamer occasionem dederat: Constitutus enim non diu à Cuspiniani morte, Principis Superintendens, eundem, quem habuerat Cuspinianus, tertium nempe inter Universitatis Proceres locum, deposcebat, multum obnitentibus quatuor Facultatum Decanis. Libellum igitur supplicem multis, solidisque argumentis refertum (cujus MS. exemplar in pervetusto variorum Decretorum libro reperi) Superintendens Regi porrigit, à quo facilè in sui favorem obtinuit ad Universitatem Mandatum.

Atque hæc ferè in Austria: Carolus interea Bononiæ rursus cum Clemente congressus novo icto fœdere multa de Italiæ quiete, multa de convocando Ge-

nerali Concilio egit. Pontifex, ut postulatis Protestantium faceret satis, anno hoc Hugonem Rongonium Episcopum Rheginum unâ cum Oratore Cæsaris ad Joannem Fridericum, qui Parenti nuper demortuo successerat, Saxoniae Electorem ablegat. Offert simul quædam capita de loco, tempore, modo Concilii. At Saxo re cum sociis Protestantibus in Smalcaldico conventu 4. Junii communicatâ, articulos celebrandi Concilii eis conditionibus scripsit, quibus Pontifex non judex, sed reus esset; quodque solis Scripturis sacris, & quidem ad eorum sensum explanatis, niteretur; atque adeo spes omnis cogendi Concilii evanuit.

An. 1534.

**I**ndulserat quidem superiori anno ad mandatum Principis Superintendenti locum tertium Universitas, eo tamen pacto addito: *Quod locus iste Domino Pilhamer pro sua tantum persona, non item pro Successoribus eius concederetur*: Offensus eâ clausulâ Superintendens rem iteratò ad Principem retulit, à quo demum is honoris locus in perpetuum est confirmatus, datis rursus ad Consilium Academicum hujus formæ literis:

**Ferdinand von Gottes Gnaden Römischer, zue Hungern, und Behem &c.**  
Khünig &c.

**E**rsamen, gelerten, andechtigen, und lieben Getrewen: Als Wir euch wenig vergangner Zeit bevolchen haben, daß ir den Ersamen, gelerten, unsern getrewen, lieben Johan Pilhamer Doctor, unsern Rat, als unsern geordneten Superintendenten unser hohen Schull zue Wien, sein Session, und Standt in allen Actibus, und Stationibus publicis, und privatis geben, und lassen sollet, wie vorrig Superintendentes, und neulichs weylend unser Anwalt unsers Stattrats zue Wien, Doctor Johan Cuspinian, als nemblich die dritte Statt gehabt



gehabt haben. Vernemen Wir doch, und gelangt uns auch an, daß bey euch noch darinnen etwas Waigerung sey, oder gesucht werden woll: so aber unser Mainung, und Willen ist, daß es also gehalten werde, so bevelchen Wir euch mit Ernst, und wollen, daß ir gedachten Johan Pilhamer, unsern Rat, als gewirtigten Geordneten, und hiemit ainen jeden Superintendenten in allen Actibus, wie ob stet, nach ainen Rector, und Canzler der Universitet die negst Session gebet, und leffet, und ungehindert also heltet, und kein ferne Waigerung dehalb suechet, noch gebrauchet, angesehen, daß die Session nit der Person, sondern solichen Ambt billig zugeordnet ist. Daran thuet ir unsern ernstlichen Willen, und Mainung. Geben zue Prag den XXVIII. Januarii Anno Domini &c. XXXIII. unserer Reiche deß Römischen in Vierten, und der andern in Achten.

Quo Mandato dissidium quoque de loci praecedentia à Paulo Oberstein jam anno 1519. excitatum, est sublatum.

Huic accedit & aliud, quod ea tempestate penè necessariò constituendum fuit: cùm enim hætenus Universitas ab origine sua potissimùm è Clero conflaretur (nam præter Theologiam non Artes modò liberales, sed vel ipsa Jura à sacris ferè prælegebantur Magistris) certè ad supremum Rectoratûs munus nemo ferme omnium matrimonio junctus est admissus; verùm quòd turbata Religione Viris eruditis haud abundaret, atque ex Juristis non nisi unus, ex Medicis nullus omnino, qui uxoratus non esset, superaret; ne observatâ hætenus Cælibatûs lege aditus ad Academicos honores Viris cæterùm egregiè Doctis intercluderetur non modico Universalis studii detrimento, à provido Principe, edito desuper 9. Martii per Excelsum Regimen decreto, statutum: nulli Laicorum legitimi matrimonii vinculum, si è Juris, Medicinæ, Artiùmve Facultatibus forent, præjudicio esset, quò minùs ad

Facultatum, Universitatisque dignitates deligantur; eâ tamen adjunctâ clausulâ: *Doch wann ad censuras Ecclesiasticas procedirt werden solle, daz der beheyrat Rector alldann seinen Gewalt derselben Zeit einem, der in Sacris ist übergebe.* Insertæ integræ literæ hæc regiæ Annalibus Artistarum sunt.

Morem Regiæ voluntati gerendum Universitati visum est: Quare instanti mox Festo Sanctorum Martyrum Tiburcii, & Valeriani electus fuit Vir consultissimus Udalricus Gebhard J. U. Doctor, qui ex illis, qui uxorem duxissent, Primus Rectoris Magnifici munus sustineret. Deinde mense Decembri Joannes quidam Faber ex Weilhaimb conjugatus itidem, ac ætate jam gravis in Baccalaureum est promotus, quod nimirum Facultas Artium sub id tempus suppositis ferè esset destituta.

Nec desunt alia, in quibus hoc tempore Universitas crevit. Juristarum enim Schola potiori sui parte aut è fundamentis ædificata, aut ex pristinis ruderibus reparata, operam in id suam plurimum conferente prælaudato Universitatis Superintendente. Aula dein Academiæ novam formam induit cum Theologorum Lyceo, atque ipso Ducali Collegio.

Sub exitum anni, sexto scilicet Calendas Octobris Clemens VII. summus Pontifex obiit; peractis funebribus Alexander Farnesius, Cardinalium in electione præsentium ætate gravissimus, concordii suffragio tertio Idus Octobris Sedi Apostolicæ est admotus, assumpto Pauli III. Nomine; Cujus Pontificatûs initio Societatis JESU prima Parisiis in Monte Martyrum fundamenta, primis votis à decem sociis emissis, jacta sunt; quæ Societas futuris subinde temporibus non postrema Academiæ Viennensis pars est futura.

Haud displicuisse Principi Consilium laugendi Universitatis ærarij nuper per Joannem Pilhamer Superintendentem cum Episcopo Tridentino communicatum, eventus docuit; datis enim ea super re Episcopo Viennensi

nenſi Joanni Fabro , L. B. à Leopoldſtorff , Domino Do-  
 ctore Dobrohoſt , ac Joanne Pilhamer Commiſſarijs ,  
 ex voluntate Regia decretum ; ut imprimis Monafte-  
 ria ſingula per utrâmq̃ Auftriam , Styriam , Carin-  
 thiam , ac Carnioliam bonis ſtabilibus ditata , certam  
 quot annos (binis in id ſtatutis terminis , in feſto ſcili-  
 cet S. Georgij , & S. Martini) penſionem ærario Uni-  
 verſitatis inferrent. Deinde bona Monafterii D. Nico-  
 lai extra Stubarum portam ſiti, ac nuper obſidione Tûr-  
 cica diruti, Canonicis ad S. Dorotheam quidem addi-  
 xit , eâ tamen lege , ut media reddituum pars , & pa-  
 ratâ quidem pecuniâ, commodo Academiæ accederet.  
 S. Udalrici aliud erat Monafterium Novæ Civitati ad-  
 junctum , quod bellorum injuriâ planè collapſum Epi-  
 ſcopatui Neoſtadienſi adſcriptum fuerat , nec ſine one-  
 re , idem bonorum dimidium Univerſitati pendendi.  
 His acceſſit religioſa extra Stubarum portam S. Spiritûs  
 Viennæ domus, è qua 50. fl. in annos ſingulos alen-  
 do Theologiæ Lectori Viennenſis Antifteſ , cui ea in  
 perpetuum obvenit , numeraret. Hæc tametſi opti-  
 mè eſſent à Principe ordinata, multas tamen lapſu tem-  
 poris difficultates , & mutationes ſubjervit.

### An. 1535.

**P**ROviſum jam fore ea ratione Univerſitatis ærario  
 cùm crederetur , in id Commiſſariorum reſti-  
 tuendæ Academiæ cura incubuit , ne Facultatibus ſin-  
 gulis præſtantes deeſſent Magiſtri : Ergo cum conſen-  
 ſu Principis , ut MS. Univerſitatis habent, Viennam ad  
 jus Pontificium profitendum Claudius Caciuncula J. V.  
 Doct̃or, Regi jam antehac à Conſiliis , ac deinde à datis  
 in lucem libris , quos inter opus ſanè eruditum , quod  
*Topica Legalia* inſcripſit , clarus , advocatur : ad Jus  
 verò civile Ingolſtadiô Fabius de Narnia Romanus ,  
 qui tamen , quodd de ſtipendio annuo haud facilè cum  
 eo conveniretur , non niſi anno 1538. Univerſitatem  
 acceſſit ; Latinis verò literis excolendis Lucas Agatho-

pedius, seu Guttenfelder; Georgius Ridhmer Græcis datus est Magister: Hebraicam linguam Antonius Margaritha edocebat: Duobus Theologiæ Lectoribus Ambrosio scilicet Saltzer ex Sopronio Canonico ad D. Stephanum; & Joanni Aurifabro itidem Canonico, additus est Joannes Gaudentius Anhauser; Medicinam profiteri jussi Ulricus Faber, & Franciscus Emericus Oppaviensis; Mathesi Joannes Vogelin est præfectus.

Cæterarum Facultatum exemplum egregiè æmulata est Artium Facultas: quæ ut pristinum literariæ rei, quæ bellis, fame, pestilentia, & turbatæ Religionis injuriis mirum quantum neglecta jacebat, decorem restitueret, die 29. Junii Diploma à se confectum publicis affixit valvis, quo optimis studiorum præceptis ad literas studiosos adhortabatur.

Verùm parum adeo hâc industriâ effectum, ut cum annis his terni, quaternique ad summum literarios ad honores promoverentur, anno insequenti, scilicet 1536. non nisi unus sit inventus, cui Christophoro Tonstetter nomen, Viennensis, qui literarium in Artibus gradum postularet.

Sub hæc cum Turca infelicius in Persia pugnâset. nec imèritò Joannes Transylvaniæ Waivoda Hungariæ Usurpator à Ferdinandi exercitu sibi metueret, Viennam Legatos adornant, cujus Acta Philos: in hæc verba meminere: *In Junio venerunt Viennam Legationes à Cesare Turcarum, & Joanne Waivoda ad tractandum de pace inter Ferdinandum Regem, & Cesarem Turcarum, similiter etiam de concordia cum Joanne Waivoda.* Verùm induciæ cum Turca, ac pax cum Joanne non nisi sequenti anno apud Vaciam Hungariæ oppidum, ut Isthvanffius refert, coaluit.

## An. 1536.

**A**T Carolus Imperator expugnatis superiori anno Goleta, & Tuneto, rebûsque in Africa prosperè gestis

gestis Italiam petens, anno hoc 1539. triumpho Romanam invehctus est. Præter regnorum negotia, iterum de Generali Concilio cum Pontifice, quod unum pululantibus indies novis sectis (nam sub ea tempora & Calvinus Institutiones suas Basileæ publicavit, & Henricus Rex Angliæ ab Ecclesia proscriptus erat) medium præsentissimum esse videbatur, tractatum: Edidit igitur Paulus Romæ quarto Nonas Septembris Constitutionem, viginti sex Cardinalium nominibus subscriptam, qua Concilium Oecumenicum, decimo Kalendas Junij proximo anno 1537. inchoandum edixit. Locus Concilio habendo Mantua designata; sed cum Mantuanus Dux varijs è causis Urbem suam Concilio sustinendo imparem dictitaret, & Germaniæ Urbem Germani mallent, Vicentia Pontifici placuit. Binis illac Concilium vicibus indictum, binis quoque vicibus suspensum. Translatum inde anno 1542. Tridentum quidem, at rursus in alia tempora dilatum, nec nisi anno 1545. initium Sessionibus Tridenti datum.

### An. 1537. usque ad 1539.

**G**ravatas haud leviter pecuniariis exactiõibus Facultates, ad annum hunc Acta meminere: Vix enim conclusæ anno præterlapso induciæ; novum iterum bellum anno hoc exarserat. Tenebat Turca Esseckinum Sclavoniæ Oppidum à paludibus munitissimum; ex quo cum identidem in regias excurreret provincias, ac sub ipsis induciis bellum occultè sere-ret, Eundem aperto Marte aggredi Ferdinando visum. Fors ea quoque de causa, quod ad Francisci Galliarum Regis preces Solimanus Neapolis littora diriperet, ac insuper bello Veneto apud Corcyram esset implicitus. Unde ut conscripto ex Bohemis, Hungaris, Italis, ac hæreditariis provinciis militi stipendia non deessent, exactio in singula hæreditariarum Ditionum capita est indicta. Quæ cum & ab Universitatis alumnis postulare-

laretur, annuit illa quidem belli magnitudine commota; obtulitque Facultas Artium, ut Acta memorant, 10. talenta nummum; Facultas Theologica (quæ sub hoc tempus duos tantum numerabat Doctores) 2. talenta nummum; Medica 30 fl. Juridica 10. fl. adjectis tamen precibus, ut cum Universitas alumnis ferè esset exhausta, ne à Licentiatis, ac Stipendiatis tertia pars annui censûs exigeretur. Ejusmodi Academici Concilij postulatis ad Ferdinandum tum Pragæ existentem delatis, sequentem rescripsit, ut Acta habent articulum;

\*Der Universität halb sind wir in allweg des gnädigen Gemüths, dieselbe, so vill möglich, zu erziglen, und in aufnemen zu bringen: welches ihnen den von Wien selbst zu ehren, guetten, und nuz kombt: Deshalb wir für billig achten, das derselben, und sonderlich derer, so aus anderen Landen, und die allda zu Wien nit haussfällig seyn, noch Grund, oder Güter daselbst liegen haben, in berührten Anschlag verschonet werde. \*

At cum nihilominus, ut Acta Philosophica continuant, Senatus Civicus exemptionem Universitatis nondum à Rege decisam, ac necessitatem sumptuum ad bellum prætenderet, ejusdem Senatûs jussu Deputati Cives Bursas, Codriamque aurei montis, ipsum etiam Collegium Ducale obibant, ac censum à Scholaribus, Collegialibusque extorquebant. Reclamatum quidem rursus ab Universitate, postulatûmque, ne passim privilegia violando occasio detur Universitati, quæ aliunde malè cohæreret, dissolvendæ; statutum tamen interea nihil, dum 1539. super exacti-  
onum causâ, jussu Regis ab Austriæ Regentibus benevolam accepit Universitas decisionem, quæ in prælaudatis Actis integra, item in pervetusto Decretorum MS. libro extat.

Interea in Hungariam exercitus Ferdinandi in duas divisus partes, quarum una copiarum Præfecto Comite

mite Katzianero Esseckinum oppugnaret; altera per Hungariam hostem observaret, profectus est: sed infelici eventu; fame enim, pluribusque incommodis vexato milite, dum Esseckini obsidionem Katzianerus solvit, Machometes Dux, qui solvendæ obsidioni copias adproperabat, in recedentem Christianorum Exercitum inVectus, ferè internecone delet. Katzianerus fugâ dilapsus, cùm perfidiæ accusaretur, aliquamdiu in custodia habitus, inde dilapsus, dum fugam ad hostes meditatur, à Comite Szrinio, quem perduelis fugæ socium sollicitaverat, obtruncatur, misso ad Ferdinandum Regem perfidi capite. Meminere bellorum horum Acta Artistica in hæc verba: *Hac æstate incerti bellorum rumores orti: primum inter Cesareum caput, & Regem Franciæ, quod bellum præter Cesaris mentem in decem menses suspensum est: Alterum, & quidem terrâ, marique difficillimum inter idem Cesareum Caput (communi faderis necessitate cogente, juncti enim sunt Veneti, & summus Pontifex) & Cesarem Turcarum, qui Corsicam obsidebat. Postremò Regia Majestas & in Hungaria per Comitem Vels, & in Croatia per Comitem Katzianer Duces bellum gessit. At, proh dolor! Inâ Octob. Katzianer à Turcis stragem accepit.*

Dum hæc infeliciter bello in Hungaria aguntur, res pro conservando in avita Religione Archigymnasio præclara est confecta. Ubi enim Regio Diplomate, ut ad annum 1533. meminimus, invitati Viennam studiorum causâ Alumni, literarumque Magistri haud pauci confluxissent, Wittenbergæ quoque Saxonum quidam creatus Magister, cui nomen Bartholomæus Zeüblrieder Kinzingensis ad Facultatem Artium admitti petebat. Verùm cum paucos ante annos Edicto Ferdinandi Regis alio vetaretur; ne quispiam Austriacorum Wittenbergam Lutheri dogmatibus infectam discendi ergo adiret, postulata Bartholomæi ad Concilium Universitatis Facultas Artium detulit; à qua responsum: non admittendum, nisi prius à regio

Au-

Austriæ Senatu licentiam impetrâſſet; obtulit ille Senatui libellum supplicem, iis potiſſimum rationibus nixum: quod & Spiræ, Lipſiæ, & aliis in Urbibus, Wittenbergenſes Magiſtri, & Doctores admitterentur. Igitur Austriæ Regentes ſupplicantiſ rationes, ſtudia, vitæque normam Rectori, Facultatibûſque Juris, & Artiſtarum iterum diſcutienda comiſſere. Præſtiterunt illi, quod imperatum; ac ſequentibus ad Regentes verbis reſcripſerunt:

**Römischer zu Hungern, und Böham &c.  
Königlicher Majestät, Ertzherzogen in  
Oesterreich, &c.**

**U**Nſers Allergnädigſten Herrns, und Landſfürſten hochlöblich Cantzler, und Regenten der Nieder-Oeſterreicheriſchen Landen. Wol-Gebohrn, Edl-Geltreng, Hochgelert, und Veſt-Gnädig Herrn; auf E. G. beuelich, Maiſter Barthlme Zeüblrieder, wie er ſich dan nent, betreffend, geben wür E. G. mit Unterthänigkeit dieſen Bericht, ſo vill Wandel, und Kunſt des Supplicanten betrifft, ſchlagen wür ihm nichts ab; dieweill aber erſtlich Röm: Kayſ: und auch Kün: Maj: unſer Allergnädigſter Herr erſtlich verboten, bey Verliehrung Ehr, und Guet, daſs niemand auß Ihrer Maiſtät Landen auf die Univerſität zu Wüttenberg ziehen ſolle ſtudirens halben, mainen wür, daſs auch die von Wüttenberg in Ihrer Maiſtät Landen, und Uni-verſitäten nicht anzunehmen ſeyn; und bevorab die-weill auch Päbſtliche Heiligkeit, auß welcher Gewalt alle Gradus in Univerſitatibus verleben werden, gedachter Univerſität authoritatem Gradus conferendi aufgehebt hat; derohalben dan in andern Uni-verſitäten, als uns etlich der Unſern, ſo des wiſſen tragen, bericht, die ſo zu Wüttenberg auch in Artibus promovirt, nicht angenommen werden; iſt uns demnach zu beſorgen, ob wür das thäten, wür wurden Röm: Kayſ:



Kayf: und Kün: Maift: auch Päbftlicher Heiligkeit ungehorfam geacht werden. Über das tragen würd auch Sorg, folches würd uns gegen den Hoch- und Ehrwürdigen Herrn Biſchoffen, und Probt von Wien unfer Univerſität Canzler Ungunſt erwecken; und wiewol der Supplicant fürgibt, wie zu Speyer in Kayf: Kamcr Gerichten, und anderſtwo Doctores, und Magiftri von Wüttenberg angenommen werden, das geſchicht leicht denen, ſo vorlengft zu Wüttenberg promovirt ſeyn worden. Jedoch was E. G. in Namen Kün: Maift: ſchaffen, und uns ordentlich bevelchen, iſt unfer Gehorſam wolgefallen. Es hat auch Facultas Artium unter eines Jar Friſt drey Magiſtros von ander Univerſität guetwilliglich zu Förderung der Lernung angenommen, an Zweiffel wird ſeyn auch ihnen, ſo bemelt Urſach nicht zu wider wären, zugelaffen haben. Thuen uns E. G. unterthänig bevelchen.

Rektor, & Facultas Juris, & Artium  
der Univerſität zu Wien.

Approbavit, collaudavitque Regimen Facultatum mentem, nec diu poſt Rektor Magnificus præſatum Wittenbergentem Magiſtrum Vienneniſi Univerſitate exeſſe juſſit.

Exinde dies 15. Septembris anni labentis aderat, cum ruſſum Reformationis Forma reſumpta, & adjectis benè multis articulis, quibus anno 1533. creverat, publicata fuit; demandatumque ſeverè omnibus, ut caverent, ne ab hac ſtudiorum Univerſitatis ratione poſthac diſcederetur: Atque hæc altera fuit à fundata Univerſitate, Academiae, & ſtudiorum Vienneniſium inſtauratio: Poſtquam nempe primùm ſæculo ſerè integro (Annus iſt 1436. dies 20. Martii erat) antea tentata fuiſſet; ut ex ejuſdem Reformationis Actis, cujus transcriptum in ſæpius dicto variorum Decretorum Univerſitatis libro habetur, colligimus.

Habuit, & illud anno hoc Univerſitas, quo ſibi gratularetur; terminatam feliciter, agitaram toties,  
&

& tot annis continuatam *de jurisdictione, & re testamentaria Ecclesiasticorum ad Academiam spectantium controversiam*, quæ Universitatem inter, & Episcopos Vienneſes hucusque gliſcebat. Compositionis ejus forma cùm *Codici Austriaco* inserta ſit, ea ſuper re nihil dicendum ſuperat.

### An. 1539.

**R**estaurata quidem optimis legibus Universitas videri poterat, quò minùs tamen ſperata incrementa ſumeret, ſtipendiorum à Lectoribus penuria iteratò cauſabatur, cùm & ab aſſignatis Monasteriorum S. Nicolai, & Udalrici bonis ærario nihil etiamnum accederet, & Prælati perſolvendæ penſionis non paucas rationes obtenderent. Porrectum à Superintendente Joanne Pilhamer ea ſuper re ad Austriæ Regentes libellum ad manus habeo; quid tamen deſuper impetratum, poſterioribus annis enarrandum.

### An. 1540.

**M**ors Joannis Waivodæ, quam duodecimo Kalendaras Auguſti anno hoc 1540. obiit, Uni-verſitatis progreſſus non parum inhibuit. Aberat ſub hæc tempora Ferdinandus Rex Gandavi in Belgio, ut Carolum Fratrem Cæſarem per Gallias proſectum ſalutaret, ac cum eo de ſedando Religionis turbine, qui famoſis identidem libellis, direptione bonorum Eccleſiaſticorum, armis etiam ciebatur, tractaret. Ad eum igitur ubi Joannem obiſſe eſt perlatum, miſſis ad Iſabellam Joannis viduam, quæ tunc Budæ erat, Legatis, Regnum Hungariæ, tum veteri jure, tum ex inito cum Joanne ejus conjuge pacto repetit: delecto quoque ad Portam Ottomanicam Oratore Hieronymo Laſcho Poloniæ Palatino, qui jura Ferdinandi ad Hungariæ Coronam Solimanum edoceret. Nihil utrobique impetratum; Solimano jam per Legatos Iſabellæ, quæ Eidem, Georgii Martinuſii D. Pauli Monachi

ſua-

suasu , regium puerum , cuius ille curator erat , stipendiario nomine submiserat , præoccupato. Ergo armis sibi asserturus Regnum Ferdinandus sub Autumnum Comitem Leonardum Velsium cum comparatis properè copiis mittit , qui Vicegradum , Albam Regalem , aliâque minoris nominis præsidia Isabellæ extorquet , Præfectis Turcicis asperrima hyeme à ferendo subsidio retardatis.

Urgebat recens istud bellorum periculum , ut muniendæ Viennensi Urbi suprema demum manus adhiberetur : Cujus jam inde à soluta obsidione Turcica mænia reparari , & subinde latiori vallo amplioribusque propugnaculis muniri cæpta ; eum in finem domibus , vineis , ac ædificiis muro Civitatis adhærentibus , adhibitis. Nec rebus ad Universitatem spectantibus , parcitum : Hospitale enim S. Spiritûs cum D. Sebastiani Sacello , vineâ item unâ , & horto , quod semirutâ , aut deserta jacerent , materiam propugnaculis educendis præbuere.

Amisit interea Acadèmia nostra Fabium de Narnia , quem superiùs Ingolstadio ad profitendum jus Civile advocatum diximus : Hic namque bona cum Universitatis venia Viennam iterum deseruit , quodd stipendium 400. florenorum Austriæ Regentes non ampliùs ei persolvendum decrevissent , magnâ scilicet ob repetita bella rei pecuniariæ difficultate. Romæ autem 5to Calendas Octobris Societatis Jesu Institutum Auctoritate Apostolica primùm approbatum , Ordòque confirmatus.

## An. 1541.

**N**on satis læta anni ineuntis primordia Austriacis attulerunt. Præterquam enim , quod Turca in Isabellæ viduæ subsidium magnas cogere copias , & Hungariæ admoveere diceretur ; Carolus quoque Cæsar frustra iterum Ratisbonæ Conventum cum Protestantibus egit. Quare seu distracturus Solimani vires,

L

seu

seu Hispaniæ prospecturus, adversum Algerios expeditionem adornat; Ferdinandus autem exercitum quadraginta millium Duce Wilhelmo Rogendorffio in Hungariam mittit expugnandæ Budæ. Verum utrobique infelicitè: re enim irrita, multis suorum desideratis, ex oppugnatione Algerii Carolus redire coactus: Rogendorffius verò, dum strenuè quidem expugnandæ Budæ insistit; at quòd spretis suorum consiliis decretorium assultum in lucem alteram distulisset, non modò ab obsessis magna clade rejicitur, sed ab adveniente in auxilia hostium exercitu etiam internecone deletur, cæsis ferè viginti millibus Christianorum: qua in clade Rogendorffius ipse seu ex vulneribus, seu animi dolore extinctus est; Solimane astu Budam ab Isabella extorquente, quam cum Filio in Transylvaniam relegat perjurus; se cum primùm puer adolevisset, Regnum cum Buda ei restitutum. Atque hoc ex anno Buda in potestate Turcarum erat, victricibus Leopoldi Magni Cæsaris armis An: 1686 recuperanda.

Tantis bellorum cladibus pestis quoque sævissima accesserat, qua Vienna cum Austria ferè tota prosternebatur; ita temporum horum calamitates Actis Artificis referentibus: *A mense Junio usque ad Purificationis festum anni 1542. Lestiones, Senatus & Regius, & civitatis cessârunt, ob gravissimè grassantem per præsentem annum 1541. pestem; ex qua in Austria tertia pars hominum trucidati; quot verò per totam Germaniam ablati sint, facile cogitari poterit. Sub hac tempora, Septembri scilicet Mense, expugnata quoque est à Turcis Buda, cæsis nostris eam obsidentibus, à Georgio quodam Paulino Monacho partis Waivodensis hostibus contra nos adjutis, maximo Christianitatis, præcipuè harum terrarum malo; quòd subdola, & infelici strage nostri milites ad unum ferè omnes terrâ, marique perierunt. Det Deus nobis in totum jam exantlatis meliora.*

Viduæ quoque ab obitu Joannis Fabri, qui in hunc annum

annum inciderat, jacebant Insulæ Viennenses, donec eas Reverendissimus Fridericus Nausea, Blanciampi in Franconia natus, resumeret, quibus sustinendis quatuor ipsis annis Fabro antea Coadjutor datus erat. Magnum inter eruditos æquè, ac fidei orthodoxæ propugnatores Nomen. Theologiæ enim, ac Legum Doctorem, deinde Ecclesiasten Moguntix, Ferdinandus Romanorum Rex ad se advocatum, sibi primò esse jussit à consiliis, & Concionibus; tum anno hoc Viennensem Episcopum. Vir ea etiam in dignitate Apostolicus, qui pro Domo Dei, & reducendis ad ovile Christi errantibus nullo pepercit labori, verbis potens, & libris, quos & Christiana æruditione, & fidei soliditate præstantes longo ordine recenset Possevinus. Interfuit deinde Fidei Catholicæ propugnator Concilio Tridentino sub Julio III. Anno 1551. ubi etiam, ut dicetur, sacris laboribus immortalis est.

### An. 1542.

**S**pirensibus in Comitibus, quæ belli Turcici causâ Ferdinandus, Carolo in Hispaniis absente, indixerat, communi consensu, & subsidiis expeditio in Turcam decernitur: Acatholicis ipsis metu victriculum superiori anno armbrum percussis, ac Joanne Morono Nuncio Apostolico, Pontificis nomine non levem pecuniæ vim addicente. Collectis ingenti numero copiis Joachimus Brandenburgicus Elector præficitur: is in Hungariam profectus Budam quidem obsidione cinxit; at vel rumore advenientis cum prævalido exercitu Solimani territus, dum obsidionem solvit, tantus simul Germanorum apparatus, nullo operæ precio facto, præter levia quædam certamina, Autumno jam inclinante, dissipatus est. Quam expeditionem Chronicon Artift: ita literis mandavit:

*31. Maii Anno 1542. Magnificus Dominus Rector cum tota Universitate Viennensi congregata Regiam Majestatem Spirâ redeuntem accepit; sibi que precans felicissimam vi-*

*Floriam, ac triumphum contra Crucis Christi inimicum Turcarum Imperatorem. Nam Clementissimus Rex fuit istius animi propositi, maximis copiis in Hungariam descendere, eumque de Buda, quæ Sedes Regia Hungariæ est, pellere: locò verò Regis in auxilium missus est à Sacro Imperio Marchgravius de Brandenburg, qui & Elector est Romani Imperii. In Hungariam venit maximis copiis militum tum peditum, tum equitum, parum tamen profecit.*

Viennam ubi Imperii miles transiret, Ferdinandus Rex Spirâ redux, seu ut Numen justis armis redderet propitium, seu ut A catholicis pietatem avitam testaretur, solemnia Corporis Christi religiosius celebranda indixerat: paulò post, inquit prælaudatum Chronicon, nempe octavâ Junii Festum Corporis Christi more solito solemnius celebratum fuit, præsentē Clementissimo Rege Ferdinando, liberisque suis, & aulicis; nullus tamen Principum, qui in Turcarum auxilium missi erant, interfuit; manserunt enim in exercitibus suis. Rex hoc die Monasteriis seriosissimè indixit, ne ferant Venerabile Sacramentum præter Ecclesiam S. Stephani, quæ unica Viennæ tunc ferebat, ut vocant, sub Calo.

Tantæ pietati Principis, numerosoque exercitui, quodd felix non responderit successus, divinis committendum judiciis; mereri sanè iram vindictamq; videri illa tempora poterant, discissâ tot erroribus Ecclesiâ, ac regnis Christianorum bello direptis: eodem enim anno Mars iterum Gallicus in Belgio & Navarra recruduit; quibus id demum effectum, ut sectariis, nuper Concilium postulantibus, occasio daretur ejusdem declinandi; Nam terni jam Pontificis Legati à Latere Tridentum Concilii anno 1542. aperiendi causa accesserant, sed irritò eventu.

Ardente tot bellorum flammis Hungariâ, Germaniâque penè omni; non deerant tamen vel prima ex nobilitate, qui dum literis Viennæ excoluntur, magno eidem, ac subinde Reipublicæ suère ornamento; numerabat enim suis in Scholis per ea tempora Nicolaum.

laum Comitem à Salm ; Achatium , & Felicianum ab Herberstein ; Stephanum Baronem ab Eyzing ; Adamum , & Carolum Barones à Dietrichstein , Ludovicum à Kirchberg ; Christophorum , Stanislaum , & Nicolaum Sobiezky Nobiles Polonos ; Wolffgangum & Joannem à Königsberg ; Christophorum , & Albertum ab Althan ; Christophorum Jörger ; Leonardum à Liechtenstein de Nicolspurg ; Vitum Albertum de Puecheim ; Bernardum , & Christophorum à Teuffenbach , aliisque complures. Id unum dolendum videbatur , tot , tamque præclaræ spei , & originis adulescentes Lutheranæ sectæ virus non paucos totis animis jam hausisse. Nec fieri aliter poterat ; cùm dilapsis veræ religionis cultoribus , sectarii Præceptores grassarentur. Certè , ut Acta memorant , Facultas Theologica per hosce annos duobus tantùm , ternisve Doctoribus definiebatur.

### An. 1543. usque ad 1545.

**D**um Ferdinandus Rex anno hoc rursum in Comitibus Norimbergæ indictis subsidia ab Imperii Ordinibus (quod Protestantes auxiliũ omne denegarent , ni de vexationibus Imperialis Cameræ sibi satisfaceret , Conciliũque omitteretur ) nequidquam procurat ; Solimanus totam ferè Hungariam subjugavit. *Ea enim æstate , verba Actorum sunt , amissæ sunt plures Civitates insignes in nobilissimo Regno Hungariæ ; Civitas Quinque Ecclesiensis , Alba Regalis , plures arces , Siclos , Valpa , Tatta , Arx Strigoniensis , & reliqua oppida non minùs opulenta , quàm clara. Conscriptus est quidem exercitus à Ferdinando Rege nostro , & expeditio instituta adversus Turcam , quæ tamen re infectâ soluta est Posonii ad Festum Michaëlis , & motis Castris milites ad sua redierunt.*

His Hungariæ cladibus accessit traductum etiam in Italiam à Gallo bellum , advocato in subsidium Turca ; qui ad Francisci Galliarum Regis , Brietio ipso faciente , preces misso cum classe Barbarossa , maritimas

Italiæ oras vastabat, & Nicæam Gallis junctus, etsi incassum, oppugnabat.

Quo pariter anno, ut Surius, & Spondanus notant, è vivis excessit vir spectatissimus Joannes Eckius Artium, & Theologiæ Doctor, Ingolstadiensis Academiae Vicecancellarius, non minimum eo nomine Universitatis nostræ ornamentum, quod eandem eruditionis causâ inviserit, & Ingolstadiensi fuerit ex Academia, quæ Viennensis est filia. Elogium ejus à Facultate Theologica Viennensi in ejusdem Actis concinatum sequens reperi: *Moritur Ingolstadii Joannes Eckius Sanioris Theologiæ Professor ingeniosissimus, Catholicæ & Christianæ Religionis propugnator acerrimus, ut inter Antagonistas Lutheri, & Lutheranorum primus, sic & omnium hæresum nostri temporis mastyx invictus: tantum enim ingenio, & eruditione Christiana pollebat.* Et certè Eckius erat, quem Deus Ecclesiæ suæ in Germania periculosis illis temporibus propugnatorem excitâsse visus est: quantum enim pro re Catholica jam inde, quo Lutherus dogmata sua sparsit, & calamo, & sermone egerit, satis testatum eunt eorum temporum monumenta, ac excusa typis volumina, quæ præclara cum commendatione enumerat Possevinus. Juerit audire quæ Eckius de laboribus suis pro avita fide proderit ad Conradum à Thungen Herbipolensem: Ego, inquit, *omnium minimus cum bestiis jam sæpe, & eminus, & cominus pugnavi; cominus quidem Lipsiæ cum ipso Draconis capite Luthero, & Carolstadio viginti diebus disputando, spectante nonnunquam Domino Georgio Saxonie Duce; & in Baden cum Capharnaïta Oecolampadio, & affeclis, assidentibus duodecim Cantonum Helveticorum Pagis, & quatuor Episcoporum Legatis, pluribus diebus confixi. Eminus verò editis aliquot in Germania, & Italia libellis cum Hæreticis manum conserui; è quorum numero est Locorum Communium Enchiridion à me editum, quo occupationes in promptu haberent, quo hæreticis occurrerent.* Hæc ille.

Eckium



Eckium anno altero, scilicet 1544. in alteram vitam secutus est Reverendissimus vir Paulus ab Oberstein J. U. Doctor, Maximiliano I. Cæsari à Consiliis, ac ab anno 1517. Præpositus Cathedralis Ecclesiæ, Cancellariûsque Universitatis; Vir & pietate, & scientiis insignis, nisi quod suorum importuna præensione jurium non exigua Academiæ sæpius creaverit dissidia.

### An. 1545.

**F**Acta post biennale bellum, adnitente plurimum Pontifice, superiori anno cum Gallo pace, initisque, quod Protestantes pervaciter auxilia denearent, cum Turca armorum induciis, anno demum isto initium Tridentinæ Synodo datum; ut per eam pax quoque, & quies Ecclesiæ redderetur. Prima anno hoc, eaque unica habita Sessio est Idibus Decembribus, qua Decretum de inchoando Concilio approbatum. Ex Universitate nostra huic, sequentibusque sub Paulo III. Sessionibus Doctorum adfuit nemo; seu quod non pauci, tametsi erroribus Lutheri non adhærerent, Ecclesiasticorum tamen mores averfarentur, seu quod Facultas Theologica ferè tota defluisset.

Post annum interim Præpositi, & Cancellarii munus (cui à morte Pauli Oberstein successerat) bene gestum, vitam finiit Joannes Rosinus, Orator pro ea tempestate celebris, ac Laureatus Pœta; peperit ei dignitatem illam præter præclara eruditionis merita diligens Liberorum Ferdinandi Regis Institutio. Ei ad brevem itidem vitæ usuram, utraque in dignitate successor datus Joannes Sauer Theologiæ Doctor.

### An. 1546.

**A**Nnus hic cum insequenti sanè Luctuosus non Germaniæ modò, sed & Universitati; complures enim Imperii Ordines, ac Principes à Cæsare simul, & Religione aperto bello defecere, & Academia his

religionis turbis flantibus propè iterum ob defectum Alumnorum, Præceptorumque corruebat. Vix namque Synodus Tridentina superiori anno cœperat, ac in præsentem quatuor aliæ Sessiones continuatæ, cùm Protestantes Concilium detestati, speciale Concordiæ causâ colloquium Imperiali aliqua in Urbe insolentiùs postulant. Ratisbona delecta, ad quam Protestantium, Catholicorumque Legati principio mensis Januarii anni 1546. convenêre. Quid eo in Colloquio actum, Theologicum Chronicon ita annotavit.

*Initio anni 1546. 27. Januarii Colloquium Ratisbonense, dùm Concilium œcumenicum Tridenti eodem mense Secundam Sessionem habet, exorditur ad veræ fidei concordiam, Ecclesiæque Christianæ communem reformationem ineundam; Cæpit verò Colloquium ab oñodecim Personis tractari, duobus Cæsareis præsidibus, post utrinque & Catholicis, & Protestantibus quatuor collocutoribus, & quatuor auditoribus; quibus additi sunt Notarii, quorum Scripta decisa ad destinatum tempus in obseratum Scrinium reponerentur: propositum quidem fuerat convenire, & colloqui de quinque capitibus; Primò de Sancta Trinitate, Incarnatione Christi, & Originali peccato; hæc verò in superiori colloquio excussa fuerunt; quare à Secundo inceperunt de Justificatione, Fide, Bonis operibus, &c. Tertium foret de Sacramentis tam in genere, quàm in specie; Quartò de Purgatorio, Suffragiis defunctorum, Veneratione Sanctorum, Usu imaginum, Celibatu Sacerdotum, Votis monasticis, de Ciborum, & Dierum discrimine, ac omnibus Ceremoniis: Quintò de Ecclesia, Authoritate Clavium, Ordine Hierarchico Papæ, Episcoporum, & Conciliorum auctoritate. Hæc ferè est Summa Lutherana, seu Augustana Confessionis. Duravit verò solum ad tertium usque Mensem, nempe vigesimam primam Martii; quia formari processus à Cæsarea Majestate præscriptam nonnulli recipere & inire nollebant; sicque discesserunt, & dissolutum est Colloquium prius, quàm verè, & ritè cœperat.*

Hæc

Hæc dum maximè agerentur pro Lutheri Secta, ipse Tragœdiæ omnis incentor, & pacis publicæ inimicus, juratus Pontificis hostis, Martinus Lutherus Islebiæ, ubi sinistro fato lucem primam aspexit, lucem, vitamque infaustus reddidit. Cui uni non nostra solùm, sed omnes penè Germaniæ Universitates in debitis referre debent, quòd tantùm non corruerint, & planissimè extinctæ sint. Breve ejus vitæ compendium Annales Theologici in hæc verba contexuerunt: 17. *Februarii moritur ex pectoris oppressione, & dolore, eo die sanus, antea bene prandens, & canans Martinus Luther tribus horis mediæ noctis in Eisleben Turringia, Civitate Comitum de Monsfeld, ubi & natus est, & educatus erat; professione deinde Monachus D. Augustino devotus: sub annum deinde 1517. regnante Maximiliano Cæsare, & Leone Papa X. mutavit vitam, religionem, animum, & habitum. Favente Friderico Saxonie Duce Wittenbergæ Catharinæ Abbatissæ Apostatæ ipse Apostata nupsit, Augustinensi Canobio prophanato, Ecclesiæque dirutæ, isthuc in Arce habitabat. Sepelitur Wittenbergæ annorum 64. Papæ, Cleri, Ceremoniarumque Erinis; & sicut Solimanus Turca Nobilium, ita ille verum Dei flagellum erat. Ach utinam, probo dolor! non plus pietatis destruxisset, quàm subdola fidei doctrinâ suâ edificare volebat.*

Capite ergo suo destituti, & fatali Germaniæ face extincta, partes diutius cæteræ, & membra cohærere non poterant. Quare deserto turpiter Colloquio, quòd turpius antea urserunt Smalcaldici fœderis Protestantes, novum frequentare colloquium pertinaciter abnuunt, quod redux ex Belgio Carolus Cæsar in Mensem Majum Ratisbonam convocaverat. Et cum facile perspicerent, planè destinatum Cæsari esse, vel armis Concilium Tridentinum tueri; ipsi quoque arma cogitârunt, quorum præcipui fuere Fridericus Dux Saxonie Elector, & Philippus Hassiæ Landgravius, conscripto octoginta quinque peditum, equitumque millium Exercitu. Utrumque Principem Cæsar pu-

blicis literis 13. Calendas Augusti, uti perfidos, seditiosos, Læsæ Majestatis reos, ac publicæ tranquillitatis perturbatores proscripsit. Illi econtra apertum Cæsari bellum denunciant, consiliis invicem divisi. Dum igitur moras nectunt consultando, urbibusque subigendis; Imperator exercitum ex Hispanis, Belgicisque copiis, duodecim millium à Pontifice submissorum accessione auctum, comparat, quo saltem resistere hostibus posse videretur. Verùm ex intestina Protestantium dissensione defluentibus eorum copiis, maximè ex quo Fridericus Elector Palatinus, seditiosorum partes deseruisset, ac pedibus Cæsareis advolutus in gratiam esset receptus, amplius quid Cæsar audere ratus, Castra Castris hostium opponit; his subinde recedentibus, Donabergam, Dilingam, Aichstadium, aliàsque Urbes, aut armis, aut missis Legatis, spe veniæ oblata, recuperat. Ferdinando interea Rege cum Mauritio Saxone Provincias Friderici Saxonie Electoris felicibus armis percurrente. Meminere belli hujus Acta Theologica in hæc verba: *Mense Majo, & Junio Carolus V. Cæsar felicissimus, ac potentissimus Ratisbonæ iterum celebrare Comitia instituit, venit, proponit. Verùm Lutherani ex Smalcaldica Conspiratione, seu confederatione centum ferè millibus armatorum confluebant, contra Cæsarem rebellionis, religionis dicere volebam, causam prætendentes Duce Saxone, & Hassò. Verùm totus rebellium exercitus ante Giengen profugit turpissimâ infamiâ ex suis Castris, adeo, ut sine omni strage, & sanguine Civitates Liberas Regni Romanorum denuo subjugarit.*

Neque tamen tanti bellorum per Germaniam motus Optimi Principis Ferdinandi Romanorum Regis curam obruere adeo poterant, quin identidem animo versaret, ut quam in Imperio armis defensam ibat Religionem, eandem Viennæ, atque in Universitate sua aut conservaret, aut ruentem restitueret, Ubi enim certis nunciis percepisset à Provinciæ Statibus acatholicos advocari Præceptores, eosque juventuti erudiendæ

endæ ipsa quoque in Academia præfici, malo ei ut præveniretur, Olomucio (nam per Moraviam, Bohemiámque legebat militem) ad Universitatem, Facultatémque Theologicam, dedit literas, quibus examinari in fidei, pietatisque causa Facultatum omnium Magistros, adhibito ad examen Ordinario Vienneñsi, & Præposito ad S. Stephanum, mandabat: Quorum tenorem ad verbum reddimus:

## Ferdinand von Gottes Gnaden Römischer zu Hungern, und Behaim Künig, &c.

**E**Rsam, Gelert, Andechtig, und Getreüe, Liebe. Nachdem Wir auf die Erinnerung, so Uns glaubwürdig zuekhomen, kurz verschiner Zeit jüngst gewesnen Professorem der Hebreischen Sprachen bey Unser Univerlität zue Wien (*Erat is Franciscus Stancaurus natione Italus*) dergleichen Wolffgangum Marcium, so ain ersame Landschafft Unsers Erz-Herzogthumbs Oesterreich unter der Ens zu ierer Kinder Præceptor angenommen, und daßs sie den neüen verfierrlichen Lehren verwont, und zuegethan gewest, von ieren Lecturen, und Dienst absetzen, und des Lands verweisen lassen, und dan zu Erhaltung Unser alten, wahren, löblichen, hergebrachten, Christlihen Religion, Unser, und Unserer Lande hoche Notturfft erfordern will, daßs nun hinfiero in Annemung der Professoren zu angeregter Univerlitet, und Lerer der Jugend so vill sicherer gegangen, und allerley beschwerlicher, und nachtheilliger Unrath, so auß Verfierrung der Jugend zu besorgen ist, verfürst, und fürkhomen werden muge. Haben Wir Unsern Statthalter, Canzler, Regenten, und Räthen Unsers Regiments der Nieder-Oesterreicherischen Lande aufgelegt, und befolchen, daßs sie nun hinfiero kainen Professoren, es sey in was Facultet, oder Sprach er wölle, zur Univerlitet annemmen, noch komen lassen sollen, er seye dan zuvor, und ehe er angenommen wird

wird per Facultatem Theologicam, sambt den Bischoff, und Thuem-Probst zue Wien Glaubens, und Religion halben notturtftiglich examinirt, und in solchen Examen Unserer alten, waren, Christlichen Religion Verwand, und eingehorsam Glied der Heiligen Christlichen Kirchen befunden worden; Zaigen euch solches genediger Mainung an, und ist darauf Unser ernstlicher Will, Mainung, und beuelich an euch, daß ier solcher Unser Verordnung biß auf Unser, oder Unser Erben genedige Verenderung gantzlichen, und unverbrochenlich gelebet, und nachkhomet, und auch hüerin kains weegs anderst haltet, damit also die Lecturen bey Unser Universitet mit erbarn, gelerten, und Unser alten, waren, Christlichen Religion werwonten Professoren, und Lesern ersetzt, und versehen, und das jenig, so zu Erbauung, und Erhaltung Unser Christlichen Religion, und Befürderung des gemainen Nutzes, und aller Erbarkeit bedacht, und füergenommen worden, nicht zu den Widerspill, als zu Abfall der Religion, und Verführung der Jugend, gedeyhe, und dieweill wier bemelte Bischoff, und Thuem-Probst zu solcher Examination, und verher biß auf Unser, und Unser Erben gnedige Verenderung adjungiren, und sye darin nicht mehr Auctoritet, dan ain ander jeder Theologus Facultatis Theologicæ in seinen Voto haben werden, so kanden Wir nicht befinden, daß solche Unser Verordnung Unser Universitet an ieren Fraihaiten, in ainigen weeg verlezlich seyn möge, oder ier darab ainig billich Beschwerung tragen sollet: darum wollen Wir Uns gantzlichen zu euch verstehen, ier werdet derselben Unser Ordnung also gehorsamlich leben. Daran thuet ier Unseren gnedigen, und ernstlichen Willen, und Mainung. Gegeben in Unser Statt Olumutz den dreysßigsten Dag Martii anno &c. Im Sechs und Viertzigsten, Unserer Reiche des Römischen in Sechszehenden, und der andern in Zwainzigsten.

Ferdinand.

Prom-

Prompti omnes & animo, & re ipsa morem gessere iusto Principis imperio, Franciscus Stancarus Viennâ pulsus in Prussiam ad Regiomontanam se contulit Academiam, inde in Poloniam ad Cracoviensem; verum cum enormia ejus dogmata vel ipsis Sectariis exosa essent, pœnarum metu inde in Russiam profugit.

## An. 1547.

**C**ontinuatum est Tridenti Concilium, habitæque Sessiones tres, ordine scilicet Sexta, & Septima, quibus accessit Octava, in qua decretum de Concilio ob grassantem pestiferam luem, Bononiam transferendo. Remansere tamen Tridenti Germaniæ, Hispaniæque obnoxii Episcopi, quod citra Cæsaris Imperium Bononiam adire eis fas non esset. Celebratæ à Congregatis Bononiæ Patribus Sessiones duæ, quas tamen abruptit Petro Aloysio Duci Placentiæ, Pontificis, priusquam sacris initiatus esset, suscepto filio illata cædes: nec nisi, ubi anno 1551. Tridentum à Julio Pontifice Concilium est revocatum, Sessiones sunt restitutæ. Rem ferè omnem Tridenti gestam Annuæ Theologicæ his verbis consignârunt: *Duravit interea Concilium Tridenti, Anno scilicet 1546. & 1547. licet ob belli tumultus Germaniæ lentè procedat; tum quod & adversa pars Hæreticorum hætenus istuc venire recusabat. Celebratæ interim sunt à Catholicis magnâ Patrum frequentia Sessiones quinque. In sexta Anno 1547. Articulum Justificationis cum annexis locis omnibus diutissimè, & Sanctissimè discussum publicârunt. Septimam habuerunt 3tiâ Martii de Sacramentis in genere, & Baptismate; item de abusu beneficiorum Ecclesiasticorum. Post recesserunt Cardinales Italici Bononiam, omnibus aliarum Nationum Præsidibus Tridenti remanentibus.*

Dum illa in Concilio: feliciter bellum Smalcaldicum Superiori anno cœptum, à Cæsare anno hoc confectum. Ubi enim Wirtenbergicus Princeps Cæsari se se submisit, ejus exemplum multis Imperii civitatibus

bus secutis ; supererat Saxonicus Elector cum Hassiæ Landgravio , victoriis , quas à Mauritio Patruale suo , omni ditione spoliato , retulerat , ferox. Quare in eum totus belli impetus à Cæsare conversus , non irritò eventu ; nam Albi fluvio prope per miraculum superato Carolus cum Ferdinando fratre , aliisque Catholicis Fridericum ad Lochanam sylvam prope Mülbergam affecutus , 8. Calendas Maji grandi novem horarum prælio fudit , vulneratúmque cæpit unà cum Ernesto Brunsvicensi. Lata post victoriam in Saxonem capitis sententia ; at vitam obtinuit Electore Brandenburgensi , & Clivienſe Duce pro affine deprecantibus. Exutus tamen est & Provinciis , & Electoratu , in Mauritium Saxonem Patrualem ex Albertina linea translatis. Landgravio Hassiæ certis sub conditionibus se Cæsari submittentem iidem cum Mauritio Saxone veniam obtinere. Retulit optimus Cæsar victoriam eam , quæ omnibus portentosa visa , uni Deo in acceptis , usurpatis illis Caji Cæsaris verbis , sed Christianè immutatis : *Veni , vidi ; sed Deum vicit.* Haud paulò post celebrata sunt ab armato Cæsare Augustæ comitia , quam in Urbem Smalcaldici fœderis præcipuam , triumphantis in morem Carolus ingressus erat ; resq; Catholica in illa restituta.

Sub hæc Pragæ vivis excessit ex partu Joannæ filiæ vita longiori dignissima , Anna Ferdinandi Romanorum Regis lectissima Conjux , quatuor filiorum , Maximiliani II. deinde Cæsaris , Ferdinandi , Joannis , & Caroli , ac undecim omnino filiarum fœcunda mater.

Cæterùm finem jam respiciebat annus , cum Universitatis nostræ nunquam non studiosus Ferdinandus Rex ad Nobilem ac Magnificum Virum Marcum Beck de Leopoldstorff Regiminis Austriæ Cancellarium literas 17. Novembris expedit , quibus peculiariter demandat , dilapsam prope Facultatem Theologicam contentione omni restitui ; in iisdem quoque Theologiæ Lectorem nominat Burchardum de Monte , qui nuper



nuper Concilio Tridenti interfuisset, natione Geldrium, assignatis ei in stipendium 150. florennis.

An. 1548.

**A**ugustanis in Comitibus Anno hoc procusa est Religionis formula viginti sex capitibus constans, quæ quod permixta esset à Cæsare, dum aliter in Universali Concilio definiretur, *Interim* appellata est. Causam ejus referunt, quod revocandæ Oecumenicæ Synodo iteratis Caroli cum in finem Legatis, Paulus III. Pontifex variis de causis à Cæsare aversus, sese præberet difficilem. Probata tamen formula illa nec Catholicis, nec Heterodoxis; his, quod nimium Pontificia, ut agebant, videretur: illis, quod & invito Pontifice esset publicata, & avitæ fidei contraria nonnulla contineret.

Eo ipso in Augustano conventu Ferdinandus Rex edoctus Austriacam, cæterarumque Provinciarum suarum Juventutem studiorum causâ passim in exteras Imperii Scholas non sine Viennensis Academiæ neglectu, Religionisque periculo dimitti, literas 5. Aprilis generales expedivit, quibus omnibus seriò quæ sæcularibus, quæ Ecclesiasticis suarum regionum subditis, & quidem sub pæna exilii, inhibet; ne quemquam suorum ad aliam, quàm duas ab Austriacis fundatas, Viennensem nempe, & Friburgensem in Brisgovia, ac ad Ingolstadtensem Academiam addiscendarum literarum ergo proficisci sinant. Inserta literarum forma *Codici Austriaco* extat.

Domi interim Electio Rectoris Magnifici nonnihil excitavit dissidii; nam cum in Festo SS. Martyrum Tiburtii, & Valeriani, ut Acta Facultatis Juridicæ insinuant, Rector Universitatis à Procuratoribus renunciatus esset Joannes Türnl J. U. Doctor, sed Facultati ejusdem necdum adlectus, acriter Juris Facultas ejus electioni se se opposuit: dum demum 24. Maii pacis, & concordie studio, factâ tamen, ne id in præjudicium

cium esset, prius protestatione, suffragiis electorum cessit.

Ad eundem annum hunc Chronicon Philosophicum memorat, bonarum Artium Laureâ insignitum esse *Georgium à Drascovich*, natione, ut Acta ajunt, Croatam; à quibus literarum honoribus subinde ad Cardinalatûs usque apicem gradum fecit. Nam eximiae virtutis, doctrinae; atque eloquentiae cum esset, sub Paulo IV. Quinque Ecclesiensis Episcopus creatus est: mox sub Pio IV. Orator Ferdinandi jam Caesaris ad Concilium Tridentinum profectus, luculentam anno 1562. in confessu Patrum Orationem habuit, qua Reipublicae Christianae tantis malis oppressae opportuna remedia adhiberi posse ex docto illo Patrum confessu omnium asseveratione confirmavit. In Patriam dein reversus, Zagrabiensis Antistes, mox Archi-Episcopus Colocensis; demum ad preces Rudolphi II. Imperatoris Presbyter Cardinalis renunciatur: priusquam tamen Cardinalitium Galerum suscepturus Romam veniret, subito prostratus morbo pridie Calendas Februarii anno 1587. Viennae vitâ excessit.

### An. 1549.

**P**ublicato optimi Principis mandato, nonnullâ alumnorum accessione Universitas augeri cæpit: Quibus ne præstantes deessent disciplinarum Magistri, ex Italia advocatus est Martinus Bondenarius Juris Consultus, subinde Universitatis Cancellarius, & Præpositus Viennensis, ac Ardeacensis: Andreas item Dadius seu Kieboin; Guilielmus Coturnosus, seu Quackelbein: & Joannes Ramus; omnes tres Lovanienſi ex Gymnasio; quorum operâ, & studio Philosophia Viennensis multum reſloruit. Ut porro Præceptoribus de stipendio prospiceretur, id ex ærario Facultatum persolvendum Austriæ Regentibus, & Cameræ Concilio visum: datæ cum in finem ad Facultates singulas

gulas à Regimine literæ , quibus & redituum tabulas, & paratæ in ærario pecuniæ summam postulabant. Tergiversari Facultates ad hæc, ac rationes suas, quàm exhausta miseris illis annis essent æraria , quàmque minimè conveniat Facultatibus Professorum fundatio, scripto referre : nec ulterius quidpiam eo in negotio agitatum , maximè quòd Ferdinandus Rex se Academiæ reditus aucturum significasset.

Ad eundem annum hunc Acta Philosophica memorant , portentosum sæminæ in quartum ferè annum uterum ferentis partum , quo decimâ Decembris soluta est. *Ex Serio* , inquiunt , *invictissimi Romanorum Regis Domini nostri Clementissimi mandato injunctum est Nobili , ac Magnifico J. U. Doctori Friderico Harrer Universitatis Reçtori , ut consilio communicato cum Dominis Consistorialibus , & Assessoribus suis , Margaretham , filiam cujusdam Wolffgangi Karbinger Civis Viennensis , sub juramento præstito inquireret de , & super gestatione fatûs per quadriennium ferè in utero , primò vivi , deinde emortui , & ejusdem per ventrem excisi , matre vivâ , & validâ permanente , & in integram sanitatem restitutâ , præsentibus Medicis Domino Doctore Joanne Enzianer , & Domino Mathia Cornax , qui scissuræ in ventrem matris factæ adfuere : cujus rei tanquam testes plenariam fidem sub juramento exhibuerunt : atque ita esse compertum est , ut historia descriptio per Mathiam Cornax facta , atque per picturam exhibita est.*

An. 1550.

**A** Nni hujus sexto Idus Februarii in Petri Sedem , quâ , & vitâ simul Paulus III. superiori anno quarto Idus Novembris cessit , Joannes Maria de Monte Cardinalis Prænestinus , assumpto Julii III. nomine , eveçtus est. Qui cum primus in Tridentina Synodo sub Paulo III. præses esset constitutus , juratûmque in Cardinalium Electorum Collegio foret , ut , qui Pontifex renunciaretur , Concilium Tridentinam in Ur-

M

bem

bem reduceret ; nihil post electionem antiquius habuit, quàm afflictæ tot sectarum turbis Germaniæ pacem reddere. Ergo ne in præjudicium Ecclesiæ Nationales Synodi, jussu Caroli per Germaniam celebrandæ, cederent, atque postulatis Cæsaris fieret satis, 18. Calendas Decembris hujus anni Constitutionem de reducendo Oecumenico, continuandoque Tridenti Concilio promulgat, ac diem primam Maii anni insequentis pro habenda rursus Sessione edicit.

Dum hæc Romæ pro Concilio ; Augustanis in Comitibus Carolus Philippum filium, quem superiori anno in Belgium advocatum secum Augustam deduxerat, Romanorum Regem renunciari adlaborat. Aderat & Maximilianus Ferdinandi Romanorum Regis Filius, ex Hispaniis, ubi biennio ante Mariam Caroli Patruis filiam duxerat, ad eadem Comitibus advolans : discussit itaque Cæsaris conatus, tum Ferdinandus Romanorum Rex, tum Imperii ordines, cum Juvenis utriusque præsentia ; ille, quod tametsi spem antea cessionis Carolo fecisset, aliis jam ageretur rationibus : isti, quod affectatam Europæ monarchiam suspicarentur ; hæc denique, quod Maximilianus indolis optimæ, & perhumanus ; Philippus vultuosus, & supra Germanorum mores fastuosus videretur.

## An. 1551.

**J**Acta sunt Anno hoc eorum bellorum semina, quæ per annos deinceps complures Germaniam, Italiam, Galliam, & Hungariam miserè involvebant, Lutheranâ Sectâ sub hoc armorum strepitu adeo prævalente, ut demum libertatem in Imperio nata sit. Belli porro Carolum Cæsarem inter, & Henricum II. Galliarum Regem causa fuit, Gallicum præsidium ab Octavio Farnesio Pauli III. nepote Parmæ receptum, rursusque Hispanum præsidium Gallorum ope à Senensibus ejectum. Traducta mox eadem arma in Belgium, & Lotharingiam, variisque Marte pugnatum ;  
nec

nec nisi anno 1559. post Caroli Cæsaris obitum, Philippum Hispaniarum inter & Henricum Galliae Regem pax coaluit. Hæc belli flamma & Germaniam corripuit; nam cum Protestantium Ordines: quorum Dux Mauritius Saxo nuper & novis ditionibus, & Electoratu à Cæsare auctus: ab Henrico sollicitati fædus, armæque cum eo pepigissent, eas suscepti belli rationes obtenderunt; servatas minimè factas Hassio sponsiones, sed protractam longiùs iusto ejus custodiam: ambitam dein Carolo Europæ Monarchiam: oppressam demum per vim conscientiarum libertatem. Occasio denique belli Turcici in Hungaria cæpti, ereptæ nuper ut Busbequius meminit, nonnullæ Turcis, tum bello Persico distentis, per Sclavoniam arces, & oppida; cædes item Georgii Martinusii Monachi, operâ Ferdinandi Regis ad Strigonienses Archi-Infulas, ac ad purpuram Cardinalitiam evecti; cujus causam, modumque Scriptores varii pro affectuum varietate prodidēte. Non abs re fecero, si, quod pervetusta Actorum Bursæ Rosæ manuscripta recensent, in medium attulerō.

*Monachus Georgius Joanni Regi in Hungariam intruso à Consiliis; post ejus mortem, ut Transylvaniam Hungariamque Joanni Sigismundo prioris filio retineret, partibus immaniissimi Tyranni adharere non erubuit: sed ut suspicione sibi per multos annos iniustâ liberari possit, Romanorum, Hungariæ, Bohemiæque Regi Ferdinando se totum obtulit. In cujus rei signum Regni Hungariæ coronam 3. Septembris Anno 1551. Viennam per Hungaros misit. At falsa omnino erat perfunctio hæc; non enim juvare, sed neci tradere Regem nostrum constituit; adeo, ut pactum jam fecerit certissimum inter se, & crudeles inimicos nostros, quod in proximo bello futuro ab ipso constituendo, Rex unâ cum toto fere exercitu in manus Turcicas essent tradendi; & literis ultrocitròque missis ad Turcarum Cæsarem hanc rem stabilem voluit. Interceptis tandem, hæc res latere diutius non potuit. Quare sic, ne summam calamitatem toti Europæ paritura es-*

*set, detecta est: Nam iisdem literis proditorem molientibus ab exercitûs Præsidibus in Hungaria ad Regem Pragam missis, mandabatur illis, ut tanto malo toti Christianitati nocituro præcaveretur; id quidem transactum est: Nam omnibus Monachi servis, & satellitibus opportunè absentibus summo manè Secretarius Regius, qui se daturum à Rege literas dixit, in conclavi suo proditorem pugione confodit; ceteri verò Regii Capitanei accurrentes ejus cranium diviserrunt, ac tandem obtruncârunt; & Cadaver sic inhumatum per longum tempus relictum est. Cædem hanc accepit die 17. Decembris Anno 1551. in proprio suoCastello Duinz, primum noviter in Transylvania edificato.*

Malè eam ob hominis, & Ecclesiastica, & Cardinalitia dignitate fulgentis cædem Ferdinandus audiit apud Julium Pontificem, à quo unà cum Authoribus Sacrorum communione interdictus. Agrè tandem sententiæ suspensionem obtinuit, donec claris probasset argumentis Georgium ob occulta cum Turcis pacta in se fuisse perfidum, & Transylvaniæ proditorem. Id cæso Georgio ab omnibus laudi datum, quamdiu is viveret, novæ doctrinæ sectatoribus in Transylvaniam omnem interclusam viam; quam ejus post obitum omnisSectarum colluvies factâ bellisTurcicis portâ irruebat.

Priusquam illæ bellorum flammæ prorumperent, datum initium Synodo à Julio III. Tridentum superiori anno revocatæ. Quæ ut accuratione omni inchoaretur, Cæsar dimisso Augustano conventu decretum edidit, quo cujuscunque Religionis Sectatores ad concilium invitat, sponsonemque securitatis facit. Et aderant jam ad præstitum diem, primam scilicet Maii, terni Legati Pontificii cum nonnullis Episcopis, Oratoribus, Patribûsque, à quibus die illo celebrata Sessio ordine XI. quæ prima est sub Julio; in qua Decretum de resumptione Concilii promulgatum. Ingruente subinde bello, de quo diximus, Gallico, Sessio futura in Septembrem dilata; cujus mensis primâ die

die Sessio XII., undecimâ deinde Octobris XIII., deniq;  
die vigesimâ quintâ Novembris XIV. sunt celebratæ.

Hæc dum extra Austriam; Viennæ ad D. Stephani  
publica supplicatio instituta fuerat, ad quam horâ an-  
temeridianâ sextâ, 24. Augusti Academici omnes ius-  
su Magnifici Rectoris Sigismundi Oeder comparuere:  
triplici illa ex causâ indicta; primò, verba actorum  
sunt: *Pro Ecclesiæ nostræ salute in Concilio Tridentino con-  
cludenda; 2dò pro felici, ac prospero Ferdinandi Regis succes-  
su contra Turcas; tertio ad agendas Deo gratias propter re-  
stitutam Transylvaniam.*

Interea restaurandæ rursus Universitatis, quæ  
etiamnum post plurimos optimi Principis conatus  
nondum in veterem vigorem restitui poterat, Ferdi-  
nandus seriam suscepit curam; igitur collecta per  
designatos Commissarios capita, septem distincta in  
Articulos, Rectori Magnifico, ejusque Consilio sunt ex-  
hibita: quorum in primo serenissimus Rex significat;  
se pro Universitatis incremento redditus annuos 930. fl.  
in telonio Ypsensi ad 2000. fl. adaucturum, eo tamen  
pacto, ut Universitas redditibus ex Bonis S. Udalrici in  
Nova Civitate cedat. In secundo annuit ex ærario  
Regio conferendos 400. fl. pro reparatione Domûs  
Goldperg, cæteris autem domorum, ac Collegii Du-  
calis restorationibus Universitas provideat. In tertio  
mandat, ut Universitatis Concilium perspiciat sedulò,  
in quibus Archigymnasium potissimum reformatione  
egeat. In quarto præcipit idoneos quosdam deputari  
Doctores, à quibus Summa quædam, & Compendium  
Catechismi, seu Doctrinæ Catholicæ, Grammaticæ  
item, Dialecticæ, & Rhetoricæ in scholis tradendæ  
conficiatur. In quinto postulat sibi denunciari, quos  
in Professoribus defectus emendandos notaverint, quis-  
ve Professorum numerus necessarius videatur. In  
sexto, quotnam in Bursis aliisque scholarium domibus  
alumni, Magistrisque accommodari. In septimo, qua  
ratione, quibusvis impensis sustentatio prædictis

Scholaribus suppeditari queat &c. Communicatâ per Facultates Principis mente, relatisque ad Academicum Concilium suffragiis, gratiæ Clementissimo Regi actæ, suâque Universitas super præfatos Articulos sententiam transmisit. At cum parum satisfaceret Principi, neque, ut petebatur, ritè responsum, ad tertium, quartum, quintum, & sextum Articulum esset, per eandem Deputatorum commissionem Universitatis Concilio injunctum, ut exactiùs responderent; Quod & præstitum, quemadmodum ipsis in Regiis literis Actorum Artisticorum libro insertis longiori ordine recensetur.

Iisdem in literis Universitati speciatim injunctum à Rege, Domum sibi denunciaret, in quam studiorum, Religionisque causâ vocatos Viennam Societatis Jesu Religiosos collocaret; rescripserat illa: sibi videri tantum superesse spatii in Monasterio Prædicatorum, quantum pro Collegio Societatis satis superque esset. Id tametsi Regi incommodum videretur, novâque ea super re peteret ab Universitate informationem, quia tamen Domus alia non occurrerat, in partem Monasterii prædicti eam tunc quidem collocari oportuit.

Quoniam verò ipsis in Actis Facultatis Artisticæ ad annum præsentem Societatis Jesu primùm Viennam adeuntis mentio injicitur, eaque non pars minima Universitatis subinde futura est, juverit causam occasionemque, cur Viennam accersita, ex ejusdem Societatis Collegii Viennensis Historia referre, quæ sic orditur:

\* Cum Serenissimus Romanorum Rex Ferdinandus Caroli Quinti Frater multis, & gravibus causis permotus de Collegio Societatis Jesu Viennæ, quæ Metropolis est Austriæ, instituendo, animum adjecisset, & anno 1550. Imperialia Comitia Augustæ celebrarentur; ubi tum fortè cum Augustano Cardinali aderat R. P. Claudius Jajus unus ex primis decem columnis Societatis, & instinctu, & operâ Reverendissimi

Do.



Domini Urbani Labacensis Episcopi ( qui Regiæ Majestati erat à Confessionibus ) introductus est ad Regem prædictus Pater , cum quo Rex multa conferens ab eodem ad propositum suum , ac desiderium prosequendum incensus , & confirmatus fuit. Vivebat tum temporis adhuc primus Societatis, Anno 1540. Auctoritate Apostolica approbatæ , Author , Admodum R. P. Ignatius Lojola Præpositus ejusdem Societatis Generalis : ad hunc Ferdinandus Rex literas dat , & cum eo per Legatum suum Romæ commorantem seridè agit , ut ex suis aliquot operarios ad expurgandam excolendamque Vineam Domini per Austriam ad se mittere ne gravetur , nullis se partituro sumptibus , quo bene illis sit , & prospiciatur. R. P. Ignatius , qui non modò Austriam, si qua ratione queat, converti cuperet , sed & orbem terrarum in Christi potestatem redigere , admodum cupidè in id, quod petebatur , consensit. Anno proinde 1551. Mense Aprili R. P. undecim Socios ex omni Patrum , & Fratrum suorum multitudine delegit , videlicet P. Nicolaum Lanoyum Belgam ; Erhardum , & Martinum Stevordianum Germanos ; Joannem Victoriæ , & Moraliū Hispanos ; Dominicum Menginum , & Nicolaum Gallos ; Brixium , Guilielmum , Angelum , & Suetonium Italum ; omnes in humanioribus literis non mediocriter versatos , quosdam verò etiam in altioribus disciplinis excellentes : ductu P. Nicolai Lanoyi Viennam proficisci jubet : Quò mense integro in peregrinatione consumpto ultimo die Maii , non sine Regis expectatione, feliciter pervenerunt. Inter reliquos autem Urbanus Labaci Antistes Sociorum adventu mirificè exhilaratus est , & perquam suaviter exceptos continuò per hospitia distribuit , vestes , & alia necessaria suppeditavit , ac cibum domi suæ interea, dum illis habitatio apud familiam Dominicanorum pararetur , omnibus præbuit. Actum est Regiæ Majestatis jussu cum Prædicatoribus , ut Socios suo in Monaste-

rio secum habitare dignarentur. Sic pars Monasterii cum Sacello, inculta quidem, & ruinosa, sed statim sumptibus Regiis utcunque restaurata, & ad Sociorum usum accommodata, assignata est, quam paucis post diebus ab adventu suo illi occupârunt. Per illam verò æstatem, & hyemem sequentem scholæ nullæ à Sociis apertæ sunt, sed occupationibus pietatis erga proximos diligenter vacatum. Ne verò omnino studia neglecta viderentur, post aliquot hebdomadas privatæ Lectiones, & quotidianæ Disputationes domi institutæ sunt. \*

Hucusque Historia: ut proinde haud iis assentiar, qui adventanti Viennam Societati, à Ferdinando primam sedem attributam ajunt domum illam, quæ hodie Divæ Annæ dicitur, & antehac Anno 1320. pro peregrinis fuerat extructa; ac subinde à Monialibus D. Claræ inhabitabatur. Nam etsi Domus illa Annæa, nonnullique dilapsæ Parthenonis reditus à Maximiliano II. Societatis Collegio assignatæ fuerint, priusquam tamen Domus illa à Ferdinando II. Anno 1626. Tyrocinii excitandi gratiâ traderetur, à Societatis hominibus inhabitata non est.

Sub exitum deinde Junii Augustâ ab Imperialibus Comitiis Viennam venit R. P. Claudius Jajus, comite Magistro P. Schorichio; moxque idem P. Claudius & à scientia Theologica, in qua Parisiis Doctor creatus erat, & à præclarè pro republica Christiana tum in Tridentino Concilio (cujus sub Paulo III. Sessioni quintæ, sextæ, & septimæ Procuratorio Augustani Cardinalis Ottonis Truchsessii nomine interfuit) gestis clarissimus, Theologiæ Professor à Ferdinando Rege in Viennensi Universitate constitutus, eandem prælegere cæpit. Auditusque fuit, ut Acta loquuntur, è Cathedra Theologica tanta eruditione, & sermonis gravitate, ut eruditos quosque in sui raperet admirationem.

Me-

Meminere quoque vetusta quædam Bursæ Rosæ MS. anni hujus principio, die nempe 7mâ Januarii Viennam allatum Illustris, ac Magnifici Herois Domini Nicolai Comitis à Salamis, & Neuburg, Regiæ Majestatis à Consiliis, & Velleris aurei Equitis, Exercitus per Hungariam Supremi Ducis, atque Comitatus Posonienfis Præfecti funus, idque in æde Sacra D. Dorotheæ sepultum; cujus in exequiis à M. Georgio Eder; decimâ deinde die in templo D. Stephani à Præcellente Wolffgango Lazio Medicinæ Doctore, de laudibus defuncti est peroratum.

Anno denique isto Domesticum jam Austriacæ pietatis exemplum renovatum; nam, ut laudata Bursæ Rosæ Acta docent: *In die Corporis Christi Illustrissimus Rex Ferdinandus unâ cum Filiis suis tunc præsentibus processionem solitam summâ devotione secutus est: Octiduo post similiter, ubi ex mandato Regio Rector, & Universitas processionem quoque secuti, quod tamen aliàs in more non fuit.*

An. 1552.

**D**Um Mense Aprili Gallicus exercitus (ut antea cum Mauritio conventum erat) Lotharingiam invasit, captis subinde, Imperii antehac Urbibus Virundo, Tullo, Metis; latens hactenus sub cineribus meditati per Mauritium Electorem Saxonem belli flamma, cujus causas superiori anno meminimus, erupit. Collectas primùm Protestantium copias (in belli fœdus Marchione Brandeburgico Alberto, & Guilielmo Hassiæ majore natu adscitis) Augustæ Vindelicorum admovet, quatuorque dierum spatiò obsessam deditioe capit. Lincium inde abiit paucorum in comitatu, cum Ferdinando Rege de pace acturus; verùm quod eam minùs è votis suis speraret, Cæsarem, qui ad bellum inopinum parum paratus in Tyrolim secesserat, cum exercitu insecutus, disjectis alpium præfidiis, captoque Ehrenbergæ munimento;

M 5

tan-

tantum terroris Carolo iniecit, ut cum Ferdinando, qui mediator pacis apud Augustum Fratrem nuper advenerat, fugam Villacum Carinthiæ iniret. Restitutus libertati Joannes Fridericus Saxo; sed profugum in Carinthiam Cæsarem sequi maluit. Vix Carolus abierat, cum Mauritius Oenipontum ingressus res omnes Imperatoris, Hispanorum, & Cardinalis Augustani diripit, Ferdinandi Regis, civiumque non læsis; Alberto interea Brandeburgico Franconiam, vicinasque Episcoporum ditiones depopulante. Pax tamen brevi post tempore, mensis scilicet Maii principio, Cæsarem inter, & Mauritium secuta, indignante Gallo, res Germaniæ nonnihil restituit, non item Religionis Catholicæ: Passaviensi enim in Conventu, qui perficiendæ pacis in mensem Augustum condictus erat, abolitum illud *Interim Religionis*, iudultumque Protestantibus, ut arbitrato suo viverent, dum lis omnis esset terminata.

Passaviensi icta pace, Cæsar Metas in Lotharingia obsidione cingit, eventu tamen irritò, ac ingenti suorum strage. Mauritius verò, ut eadem pace conventum, partem exercitus in Hungariam Ferdinando Regi auxiliarem ducit, at simul adversus Turcam res quoque parum prosperè cessit; insigni enim ab hoste ad Segedinum Christianorum miles clade affectus est: expugnatis inde à Barbaro Vesprimiensi Castro, Temeswarino, Lippâ, aliisque minoris nominis munimentis. Agria postremum hostis impetus cohibuit, à duobus Stephanis, Dobore nimirum, & Nesqueio Præfectis contra triginta quinque dierum acres assultus fortissime propugnata.

Dum bellum adhuc in Germania ferveret, Vienneam attigit Serenissimus Maximilianus Austriæ Archidux, nuper ex Hispaniis in Germaniam redux. Omni lætitiæ significatione & à Civibus, & ab Universitate est salutatus; quemadmodum Tabulæ Bursæ Rosæ in hæc verba annotarunt. *Divus Maximilianus Austria Archi-*

*Archidux, Ferdinandi Romanorum Regis Filius primogenitus, multis superatis periculis terra, marique, ex Hispaniis una cum Coniuge sua Regina Maria Imperatoris Caroli V. Filia, & liberis in Panonias feliciter, cum maximo totius Austriae gaudio, & melioris futuri statûs per hunc Heroem constituendi spe, revertitur, ac Viennam 7mâ Maii cum maximo totius Urbis applausu, lætitiâ, ac multis gaudiorum spectaculis, magnâ exterarum nationum, præcipuè Hispanorum, comitante catervâ ingreditur. Attulit secum Elephantem, Vienna necdum visum. Senatus, Populusq; Viennensis sui Principis congratulantes felicem reditum, munera eidem per pueros more militari instructos obtulerunt. Sequenti die Universitas nostra Principem excepit, Orante Domino Joanne Bapt. Pacheleb Juris Doctore, ac Consiliario Regio.*

Posteaquam anno hoc Ingolstadio advocâisset Ferdinandus Rex P. Petrum Canisium, & P. Nicolaum Gaudonum Societatis Jesu Religiosos, primum ad populum Conciones habere iussit; quod Canisius præclara sui commendatione in æde S. Jacobi, dein ad S. Hieronymi, & apud Prædicatores præstitit. Gaudono verò secundam Theologiæ Scholasticæ lectionem in Universitate contulit. Publicæ quoque primum Societatis Scholæ, erudiendæ politioribus literis juventuti ætatis initio apertæ, fructu subinde ingenti consecuto. Quamquam nec etiam jacerent severiora in Universitate studia; anno enim hoc quatuor ad primam Artium Lauream promoti, quos inter Joannes Cobenzlex Karsto, cujus subinde nominis, & nationis familia in supremas apud Cæsares excrevit dignitates.

Læta Societatis initia funestavit P. Claudii Jaii obitus, primi ex Societate in Universitate Viennensi Theologiæ Professoris, qui ipso Transfigurationis Festo fatiis cessit. Meminere illius Acta Bursæ Rosæ: Sexta die Augusti Claudius Jaius Artium, Sacraque Theologia Doctor, unus ex Jesuitarum, seu ex Societate Fraternitatis Christi contubernio, eorumque quasi Præfectus, & Parens à Deo

*Deo Optimo, quem indefinenter prædicare solebat, ad celestia Regna humanitus vocatur.* Funus, ut Historia Societatis tradit, ex Collegio, Prædicatorum Cœnobio juncto, ad D. Nicolai ædem, quam Franciscani de Observientia tunc incolebant, continenti pompa magnificè eductum; ubi in medio templi sepultus quiescit corpore, & spiritu vivit Deo. Ab ejus morte Theologiæ prælegendæ provincia ad P. Canisium est translata.

Jajum, Tridenti, ubi institutæ Synodo intererat, in æternitatem 6tâ Febr. præcessit Reverendissimus Fridericus Nausea Viennensis Antistes, non Urbis modò, sed & Universitatis, cujus membrum erat, ingenti luctu. Funus ejus Viennam delatum ad S. Stephanum conditur, ut ex citato Bursæ Rosæ Chronico discimus: 26tâ Febr: ait, *cadaver Reverendissimi in Christo Patris Friderici Nauseæ Episcopi Viennensis, J. U. & Theologiæ Doctõris præstantissimo ingenio, eruditione, & virtute, sapientiâ, & pietate præditi, & cum totius Civitatis maximo luctu ex Concilio Tridentinensi, ubi propter sinceri Verbi Dei maximam curam, & defensionem obiit, Viennam advectum, inque æde D. Stephani coram medio templi altari summis cum Ceremoniis est sepultum.* Visitur etiamnum eo in loco marmor cum sequenti inscriptione:

**D. Fridericus Nausea Episcopus Viennensis  
Anno M. D. C. L. II.**

Aliud infra Aram D. Catharinæ Virginis Protomartyris in ejusdem templi columna epitaphium eidem erectum post annos octo, è tabula lignea, in qua ejus effigies è pulpito sacro ad populum dicentis coloribus expressa; subjecta hac epigraphe:

Reverendissimo in Christo Patri, Domino Friderico Nauseæ. Episc. Vien. qui vitâ momentaneè Tridenti in Concilio defunctus, inde translatus, hîc sepultus est.

An-

**Antonius Mugliz Successor posuit. Anno Domini M. D. LX.**

Dominus ad iudicium veniet. *Esaiæ 3.*

Pœnitentiam agite. *Ezech. 18.*

Catholicum pavi populum sic Nausea verbo,  
Ut pax Ecclesiæ toto floreret in orbe;  
Pars ideo sum Concilii, majôrque Tridenti;  
Ossa Viennæ tenet sed Præsulis abdita chari.

Post mortem Friderici 13. subinde Febr. à Neostadiensi Ecclesia ad Viennensem Episcopatum evocatus est Christophorus Wertwein. Alsatæ Phorzheimensis, Theologiæ in Universitate nostra, Jurisque Canonici antehac Alumnus, & Ferdinando Regi à Conscientiæ Consiliis. Vir spei maximæ, nisi eum citius, quàm credebatur, invida fata eripuissent; altero siquidem ab inito Episcopatu anno, mense Aprili humanis est ereptus.

**An. 1553.**

**D**efunctus anno superiori Mauritius Saxonix Elector gesto quatuor menses bello Turcico, militem, copiasque suas in Saxoniam revocat adversus Albertum Brandeburgensem militaturus; quod nempe is transactioni Passaviensi subscribere nollet, & Germaniam hostilibus adhuc armis, Catholicorum maxime Episcoporum ditiones incurreret. Hunc igitur, ut ut amicum antea, & contra Carolum Cæsarem armorum socium, sancito cum Wilhelmo Hassiæ, Henrico Brunsvicensi, Ferdinando Rege, nonnullisque Imperii Episcopis fœdere, ex condicto undique bello aggrediuntur. Et Mauritius quidem ad Visurgim Alberto se objicit, prælioque congredi ausum fudit, splendideque potitus esset victoriâ, nisi læsi in prælio Mauritiij mors consecuta victoriæ gloriam funestâset. De quibus hæc Acta Bursæ Rosæ adnotârunt : *Nonâ Julii*

1553.

1553. inter Ducem Mauritium, & Marchionem Brandenburgensem non procul à Braunschweig prælium erat, in qua quidem conflictu, licet victoria penes Ducis Mauritiæ milites steterat, id tamen non absque miserrima magnorum virorum strage factum erat. Duo enim Filii Ducis de Braunschweig, Comes de Monsfeld, & complures alii strenuam manu contra Marchionem militantes, ejusque crudelissimam multarum Civitatum devastationem impedire, ac prohibere volentes in hoc prælio occubuerunt. Sed Dux Mauritius globò læsus tertio die post conflictum moritur. Accepta hac clade Albertus à Federatis, regionibus quoque suis exutus, in Galliam anno insequenti effugit. Hæc in Germania.

In Belgio, Italiæque Carolus Imperator vario hæc annis Marte depugnavit. Ferdinandus in Hungaria pacem à Turcis habuit, non item in Transylvania. Quæcti potiori ex parte potitus esset inito cum Turca fædere; anno tamen hoc 1553. totâ iterum excidit; Isabellâ inconstantis animæ sæminâ Solimani auxilia inclamante.

Secundiora omnia Universitatis res anno hoc habuere. Ferdinandus enim Rex, cum non nesciret, ea, quæ annis superioribus pro Universitatis incremento pluribus acta essent, grassante undique Viennæ Lutheranâ lue, & rei pecuniariæ penuriâ, nihil, aut parum admodum commodi afferre; Ipse, quemadmodum Georgius Edertus, qui præsens aderat, testamentum reliquit, reducendæ Universitati manum admovit; habitæque ad Provinciarum & Statuum Austriæ Procures (qui tum in Comitibus aderant) gravissima, disertissimaque oratione tantum effecit, ut in alendos 100. & plures pauperes studiosos, qui Artibus liberalibus, & præprimis Theologiæ hac in Academia operam darent, sumptus per quinquennium suppeditarent. Nec Senatus, Populusque Viennensis ærario publico pepercit; præterquam enim, quod 25. Scholares, aliis ingenio sagaciores, è suo alerent, Consilio etiam,



etiam, & patrocínio viri Optimi D. Sebastiani Huetstock moti, proprium illis Præceptorem, & Oeconomum in Bursa Rosæ præfecerunt.

Memorant eodem anno Acta Burſæ Roſæ triſtem Univerſitatis jaſturam Reverendiſſimi in Chriſto Patris Chriſtophori Wertwein Epifcopi Vienneniſis, nec non Sacræ Theologiæ Doctōris, & Ferdinando quondam Regi à concionibus ſimul, eleemoſynis, & confeſſionibus. Qui cū anno ſuperiori, ūt diximus, è Neoſtadienſi Sede ad Vienneniſem aſſumptus eſſet, anno hoc 20. Maii hora 6. matutina fatiſ urgentibus eandem deſeruit. Vacavit ab ejus obitu Epifcopaliſ Sedes, annos ſerè quinque, ad annum nempe 1558.

## An. 1554.

**I**Neunte hoc anno, dies iſ erat primus Januarii, Univerſitatis membra conceptæ ſecundo reformationiſ formulæ nomina ſua ſubſcripſère, quæ paucis dein inſequentibus diebus Ferdinandi Regiſ, Univerſitatiſ ſupremi Domini, & Patroni juſſu affixa publicè, & in Gymnaſii Aula cunctiſ audientibus prælecta eſt. Multa hac in Formula, quæ in ſuperiori prætermiſſa erant, aut temporum injuriâ antiquata, reſtituta ſunt; confirmata vetera Academiæ Privilegia, aucta Lectoribus ſtipendia, renovata alia, ac demum, quidquid Profeſſorum erat, Doctōrum, ac Baccalaureorum, Studioſorūmq; à communib; exactionum oneribus eximuntur, velut jam olim à primis Univerſitatiſ Fundatoribus, Auſtriæ Ducibus conſtitutum fuerat. Extant hæc ad verbum omnia in Univerſitatiſ Tabulario, quæ cū longiora ſint, hîc adduci haud oportuit.

Conſtitutiſ hunc in modum, tranſactiſque præclarè Univerſitatiſ rationibus, aliud, idque novum, in commodum Academiæ, à Rege emanavit Decretum, quo & Lectorum numeruſ, & ſtipendiorum ratio definiēbatur. Habetur ejus Decreti exemplum in per-vetuiſto Tabularii Univerſitatiſ MS. hiſ verbis : Sa-

Gra-

cratissima Romanorum, Hungaria, Bobemia Regia Majestas, Dominus Noster Clementissimus, publicata nuper reformatione Academia sua Viennensis, cupiens proinde eidem de optimis quibusque Professoribus prospicere, subsequentes unà cum stipendiis cuiusvis deputatis nominandos, & designandos censuit, prout clementer nominat, & designat. Non ea quidem ratione, ut plures assumere non liceat, vel ut jam nunc constituta stipendia perpetua esse debeant, sed quod successu temporis exigente necessitate, seu publica suadente utilitate plures etiam Professores per Rectorem, Consistorium, & Superintendentem Regium conducere, stipendia denique pro qualitate, eruditione, & diligentia Professorum, arariiue publici conditione per eosdem semper vel augeri, vel minui, moderariue queant.

Atque ne stipendiorum, quæ Lectoribus constituebantur, solvendorum difficultas sese objiceret, Rex ipse voluit, ut æs omne, & proventus Universitatis apud se elocarentur, pro quibus duplicatum se redditurum censum benignissimè promisit: sic enim ulterius Decretum loquitur: *Quum etiam Universitatis proventus, qui exceptis bonis S. Nicolai summam duorum millium quingentorum octuaginta, & unius floreni excedere dicuntur, unà cum fructibus beneficiorum Universitatis arario jam jam incorporatorum, pauciores sint, quàm ut solvendis præscriptis stipendiis, aliisque necessariis oneribus, & expensis ad Academiam spectantibus perferendis sufficiant: Quamobrem Sacra Majestas pro uberiore Regiæ suæ munificentia significatione clementer annuit, tam pecuniam in arario publico restantem, quàm etiam eam, quæ ex venditione bonorum S. Nicolai Universitati cedit, ad manus suas recipere, ac pro singulis centenis, quinos, & totidem ex singulari liberalitatis gratia Academia annuatim persolvere, adeoque eandem justis desuper inscriptionibus, cautionibus, & assignationibus clementer se curare velle.*

Denique: ut memoratum itidem Decretum prosequitur: *Cum Sacra Regia Majestas in Scriptura sua reformatoria Statutorum hujus Universitatis, seu Academiæ suæ*

*sua Viennensis ipsi Reſtori, & Conſiſtorio nuper exhibita clementer ſeſe obtulerit, gravem aliquem, & maturum virum, qui & pietate, & eruditione ſimul, atque authoritate polleat, & ad quem nullum tali ex officio commodum, aut incommodum redire queat, deputaturum, ut nomine, & loco Regiæ ſuæ Majeſtatis huius celeberrimi Archi-Gymnaſii Conſervatorem, Proteſſorem, ſeu Superintendentem agat. Ideo Regia ejus Majeſtas hanc curam Conſiliario, & Cancellario ſuo Patriarum inferioris Aſtriæ, Domino Alberto Widmanſtetter J. U. Doct. demandandam, committendamque duxit, ad quem, rebus ita poſtulantibus, Reſtor una cum Conſiſtorio ſuo deinceps recurrere poſſit, ac debeat. Neque enim dubitat Majeſtas ſua Regia, quin idem ille Cancellarius ſuus ad omnia, quæ ad ipſius Univerſitatis honorem, commodum, & incrementum pertinebunt, ſedulo ſemper, attentoque animo invigilaturus ſit.*

Illud adhuc annus hic memoriâ dignum habet, quod J E S U Societatem anno hoc nondum finito Rex Sereniſſimus Ferdinandus, poſtquam integro ſerè triennio in Prædicatorum Cœnobii parte penè neglecta latitaſſet, ad Carmelitarum Monasterium incolendum tranſire jufferit. Quo autem modo Domus illa, & Templum authoritate & Summi Pontificis, & Auguſti Regis Patribus Societatis Jeſu conceſſa ſint, totidem verbis ex Actis enarramus.

\* Eſt in ea urbis parte, quæ Occidentem ſpectat, haud procul à Scotorum Cœnobio, Monasterium, nec ſitu, nec magnitudine ulli Civitatis templo, poſt D. Stephani Fanum, ſecundum, D. Virginis à Rudolpho IV. circa A. Domini 1360. honoribus exædificatum; eo ipſo ſcilicet in loco, ubi antehac veterum Marchionum Aſtriæ Aula fuit, ut proin etiamnum non Domus modò illa Religioſa, ſed vicina Area (*Auff dem Hoff*) nominetur. Monasterium illud jam inde ab initio Sacræ Carmelitarum Familiæ, quæ & hominum multitudine, & doctrinæ opinione, & ſanctitatis famâ incredibili tunc florebat, traditum, rebuſque omnibus

optimè instructum fuit. Verùm temporum decursu Monasterii status deterius habere, sensimq; dilabi, ac fluere, cùmque rebus ipsis etiam numerus Religiosorum diminui cœpit, maximè posterioribus hisce præterlapsis annis grassante per Austriam non minùs, quàm Germaniam, Lutheri dogmate: quo tandem eò devenit, ut ex tanta antehac Religiosorum copia annis hisce unò plùs superfuerit nemo, & is ipse, ut postea compertum, non Monachus, sed Presbyter sæcularis, Carmelitæ vestitu indutus; ne scilicet Monasterium omnino desertum videretur. Quo factum est, ut neque Sacra, neque Officia Divina, neque obsequia animarum more veteri haberentur, Ecclesia ipsa profanaretur, & Monasterium à non paucis sæcularibus inhabitaretur. Ea res, cùm per Judices ad Regis aures pervenisset, graviter molestèque factum tulit; confestimque ejus Religionis Provinciali denunciat: non ita Monasterii fortunas, Divinæque officia in eo se negligi velle; Monachos, quot ad Ecclesiæ officium satùs esse videbuntur, aliunde procuret: Monasterium instauret, & restituat; id nisi intra triennium ritè curatum fuerit, sua se potestate usurum esse, neque commissurum, ut sacer locus, quem Majores sui Divino cultui dedicassent, per solitudinem religiosæ familiæ profanaretur. Movebant hæc Provinciales; sed consilio misera illa tempora obstitère. dum cum Religione Catholica in Austriâ æquè, ac Germaniâ ferè totâ, Religiosa Instituta profitentium numerus deficiebat. Quamobrem, cùm nihil horum, quæ Rex postulabat, neque tunc, neque deinceps dictus Provincialis procurare posset, tandem anno hoc 1554. sub finem Maii, Societatis JESU Religiosos in desertum à prioribus incolis Monasterium Ferdinandus succedere voluit, traditionem subinde in perpetuùm cum consensu Summi Pontificis confirmante. Sæculares incolæ, qui tum Monasterium inhabitabant, è vestigio excedere jussi; Presbyter ille sub Carmelitæ vestitu Pareciæ Weisbergenû, haud

haud procul Corneoburgo, præfectus : Monasterium ipsum, ubi à Societatis hominibus est aditum, apertum omnino, incompositum, ruinosum, & ita profanatum, ut vel in ipso templo fœnum reponeretur, & in Monasterio horreum fieret, & armamentarium; suppellex domestica alicujus momenti nulla; templi vero modica, & vetus; scilicet præter cupreum calicem, & aliquot Confraternitatum sacras vestes, nonnullaq; altarium monumenta in Sacrario repertum est nihil. Ædificium ipsum Monasterii iis solùm muris, & cubiculis definiebatur, quæ hodie dum domesticam Domûs Professæ aream respiciunt. Reliqua domûs pars à Societatis hominibus subinde est constructa. \*

Vix Monasterii hujus possessionem adiêrat Societas; erant statim, qui & Convictûs alicujus juvenibus instituendis initium urgerent. Atque omnium primus quatuor filiorum parens filios suos offerebat. Quartâ igitur Julii quaterni hi fratres Convictorum primitiæ admissi sunt: Quibus & aliis dein, atque aliis accedentibus ædícula prope communem Collegii portam habitanda concessa est. Datus eis Præfectus è Societate aliquis, qui moribus juvenum invigilaret, & studiis.

An. 1555.

**E**Ditâ eâ Universitatis reformatione Caput nonnihil Academia erigere cæpit. Auctis nempe Doctorum pensionibus suis cuiq; Facultati insignis Professor præerat, qui dum prælegendis literis solertem dant operam, auditores undique, & benè multi è Nobilitate etiam confluerunt. Et Theologiæ quidem Studiosos (ut regia stipendiorum assignatio testatur) instituebant Leonardus Villinus Canonicus ad D. Stephani, qui Scripturam Sacram explanavit. Petrus dein Canisius, & Nicolaus Lanoyus uterque è Societate JESU, Theologiam Scholasticam professi sunt; quorum primo 170; duobus reliquis singulis 140. fl. sti-

pendium est designatum. Juridica è Facultate D. Laurentius Kirchamer jus Ecclesiasticum exposuit ; in Jus Civile R. D. Martinus Bondenarius , Præpositus simul ad D. Stephani, & Universitatis Cancellarius primo loco ; secundo verò Dominus Stephanus Haubtman commentatus est : Institutiones Imperiales elucidandi provincia Domino Sigismundo Oedero delata ; primo 170. alteri ob plurima quoque Regia obsequia 300 ; duobus postremis singulis 100. fl. pensio obvenit. Medicinæ Aphorismos tres Professores tradidère ; primus D. Franciscus Emericus , alter D. Wolffgangus Lazius , tertius denique Joannes Schrotterus ; Illi 150 , horum cuivis 120. fl. ex ærario soluti. Ex Artium Facultate Grammaticæ leges docuit M. Laurentius Zadesius , Dialectices M. Georgius Muschlerus , Rhetoricæ M. Nicolaus Polites : Physicam Professus est M. Guilielmus Coturnosius ; Logicam M. Andreas Dadius ; datum singulis minerval 80. fl. Mathesi verò tradendæ terni insudabant , Bartholomæus Reifacher , Paulus Fabricius , & Georgius Joachimus Rheticus , constituto eorum primo 80, alteri 100. fl. salario. D. Casparus Pirpach Ethicam legit ; M. Lucas Guttenfelder , alio nomine Agathopedius , literis politioribus , seu Poësi discipulos instituit. Hebræam D. Andreas Blancus ; D. Petrus Raymundus , cum D. Guilielmo Postello Græcam profitebantur , quorum posterior Arabicæ simul Linguae jussus est præcepta tradere ; unde cum cæteris his singulis 100. fl. postremo ob duplicatos labores 200. quoque florenorum stipendium est persolutum.

Dum ea in Universitate ; suis interea in scholis , quas tunc privatas adhuc , & Archigymnasio nondum unitas habebant , minimè segnem promovendæ rei literariæ contulère operam Societatis Magistri ; nimirum jam tum numerosa juvenus tam humanioribus literis , quàm virtute ab illis excolebatur. Susceperant quoque sub id tempus , cupiente ita , & deprecante Reverendissimo Labacensium Episcopo , Religiosi hi

viri

viri Aurei Montis Præfecturam, cujus maximè administratione P. Lanoyus distinebatur, nec cessabat, ut ædificium huic rei destinatum incrementum sumeret, urgere. Et sanè tantum indefessa contentione profecit, ut amplum quoddam juvenibus cubiculum accederet. Ineunte dein Autumno à Societatis Magistris *Comædia Euripi*, magno spectatorum assensu, & applausu sub dio acta fuit; atque hoc Viennæ omnium primùm spectaculum literarium erat.

Tam lætis literariæ rei progressionibus, Religio quoque Catholica Viennenses inter Alumnos egregiè promota est. Ferdinandus enim Rex cùm videret, Fidei clementia, & à Sectatoribus perperam Juventuti præpostera ex Lutheri interpretatione instillari, & passim à plebe ignorari; anno jam 1551. Theologis dederat in mandatis, ut Doctrinæ Catholicæ Summam aliquam, seu Catechismum per nonnullos Facultatis suæ concinnatum vulgarent, non studiosis modò Adolescentibus, sed omnis fortis hominibus ediscendum. Sed cùm tardaret opus hoc Facultas, id Patri Petro Canisio à Societate JESU Facultatis ejusdem Doctori superiori anno curandum dedit: qui manum operi admoventis brevi post tempore opusculum perfecit, & anno hoc 1555. Viennæ primùm in lucem edidit Catechismum illum, qui non à Scholis modò Viennensibus, sed ferè omnibus Academiis Europæ magno rei Catholicæ emolumento susceptus, & deinceps per Orbem omnem tanquam purissimus Catholicæ Religionis succus dispersus est.

Interea, quòd cæptum nuper Tridenti Concilium differretur, ac Germania tota Religionis diffidio miserè æstualet, Augustæ Comitia à Ferdinando Rege Augusti Cæsaris nomine à mense Februario usque in Septembrem continuata sunt. Cohortatus est optimus Princeps Imperii Ordines ad unitatem Fidei, & concordiam; at post disceptationes plurimas eis tandem subscripsit Decretis, quæ pacis restituendæ causâ iisdem

in Comitiiis sunt confecta, editaque habentur apud *Palatium*.

Dum hæc in Comitiiis Augustanis geruntur, ad primam usque Aprilis adhuc ad clavum Ecclesiæ federat Julius III. quo deinde die vitam obiit. In cujus locum ingenti orbis approbatione electus est Pontifex verè optimus Marcellus II. à quo maxima quæque cùm Europa expectaret, ostensus tantùm, non concessus, inexpectato fato iterum sublatus est post 20. dierum summum in Orbem imperium. Huic à congregatis adhucdum Patribus mox subrogatus Joannes Paulus Caraffa, qui Paulus IV. dici voluit. Vir is erat octogenarius, & à rigore non minùs in suos, Clericùmque percelebris, quàm bellis contra Hispanos in Neapolitano gestis nominatissimus. Primus fuit, qui impiorum librorum Indicem per Inquisitores texi jussit, quorum lectionem editâ speciali Bullâ, & anathemate intento interdixit.

Carolus verò Cæsar ferventibus his bellorum in Belgio, Italiâque turbis, rerum humanarum pertæsus, ut ultimam ætatis jam provectæ partem uni daret Deo, & melioribus salutis negotiis vacare posset, evocato in Belgium filio ( qui tunc in Anglia aberat, Mariam Reginam matrimonio sibi juncturus ) in eundem 8. Cal. Novembris cum Belgicis Provinciis Hispanam quoque Monarchiam transtulit. Imperii dein coronam Ferdinando Fratri concedere in propositis habens, ad eundem Oeniponti commorantem Legatos destinavit, qui propositi sui certiores facerent: Quibus transactis quinquennales insuper belli inducias Henricum inter Galliæ Regem, & Philippum Filium conciliat. Atque sic anno demum insequenti è Belgio Hispaniam petiit in Monasterium S. Justi secessurus, ubi piæ, tranquillæque vitæ vacaret, qui Orbem antehac armis devicerat.



**B**ellum, quod rursus hoc tempore Turca Hungariæ intulit, Ferdinandum continuit, quo minùs Carolum Fratrem extremum salutaturus in Belgium properaret. Solimanus enim, qui potiori jam Hungariæ parti dominabatur, ut totum Regnum Imperio suo adjiceret, numerosissimo exercitu Sigethum urbem expugnaturus circumfudit. Hunc ut rejiceret Ferdinandus, subsidia undique, & militem postulabat. Sed adeo perversa Lutherano ex dogmate tunc erant tempora, ut non solum acatholici Imperii Ordines, sed vel ipsi Austriæ Status, qui in Provinciali Viennæ conventu collecti aderant, belli subsidium omne denegarent, nisi liberrimum Religionis Lutheranae exercitium publicè omnibus permetteretur. Offensus his Ferdinandus, Princeps, si quisquam alius, maximè Catholicus, subsidio carere maluit, quàm in tam iniqua postulata consentire. Ære igitur, unde unde tandem corraso, exercitum in Hungaria sustinuit, fortitèrque defendente Sigethum Marco Horvatho, eò Turcarum Ducem Halim Bassa compulit, ut soluta trium mensium obsidione, nec sine multorum millium jactura Copias mutilatas reduceret. Quamvis non diu hæc lætitia tenuerit: Cum enim Isabella quiescere non posset, & Provinciales Austriæ Heterodoxi à Ferdinando secessionem fecissent, Transylvania rursus tota in Turcarum potestatem venit. Coaluere tamen anno hoc armorum induciæ cum Turca.

Hoc metu solutus Ferdinandus, exeunte jam anno ad convocata Ratisbonæ Comitia profectus est. Multa illuc iterum de Religione, multa de sua in Imperio successione agitata sunt. Nihil tamen ampliùs his in Comitiiis de Religione confectum, quàm, ut mense Augusto anni 1557. Wormatiæ colloquium haberetur, in quo duodeni utrimque seligerentur, ea adjuncta conditione: *Ut hi conferrent, haberentque consilium de modo*

*concordiæ, ac postea ad se referrent, qui decreturus erat, quod opportunum foret de Religione. Videbatur nempe id Colloquium ad pacem plurimum facturum, quando Oecumenica Synodus eo rerum statu nec Catholicis, nec hæreticis probabatur: maximè cum abruptis à Galliæ Rege, Pontifici Paulo confœderato, induciis, in Belgio arma rursus circumferrentur.*

### An. 1557.

**I**Nitium igitur Augusto Mense datum est Colloquium Wormatiensi, cui Ferdinandi loco præsidebat Julius Pflugius Episcopus Naumburgensis, incontaminatus veræ Religionis cultor. Huc pariter sese annuente Pontifice rogatu Ferdinandi conferre iussi, Patres Petrus Canisius, & Nicolaus Goudanus (hunc enim alterum quoque Colloquio interfuisse Historia Societatis Viennensis apertè meminit) Societatis Jesu Religiosi nec non Theologiæ Doctores, qui tunc Romam reduces Germaniam repetebant; cæteros utraque ex parte Collocutores diffusius enumerat Spondanus. Eò præprimis Catholicorum conatus contendebat; ut, cum tot Cæsareis Comitiorum Edictis omnes Sectæ proscriptæ essent, præter eas, quæ Religionem Catholicam veterem, & Confessionem Augustanam profiterentur, ante omnia unanimes convenirent in reliquis improbandis. Cui consilio 5. ex Collocutoribus Sectariorum consenserunt, 7. repugnantibus: quo illud effectum, ut dum Sectarii invicem altercarentur, Conventus sit dissolutus. Hoc autem Colloquium, ut Spondanus meminit, cum habitum esset citra Pauli Pontificis indultam expressè licentiam; multum exinde Papa in Ferdinandum, haud parum aliunde ab Austriacis aversus, indignationis cæpit, quam anno insequenti clariùs patefecit.

### An. 1558.

**N**on unam ob causam Universitati nostræ memorandus hic annus est; sub cujus initia Ferdinandus I.

dus I. Imperii Ordinum approbatione, & maximo omnium plausu Romanorum Imperator proclamatus est. Carolus verò V. Ferdinandi Frater sub ejusdem Anni exitum vivendi finē fecit. Hic enim, ubi iteratò congregatis cum Ferdinando Francofurti ad Mœnum Electoribus Imperii abdicationem per Legatos offerret, 6to Calendas Martias (qui ipse D. Mathiæ Sacer, & nunquam non Carolo faustus erat) eandem tandem adferunt, habitisque deliberationibus pridie Idūs Martii Imperialem dignitatem, & Coronam in præsentem Ferdinandum solemni Ceremonia transulere annum tunc 55. agentem. Qui ut suam erga Sedem Apostolicam observantiam testaretur, Electionis suæ Nuncium Martinum Gusmanum ad Paulum IV. ablegavit. At Pontifex, suæ, ut ait Spondanus, dignitatis studiosissimus, non modò Ferdinandi Legatum non admisit ad sese, sed electionem omnino rejecit, & ut Imperio renunciaret, quamdiu vixit, institit.

Multa erant, ob quæ Successionem Ferdinandi in Imperio Pontifex censebat irritam : cum enim Imperatores Occidentis, eorūque Electores ab Apostolica Sede essent instituti, & jus penès Sedem Apostolicam remansisset, ne quis ejus absque annutu potiretur Imperii Coronā; videbatur ei neque Caroli renunciatio, neque Ferdinandi subrogatio absque interventu Pontificiæ Authoritatis esse legitima. Fuisse quidem, aiebat, Ferdinandum assensu Sedis Apostolicæ jam, electum Romanorum Regem; sed inde id solū illi juris obvenisse, ut demortuo Cæsari succederet; aliò omni in vacationis eventu nova Pontificis comprobatione opus esse. Accederet, subrogationem illam Francofurti suffragiis quoque A catholicorum Electorum, qui omni auctoritate excidissent, factam : ideòque mittendum esse à Ferdinando Procuratorem, qui omnibus Francofurti actis renunciaret, remque omnem Pontificis arbitrio permetteret, qui electionem eam confirmaret.

At plura adhuc erant, quæ Pontificem in Ferdinando offendebant. Primò, quòd in digressu è Ratisbonensi Conventu illa, quæ jam aliàs Sectariis concessa erant, iterum authoritate, & præsentia suâ iisdem confirmata sint. Deinde, quòd executioni dare tergiversaretur illa, quæ à Pontifice in eos statuta erant, qui in Austria sub utraque specie communicarent. Tertio denique quòd Maximilianum Filium A catholicis magna parte Ministris educandum permisit, passimque in aulam admitterentur. Dilatæ quidem partim, partim excusatæ Pontificiæ rationes non à Gulmano Legato duntaxat, qui privatus Romæ subsisterat, sed quoque à Joanne Groppero Cardinali; pro Ferdinandi Electionis confirmatione Philippo Hispaniarum Rege, & Republica Veneta per Oratores suos item intercedentibus. At sententiâ suâ dimoveri Paulus non potuit, nec quidem nuncio de morte Caroli Cæsaris paucis post mensibus percepto.

Ferdinandus tamen Imperatorem se gerens Francofurto Viennam appulsus est feliciter; Ubi ab Academia summo honore exceptus, datûsque in lucem honori Principis inscriptus Liber *Triumphus Triplex*. Qui conatus literarius adeo Principi Augustissimo probabatur, ut non paucos, qui in exornando ipsius Triumpho fuissent studiosi, nobilitatis insigniis donârit, ipsique Academiæ confirmârit Privilegium jam olim à Maximiliano concessum, Poëtas Laureatos creandi, edito hac super confirmatione 10. Septembris Diplomate, cui immutata Maximiliani concessio inserta fuit. Quo ex Privilegio Henricus primûm Eckardus 4. Nonas Julii, duobus ante confirmatum Privilegium mensibus; die deinde 15. Septembris Elias Corvinus, Joannes Lauterbachius, & Vitus Jacobæus, post exquisitissimum Collegii Poëtici examen in celeberrima Principum, Legatorum, & totius Academiæ frequentia per Paulum Fabricium Cæsareum Mathematicum, & Facultatis Poëticiæ Collegam in aula Univer-

versitatis tanta celebritate creati sunt Pœtæ Laureatî, ut infra hominum memoriam nihil ferè magnificentius fuerit visum.

Nec diu post hæc Carolus V. Gloriosissimus, & Victoriosissimus Princeps supremum vitæ diem egit 21. Septembris, ipsâ D. Mathæi festâ Luce, postquàm penè biennio in Monasterio S. Justi privatus sibi & Deo vixisset, & annum ætatis suæ quinquagesimum octavum (ipso enim sæculari anno 1500. die D. Mathiæ Apostoli, Gandavi in Belgio natus erat) attigisset. Princeps erat, non Austriacæ solùm gentis, sed Orbis terrarum decus, & perfecti Principis exemplar, ruentis Reipublicæ, & Religionis invictum columnen, qui Victoriis suis Europam, Africamque illustravit. Nec oblita est hîc Academia nostræ officii sui: sed meritorum memor, & Augustissimæ Austriacorum Familiæ honoribus deditissima anno sequenti 3tiâ Januarii eidem Carolo parentavit. Dicta quoque ab ipso Rectore Magnifico Panegyris funebris, quæ postea typis data lucem aspexit. Mortem Caroli duarum ejusdem Sororum funera exceperunt, ut Acta nostræ memorant: Quibus & tertia accessit Maria Angliæ Regina, Philippi II. Hispaniarum Regis Conjux, & Caroli V. Nurus, ut ex iisdem Annalibus discimus: *In festo D. Matthæi Apostoli in Christo obiit Carolus V. Imperator Romanorum semper Augustus, de Republica optimè meritus, à re militari felix, pius in Patriam; & omnibus virtutibus insignis, qui Deo vivat. Paulò post etiam mortua est Soror sua Eleonora Regina Gallia. Itidem Maria quoque Soror Regina Hungaria, Ludovici Regis piæ memoriæ; ac Maria Regina Angliæ Philippi Filii sui Uxor. Quibus bene sit.*

Quod Universitatem attinet, strenuè in id incubuit hoc tempore, ut secundùm habitæ nuper reformationis Leges omnia agerentur, & quæ ad Academiæ decorem, incrementumque facerent, providerentur. Quapropter Bursarum præprimis, & Contuberniorum  
visi-

visitatio habita est, & lectionum publicarum modus, ratioque disquisita. Hac in visitatione Bursarum licet Philosophica Facultas, ad quam tamen ple- ræque Bursæ, Bursarumque Provisores pertinebant, esset præterita, neque reclamans exaudiretur; de- dit nihilominus operam, ut hac occasione caveretur; *ne pro libitu à Professoribus* (sic Acta nostra loquuntur) *Lectiones Philosophicæ haberentur, aut à Discipulis excipe- rentur, sed, ut triennio minimum, veluti reformationis acta jusserunt, Philosophia Auditoribus prælegeretur.* Co- gitatum item hoc anno de renovanda Ducali Gymna- siii Aula, in quam rem Facultas Artium, cujus antea hæc Aula fuerat, sumptus liberaliter suppeditavit, qui non tantum reparandæ, sed & ornandæ Aulæ suffi- cerent.

Nam cum jam sæpius in deliberationem venisset ea res, an, & quibus potissimum imaginibus exornan- da esset Aula, anno tandem sequenti à *Facultate Artium de picturis in Aula Universitatis ab inclyta Facultate Artium statutum, ut illæ fierent Facultatis sumptibus; & pingeren- tur Principes Austriaci, & Antiquiores Philosophi, Conra- dus Celtes, & alii ex Fundatoribus præcipui.* Denique Disputationum, & Lectionum de Quodlibeto usus jam multis annis intermissus non tam revocatus est, quam in declamandi consuetudinem conversus.

Habuit & illud annus hic, uti & proximè infecu- turus, peculiare in Universitate nostra, quod tertium, quartumque, multis nominibus clarissimum Virum Georgium Eder Juris Utriusque Doctorem, & Con- siliarium Cæsareum, Rectorem Magnificum, nunquam positus tanti muneris insignibus, nacta sit. Nam po- steaquam superiori anno 1557. in æstivis comitiis Rectoris Magnifici honor ab Academia, Facultatis Theologicæ nomine (è qua tum Rector petendus erat) Edero tanquam Canonum Doctori delatus esset; ei- dem anno præsentem non modò à Juridico Collegio hæc digni-

dignitas confirmata est, sed & in annum sequentem, cum Inclyta Facultas Medica in ejus favorem juri suo pro hac vice renunciasset, prorogata fuit. Quod idem officium Facultas Philosophica, inaudito exemplo, postea eidem quartò detulit. De quibus Acta Philosophica sic adscripserunt: *Georgius Eder J. U. Doctor Cæsareæ Majestatis Consiliarius, quater continuò electus est in Rectorem Universitatis: in tribus superioribus Facultatibus, Theologica, Juridica, Medica; & anno sequenti in Philosophica, propter singularem prudentiam, industriam, & diligentiam, quam in causa seu controversia Privilegiorum Universitatis defendenda indefesso studio, & multis scriptis laboribus exhibuit. De re literaria, & tota Universitate optimè meritis, nec non summa laude dignus; tantum enim in causa & controversia Privilegiorum effecit, quantum multis retro elapsis annis ullus præstare poterat.*

Cum anno hoc exeunte desinit quoque Magnifici hujus Viri Georgii Ederi *Catalogus Universitatis*, quem magno labore, & studio conscripsit, typisque dein datus fuit. Quo in Catalogo præter Rectorum, & Illustrium Archigymnasii nostri Virorum seriem, summa etiam capita earum rerum complexus est, quæ memoratu digna cujusque Magistratûs tempore in celeberrima hac Academia contigerunt. Adjecit quoque Syl-  
labo suo Codicillum, historicum nempe Universitatis nostræ Sîstema, seu *Descriptionem totius Academiae Viennensis Generalem in quinque libros dispersitam*, cujus quidem Descriptionis summa tantum capita, & titulos adducit: Historiæ tamen diffusius corpus, quod meditabatur, aut non absolvit, aut in manuscriptis adhuc delitescit ineditum. Meminit quoque in Descriptionis suæ prolegomenis conceptam à se Universitatis historiam juxta designatos à se titulos sermone ligato concinnatam à Vito Jacobæo Pœta Laureato; sed nec istud Poëtices opusculum, fortasse manuscriptum tantum, ut ut investiganti, conspiciere adhuc dum datum est.

Inva.

In vacantem jam in annum quintum Episcopalis Viennensis Ecclesiæ Sedem, quam fatis cedens Reverendissimus Dominus Christophorus Wertwein prius occupaverat, anno demum hoc Reverendissimus Antistes Dominus Antonius Mngliz (ita enim ex Universitatis Actis Ederus cum Lazio colligit adversum eorum opinionem, qui Antonium eodem, quo Christophorus obiit, anno Antistitem Viennæ datum proderunt) collocatus est. Hic in Universitate nostra literis Adolefcens excultus est; supremus deinde & Generalis Dominorum Crucigerorum cum Rubea Stella per Poloniam, Moraviam, & Bohemiam Magister effectus. Quo in honoris gradu cum strenuus fidei & Religionis assertor audiret, à Ferdinando I. Cæsare, ad Viennensem Insulam evocatus est. Sacram hanc dignitatem adeunti optimo Præsuli Alexander Liebhardt Juris Consultus Academiæ nomine oratione disertagratulatur. Præfuit indefessus Ecclesiæ suæ Pastor quadriennio ea commendatione, ut Anno 1562. ab Episcopali ad Archi-Episcopalis honoris gradum Pragæ eveheretur. Inde, ut dicemus deinceps, Ferdinandi Cæsaris nomine Concilio Tridentino Orator adesse jussus est: cui etiam posthac, usque dum terminaretur, interfuit. Redux è Concilio Pragensem rexit Metropolim sursum cum laude ad annum usque 1580. quo meritis, & annis gravis vivere desiit.

Non eximie solum defuncti Reverendissimi Christophori Virtutes, sed propria Scientiarum & Pietatis merita ad Præpositi Viennensis, Cancellarii que dignitatem anno hoc extulere Clarissimum, ac Admodum Reverendum Matthiam Wertwein SS. Theologiæ Doctorem, & Canonicum ad D. Stephani: ut proinde is ab erecta in Cathedralem Ecclesia D. Protomartyris numeretur Octavus.

Ad hunc demum annum spectat Decretum à Ferdinando Cæsare emanatum, quo Lectio Theologiæ Scholasticæ Societatis Collegio, è quo bini Societatis

Docto-



Doctores eandem profitebantur, in perpetuum adjudicata, confirmatâque est, stipendio Lectoribus statuto in futuræ foundationis partem computato.

An. 1559.

**F**uneſtavit hunc annum obitus ſupremi Eccleſiæ Capituli Pauli IV. Pontificis maximi, qui Spondano teſte 15. Calendas Septembris, ætatis 83. Pontificatûs quarto, ſupremam diem clauſit, ejus ſeveritate in furorem actô populo ipſo Romano, qui ad ejus mortis nuncium Inquiſitionis Carceres populatus, Statuam marmoream Pauli, capite, dextrâque priûs truncatam, triduo per Urbem raptavit, inde in Tyberim conjectam. Subrogatus in ſupremam in terris dignitatem Pius ejus nominis IV. quem poſt longas in Conclavi diſſenſiones unanimi tandem ſuffragio ipſa Natalis Chriſti die Pontificiâ Mitrâ dignum Cardinales cenſuerunt; è nobiliſſima Is, & antiquiſſima Mediceorum Familia erat, nomine Joannes Angelus Mediceus, Vir annis jam gravis; nam ſeptuaginta ſerè ſuperaverat. Qui in Ferdinandum longè Paulo IV. pronior, haud diu à ſua in Pontificem aſſumptione Cæſareos eidem titulos, tam conſtanter, tamque pertinaci conſilio à Paulo Anteceſſore denegatos, approbavit; admiſitque publicè primùm Oratorem Cæſareum Franciſcum Turrianum, qui novam dignitatem Cæſaris nomine Novo Pontifici gratularetur, non ſine inſigni laude, & de ſapientia Pontificis concepta æſtimatione. Nec omiſit Ferdinandus Cæſar iſdem literis Concilii Oecumenici, jam aliquot annos diſſipati, revocationem urgere. Quod quantum ponderis habuerit apud Pontificem, ſequens annus docebit.

Porrexit quoque anno præſenti Universitas Cæſari libellum ſupplicem, quo ſtudioſiſſimè (veluti Hiſtoria Collegii Societatis Viennæ annotavit) contendit, ut Societatis Scholæ ac Studia, quæ indies majora ſumebant incrementa, Rectoris Magnifici poteſtati permitte-

mitterentur. Postulationi huic Excelsum Regimen paucis satisfecit: nolle se novi quidquam, quod cum Societatis Jesu Instituto pugnaret, ejusque libertati adversaretur, constituere; sinerentur igitur, quemadmodum ante constitutum fuerat, dum iisdem duarum lectionum locus in Universitate concessus fuisset, duo illi Societatis Professores, cæteri item suis in domesticis scholis absque omni Instituti sui perturbatione liberè docere.

**An. 1560.**

**M**otus Pontifex Pius IV. tum Imperatoris, Hispaniarumque Regis precibus, tum suo erga avitam Religionem studio, nihil prius habuit, quam ut turbatae tot, in Germania praecipuè, hæresibus Ecclesiae per Concilii Tridentini revocationem succurreret. Anno igitur ab electione sua primo, qui 1560. erat, 3. Calendas Decembris Bullam de celebrando rursus anno sequenti 1561. Concilio ipso die Paschatis, Romæ primùm solenniter publicari jussit, tum ad cæteras omnes, quarum intererat, Regiones transmitti. Habendis autem Concilii hujus Sessionibus mirum quantum contulit, (ut Bulla ipsa meminit) Pax, quæ inter Philippum Hispaniæ, & Henricum III. Galliarum Reges Anno superiori 1559. coaluit.

Et sanè perquam necessarium, & fermè unicū restituendæ Religioni veteri, & Quietì publicæ medium videbatur Concilii Oecumenici revocatio: præterquam enim quod Galliam, Sueciam, Daniæ, Angliam, & plerasque alias Regiones sui errores dilacerarent, unam solamque Germaniam propè innumeræ hæreses, errorumque velut colluvies aliqua inundabat. Ipsum quoque Lutheranum dogma in tot secum ipsis pugnantibus opinionibus scindebatur, ut tot Evangelia, seu Sectas numerares, quot Novatorum capita. Volitabant passim ea in Regione Lutherani, Calvinistæ, Zwingliani, Anabaptistæ, Westphalici, Molles, Wiclef.

Wicleffistæ, Schwenckfeldiani, Davidici, Quintinistæ, Ubiquistæ, Stancariani, Bezavitani, Servetiani, Musculani, Osiandrini, Antischwenckfeldiani, Sturmiani, Adiaphoristæ, Antilutherani, Heshusiani, Majoristici, Illyricani, Antitrinitarii, Polygamistæ, Puritani, Intermistæ, Confessionistæ, & sexcenta ejusmodi nominum, & errorum monstra audiebantur. Concilii publicationem insecutum est universale Jubilæum hoc anno Romæ celebrandum, dein in longingua differendum. Quod ut ritè inchoaret, ipse Pius Pontifex ex Ecclesia S. Petri solennem Supplicationem nudipes eduxit ad Beatam Virginem **MARIAM** super Minervam.

An. 1561.

**C**onstitutus erat hic annus aperiendo iterum Concilio Tridentino; quod tametsi Reges plerique cum Imperatore petiissent, non leves tamen de eo cogendo subortæ difficultates; à Ferdinando quidem illæ obmovebantur, quas Pallavicinus recenset; ne scilicet Concilium Tridentinam, sed aliam in Urbem convocaretur; neque continuari illud, sed de novo cæptum dicatur; pronior quoque Germanorum in id ut esset animus, severitas Canonum mitigaretur, ac Populo Usus Calicis, Clero Conjugium indulgeretur. Ad hæc Legati Pontificii ad Aulam primum Cæsaris Viennam missi, tum ejus adhortatione, cum Pontificis authoritate Germaniæ Ordines Acatholicos, Daniam item, & Sueciam obibant, eosdem ad Concilium inflexuri; quo fiebat, ut tametsi missi à Pontifice Tridentum Præsides adessent tempori in Bulla præstituto; quia tamen Tridentina in Urbe non nisi 9. Episcopos collectos invenissent, tempus Synodo habendæ prorogatum iterum est in annum alterum.

Universitati nostræ anno isto id obtigit commodi, quod Declaratio Privilegiorum, & Jurisdictionis, de quibus inter Universitatem, & Magistrum Civium

controvertebatur, perscripta fuerit; eaque utrique parti prælecta publicè pacem conciliavit. Ablata demum etiam est Administratio Bonorum Ducalis Collegii tum Priori ejusdem, tum Collegiatis, quæ ad Principem iterum devoluta est. Cujus rei plures extant Commissiones in Libro Decretorum Universitatis, & Priori quidem Anno 1562. Sessio data est in Consistorio, sed infimo loco.

### An. 1562.

**A**Nnus hic tandem cum sui principio Synodo Tridentinæ initium dedit. 18. Siquidem Januarii hujus anni sublatâ, quæ hætenus tenuerat, Suspensione Concilii, prima collectorum in Spiritu S. Patrum iterum Sessio, quæ ordine XVII. habita est: Adventante sub Januarii finem Antonio Muglizio Archiepiscopo Pragensi, qui Cæsareo; & Georgio Drascovio, qui Regio Hungariæ nomine, à Ferdinando (uterque in Universitate nostra quondam literariis honoribus exculti) missi erant. Excepti honorificè à Patribus, & admissi sunt. Habitæ subinde anno hoc adhuc quinque varios inter rerum eventus Sessiones; XVIII. scilicet cæpta 26tâ Februarii: XIX. die 14tâ Maii. XX. die 4tâ Junii. XXI. die 16tâ Julii. XXII. die 17mâ Septembris.

Sub his nihil omiserat Cæsar cum Bavarix Duce, quo per Legatos suos Tridenti Usus Calicis, & Sacerdotum Connubium pro potestati suæ subjectis Regionibus à Patribus Congregatis impetrarent; illum enim & Laici sitiebant avidissimè, istud verò non pauci per Austriacas quoque Provincias Sacerdotes jam contrahere; utrumque, Religiosissimis cæterum, Cæsari, ac Bavarix Duci opportunissimum medium videbatur, quo & Catholici sua in Religione conservarentur, & hæterodoxi avitæ Fidei rursus accederent. Remissius actum de Conjugio, & haud paulò post à petitione ea desitum: non item de Usu Calicis; quem in finem volumen Ferdinandi nomine conscriptum Concilio oblatum,

tum, & per Muglizium, atque Drascovitium instantissimè Cæsaris postulatio est commendata. Pertractata illa sunt pluribus in Congregationibus Sessionis sub Pio Quintæ, quæ ordine erat XXI. multâ contentione, & sententiarum varietate; quatuordecim enim Patrum differri determinationem voluere; triginta octo rejecerunt petitionem; viginti novem assensu sunt: viginti quatuor causam totam ad Pontificem rejecere: quorum posteriorum est sententia tandem decretum, & causa de Ufu Calicis à Concilio Romam ad Pontificem est devoluta.

Dum Tridenti ea aguntur; Ferdinandus Cæsar, ut Regna sua, & Provincias stabiliret, & fortunis, ac securitate augeret, ætate præterea grandior, Filium suum Maximilianum indubium sui successorem subditis daturus, eundem hoc anno 20mâ Septembris Bohemorum primùm Regem inaugurari procurat; & indictis dein Francofordiæ ad Mœnum Electorum Comitibus, Rex quoque Romanorum à Septemviris unanimi calculo 30mâ Novembris est pronunciatus. Cujus sacro demum Vertici anno altero 1563. 8vâ Septembris Ungarica quoque Corona accessit: Quod præter Albertum II. ad ea usque tempora contigit nemini, ut anni unius spatio trium Regnorum Coronas auferret. Nec defuit Universitas, quin tanto Principi promerito applauderet. Mandatum igitur Collegio Poëtico à Rectore Magnifico, ut Neoelectum Bohemorum, Romanorūque Regem Maximilianum, ac totam Austriacam Prosapiam, ut Acta scribunt, Panegyricis Eloquiis, Trophæisque exornent.

Translato præterea à Viennensi Cathedra ad Pragensem Archi-Episcopatum Antonio Muglizio, in ejus locum anno labente Viennensis Administrator designatus est Urbanus Gurcensis Præsul, qui præter Ecclesiam suam Viennensem quoque usurpavit ad annum usque 1574. charus adeo Austriacis Principibus, ut Ferdinandus I. æquè ac Maximilianus II.

Imperatores sibi eum à Consiliis habere , Palatinique Comitatus munus gerere voluerint. Carolus verò Archidux, & Austriæ Interioris Dominus in intimum Consilium adlectum, è pulpito quoque Ecclesiasten Aulicum non sine approbatione audièrit.

### An. 1563.

**H**abitæ anno hoc Sessiones tres à Patribus Tridenti Congregatis ordine nempe XXIII. XXIV. & XXV. ; primæ initium factum 15tâ Julii, secundæ 11mâ Novembris; tertiæ 3tiâ Decembris; à qua finis consensu Patrum Concilio feliciter impositus, consue- tas Lotharingo Cardinale acclamationes præeunte: Cujus Decretis à 256. Patribus est subscriptum. Atque ita Concilium Tridentinum Auspiciis Pii IV. Romani Pontificis, adnitente potissimum & operâ Ferdinandi Cæsaris Principis Austriaci Optimi, ingenti bonorum omnium gaudio, & Ecclesiæ emolumento est terminatum; atque annis proximis per Provincias Austriacas, Catholicamque Germaniam Oraculi instar, quod ad Dogmata attinet, est receptum.

Et quamvis non is hoc in Concilio Universitati nostræ per tot bellorum dispendia, & grassante per Austriam Lutherana Sectâ propè dilapsæ splendor fuerit, ac fama, quæ in superioribus illis Conciliis Basileæ, & Constantiæ collectis; neque ullus in hoc Ecclesiæ Theatro se Academiæ hujus nomine ostenderit Theologus; gloriari nihilominus potest non uno Viro, eoque celeberrimo, qui Concilio huic sub tribus Pontificibus Paulo III. Julio III. & Pio IV. interfuerunt, quos aliquando aut in Scholis instituit, aut Laureis ornavit, aut inter membra denique Universitatis numeravit. Claudio scilicet Jajo è Societate Jesu sub Paulo III. qui primus ex eadem Societate Viennensi in Universitate Theologiam prælegit: Friderico Nausea Episcopo Viennensi sub Julio III. Antonio Muglizio Viennensi antehac Antistite, dein Archi-Episcopo Pragensi

genſi ſub Pio IV. Cæſarei Oratoris munus in Concilio ſuſtinentē, & Georgio Drascovitio Quinque Eccleſienſi Epifcopo, Oratoris item munus pro Ferdinando Hungariæ Rege obeunte.

Domi noſtræ interea cūm Inclyta Artium Facultas jam ab aliquot annis ſæpius in Rectoris Electione præteriretur, & anno etiam præſente negligeretur, id indignè ferens, Decretum à Maximiliano Rege (aberat tunc Ferdinandus Oeniponti ad congreſſum Theologorum, quorum primi erant P. Petrus Caniſius è Societate JESU, & Fridericus Staſilus Reginæ Romanorum à Confeſſionibus, à ſe inſtitutum ad expediendas nonnullas à Concilii Patribus propoſitas quæſtiones) impetravit, quo cavebatur: ne, ſi dignum tanto muneris Virum inter membra ſua cenſeret, poſthac prætereatur. Quare Ncoelectus Rector Georgius Walther J. U. D. & Linguae Græcæ Profeſſor, veluti incongruè electus, officio juſſus eſt cedere; & juxta Univerſitatis Statuta, Decretumque Regium Philoſophorum tum temporis Decanus, M. Georgius Muſchlerus in Rectorem eligitur. Extat hoc idem Maximiliani Decretum Poſonii 26. Octob. datum in Actis Univerſitatis.

Aliud item Rectori Magnifico, & Conſistorio anno hoc Cæſaris nomine ab excelſo Regimine Mandatum conſignatum eſſe Acta Univerſitatis notant; ut viam nempe, rationesque ineant, quæ Facultas Theologica ad paucos jam redacta, & penè emortua, in integrum queat reſtitui. Id ut curaretur diligentius, Rector cum Conſistorio negotium Juriſdicæ Facultatis Decano Wolſſgango Pudlero, & M. Laurentio Zadeſio Artium Doctori, ac ad D. Stephanum Canonico detulerunt: qui ſi quid in dictæ Facultatis commodum excogitaſſent, ad Conſistorium referrent.

Crevit deinde Univerſitas anno hoc ære non modico, quod ex divenditis S. Nicolai Bonis collegit, 4000. circiter florenorum; quam pecuniæ ſummam

apud se elocari voluit Augustissimus Cæsar Ferdinandus, cum aliis 1000. fl. pro quibus duplicatum Universitati censum liberaliter promisit, 10. pro centum. Atque ne in levandis censibus difficultatem pateretur Universitas, duos fundos assignavit, das Saltz-Ambt, nempe, è quo pro 4000. florenis; & Telonium in Stain, unde pro residuo censum peterent. Addidit & syngrapham obligatoriam, cujus copia extat in MS. decretorum libro Universitatis, cui se Jacobus Oechsl Notarius in hanc formam subscripsit: *Auscultiert, col- lacionirt, und mit sôndern Fleis übersehen ist gegenwärtige Copey durch mich Jacob Oechsl, sonst Taurellus genannt, verheyrather Glerickh Straßburger Bistumb von Schlesstadt außs den Elsas, Comitem Palatinum Apostolicum, Rôm: Kayf: Majestât Rath, und Zaigs-Commissarium bey der Niederösterr: Regierung außs Pabstlicher, und Rômischer Kayf: und Rôn: Maj: Volkbomenheit offnen, und geschwor- nen Notarium.* Quid porro circa pensiones à Mona- steriis stabilitatem professis ærario Universitatis conse- rendas, quarum annis hisce nonnullæ sunt persolu- tæ, ulterius constitutum, commodiùs sequenti sæ- culo referetur.

## An. 1564.

**C**lauso, ut superiori anno meminimus, Concilio Oecumenico, & speciali Bullâ à Pio IV. appro- bato, Ferdinandus Cæsarj facultatem Usûs Calicis, quem cum Alberto Baviaræ Duce non semel, nec re- misse pro Provinciis suis in Synodo Tridentina urse- rat, at ab eadem ad Pontificem rejectus erat, tandem iteratis precibus (quod usum illum non parum redu- cendis Sectariis, ut diximus, conservandisque Ca- tholicis profuturum crederet) certis sub conditionibus anno hoc impetravit. Nihil moratus igitur Cæsar, promulgari publicè tribus è Cathedris hanc Calicis con- cessionem Viennæ jubet, in S. Stephani nempe, S. Mi- chaelis, & Collegii Societatis Ecclesia; jussu Impe- rato.



ratoris priorum duorum templorum Præsides lubentes fecere ; una Societas facere detrectavit. Quæ res illi magnam apud Principem , cæterum additissimum,offensam conciliavit. Atque eò majorem, quòd non lateret Cæsarem, ejusdem Societatis JESU potissimos fuisse, Jacobum Lainez scilicet Generalem, & Alphonsum Salmeronem, qui dicto postulato Cæsaris in Tridentino adversati sint. Lenivère nonnihil Ferdinandi indignationem Societatis Patres, ubi novis Româ à Præsidibus literis instructi Concessionem illam demum promulgârunt. Excepta in principio non in Austria modò, sed & Viennæ facultas illa magno jubilo, & gratulatione, imò & fructu nonnullo ; cum Delphinus Pontificis Legatus Romam haud paulò post rescriberet, teste Pallavicino, jam duas tertias hæreticorum partes Viennæ ad frugem redactas. Verùm Usus hic haud multo tempore progressus, post mortem Cæsaris sensim & incommodis suis, & dedoctione eorum, quorum operâ vetus Religio refloruit, desit.

Interea in Universitate nostra multùm laborabatur, ut, quemadmodum anno superiori notavimus, secundùm Excelli Regiminis Decretum, Facultas Theologica, quæ penè jacebat, exurgeret, incrementumq; acciperet ; E Clero enim tum paucissimi Viennæ Theologicos Gradus ambiebant, quòd Lutheri ex doctrinâ Matrimonia potius sequerentur ; Quatuor autem Religiosis Mendicantium Ordinum è familiis, quibus ab Universitatis prope Origine jus ad Facultatem Theologicam aspirandi fuit, plerique dilabebantur. Cum igitur & anno hoc laudatæ Facultati tantæ dignitatis vir deesset, qui Rectoris munere dignus censeretur, habitis mense Aprili Die SS. MM. Tiburtii, & Valeriani more veteri comitiis, tres Nationum Procuratores in Rectorem elegerunt A. R. ac Glarissimum D. Laurentium Zadesium Magistrum in Artibus, & Cathedralis ad S. Stephanum Ecclesiæ Canonicum, Nationis

tunc Austriacæ Procuratorem. A cujus electione reliquo toto anno Procuratoris officium vacabat.

Majo subsequenti consuetâ formâ convocata sunt omnia, & singula Universitatis tam superioris, quàm inferioris Ordinis membra, quibus à Consistorio imperatum: operam darent, ut solemni Processioni Corporis Christi cuncti interessent, in qua velatum sub speciebus Numen publicè, & magnâ pompâ circumducitur, nisi statutam irremissibiliter pœnam incurrere velint. Multos jam annos siquidem is Deo debitus honor intermissus erat, & vel nulli, vel pauci omnino ex Academicis hanc solennitatem prosequerentur. Advocati potissimum sunt in Consistorium Bursarum Provisores, stipendiarii, & inquilini, quibus præ reliquis, id ut præstarent, demandatum.

Adeò scilicet Lutheranum dogma Viennæ grassans veterem Austriacorum pietatem extinxerat; ex quo & illud consequebatur, quod tametsi superioribus annis Universitas ingenti Ferdinandi Cæsaris curâ in cæteris esset restaurata, tanta tamen Magistrorum æquè, ac literarios gradus petentium esset paucitas, ut penè emortua videretur. Cujus rei causam in id nonnulli fors Orthodoxi quidem, sed laxatæ tamen (ut maligna tunc tempora erant) conscientiæ homines conferebant: *Quid, qui ad gradus promoveri cuperent, ad emittendam Catholicæ Religionis professionem severe nimium adigerentur, atque inde & à scholis, & ab honorum petitione absterrerent.* Re hac ad Maximilianum II. (qui demortuo, ut mox dicemus, Patri Ferdinando ante menses jam duos successerat) delatâ, condescendi nonnihil posse ratus, ad Universitatem 5. Septembris subjunctum Decretum transmisit:

*Sacra Cæsarea Majestas, Dominus noster Clementissimus audita difficultate, quæ in promovendis hoc in Viennensi Archigymnasio Doctoribus injicitur, circa professionem Catholicæ, & Romanæ Religionis ab ipsis exigitam; mandat, atque de cætero inviolabiliter observandum decernit, ut deinceps*

*ceps in quacunque demum studiorum graviorum Facultate, Doctoratus, aliorumque dignitatum Insignia suscepturus, si sese Catholicos esse, & cum S. Matre Ecclesia Catholica communicare professi fuerint, ad Romana insuper Ecclesie fidem speciatim profitendam minimè adstringantur. Quod ita sese velle Cæs. Sua Maj. manu sua subscriptâ, sigillò Cæsareo hîc appressio attestatur. Decretum Vienna Austriae 5. die mensis Septembris An. 1564.*

Non adeo diu tamen tenuit hæc Cæsaris Constitutio, quin non mox sequentibus annis aboleretur. Cùm enim anno hoc eodem Idibus Novembris Pius IV. P. M. è Concilii Tridentini mente Bullam emisisset, quæ incipit : *In sacrosancta D. Petri Principis Apostolorum Cathedra*, Qua promovendi omnes, nullo excepto, ad scientiarum Gradus, earumque Professores, ad emittendam Fidei Catholicæ professionem adstringuntur, sic volente ipso Maximiliano Cæsare, ex præscripto Bullæ agi cæptum est, atque, ut clarè in Actis Theologicis ad annum 1568. lego, Theologiæ Baccalaurei prædicto anno secundum formulam à Pio IV. dictatam professionem fidei fecêre. Atque hac ratione demum heterodoxis aditus ad Universitatem interclusus est.

Occurrit rursum hoc anno sub Autumnum altera Rectoris Magnifici electio, die D. Colomano festâ haberi solita, in qua è Facultate Medica Clarissimus Vir Andreas Dadius Artium & Medicinæ Doctor, Rector nominatus est; quanquam ex Facultate Juridica Rector Universitatis ex ordine dandus fuisset; sed ea ultroneè juri suo cessit eo consilio, ut usitata eligendi Rectoris ratio, quæ aliquamdiu inversa fuit, in pristinum electionis Ordinem reduceretur. Consilium hoc Maximilianus approbavit, atque ne ullo posthac tempore ab hoc ordine discederetur, seriò, & in perpetuum mandavit, dato eam in rem Mandato publico.

Priusquam illa 12. Novembris à Maximiliano statuerentur, jam diem supremam omnium dolore, & luctu

Iuſtu obiit 25. Julii tabe catharrali conſumptus, Fer-  
 dinandus I. Romanorum Imperator Optimus, Hunga-  
 riæ, Bohemiæque Rex, Hiſpaniarum Infans, Auftriæ  
 Archidux, & quod ad rem noſtram eſt, Univerſitatis  
 Vienneniſis Fundator alter, aut certè Reſtaurator. Ei  
 enim uni in acceptis debet Univerſitas, quòd tot bello-  
 rum turbis non ſit dilacerata, atque tanta Lutherani  
 dogmatis invaſione, ſtudioſorùmque contemptu non ſit  
 penitus extinſta. Binà eam reformatione renovavit,  
 ornavit, novis auxit privilegiis, & ære. Profeſſores  
 Catholicos aliunde accitos dedit, ſtipendia ampliavit,  
 ſtudioſis denique omnibus divulgato per Provincias  
 ſuas ſcripto ſummam pollicitus clementiam, & digni-  
 tates, quibus non tantùm ad literas, ſed & Fidem Or-  
 thodoxam juventutem provocavit. Literatos ſibi vi-  
 ros ſemper adſcivit; adſcitos ad intima conſilia, &  
 utriusque Reipubl. honores extulit: cujus ex ore ea  
 præclariffima, & magno Imperatore digna vox non ſe-  
 mel audiebatur: *Minoris ſe gemmarum, & theſaurorum*  
*copiam facere, quàm ſcientiarum.* Forti ad bellum pe-  
 ctore princeps, & generoſo; quamvis minùs fortuna-  
 tus. Religionis præterea avitæ propugnator conſtan-  
 tiſſimus, cujus tuendæ, augendæque cauſâ nullos in  
 Imperio detrectavit labores, indiſtis toties, tótque lo-  
 cis Comitiiſ; etſi Sectariis nonnulla iis in Conventibus  
 ſubſcriberet, ad quæ non mente ſua, ſed ut turbato  
 Germaniæ Statu præ majori malo minus eligeret, erat  
 compulſus. Nulli certè deerat indiſtriæ ad regiones  
 ſibi ſubjectas illæſas à communi tum Germaniæ mor-  
 bo, ſectarum nempe dogmatibus, ſervandas. Concilii  
 Tridentini, Sedisque Apoſtolicæ ſtudioſiſſimus, adeo  
 ut hæc cum experta ſit egregium obſequioſiſſimos in-  
 ter Cæſares, qui unquam in Germania imperârunt; at-  
 que illi potiſſimum acceptam referre poſſit immen-  
 ſam utilitatem, quam attulit Eccleſiæ Synodus Tri-  
 dentina. Et certè non niſi ob nimium Religionis ze-  
 lum correptum morbo religioſiſſimum principem pa-  
 lam

lām scribere non dubitavit Pallavicinus: *Audiens enim, inquit, magna detrimenta, quæ ex Lutheri hæresi patiebatur Christiana Respublica, in febrim incidit; hoc prodigioso morbo demonstrans se pio quodam vitali calore vivere, qui solito acrius circa cor ardens febrim hanc pietatis attulerit.* Persoluta sunt iuxta Optimo Principi non ab Universitate modò, sed quoque à Societatis JESU scholis; Romæ etiam Defuncto insueti planè in Basilica Vaticana honores à Pontifice Pio, Cardinaliúmque Collegio habiti sunt. Cum cujus igitur obitu Sæculum Alterum Conspectûs Historiæ Universitatis Viennensis explicit.

F I N I S.



**H**Abes hifce, Academice Lector, Alt.  
rum Sæculum Hiftoriæ Viennenfis Univerfitatis: Cujus Sæculum ab Origine fua primum ubi Bienio abhinc lucem afpexerat, ea mox exceptum eft Academicorum approbatione, ut Continuationem ejufdem non modò peroptarent, fed etiam urgerent. Nec deerat Primo Operis hujus Authori animus, nec ftudium, quo eorum defiderio obfecundaret; nifi eidem Mutatio loci opportunitatem ademiffet. Imposito igitur mihi ex Majorum imperio Continuandi operis labore num Votis eorum factum fit fatiſ, nescio; id compertum, me Conatibus non defuiſſe, quibus & ad Univerſitatis Commendationem, & ad Cæpti Operis formam Conſpectum iſthunc pottexerem. Id ſi minùs ex judicio tuo ſum aſſecutus; memineris, laborem paucorum Menſium Spatio præter quotidianas Philoſophiæ prælectiones fuiſſe perficiendum. Cæterum omiſſa oportuit non pauca, quæ ad Hiftoriam facerent, quando Documenta eorum annorum bene multa in Tabulario Univerſitatis injuriâ temporis perivêre, Facultatum autem Acta non ſemel neglectâ manu conſcripta. Prætermiſſa præterea ſunt, Decreta varia, Reformationum Formulæ, Conſiſtoriales Cauſæ, privatæ Facultatum Controverſiæ, ac Statuta, Literariæ promotiones, & quam plura alia hujus generis; tum quòd non juſtos Annales, ſed Conſpectum ſcribamus; cùm quod ſingulis adferendis vires pecuniariæ eſſent impares. Denique Hiftoriam Auſtriacorum Principum continuatâ ferè annorum ſerie immiſcuimus; ſeu quòd illa non parum ex Academicis Actis lucis accipiat, ſeu quòd iſta gratiam, prætiùmque ſui ab illa mutuent. Si Conatibus hiſce faueas, fors erit, ut anno ſequenti finem operi imponamus.





8725





